


臨城縣志

序 凡例 目錄
圖 卷一

內閣文庫			
番號	漢	14433	
冊數		6 (1)	
函號	史	163	1

書
史部
一四三六號
全三六號



重修臨城縣志叙

余嘗攝篆臨城知邑有高士喬百一先生者明大中丞壁星之孫贈太常少卿恭肅公冢嗣硜硜守介節意所不可未嘗依向以徇人余造訪因得締交其為人爽直不阿余甚重之壬戌冬余友宋君澄溪來爲令余復介澄溪交於百一

時百一已耄澄溪甫壯樂與爲忘年交
以古道相敦勗余自柏鄉解組後常往
來於臨城我三人者時相聚也澄溪與
余言以邑無志乘爲慊百一遂身任之
蓋臨邑舊志原出喬中丞公手恭肅公
復作邑志補而百一於邑中事物當記
者皆筆而藏之余喜其志之必有成成

之必有可觀昔漢司馬子長班孟堅唐
之姚思廉皆父子相繼而成一代之信
史今雖邑志乎中丞恭肅振于前而百
一繼之宜其無遺漏而可觀也乃未幾
澄溪丁外艱歸百一能卒成其書以致
澄溪可謂有始終者比澄溪補任商南
余以督運至秦與澄溪遇詢及臨志澄



溪出之篋中余取而讀之叙例比舊加
詳事與文增過半焉其大較洵可觀矣
而澄溪尤欲審覈之而後鏤版則慎之
至也余與澄溪別者六年於茲回憶曩
日先後同官百一謂余二人以實心行
實政而余二人亦以百一博聞彊識足
爲是邦之文獻也今百一不可見讀其

所叙述猶足想其爲人故不忘夙昔而
爲之序異日歸之臨城臨之人士讀之
知余三人之締交非泛泛者而彌見是
書之可徵不亦愉快乎 崑

康熙三十一年八月

賜進士出身中憲大夫直隸守道管理錢
穀布政使司叅議古邨邵嗣堯題於商

南梳洗樓之寓齋



自序

昔孟夫子曰晉之乘楚之檮杌魯之春秋其義一也我

國家車書一統幅員之廣超軼前代自京師以及溥海內外既纂修

大清一統志矣其直省有通志郡有郡志州有州志縣有縣志詳畧雖異其義亦一也夫修志之法立意貴嚴措詞貴簡

山川形勝考訂務極真確政事文章紀載務極詳明而且賢哲挺生可爲程式貪污不法可爲鑒戒者褒譏務期各當雖一邑之志乎而天下人心風俗繫焉不可以不修也修之不可以不慎也康熙壬戌余待罪房子涖任後竟無邑志寓目文獻旣不足徵傳聞亦何敢信心甚憂之甲子春勸農至鎮內莊得志書

一冊乃明萬曆丁酉前令程君鵬搏所修者也出自婦人績筐中殘破不堪字蹟零落與以十金始售竊幸萬曆以前其人其事可備考稽矣然萬曆以後闕畧甚多何以成書適邵子昆先生自柏鄉去官來署爲余言喬百一先生名已百者邑中高士也因介余往見之儀容古樸而胸中自別涇渭詢以舊事瞭如

指掌自明萬曆迄今皆有筆記遂與謀
修志之役一時襄其事者廣文趙君懿
源孫君睂皆與余朝夕考究援古證今
不敢諛不敢濫得書十卷煩簡頗極匠
心不謂草創甫定而余遽丁外艱趙君
先擢浙江浦江令行取御史孫君後擢
河南溫縣令而喬君年高未幾即世是
以弗獲付梓每一念及未嘗不快快于

中而莫釋及余補任商南子昆先生爲
畿輔守憲督運來秦特爲製序然以余
調省辦事十年之中刻無寧晷最後又
蒙

恩特擢僉事濟東河道驛傳紛馳絡繹弗暇
爲也癸巳夏子志益爲端州郡守余就
養焉知余弗忘是志也請加校讐付之
剞劂嗚呼遲速自有定數顯晦因乎時

會先是

南薰殿纂書官奉

命編纂方輿考畧檄行郡縣備造方輿路程
登載成書而子益較刊是書亦已告竣
謂非時數之當成事會之適合歟至書
中大意雖董狐倚相之筆不可得而見
而考據詳覈蓋凜凜乎春秋謹嚴之意
以成一邑之志惟採風者審擇焉

康熙五十五年季春山東布政使司分
守濟東道僉事加三級前知臨城縣事
長洲宋廣業撰



舊志序引四首

朱之蕃

字蘭嵎

宇內省郡類有志而載屬邑事不及詳惟邑各有志而後其山川風俗之盛人物宦蹟之善備悉無遺可以稽往轍可以示四方可以令邑之後生者與未仕者得紹先民矩矱而不失其所傳述故邑志不可廢也臨城肇為志迄今垂四十年所往既苦於始事之難而義例或有未當後復湮於歲月之久而遺亡更為可惜我圖程侯來守茲土政成民悅庭日多閑乃

更謀修飾之值吾師喬侍御公予告里居遂屬岳孝廉自勵執毫而取衷於侍御舊志所存繁者刪之而要無不舉補葺其所不及載者十居其四既脫稿欲授剞劂而侍御奉命起田間攜其草創及所竄定者出以示蕃讀之卒業見岳君所載吾師疏畧之有關於大政者皆盡削之蕃執以請曰邑志非一人私錄也徵往憲來於是焉藉昔賢以濂洛關閩著稱均之地以人重志一邑而遺其邑人之名言求跡之似公而反以私損矣是當去其詩文敘述之無所關係者

疏畧則載之以傳因命蕃任校讐之役梓既成復題其顛末於首簡後之覽者庶見其語皆實錄事無誇張而一邑之故可指掌得也惟以時續其將來則此志與此邑當永永不磨爾
昔萬曆丁酉孟秋翰林院修撰金陵朱之蕃撰

程鵬搏

字我圖

夫志以識一邑故實昭往鑒來為必不可闕之書闕則修舉之責主者身之然夫子魯人魯史裁自聖心而後魯之事萬古如存則執簡摘詞又自邑之賢者

事已搏郢人也生左史倚相之鄉丘索無能究極挾賦走兩都不一遇空抱離騷憤強顏一官而得臨也臨自爲古文獻宜徵乃往志存王永興公後寥寥無與續何耶曰吏人職吏治書史其政成化行後事由今邇見前令君更迭靡常憂讒畏譴不能以其身一日安曷暇爲其邑圖此千秋業者書痴竊不然也竊鏡識此矣一行綰綬卽從鄉先生喬直指公問政見邑志久湮山川靈秘闕而不展因請先生得秉筆先生辭不居如不欲蒙知我臯我之名也者聘懇再四

始心承之值讀禮餘閒就其故處屬草大書特書悉準諸史例飾之以詞則班馬而晷焉真良史才哉余觀先生心極細極虛亦極公細則諸家不憚披閱以求合諸勝不憚歷覽以求實而又不難欵示蒙昧以覘一得且謂一邑之書弗與孚弗傳孝廉岳君趙君太學米君及諸齒德俾得叅互各出所見以補遺滲虛之至也亦公之至也凡再閱月而草具行且入都門候補則攜以與故契今太史朱蘭嵎公商訂之一切經校定而後舉以付冗吏參刻蓋逾季而書始成

也其慎哉搏因為之說曰志史類也惟邑有志惟國有史史不能外志以集其成有其采之惟其信耳今聖神為國事圖不朽館閣鉅卿有事纂修者方廣求野史以充茲志筆自先生者不信不書而又得太史公以裁其成其所與於筆之削之者必其有當於史例者也夫知不自用美重相成此一志也重邑典者不難自屈以請斤而為知己效忠者又能不愛琬琰以畢力令早早得藉享其成以塞修舉責夫非千載一時而此志之幸耶鋟且竣工太史公既以序先之

矣搏即不文何可無一言以紀月日因為之述作者之意如此庶幾嗣此者得有所攷見云萬曆丁酉秋九月臨城縣知縣鄂郡程鵬搏撰

喬壁星

字文見

臨故有志蓋往令王公永興之所修者然脫畧不甚治且四十年新蹟不續入得無久而磨滅乎不佞承邑程侯指遂忘其固陋而重輯之凡所紀錄皆蒐往昔殘碑斷碣與夫長老傳記里巷輿評不信不載不公不載雖不敢自謂筆削咸宜然事增於昔文僅如

舊亦庶幾一邑之完史焉嗟夫後之視今猶今之視昔數十年後豈無脫畧我者乎豈無當續入者乎刪補而更正之則有後之君子萬曆丁酉秋七月山東道監察御史邑人喬壁星撰

喬若雯邑志補引

邑舊有志原不出先生之手今又已三十餘年矣暇中續述得一二名文可生光氣其他一二遺事可以增入懼其久而逸也因板之以示來茲邑在萬山中代不遭兵燹古蹟殊多而瘠儉陶淵明所謂俎豆猶

古法而衣裳無新製者庶幾有焉其可志固不止此一二名文遺事已耳崇禎辛未秋七月吏部文選司主事邑人喬若雯撰

凡例

一吾邑自唐天寶移治以來八百餘年矣紀述闕焉至明嘉靖三十一年山右王公永興始爲縣志自嘉靖壬子至萬曆戊戌閱四十七年郢都程公鵬搏重修委重于先王父中丞公先王父集生儒取十七史各授一函凡涉真定常山趙國趙郡房子臨城字句概爲錄出與趙孝廉志鵬米太學濟時共爲商確而摭觚則岳孝廉自勵也志旣成復以屬門人朱修撰之蕃俾校讐

焉虛懷採輯厥惟艱哉自萬曆戊戌至今又九十年矣順治二年邑侯渠公淙海雖奉文重修祇於舊本各條下畧註今存今廢字樣即以抄本呈解既未發刻亦無存藁今康熙二十五年邑侯宋公廣業銳意增修猥以屬余余懼固陋不足以繼先王父即無以承公命因爲之翻覈典故者五閱月訪覽山川古蹟者四閱月始敢分列而彙訂之每一卷成輒請正於公必再三審定而後入集

一是志所輯半出舊志半出平日覩聞所記惟錢糧關係重大悉照康熙二十二年賦役全書錄入不敢增損一字也

一邑在本郡雖稱下下而幅員實不爲狹祇以山水多而田疇少耳百因訪覽之後山水一條比舊畧有所增

一先王父舊志務崇簡覈故生平諫草不敢輕入修撰朱公謂奏疏關係大政寧刪其詩文叙述之無所關係者而登奏疏故舊志藝文絕少然

遺文軼事皆足以備異日之考稽茲凡碑碣所垂見聞所及悉爲錄入藝文志

一史有關文貴傳信也茲于舊志所闕者仍之以後所增凡遇闕文疑義之無可考者悉以圈代一舊志先王父每有評論自稱外史氏先君子所作邑補志百錄入志內者稱先恭肅宋公謂志以傳信宜從其質故我祖父評論處俱書名宋公填諱

一先王父編次舊志僅分卷帙每卷之中雖有次

序無復斷續今宋公命余於末幅務爲留餘俾異日便於續入

一先人藏書三樓明季城破被焚無遺而舊志亦蕩然矣有庠友寄居高邑持一卷授余乃先王父所編舊志也余寶之不啻拱璧康熙二年邑侯李公行時偕覽而失之今宋公購覓踰年始得一本示余即余向所失舊本手筆宛然則是編之成似亦有天意焉故并及之

一是編修於康熙二十五年成於二十六年而宋

公適丁外艱不及付之剞劂雖然余老矣非公無以知余故歸藁於公倘得鏤版以垂不朽請俟他日奚不可者

康熙二十六年歲次丁卯正月臨城市衣喬已百記昔年八十有三

臨城縣志凡例

終

重修臨城縣志目錄

序

自序

舊志序引四首

凡例

卷首

圖考

卷之一

天文志

天星野

輿地志

沿革

疆域

形勝

山川

風俗

土產

古蹟

藩封

丘墓

建置志

城池

關廂

街道

公署

學校

壇廟

里社

舖舍

村莊

坊表

市集

橋梁

寺觀

郵政

卷之二

賦役志

悉照康熙二十二年全書

地畝

人丁

起運

存留

雜稅

附鹽課又清丈記二首

卷之三

官師志

官制

歷宦

名宦

選舉志

進士

舉人

武科

貢士

廕襲

例貢

雜職

封贈

人物志

鄉賢 節烈 孝行 義行 烈婦

節婦 義姑 隱逸 仙釋 方藝

卷之四

藝文志

宋元明御製文

大清學規

卷之五

藝文志

誥敕 敕書 諭祭文 旌獎碑文

奏疏 申詳

卷之六

藝文志

碑記

卷之七

藝文志

碑記

卷之八

藝文志

碑記

序

引

傳

誌銘

卷之九

藝文志

各體詩

卷之十

述考志

事紀

自周敬王四十九年至

大清康熙二十六年

禁約

鑒戒

附喬已百隨筆雜記

重修縣志後序二首

跋

臨城縣志

山東布政使司分守濟東道僉事加三級前臨城縣知縣長洲宋廣業重修

男廣東肇慶府知府宋志益較刊

明巡撫四川都察院右僉都御史邑人喬璧星原編

孫布衣喬已百增訂

浙江道監察御史前臨城縣儒學教諭武清趙懿源

參訂

河南府溫縣知縣前臨城縣儒學訓導平谷孫

睂


卷首

圖考

畢宿圖

臨城系云


圖



昂宿圖

臨城系云

圖



山 川 圖

嘉成系云

圖考

三



臨 城 縣

臨城縣志

圖考

二




東北抵栢鄉縣
界二十五里


東抵隆平縣界二十里

東南抵順德府唐
山縣界十五里


臨城縣城疆圖




疆域圖



城池圖





臨城縣



臨城縣治圖

臨城縣志

圖考



臨城縣志

圖考


五

儒學圖

臨城縣志

圖

七




臨城縣

臨城縣志

圖

八



臨城縣志卷首圖考終

臨城縣志卷之一

知縣事長洲宋廣業重修

天文志

星野

昂畢之次

按臨城屬趙地故分野昂畢之次

廣業謹按順德廣平二郡屬昂臨城至真定二百里之間屬昂畢臨城殆昂畢兼屬之始界乎

又按天市垣蕃衛二十二星分為左右其左列之第十星主趙北斗第三星主冀州以五戌日候之庚戌為清河趙國壬戌日為常山

輿地志

沿革

禹貢冀州之域

周地分於邶

春秋時為晉臨邑

魯哀公四年趙穆奔臨即此

後屬中山

今定州

戰國時為中山房子邑

安王二十四年趙與中山戰于房子

趙武靈王十九

年北畧中山之地至于房子

見史記

遂屬趙

西漢置房子縣屬常山郡

今真定府

東漢屬常山國

魏屬常山郡

晉置趙國治房子後屬趙郡

北齊移高邑於房子東縣遂省

隋開皇中復置房子屬趙郡

唐天寶元年沛水泛溢移治泚水店改為臨城屬趙

州

臨城之名始此去舊城四十五里

天祐二年更名房子尋復臨城

宋改趙州為慶源府以臨城屬之熙寧六年省隆平

為鎮入焉元祐元年復置隆平

金改趙州為沃州屬沃州

元復沃州為趙州屬趙州

明如元制隸真定趙州編戶一十三里成化八年知

縣王理新增三里為一十六里

大清因之編戶一十六里

疆域

東西廣一百五十里南北袤五十里

東抵隆平縣界二十里南抵順德府內丘縣界一十

五里西抵山西樂平縣界九十里北抵高邑縣界

三十里

東北抵栢鄉縣界二十五里東南抵順德府唐山縣

界十五里順德府內丘縣界一十六里西南抵順

德府邢臺縣界六十里西北抵贊皇縣界四十里

東北至

京師八百里至趙州九十里至真定府一百六十里

形勝

山勢聯絡肘腋太行稱形勝之區

見府志

堯峰峙其左

太行拱其右泝水帶其前董岡擁其後

見儒學記

山川

太行山

縣西九十里層巒疊嶂為畿南雄鎮○已百有說見藝文

三峰山

城西一百里三峰如削勢若挿天

九珠山

縣西一百二十里其形陡立而色白以上二山舊志未載以首入縣界故補出

釣盤山

縣東南五里泚水南岸相傳韓信斬成安君陳餘泚水上卽此餘初入釣盤山曰魚入釣盤吾其亡矣果為韓信所斬

鐵山

縣西南五十里石色如鐵

敦與山

縣西南七十里一名幽淮山南接太行北連常山

蓋山

縣南四十里上有舒姑泉見州志

天臺山

縣西五十里以高聳頂平故名上有井水如飯漿名曰飯井

杏山

縣西七十里其山多杏

彭山

見金史其詳不可考

九尖山

縣西北三十里又有小九尖山亦與此相連以上有九峰因名

白山

縣西北十里南至大河北至山口長二十里或曰此縣之主山也

堯峰

縣東南二里許去堯故都唐山三十五里故名峰巒最為秀麗見州志

輝山

縣西三十里

空山

縣西五十里見山寺甘泉院碑記名紫金山

鳳凰岡

縣北八里韓家庄連亘數里形如鳳凰

董岡

縣北門外東接堯峰西臨泚水形勢環抱為邑奇觀

聖井岡

縣東北三里有泉夏旱不竭禱雨輒應土人立廟祀之

長生岡

縣西六里舊名石老婆岡喬中丞壁星易以今名有記

聖母洞

縣西北三十里洞口有聖母祠禱雨輒應

桃源洞

九尖山麓下有梵刹層巒疊翠頗可遊觀郡人魏大用有記

仙人洞

栢暢村崖下洞口僅能容人漸入稍寬中多岐路莫測所至

曹溪洞

天臺山之東麓北泉寺內

盤山洞

洞深數里人行其上填然有聲

牛口峪

縣西二十五里相傳昔有童謠曰竇入牛口勢不得久竇建德為唐兵所破走至此被擒舊有竇王廟今廢

仙人巖

城西北三十五里孤懸壁立下臨絕澗有泉自巖孔中流出四時不竭

乞了寨

縣西壇峪村有碑記

石人寨

縣西嶺西

天臺寨

天臺山上可以避兵

青龍寨

縣西郝家庄

泚水

縣西北二十五里史稱韓信斬成安君于泚水上按水經其原有二南泚水見郭璞註此源發元氏封龍山折而東經栢暢亭

至城西五里許伏流三百步餘復出流東南經釣盤山入沙河每秋水溢衝突城下

沙河

在縣西南其源出杏樹山東南經唐山入葫蘆河

彭水

在臨城見隋書又山海經云泚水東流注於彭水然其詳不可考已百按泚水至三岐之東與彭水合既合後但稱彭水矣

泥河

縣北五里其源自河上一里許昔廣武君李左車戰敗至泥河廣武君曰車入泥河不能行吾其亡矣果為韓信所擒

狗跑泉

縣北三十里流入槐水河相傳昔有醉人臥草中野火將迫狗跑地得泉展水濕草主因得免故名

舒姑泉

縣南四十里蓋山上相傳舒氏女與父採薪坐其處化為泉見宣城志

舞水

即舒姑泉宣城志昔有舒氏女與父採薪於此將歸女坐牽挽不動父告其母偕來惟見清泉一泓在其坐處母曰吾女其化為水耶盍試之父曰何試曰吾女好音樂乃絃歌泉湧迴流有朱鯉四頭在焉今作樂嬉戲泉必湧出如舞故世俗以為蓋山有舞

水云州志

作野姑

青龍潭

縣西南三里小西岡停住崖下在昔所無自順治四年後三泓相連水碧魚多今四十年不斷矣往來騷客每置酒于此

題詠甚多

其餘無名山水傳聞不可考者俱不載

宋廣業曰臨城小邑絕長補短纔百里許而山麓去十之五川澤去十之三可耕之地蓋無幾近山者薄濱河者鹵又其大較也地瘠民貧艱於生聚惟望

當道大人及職斯土者念諸

風俗

地薄人衆丈夫相聚遊戲悲歌慷慨

漢書地理志

質厚少文多專經術

宋史地理志

性多敦厚務在農桑好尚儒學傷於遲重

隋書地理志

婚姻喪葬交相爲助

舊郡志

人習文武

真定廳壁記

風俗淳厚士知書而民知禮

本縣儒學記

士知自勵民鮮淫邪之病

見章忱去思碑

喬壁星曰燕趙昔稱渾朴晚近漸尚奢靡迨今極矣石熊峰謂西成遺秉簫鼓連村春事轉空券書

絡繹亘其然哉獨余邑以地磽民瘠俗尚簡素猶存先進遺風第民有俠氣稍抱不平輒訴於長吏使能處置得宜固可蒲鞭理也

歲時土俗

正月元旦

禮神

祀先

拜謁親長

立春

翦綠

薦辛

元宵

設酒肴置火樹偕伴登臨曰遣百病

布散麵燈曰除虛耗

次日

二月二日

圍灰

三月上巳

修禊尋芳

清明

祭先壟挂白錢插柳又前一日曰百五皆同

儲漿

前一日曰寒食

四月八日

浴佛日民多作會

五月五日

插艾葉餽角黍飲雄黃酒辟五毒小兒繫續命縷

六月六日

曝書辟蠹

爆豆驅螢

七月七日

乞巧

中元

樹桑麻祀先壟

八月中秋

瓜餅供月

九月重陽

登高賞菊棗糕餽遺

十月一日

翦紙為衣焚祭先墓曰送寒衣

十一月長至

拜業師

十二月八日

煮臘粥

二十四日

祀竈

自此掃舍宇立桃符易門神貼春聯

除夕

響爆竹

進屠蘇

守歲

土產

樹木

楸

大者數圍

紫荆

柳

榆

松

檜

榲

漆

梓

梧

白楊

青楊

土泥

赤實

五穀

白麥

五穀與他邑同惟白麥為上皮薄麵多引長不斷他邑所不及也

果實

桃

杏

梨

葡萄

蘋婆果

羊棗

大棗

小紅棗

核桃

栗

柿

桑椹

蔬菜

蔴姑

有三種大者如盤白而且香美如肥肉松花第二羊肚第三

瓜

王瓜

瓠

王瓜最盛而瓠次之出高村鴉
鴿營等處遠近居民賴以為業

藥材

何首烏

金鈴草

五靈脂

蛇床子

茯苓

如意草

地骨皮

防風

黃芩

歲時

知母

百合

藟麥

車前子

黃芪

荊芥

篇蓄

枸杞

蒼朮

大黃

澤蘭

花卉

薔薇

甘菊

二種俱徧滿山野間

鳥獸

鴛鴦

狐狸

虎

豹

鹿

昆蟲

寒蟪

石

玲瓏石

青石

白石

古蹟

栢暢亭

縣西十五里水經載泚水東經栢暢亭卽此今廢

栢暢城

在栢暢亭南相去里許按漢書王子侯表武帝封趙敬肅王于終古爲栢暢侯此卽其封國城今廢遺址存

遊觀臺

在栢暢村東遺址高二丈許週圍百步有奇俗傳漢栢暢侯登臨處也南眺鹿思蕃育北俯綠楊巨浸亦古境最勝者

房子城

臨城舊邑名漢爲縣唐天寶元年城爲泚水所衝遷縣治于泚水店改名臨城俗因呼舊治爲古城今入高邑西南一十五里

回車城

在臨城見魏書今無考。已百按此城在贊皇縣南十二里泚水東岸有南回車北回車二村去臨城六十里蓋臨贊古

原一邑故舊志存其名而不知其處

平州城

見魏書今無考

岡西廢城

城垣猶存前代無考

石城

縣西四十里城基猶存前代無考。已百按止有南門一座無垣墻今爲集市

嶂洪洞

見魏書今無考

鵜鴿井

縣西北二十里按碑記云西楚霸王引兵追漢高祖高祖避于井中有鵜鴿集井追者不疑得免後因建高祖廟

龍王臺

縣南八里栢舍村見府志

爽亭

縣治東北普利寺後昔徽宗下晉陽過此駐蹕命蔡京書爽亭二字於石碣久廢今寺中有爽亭二字石刻明喬中丞壁星

所立也

嘉禾亭

縣廳後元時有嘉禾連穎故作此亭會川尹澄記云嘉禾兩莖相去三尺挺挺而上穗巨異常相向而對合爲一無纖毫

痕迹縣官刻石以紀其瑞亭廢後石亦屢移而原石後繪圖猶存因復刻記文於舊址

息波亭

西城外石堤上萬曆二十六年縣侯程鵬搏築堤旣成建此其制木梁石柱八角四正爲門四維爲牖環以短垣可備列

坐康熙二十二年知縣宋廣業重修井陘僉

事道李基和題額湖廣叅議道葉映榴撰記

漢松

文廟戟門左高二丈五尺圍七尺盤屈如蓋相傳植于漢時在建學之前明喬中丞標漢松二字於石刻

唐槐

城隍廟內傳自唐天寶間已有此樹圍二丈餘高數丈老幹參天如虬龍之狀喬中丞亦立碑識之

五女塔

城西北雙井村五女者不知其姓傳自東海避洪水而來共葬父母于白山之顛土人為之建五塔四時享之歲旱禱雨輒應宋進士龐

革有記今廢

普利塔

普利寺內高數丈宋皇祐四年建塔內有井井內有志云異僧持佛骨佛牙舍利葬于內其銘曰有相歸無相事理真無

上色境既隨形凡像依聖像

義姑塔

駕迴北南岡魯義姑塚上純石為之高不及二丈共十有一層中有文云奉旨旌表而不書其朝代後十里外有村曰岡

西風水不利夜半牽而仆其半焉

程楊塔

程楊村東南山上

官都塔

官都村東南山上

藩封

房子侯鄧晨

初婚光武姊元及漢兵起晨將賓客會棘陽漢兵敗姊亡光武即位封晨為房子侯見漢書

栢暢侯劉終古

趙敬肅王之子武帝五年封子朱嗣始元三年薨無後見漢書

臨城伯廉頗

宋宣和五年加封從祀武成王廟見宋史

臨城縣子王進

元以趙州知州封失其名查係名進

臨城縣子范○○

元以真定路總管封失其名

丘墓

漢王霸墓

縣東南三里東西二塚相距里許相傳一實一虛昔土人犁地忽穿一孔見其中規模宏麗二塚複道相通隨

出掩之按恒南一帶乃光武當時用兵之處疑卽二十八將中之王霸也

漢趙將軍墓

城西十二里高村東墳高丈餘雨衝一孔土人入視棺已朽骸骨尚存頭大如斗壁上有文云漢趙將軍

之墓不

知其名

竇建德墓

縣西北二十五里牛口峪

曾義姑墓

駕迴北村塚上有石塔

唐蒲圻縣男孟客墓

縣東十五里按墓志君諱客字賓武德中授左驍衛永壽府蒲圻縣男食邑三百戶

春秋八十有三薨於里第以偽周延載元年十月二十三日與夫人尹氏合葬于房子縣東十五里之原

宋處士王適墓

適字子立蘇文忠公軾爲誌銘不言墓地喬忠肅公若雯補入

元真定路總管封鎮陽伯喬公墓

按總管喬公本縣南程村人卽元戶部主事喬

林之祖也其他若喬松喬亨喬思澤皆以孝廉進士顯惟總管公及一教授公僅于墓側有石題銜而名字世次皆不可考萬曆丙申邑人喬壁星過墓下見二碑與石器俱仆詢諸父老云其後人止有一丁克戍近亦絕迹墓居者侵其墓基遂毀其石因董夫匠復豎其仆碑及石門石羊之類稍存舊觀總管在元爲巨族今其塋兆幾不能蔽枯骨亦可悲矣後之人能留意俾其永存庶得古人興滅繼絕之意

臨城子王進墓

解村人元延祐間授奉議大夫真定路趙州知州封臨城子卒葬村南二里石獸翁仲俱存

豐州知州王直墓

進長子泣官有政聲陞奉議大夫大同路豐州知州卒葬于父側弟東翼寧路臨州州同

稱廉明弟榮祖大同路通判以純孝著俱附葬焉

真定路總管封臨城縣子范公墓

廣州路總管府治中范公墓

以上二墓在縣南十二里兩口村俱失其名

明工部侍郎馮彬墓

縣西三里射獸村詳鄉賢

工部侍郎楊和墓

縣南一里楊家灣詳鄉賢

少卿薛幹墓

縣東二十里羊泉口村

僉事趙世相墓

縣南三里水南寺西邑人喬中丞壁星志其墓銘進士田勸撰墓表

戶部郎中李世藩墓

縣東北三里侍郎趙孔昭志其墓銘

封中年知縣晉贈四川巡撫右僉都御史喬輔世墓

縣北八里韓家庄大學士

申時行志其墓文見後

四川巡撫喬壁星墓

縣北八里喬家庄翰林院侍讀姚希孟志其墓文見後

涇州知州岳麒墓

祁村

鞏昌府同知趙志鵬墓

留村

平涼府推官岳自勵墓

祁村

少卿喬恭肅公若雯墓

城東南七里盤石村

湖廣都司劉芳周墓

孟村任湖廣桂東都司以勦賊陣亡敕賜造葬

蔣孝女墓

城東南一里楊家灣舊有碑今碑跌尚存

建置志

城池

唐天寶元年移房子治於泚水店改為臨城縣建土城四門明正統十年知縣阮居仁修成化二年知縣張佐十九年知縣章忱增修弘治十四年泚水奔衝城西面盡頽知縣潘銓徙修今周圍止二里二百六十步高二丈五尺廣二丈池廣五丈深二丈城門三座西臨泚水河無門城外護以南北斜堤長三百餘步嘉靖十五年知縣党承美以護堤薄增築西面植

柳以禦水患三十二年秋雨大作城復傾圯知縣王永興重修隆慶三年秋雨連旬水大漲衝崩西南一角六十餘步毀南門知縣高常徙修之遷南門稍東去舊門八十餘步於舊南門下砌石溝出城中之水事未畢而去任知縣鄧之松繼之以土堤不堪水齧建議築西南角八蜡廟一面石堤此築石堤之始尋亦被衝萬曆七年知縣余起元將城西南一帶通築石堤賴為保障邑人喬輔世復鑄鐵牛以鎮水勢萬曆二十五年六月初三日暴水漫堤幾不為衛知縣程鵬搏建

議加修乃易大石增高厚焉天啓二年水復平堤幸無衝齧崇禎二年因有烽警而西城太狹知縣鄧紹禹奉文增築一倍十七年給事中時敏察城從廩生趙翼珍議于雉臺舖上各增一樓

大清順治三年巡撫郝公步行驗視至西南角謂知縣渠淙海曰南門宜速移於此僉以百姓瘡痍未起議遂寢康熙二十四年奉文修城明年正月知縣宋廣業設法捐修圯者築之缺者補之堅厚完固丈量得東城長一百三十丈七尺北城長九十九丈六尺

西城長一百八十六丈七尺南城長六十九丈七尺共四百九十三丈合二里零一百六十六步東南角高二丈四尺正東門高二丈二尺東北角高二丈正北門高一丈八尺西北角高二丈一尺正西城高一丈西南角高一丈五尺正南門高二丈四尺東城高二丈五尺南城最厚西城次之東城次之北城又次之雉臺十一座

東城三北城一
西城五南城二

門樓三座角舖四座

喬壁星曰臨城西面濱河夏秋雨潦山水氾漲浪且兼天雖有前提未可恃以無恐有保障之責者

能無思未雨綢繆乎傳曰有備無患又曰思患預防斯之謂也

池未有不環城爲塹者臨之西阻水護石旣難以池南復當氾泛之衝不可池石城峭直亦不須池其北居民頗促形勢爲邑來脉不宜池池獨東一面耳萬曆二十五年知縣程鵬搏重加穿濬瀦水植蓮其中明末旱涸蓮亦槁矣

大清初年池水盈盈蓮忽自生紳士爲詩歌以紀瑞康熙十二年知縣崔廷瑜植柳堤岸以增勝二十四

年知縣宋廣業旣西固石堤復東濬此池鑿之得泉湛然淵淡矣

宋廣業曰除大害者不計功罪規遠利者不恤勞怨余泣事初視城見氾河灘跡突護城下輒以爲憂及稽往牒見自明弘治以來屢遭衝決而西門塞而城角縮而南門移捧視愕然惴惴不能自安逮康熙二十四年七月一日氾水洶湧泛溢怒濤如雷舉城奔駭余驚趨往勘水已襄堤撼城卽與同官展拜自訟洪濤上下入而復出者再堤決數

丈蓄地成潭急撤頽屋為椿束柳為埽繼日夜以捍禦勢乃稍緩復遣善水者數十人隨防汛千總張文芳駕濤排決幸以僅免余于是時固疑城之不徒以堤重也蓋陂堰堅完僅護門庭而曲突不預終虞焦濫當此巨浪奔衝之際稍為疏濬已有其效矣倘于射獸村下逕城南北陂而東之穿渠道築長堤束水東流堤可借為城之外護而河流漸淡歸洩亦易此或一長久之道也第凡民可與樂成難與圖始余有志而未逮也有心者相勢規

畫檐當而力行之不以功罪勞怨為慮其庶幾乎

關廂

關以護門有門則設臨城無西門故無西關南門當泚水之衝故無南關惟東北兩關順城相接邑小地近聯絡如一關云

街道

城內四街中為十字街自西門毀塞遂稱為丁字口丁字口以東為縣門街由縣門東出南門為倉門口丁字口以南為拱辰街學前為興育街拖南一東西

小街曰楊家衙衙丁字口至北門為大街大街之西曰西寺港城下四馬道皆有人居為四小街共十牌一百家而城內之民數止矣

公署

縣治

大門

三間萬曆十三年知縣易體乾修

儀門

三間左右兩角門各一間去大門四十武正德八年知縣李璿修

戒石坊

甬道上 宋太宗頒戒石銘爾俸爾祿民膏民脂下民易虐上天難欺

大堂

三間萬曆十九年知縣羅士元重修崇禎十一年焚大清順治五年知縣王國柱重建題額公明堂今改為忠愛

堂堂前甬

道六十武

川堂

一間大堂後知縣劉啤建

內宅門

川堂後

二堂

三間知縣劉暉建名退省堂今名思補堂

迎旭堂

三間在二堂東知縣宋廣業建

三堂

五間二堂後其餘偏居小室不具載

瞻雲樓

五間在三堂後康熙年知縣陳殿邦建題曰董柱向有崇門戶堵塞知縣宋廣業啓而新之四開戶牖更題

曰瞻雲樓蓋取瞻雲

望日之義崇遂絕

綵軒

瞻雲樓東知縣宋廣業為迎養封翁建栢鄉邑侯邵公嗣堯題額

豐慶園

瞻雲樓後知縣宋廣業葺封翁孝廉宋必題額蓋因災後之後為民祈年也

嘉禾亭

元時有嘉禾連穎作此亭元統時建有會川尹澄記今廢知縣宋廣業每歲植禾亭基之前以驗豐歉

介齋

井陘道李公基和題額齋前有玲瓏白石一座湖廣少叅葉公映榴題曰雪浪石并賦詩以紀之

梧桐書屋

介齋西邑侯宋公建

宛在軒

旁有荷池牡丹臺長洲孝廉宋必題軒額少叅葉映榴有記并詩見藝文志

射圃

土地祠

二門內東舊西向萬曆二十一年邑侯楊應丙移向正南

迎賓館

三間土地祠北崇禎十一年焚順治十一年知縣高科重建

書吏房

東為承發司架閣庫吏戶禮房西為兵刑工三房南為馬科

庫樓

大堂東

典史廳

三間在堂西為典史侯文聽委之所今廢

捕衙

在大堂西

鑾駕庫

典史廳西

主簿衙

庫樓後嘉靖四十一年裁萬曆間知縣楊應丙改為公廨以居六房吏典今廢

申明亭

縣門東今廢碑記存

旌善亭

申明亭東今廢

監獄

縣治西南隅八十餘武

承流坊

縣門左

宣化坊

縣門右二坊俱焚未修

醫學

承流坊東久廢萬曆四十四年新舊兩邑侯王佐才莊紹祖議以其空地為關王廟

陰陽學

官亭東久廢萬曆二十六年知縣程鵬搏于申明亭東建三間以存陰陽醫二學之名今亦廢 順治五年以

其地為胥

公生祠

僧會司

舊志在城外普利寺

預備倉

縣治東南府館西東廩西廩數十間改折之後廢知縣宋廣業重修

草廠

預備倉南向徵本色時貯草于此改折之後廢今盡為民居

察院

縣治東嘉靖三十二年縣侯王永興重修萬曆十二年縣侯易體乾重修康熙二十二年知縣宋廣業重修

官亭

察院左萬曆二十六年縣侯程鵬搏重建今廢

府館

縣治東南按院出巡之時隨行府官居之今廢

教場演武廳

在郭外西北每年霜降日本縣率典史防汛武職集兵壯馬步快手及各鄉勇操練其中知縣宋廣業平

日無事亦嘗操練
蓋為民防守計也

文廟

縣治南

萬仞宮牆

雲路南知縣宋廣業建

鳳池坊

龍門坊

二坊俱在櫺星門前東西相對康熙二十四年知縣宋
廣業重修

為萬世師坊

在雲路北康熙二十四年知縣宋廣業建

雲路

檣星門外逼近居民氣象狹隘康熙二十一年知縣宋廣業特捐俸銀一十九兩四錢買趙重賀等地基開甬道五

十餘丈榜曰雲路兩旁築垣墻
高丈餘長與甬道等朱飾之

櫺星門

三間去戟門十二武櫺星者取空明之義舊以偏于民居改爲數仞宮牆康熙二十三年知縣宋廣業既闢雲

路築宮牆因依式修整
手書櫺星門三大字

戟門

三間去殿四十二步按宋真宗幸太學留其戟之半于門故稱戟門

大成殿

五間明正統八年知縣阮居仁以規模狹隘移上四十二步濶大其制置月臺圍以石檻萬曆二十二年知縣楊應

丙二十五年知縣程鵬搏四十五年知縣劉永茂 大清順治十四年知縣高利康熙十四年知縣崔廷瑜二十四年知縣宋

廣業疊加重修二十五年

欽頒御書萬世師表扁額懸殿內

至聖先師孔子

漢高祖過魯以太牢祀孔子平帝時進號宣尼公唐太宗尊為先聖玄宗追謚文宣王南面坐

宋真宗加謚玄聖文宣王改至聖元成宗加大成至聖文宣王明嘉靖九年改稱 至聖先師孔子 大清因之

兩廡

東西各五間明萬曆二十五年知縣程鵬搏造籩豆一百八十有奇石香爐三十七個 大清康熙二十四年知縣宋廣業重修

啓聖祠

儒學門內東首明嘉靖十二年知縣張鸞建萬曆二十四年知縣程鵬搏以舊基低下遷上百武建新祠三間

大清康熙二十四年知縣宋

廣業重修又建抱廈三間

名宦祠

在東廡南舊為啓聖祠知縣程鵬搏既遷啓聖祠于上因卽其祠祀名宦

鄉賢祠

在西廡南舊名宦鄉賢同列一祠在殿西知縣程鵬搏以合祀非體酌議祀名宦于東因建一祠祀鄉賢于西

祭器庫

知縣程鵬搏卽舊名宦鄉賢合祠改設今廢

神厨

三間在戟門西今廢宜建

省牲所

萬曆二十五年知縣程鵬搏卽神厨故址改建今廢宜建

春秋二仲月上丁日致祭

至聖先師

祭品

帛一筐 酒三爵 大羹一登 和羹二鉶
黍稷二簋 稻粱二簋 籩十 豆十
籩實 棗 芡 藁魚 形鹽 榛

豆實 菱 栗 鹿脯 黑餅 白餅
菁菹 韭菹 醯醢 笋菹 芹菹
兔醢 鹿醢 脾析 豚胎 魚醢

羊一俎 豕一俎

四配

復聖顏子

魏正始中配享唐太宗稱先師明嘉靖九年稱復聖

述聖子思子

宋徽宗從祀端平二年升列十哲咸淳中始與曾子升配明嘉靖九年改述聖以上東位

宗聖曾子

唐高宗從祀開元八年配享明嘉靖九年改宗聖

亞聖孟子

宋元豐中配享明洪武中罷享踰年尋復嘉靖九年稱亞聖以上西位

祭品

東西各爵三 帛一 登一 鉶二 簠一
簋一 籩八 豆八
羊一俎 豕一俎

十哲

先賢閔子

子騫唐開元八年從祀

先賢冉子

仲弓唐開元八年從祀

先賢端木子

子貢唐開元八年從祀

先賢仲子

子路一字季路唐從祀

先賢卜子

子夏貞觀二年從祀

以上東位

先賢冉子

伯牛唐開元從祀

先賢宰子

子我唐開元從祀

先賢冉子

子有唐從祀

先賢言子

子游唐從祀

先賢顓孫子

子張唐開元從祀

以上西位

祭品

東西各帛一 爵三 鉶一 簠一 簋一
籩四 豆四

東廡先賢

澹臺子

子羽名減明

原

子思名憲

南宮子

子容名适又名韜

商

子木名瞿

漆雕子

子開名開

樊

子遲名須

公西子

子華名赤

梁

子叔魚名鱣

冉	子子魯名孺	伯	子子析名虔
冉	子子產名季	漆雕	子子歛名哆
漆雕	子子期名徒父	商	子子季名澤
任	子子選名不齊	公良	子子正名儒
奚容	子子偕名藏一字子皙	顏	子子襄名祖
勾井	子子疆名疆	秦	子子丕名商
公祖	子子之各句茲	縣	子子橫名成
燕	子子思名伋家語名級	顏	子子叔名之僕
樂	子子聲名欬	邾	子子欽名與
子西	子子上名與如	公西	子子尚名藏
陳	子子禽名亢	琴	子子開名張
步叔	子子車名樂		
先儒			
周左	子子名丘明	穀梁	子子名赤
漢高堂	子子名生	毛	子子長公名萇
杜	子子名子春	隋王	子子淹名通
宋歐陽	子子永叔名修	周	子子茂叔名敦頤

西廡先賢

程	子子正叔名頤	張	子子厚名載
朱	子子晦菴名熹	楊	子子中立名時
羅	子子仲素名從彥	陸	子子靜名九淵
蔡	子子仲嘿名沆	元許	子子仲平名衡
明陳	子子公甫名獻章	王	子子伯安名守仁
西廡先賢			
宓	子子賤名不齊	公冶	子子子長名長
公皙	子子季次名哀	高	子子羔名柴
司馬	子子牛名耕	有	子子子有名若
巫馬	子子期名施	顏	子子子柳名辛
曹	子子循名卹	公孫	子子子石名龍
秦	子子南名祖	顏	子子子驕名高
壤駟	子子徒名赤	石作	子子子明名蜀
公夏	子子承名首	后	子子子里名虔一作處字里之
公肩	子子中名定	鄭	子子子家名單
罕父	子子素名黑	榮	子子子祺名祈

左	子行名人郢	鄭	子子徒名國本名邦避漢高諱為國
原	子子籍名亢	廉	子子曹名潔
叔仲	子子期名會	狄	子子哲之名黑
子蔑	子名忠孔子兄孟皮之子	施	子子常名之常
秦	子子之名非	申	子子周名振
顏	子子聲名噲		
先儒			
周公	子名高唐	漢伏	子子賤名勝
子國	子名安國孔子十二世孫	董	子子仲舒
后	子近君名倉	唐韓	子子退之名愈
宋	子翼之名瑗	程	子子伯淳名顥
邵	子堯夫名雍	司馬	子子君實名光
胡	子康侯名安國	李	子子愿中名侗
呂	子伯恭名祖謙	張	子子敬夫名栻
真	子希元名德秀	明薛	子子德溫名瑄
胡	子淑心名居仁		
兩廡祭品			

東西各帛一	每四位爵三	簋各一
籩各一	籩各四	豆各四
豕		
祭文		
惟		
師德配天地道冠古今刪述六經垂憲萬世今茲		
仲禋謹以牲帛醴齊粢盛庶品式陳明薦		
樂章		
迎神樂奏咸和之曲		
大哉孔子道德尊崇維持王化斯民是宗典祀有		
常精神並隆神其來格於昭聖容		
奠帛初獻樂奏寧和之曲		
自生民來誰底其盛維		
師神明度越前聖粢帛具成禮容斯稱黍稷非馨		
惟神之聽		
亞獻樂奏安和之曲		
大哉聖師實天生德作樂以崇時祀無數清酤惟		
馨嘉牲孔碩薦修神明庶幾昭格		
終獻樂奏景和之曲		

百王宗師生民物軌瞻之洋洋神其寧止酌彼金

罍惟清且旨登獻惟三於嘻成禮

犧象在前豆籩在列以享以薦既芬既潔禮成樂

備人和神悅祭則受福率遵無斁

送神樂奏咸和之曲

有嚴學宮四方來宗恪恭祀事威儀雖離歌茲維

馨神馭還復明禋斯畢咸膺百福

樂器

鐘磬 柷敔 建鼓 搏拊 琴瑟 簫

笙鳳簫 橫笛 塤 箎 篪 篴 簫

引節

啓聖公孔氏

明弘治元年吏部尚書王恕請立啓聖祠十四年侍

學建啓聖公

祠祀叔梁紇

東配

顏氏字路名無由唐開元從祀明嘉靖九年遷配啓聖

孔氏伯魚名鯉宋咸淳中從祀明嘉靖九年遷配

曾氏子皙名點唐開元從祀明嘉靖九年遷配

孟氏公宜名激明嘉靖九年配享

東從祀

程氏字伯溫名珦生二程子明嘉靖九年從祀

蔡氏字季通名元定生文正公仲嘿明嘉靖九年從祀

西從祀

朱氏字喬年名松生文公朱子明嘉靖九年從祀

周氏名輔成生周子茂叔明萬曆十三年從祀

祭品

帛一 爵三 鉶三 簋二 簋二 邊四

豆四 羊一 豕一

祭文

惟

公誕生聖嗣爲萬世帝王師茲當仲椿式陳明薦

名宦祠 祭品同兩廡

鄉賢祠 祭品同兩廡

宋孝廉功德祠

在北關外隨春秋二丁致祭孝廉乃邑侯宋廣業之封公也名諱詳見碑記康熙二十三年臨邑大飢縣侯聞之封公封公嚮產代臨民完逋賦又于二十四年春煮粥活人人感其德徧籲諸憲照禦災捍患例春秋崇祀

祭品

祭帛一筐盛

酒一觔爵獻

豕一口

香燭一分

鹽一升遵實

栗一升遵實

棗一升遵實

鹿脯一觔遵實

菁菹半觔豆實

芹菹半觔豆實

鹿醢半觔豆實

兔醢半觔豆實

黍一升簋實

稷一升簋實

香油半觔

蜂蠟二兩

香料各一錢

祭文

維神嶽挺世濟忠貞文章祭酒禮樂宗盟學足副志實不慚名令予能官出宰臨城義方是訓修潔是成迨聞歲祲爰用心忤既無官守亦非私羸江南嚮產河北恤焚輸帑捐逋散粥贍生全活無算功德莫京禦災捍患俎豆惟誠千秋百禩歆此粢盛尚饗

儒學

學門

三間在櫺星門東門樓上供文昌神位

義路

禮門

二門在明倫堂前東西相對舊為騰蛟門起鳳門萬曆二十二年知縣楊應丙重修改今名

明倫堂

五間創建姓名失考宋朱子手書明倫堂三字明洪武間頒行天下學校萬曆二十二年知縣楊應丙周圍繚以垣墻國子監助教陳九德記四十四年知縣劉永茂重修大清順治五年知縣王國柱康熙二十三年知縣宋廣業重修

東西齋房

各五間在明倫堂前東曰日新齋西曰時習齋萬曆二十二年知縣楊應丙重修易日新為博文時習為約禮生徒廩膳生員二十名增廣生員二十名附學生員不拘名數東西各立齋長肄業其中

號舍

明倫堂東今廢

敬一亭

舊在明倫堂前嘉靖十一年知縣張鸞建以貯明世宗御製敬一箴及范浚心箴程子四箴註并聖諭六碑萬曆二十四年知縣程鵬搏重建歲久亭圯教諭杜公樸移碑于明倫堂舊址猶存

射圃亭

在儒學前今廢

浥泉亭

在儒學內嘉靖九年邑侯徐官建為博士弟子遊息之所今廢

學中舊頒書籍

大明令一部	大誥一部	洪武禮制一部
洪武正韻一部	臥碑	大明律一部
稽古定制一部	韻會定正一部	
志戒錄一部	資治通訓一部	
大學衍義一部	名臣奏議一部	
孝慈錄一部	資治通鑑一部	
通鑑綱目一部	文章正宗一部	
周易本義一部	詩經集註一部	

春秋三傳三部

春秋說一部

書傳會選一部

書經集註一部

四書集註一部

禮記集說一部

以上洪武年頒

孝順事實一部

古今廉鑒一部

四書五經大全各一部

以上永樂年頒

五倫書一部

大明會典一部

御製敬一箴一通

御製視聽言動四箴註各一通

大明集禮一部

以上嘉靖年頒

重修大明會典一部

萬曆年頒

三朝要典一套

天啓年頒

宋廣業曰道德文章功名事業俱從讀書中來而貧窶之士往往賃書無力蓋亦難矣前代所頒書籍久已無存必欲如制全備力恐維艱若資治通鑑朱子綱目大學衍義性理大全諸書以漸購而貯之聽諸生披讀裨益豈淺鮮哉乃始焉有志未遑繼復迫于去任每迴憶之殊深愧怍姑以俟後之君子

學中古木

漢松一株見古蹟
古楸一株在東廡前

古栢八株在大成殿前
古楊三株在西廡南

古槐一株學門內東側 栢五株明倫堂前
其餘樹木尚多望之鬱然不及悉載
教諭宅 明倫堂後改遷堂西約禮齋後

訓導宅

二所俱在博文齋東嘉靖四十一年裁訓導一員東一宅遂廢

學倉

在訓導宅前今廢

學田

元至正七年邑隱士劉栢楚與弟國子伴讀劉文淵捐田一百畝又有逋民蘇用田一百六十二畝俱為學田今碑記猶存田無考矣明嘉靖四十三年深州判官侯諭署縣查出南盤石河灘隙地五十畝申作學田後陸續增之總計三頃一十五畝五分八厘每畝徵銀一分九厘八毫二絲每年共徵銀六兩二錢六分七厘四毫八忽以助諸生婚葬不足與薪水不給者明季歲凶田蕪 大清順治初訓導路宗程等屢次查出學田四頃三十七畝八分五厘七毫康熙十年奉文除豁沙壓地四十三畝實在地三頃九十五畝八分五厘七毫每畝徵銀一分九厘八毫六絲共徵銀七兩八錢六分一厘七毫二絲康熙十

八年奉
文提解

社學

在縣治東城隍廟左知縣程鵬搏建又於梁村高村留村各建一所其餘令借居寺觀編列啓蒙古今明訓人授一部使知誦習

喬壁星曰余讀少儀弟子職諸篇蓋知古人重始教哉後世小學之法廢而社學與書院又家塾之遺奈何日墜壞也今令程侯構堂宇以奠其居延師儒以聯其業命山村窮谷之民與採薪牧畜之子皆得與聞先聖之道而肄業焉教化其有興乎

樂天書院

縣治東南萬曆十九年春邑人封中牟縣喬公輔世建其大五畝有堂室庖厨花木池榭聚羣族子弟于

中擇師教之後高邑趙忠毅公改為正心書院封公沒卽於後建祠祀之燬于火

義學四所

康熙三十二年知縣宋廣業創設每所束脩銀六兩米四石皆捐貲給之

在城建義學三間于東寺

延師廩生張衆隨即普利寺

東路鎮內村

延師賀雲開

南路賈村

延師和于陞

東南路尹村

延師路德元

宋廣業曰古者黨庠術序而外必有家塾於今義學爲近之因置義學四所延諸生有學行者主其教庶幾里井之秀亦知鼓舞以共奮也至於栽培多方區畫以圖可久應有繼我者矣

壇廟

社稷壇

城外西北二月八月上戊日記壇制方二丈五尺高三尺四出陞各三級壇下前十二丈東西南各五丈繚以周垣四門

紅油北門出入

石主長二尺五寸方一尺埋於壇南正中

去壇二尺五寸止露圓尖餘埋土中

神牌二以木為之朱

漆青字身高二尺二寸濶四寸五分厚九分座高四寸五分濶八寸五分厚四寸五分臨祭設矮桌以供祭畢藏之

神厨三間庫房三間宰牲房三間鍋五口洗牲桶四隻

祝

版以木為之白紙寫文貼其上祭畢焚之留版

祭器牲匣

四以木為之酒尊三用瓷幕三用布酌酒杓一爵六銅一籩豆簠簋俱用瓷

香爐二

神版案二高一尺一寸濶一尺

九寸長二尺三寸籩豆簠簋案四高一尺一寸濶一尺九寸長三尺三寸牲匣案四高六寸濶二尺四寸長三尺五寸祝案一高一尺一寸濶一尺九寸長三尺二寸酒尊案一高二尺七寸五分濶一尺五寸長五尺面鑿三孔下托複版以盛酒尊爵帛案一高二尺七寸五分濶二尺三寸長三尺尊一用瓷甕杓一盆一帨一

祭品羊一豕一帛一黑色長一丈八尺劍一盛和羹籩四棗栗

鹽藁魚豆四韭菹醯醢醢醢菁苴鹿醢或用鹿兔簠二黍稷簋

二稻粱 祭文曰品物資生烝民乃粒養育之功司土是賴維

茲仲穡禮當告祀謹以牲帛醴齊粢盛庶品式陳明薦尚享

風雲雷雨山川壇

城外東南制與北壇同帛七用白色爵用二

十一祭文曰妙用神機生育萬物莫我民居

足我民食某等欽承

城隍廟

縣治東察院之左洪武九年知縣蔡鏞建成化四年知縣張

容黎淳記弘治十六年知縣潘銓重修增左右道院嘉靖十二

年知縣党承美重修四十二年知縣王之弼重修萬曆元年知

縣鄧之松重修砌甬道加簷厦三間其寢室三間隆慶九年知

八蜡廟

縣高常重修萬曆二十五年知縣程鵬搏改建為五間殿後加

清居五間

殿前古槐一株相傳樹在建城以

前萬曆二十四年喬中丞刻唐槐二字于石上

四曰郵表畷五曰猫六曰虎七曰坊八曰水庸皆有關於農

嘉成縣志

卷一

壇廟

三

者萬曆辛卯知縣禱廟驅蝗邑人喬封公輔世有政成異感記

邑厲

壇在城外東北 每歲清明中元十月朔祭無祀鬼魂于此祭品羊三豕三飯米三石 前期三日主祭官齋沐詣城隍廟發牒文至日設城隍位于壇上邑厲位于壇下而祭

馬神廟

東門外萬曆二十六年知縣程鵬搏修 順治十六年知縣許元孝重建內有老栢十餘株

火神廟

舊在南門外常有火災萬曆四十一年知縣王佐才改建于城北岡普利塔後

奎星樓

東南城角上萬曆十一年邑人趙世相建康熙二十二年知縣宋廣業重修

元帝廟

有二一在縣北郭外一在高村

二郎廟

元帝廟左

三義廟

縣西郭門外社稷壇後創始不知何時弘治間鄆陵丞馮恭射獸人與其弟臨江幕讓修之嘉靖間恭之子琇讓之子瑞

重修萬曆五年署縣事高邑諭張棟重修二十四年喬中丞重修有碑記崇禎二年喬恭肅公重修邑人涇州知州岳麒有記

關王廟

一在縣治左萬曆間建一在三義廟後萬曆二十四年喬中丞建正殿三間左右廂各三間崇禎二年喬恭肅公重修

真武廟

北郭外東北岡上

龍王廟

舊在城外北關隆慶三年水漲衝城五年知縣鄧之松議建于西關門外泚水河邊萬曆六年知縣余啓元修築石堤又

重修之廟前及八蜡廟旁各有石人石牛以鎮壓水勢邑人喬封公輔世所立也

東岳行祠

縣東郭外

岱嶽行祠

縣西監石村今圯基址尚存

南岳廟

急霜村

北岳廟

忠信村

烏龍廟

萬曆時邑令憂旱夢神告云某水黑龍能雨次日往求果得雷足遂建廟于蜡廟之後每歲春秋亦隨戎祭

青龍潭龍王廟

縣西南三里水南寺村小西岡泝水之灣順治四年立廟禱雨甚應

鵲王行祠

城東五里官道左蓋祀扁鵲也春秋時醫趙簡子有效賜之蓬鵲之田今屬內丘縣西山近臨城界順德府堂

上官來祭臨邑為東路往來要地昔人建此為行宮每歲三月十八日貨物雲集晉豫齊魯燕趙四方之人萃焉

漢高祖廟

鵲鵲井旁今廢止存其基有里人迎送樂歌二章其詞曰帝之來今猶故鄉駕馭天風今來翱翔能用傑人

靖四方帝入新廟今氣洋洋袞衣楚楚今玉鏘鏘祀帝以樂今鼓笙簧犧牲肥腍今酌酒漿於戲前王今今不忘帝之返今駕風為馭朱雀玄武今前後奉侍神佑泝人今感帝多惠錫爾景福今驅除鬼魅雨暘咸若今恒為豐歲西成芄芃今禾黍稔穰民沾帝德今耕田樂利民被神庥今更千萬季

竇王廟

竇建德死于牛口峪葬于寒溝廟今廢有碑字泐不可讀

舒姑廟

駕迴村東蓋山上

孟君廟

孟村岡上唐蒲圻男孟公客也萬曆中喬中丞修葺之樹栢二十餘株

程邑侯遺愛祠

息波亭後公擇水督工築堤嘗避風雨于此去後邑人不忘公德奉木主書公銜祀之每遊人舉酒

必先獻一杯春秋祀北壇畢正獻官獨祭南壇分遣學衙徧諸小祀而此亦與焉崇禎六年以挑濠廢人心至今思之

喬恭肅公祠

公諱若雯字○○中丞公之子由己未進士授中書舍人陞禮部主政調吏部左遷兗州守數月告歸闡

性命之學于正心書院恬如也崇禎戊寅冬城陷具衣冠抗節以死越二年巡撫黎公上其事贈太常寺少卿賜諡恭肅予祭葬建祠已度土正心書院鳩工庀材旋以流寇蜂起攻掠無寧日繼以歲凶人多流亡事竟中已夫以公之大節矯矯宜配饗宮而無愧乃一祠既荷明綸卒致不果惜未有申請其事者

里社 共十六社

在城社

高村社

白鴿社

栢暢社

郝庄社

鹿庄社

獐磨社

鎮内社

右八大社

賈村社

永安社

長壽社

新安社

忠信社

梁村社

雙井社

孟村社

右八小社

每社一人謂之社書總算一人謂之總書其催督錢糧每社一人謂之里長一社十甲每甲一人謂之甲首十六社總一人亦謂之總書知縣宋廣業徵收錢糧之法按分比較先問里長分四等賞罰逾分者賞以花紅獎牌足分者賞以果酒不及分者

罰跪不完者薄責仍許里長開報欠戶執票催完不差一人下鄉其受賞之人令應罰者斟酒人人愧勵爭先樂輸可免敲朴之苦矣

舖舍 四處

急遞舖

舊在縣東郭外司兵三名萬曆二十五年邑侯程鵬搏移于縣治南

留村舖

城東十里司兵二名

鎮內舖

城東二十里

野狐舖

城正東二十五里通內丘栢鄉大路舊置司兵八名萬曆二十二年改大路于栢鄉小李村本舖得免送迎之擾止於遞

送公文邑侯楊應丙因申革五名止存三名

村莊

舊六十三庄旱蝗兵役之後減為三十五庄近年稍稍生聚增為五十二庄矣

留村莊

南孟村莊

北孟村莊

古魯營莊

南鎮內莊

東鎮內莊

西鎮內莊

東陽泉口莊

中陽泉口莊

西陽泉口莊

東鴉鴿營莊

西鴉鴿營莊

祝郭村莊

趙村莊

支角莊

以上東路十五莊

岡頭莊

山南頭莊

山口莊

程楊莊

管等莊

遊仙觀莊

三岐莊

栢暢莊

壇峪莊

郝莊

西有紫河套山賊盤踞在內從斷利口入山

石家欄莊

灰林莊

石城莊

獐磨莊

以上西路十四莊

解村莊

山下莊

賈村莊

駕廻北莊

窺窰溝莊

馮村莊

尹村莊

冷水莊

以上南路八莊

喬家莊

祁村莊

雙井莊

黑城莊

鵲鴿井莊

韓村莊

梁村莊

方等莊

忠信莊

新安莊

南高村莊

北高村莊

新莊

瀆上莊

牟村莊

以上北路十五莊

坊表

文廟

為萬世師坊

龍門坊

鳳池坊

縣治三坊

縣門

縣門左

宣化坊

縣門右

戒石坊

縣治甬道舊為碑亭今改為坊

鄉宦坊三

秉憲坊

宣化坊西為僉事趙世相建

柱史坊

秉憲坊西為御史喬壁星建

金吾坊

文光坊北為兵馬指揮使岳麒建

進士坊四

進士坊

一為薛幹建一為薛珪建

甲第傳芳坊

為李世藩建

世進士坊為喬壁星喬若雯父子建

舉人坊九

獨步坊為薛幹 鳴世坊為曹素

聚奎坊為薛理 叢桂坊為薛琦

繼志坊為薛珪

天池鯤化坊為趙世相

聳壑昂霄坊為閔珩

登科坊為馬驥

文光坊為喬直

節孝坊六

孝子坊拱辰街西萬曆十九年奉旨為生員張誥建今圯

李讓妻王氏洪武六年旌表 王祥妻喬氏成化四年旌表

王慶妻李氏成化四年旌表 陳敖妻劉氏成化七年旌表

武才用妻石氏以上俱節婦

節烈坊一

高氏御史喬壁星妻累封恭人以子若雯進封太恭人以節贈淑人

魏氏廩膳生員喬已百妻崇禎十三年與高淑人全受旌表

市集

在城集

二八大集
五十小集

梁村集

城北三十里
每逢二七日

鎮內集

城東二十里
每逢一六日

鴉鴿營集

城東北三十里
每逢四九日

以上四集為上集梁村差
勝蓋五縣適中之地也

郝庄集

城西五十里
每逢四九日

石城集

城西三十里
每逢二七日

二集為中集山
產俱集于此

高村集

城東北三十里
每逢一六日

黑城集

城西北二十里
每逢一六日

賈村集

城南十里每
逢二七日

三集為下集市無
所有惟便口糧耳

橋梁

東安石橋

縣東門外見府志

惠民石橋

縣北門外見府志

普濟石橋

縣北五里泥河村
邑人知縣劉偉記

惠政石橋

縣南五里解村見府
志邑人知縣劉偉記

通濟石橋

縣北五里泥河村

泥溝石橋

縣西二里程村里人
趙思學記

馬藏溝石橋

縣東北四里王
家庄見府志

橫澗石橋

縣東北六里不要村
見府志

安定石橋

鄧底

永安石橋

縣西北十八里米家
河見府志

永濟石橋

灰林

福善石橋

縣東北二十里趙村
邑人太監賀世暹建

青龍石橋

縣西北四十里
瀆上村共二座

濟眾石橋

祁村

安固石橋

溝里韓村

安延石橋

祁村

廣濟石橋

祁村

朝陽橋

徐村木石半

初地石橋

鐵山下

廻岡二橋

駕廻東岡

螻蛄雙橋

一東西一南北

石窟東橋

木石半泉石俱美

王家庄石橋

高邑大道

四槐石橋

興龍岡北橋雖小而景可觀

僧寺

普利寺

在縣治東北郭門內肇建于唐時宋徽宗下晉陽過此賜額曰普利

西禪寺

縣治西異僧澄普坐化于此見仙釋

大覺寺

縣東孟村

正覺寺

孟村

龍興寺

縣西北石窟村

天王寺

縣西石城村

玉泉寺二

一在黑城村一在鵝鴿井村俱縣西北

千佛寺二

一在縣南賈村嘉靖元年巡按御史彭朝吉過此有感偶題云未了翁子星分沂魯明耀耀月斧輪廻光睹賢

聖捫舌接引手舞海衆齊臻嘉靖元午屈指一十二萬五千六百秋過去多少未來幾許遣門上四金剛問堂上十八位羅漢并我佛如來都起身環拱頂上法言色卽是空空卽是色古不知今今不知古未了翁子曰坐坐坐繡衣行矣斬斷長橋放出

蝎虎冤苦冤苦冤苦
一在縣西程村

峒巖寺

縣西北王家莊

祥符寺

縣北瀆上村

文殊寺

縣北高村

天福寺

縣西泠水村

聖壽寺

縣西岡西村

福隆寺

縣西中高村

石佛寺二

一在縣西東監石村
一在縣西射獸村

甘泉寺

紫金山下

白雲寺

縣西落波村

八方寺

縣西北城陽村

崇慶寺

縣西北管等村

古佛寺

縣西北竹北村

興國寺

縣北忠信村

廣福寺

縣東北趙村邑人太監
賀世暹重修

草堂寺

縣西五十里空山之顛一名草堂一名岳山一名西禪菴寺
故無碑記止有一峭壁鐫云永平二年重修王永興舊志載

明初時殿宇俱草構洎正德中有開蕪例山為岳氏人○居壤
輸賦始得續修葺之以有今刹正殿旁廡凡九楹僧舍二故名
草堂亦名岳山云院前有石砌小菴僅可容膝父老相傳為號
國太子所創曾參禪于此而最後適太子岩乃化太子岩去空
山三十里屬邢州臨邑名山不乏而惟此山甚孤峻北峙鷹落
石南望虎穴山雲天寨踞左老馬嶺錯右寺前後清泉冷冷萬
木堆錦路紆曲而上幾十里梵景蒼茫如畫登者忽可望忽不
可望及陟顛一眺則千峰競秀萬派爭流令人神爽欲飛依稀
天畔亦一大奇觀哉已
百按空山即紫金山

鸞喜寺

大山上

雷音寺

縣西北
栢暢村

龍泉寺

遊仙觀村

純白菴

鎮內村

西朋寺

陽泉口

大明寺

祝郭村

異泉寺

梁村

佛龍寺

監石村

慈雲寺

寨窪

西方菴

興林寺

三岐村

白雲菴

石家關

白雲寺

峽峪

撒馬寺

葦塲

寶峰寺

檀峪

聖佛寺

趙庄

延壽寺

急霜村

崇佛寺

兩口村

南泉寺

北泉寺

二寺俱在城西天臺山之麓俱有泉自石縫中流出因名

尼菴

四所

泥泉菴

王家庄溝內

元靜觀

監口村北山上亦改為寺而尼居之

萬行菴

王家庄東山上

雙泉院

遊仙觀南山上以上四所

道觀

太明觀

縣東南馮村今改同果寺

瑞雲觀

縣南兩口村今改為崇福寺

昊天觀

縣西石家欄

大同觀

縣北菴上村

飛雲觀

桃花洞

遊仙觀

今改為寺其村仍名遊仙觀村

青龍觀

城西郝庄今改為寺

常真觀

城南界溝村女冠居之

郵政

養濟院

縣東郭門內萬曆十七年燬十八年知縣吳典學重修二十五年知縣程鵬搏重修

漏澤園

縣郭外東北岡上地七畝石厚土淺不可浚埋不足以掩枯骨萬曆二十五年知縣程鵬搏就其左畔增買市民李學地

七畝為之立有碑碣

臨城縣志卷之一終

臨城縣志

卷一


四



臨城縣志

二

內閣文庫		
番號	漢	14433
冊數	6 (2)	
函號	史	163 1



臨城縣志卷之二

知縣事長洲宋廣業重修

賦役志

地畝

原額上中下參等民地共折徵糧地柒百玖頃陸畝

肆分貳厘玖毫叁絲貳忽貳微每畝額徵銀不

等共額徵銀壹萬貳千陸拾玖兩肆錢捌分肆

厘壹毫玖絲壹忽捌微伍沙玖塵捌埃貳渺捌

湖伍虛

內無主荒地貳百壹拾壹頃玖拾叁畝捌分壹厘肆毫壹絲肆忽肆微除康熙元年開墾過荒地貳拾畝捌分捌厘捌毫玖絲康熙貳年開墾過荒地叁拾畝肆分陸厘肆毫伍絲康熙叁年開墾過荒地陸拾叁畝柒分伍厘伍毫康熙肆年開墾過荒地叁拾捌畝肆分貳厘柒絲康熙伍年開墾過荒地壹拾叁畝陸分康熙陸年開墾過荒地壹拾叁畝康熙拾貳年開墾過荒地肆拾柒畝玖拾陸畝康熙拾叁年開墾過荒地肆拾柒畝玖

分肆厘伍毫康熙拾肆年開墾過荒地叁拾捌畝貳分捌厘壹毫康熙拾伍年開墾過荒地陸拾叁畝捌分伍厘壹毫肆絲又於康熙拾陸年清出自首漏糧徵糧大地壹拾叁頃伍拾柒畝陸分陸厘壹毫陸絲柒忽康熙拾陸年開墾過荒地壹頃叁拾柒畝伍分壹厘柒絲貳忽貳微又於康熙拾柒年開墾地壹拾叁畝貳厘陸毫伍絲壹忽又於康熙拾捌年開墾地拾肆畝柒分柒厘壹毫柒絲俱入熟地徵糧訖

實剩無主荒地壹百玖拾叁頃肆畝陸分叁厘柒毫肆忽貳微每畝除銀壹錢柒分陸絲玖忽柒微玖纖貳沙肆塵柒埃叁渺共除銀叁千貳百捌拾叁兩壹錢叁分伍厘陸毫壹絲伍忽肆微玖纖玖沙伍塵貳埃捌渺伍漠柒湖捌虛柒澄陸清

實在成熟并開墾清出共地伍百壹拾陸頃壹畝柒分玖厘貳毫貳絲捌忽內康熙拾年奉

旨除豁康熙柒年被水衝沙壓徵糧共地壹拾頃柒畝

貳分內

優免沙壓地柒拾壹畝肆分伍厘每畝除銀壹錢柒分陸絲玖忽柒微玖纖貳沙肆塵柒埃叁渺共除銀拾貳兩壹錢伍分壹厘肆毫捌絲陸忽陸微柒纖貳沙壹塵玖埃伍渺捌漠伍湖行差水衝地叁頃伍拾陸畝行差沙壓地伍頃柒拾玖畝柒分伍厘每畝各除銀壹錢柒分陸絲玖忽柒微玖纖貳沙肆塵柒埃叁渺共除銀壹百伍拾玖兩壹錢肆分貳厘捌毫捌忽叁微陸

沙陸塵玖渺柒漠伍湖貳頃共除銀壹百柒拾壹兩貳錢玖分肆厘貳毫玖絲肆忽玖微柒纖捌沙捌塵伍渺陸漠

實在成熟并開墾清出共地伍百伍頃玖拾肆畝伍分玖厘貳毫貳絲捌忽內分

優免地壹百貳拾陸頃肆拾陸畝壹分伍厘奉文不免每畝徵正供襍辦并改折花絨銀壹錢柒分陸絲玖忽柒微玖纖貳沙肆塵柒埃叁渺共徵銀貳千壹百伍拾兩柒錢貳分捌厘壹毫陸

忽捌纖貳沙肆塵貳埃捌渺玖漠伍湖

行差并開墾清出共地叁百柒拾伍頃貳拾捌畝肆分肆厘貳毫貳絲捌忽每畝徵正供襍辦并改折花絨銀壹錢柒分陸絲玖忽柒微玖纖貳沙肆塵柒埃叁渺共徵銀陸千叁百捌拾貳兩肆錢伍分肆厘叁毫玖絲叁微玖纖肆沙伍塵伍埃捌渺玖漠伍湖陸虛貳澄肆清

寄庄地肆頃貳拾畝每畝徵正供襍辦比行差加半倍并改折花絨銀壹錢玖分肆厘玖毫叁絲

貳忽捌微貳纖壹沙柒埃叁渺共徵銀捌拾壹
兩捌錢柒分壹厘柒毫捌絲肆忽捌微伍纖陸
塵陸埃

人丁

原額下下人丁捌千陸百叁丁

節次新編人丁捌百陸拾叁丁

康熙伍年新編人丁伍拾壹丁

康熙拾年新編人丁拾壹丁

康熙拾伍年新編人丁壹千柒丁

康熙貳拾年新編下人丁叅百肆拾壹丁

實在下下通共人丁壹萬捌百柒拾陸丁每丁徵

銀壹錢共徵銀壹千捌拾柒兩陸錢

額外

充餉籽粒地伍拾柒頃叁拾貳畝叁分玖厘共徵銀伍拾柒兩叁錢貳分叁厘玖毫內荒地肆拾壹頃叁拾肆畝伍分捌厘內於康熙玖年開墾過地柒頃肆拾柒畝康熙拾叁年開墾過地叁拾柒畝康熙拾肆年開墾過地拾畝伍分又於康

熙拾陸年清出自首漏糧地壹頃玖畝壹分貳厘又康熙拾陸年開墾地壹頃伍拾畝柒分又康熙拾捌年開墾地伍拾畝實在荒地叁拾頃叁拾畝貳分陸厘每畝除銀壹分共除銀叁拾兩叁錢貳厘陸毫實在并自首開墾地貳拾柒頃貳畝壹分叁厘內於康熙拾年奉

旨除豁康熙柒年被沙壓地陸頃陸拾叁畝每畝除銀壹分共除銀陸兩陸錢叁分

實在地貳拾頃叁拾玖畝壹分叁厘每畝徵銀壹分共徵銀貳拾兩叁錢玖分壹厘叁毫牧地籽粒地貳拾叁頃壹拾捌畝貳分肆厘壹毫柒絲內拋荒中地伍頃壹畝伍分壹厘陸毫貳絲每畝除銀貳分叁厘貳毫叁絲肆忽共除銀壹拾壹兩陸錢伍分貳厘貳毫貳絲柒忽叁微玖纖捌塵內拋荒下地壹拾捌頃壹拾陸畝柒分貳厘伍毫伍絲每畝除銀壹分肆厘伍毫壹絲伍忽共除銀貳拾陸兩叁錢陸分玖厘柒毫柒

絲陸微叁纖貳沙伍塵貳項共除荒銀叁拾捌兩貳分壹厘玖毫玖絲捌忽貳纖叁沙叁塵地荒未徵

馬厰籽粒地叁拾頃貳拾捌畝捌分柒厘陸毫叁絲陸忽共徵銀肆拾玖兩陸錢捌分壹忽貳微陸纖捌沙叁塵捌埃伍渺內中荒地貳頃柒拾貳畝陸分玖厘陸毫壹絲捌忽壹微內於康熙玖年開墾中荒地叁拾叁畝又於康熙拾叁年開墾中荒地叁拾壹畝肆分捌厘貳毫叁絲陸忽

陸微又於康熙拾陸年清出自首中地壹頃伍拾陸畝貳分捌厘捌毫又於康熙拾陸年開墾中地壹拾陸畝俱照例入熟地徵糧訖實在中荒地叁拾伍畝玖分貳厘伍毫捌絲壹忽伍微每畝除銀貳分叁厘貳毫叁絲肆忽共除銀捌錢叁分肆厘柒毫叁微捌纖伍沙柒塵壹埃又下荒地壹拾陸頃肆拾玖畝壹分玖厘伍毫壹絲內於康熙玖年開墾下荒地貳頃柒拾畝康熙拾貳年開墾下荒地柒拾叁畝康熙拾叁

年開墾下荒地叁拾陸畝貳分玖厘貳毫伍絲
伍忽伍微康熙拾肆年開墾下荒地貳拾玖畝
又於康熙拾陸年清出自首下地叁頃玖拾畝
陸厘又於康熙拾陸年開墾下地壹頃貳拾畝
伍分貳厘俱入熟地徵糧訖

實在下荒地柒頃叁拾畝叁分貳厘貳毫伍絲肆忽
伍微每畝除銀壹分肆厘伍毫壹絲伍忽共除
銀壹拾兩陸錢陸毫叁絲壹忽柒微肆纖陸塵
柒埃伍渺貳項共除荒地銀壹拾壹兩肆錢叁

分伍厘叁毫叁絲貳忽壹微貳纖陸沙叁塵捌
埃伍渺

實在中熟并自首地陸頃壹拾玖畝陸分叁厘捌毫
每畝徵銀貳分叁厘貳毫叁絲肆忽共徵銀壹
拾肆兩叁錢玖分陸厘陸毫陸絲玖忽貳微玖
纖貳沙

實在下熟并自首地壹拾陸頃肆拾貳畝玖分玖厘
每畝徵銀壹分肆厘伍毫壹絲伍忽共徵銀貳
拾叁兩捌錢肆分柒厘玖毫玖絲玖忽捌微伍

織二項共徵銀叁拾捌兩貳錢肆分肆厘陸毫陸絲玖忽壹微肆纖貳沙

學田地肆頃叁拾柒畝捌分伍厘柒毫每畝徵銀壹分玖厘捌毫陸絲共徵銀捌兩陸錢玖分伍厘捌毫肆絲貳纖內於康熙拾年奉

旨除豁康熙柒年沙壓地肆拾貳畝每畝除銀壹分玖厘捌毫陸絲共除銀捌錢叁分肆厘壹毫貳絲實在地叁頃玖拾伍畝捌分伍厘柒毫每畝徵銀壹分玖厘捌毫陸絲共徵銀柒兩捌錢陸分壹厘

柒毫貳絲貳纖康熙貳拾貳年一件請廣學宮等事案内奉

旨留給貧生廩生之用

不在地丁之內

藥材銀貳兩柒錢捌分叁厘捌毫叁絲壹忽貳微伍纖

以上額內額外地丁實徵共銀玖千柒百柒拾壹兩玖錢叁分伍厘捌毫壹忽柒微叁纖玖沙陸塵肆埃柒緲玖漠陸虛貳澄肆清遇閏

加銀肆百伍兩陸錢伍分柒厘伍毫壹絲肆忽

起運

戶部項下折色正襍共銀柒千陸百叁拾肆兩叁錢

玖厘貳毫陸絲叁忽肆微捌纖壹沙柒塵捌埃

壹渺捌漠柒湖貳虛壹澄肆清

減缺額銀壹千捌百壹拾肆兩伍錢壹分叁厘捌

毫肆絲陸忽玖微肆纖伍沙陸塵柒渺叁漠捌

湖

實徵銀伍千捌百壹拾玖兩柒錢玖分伍厘肆毫

壹絲陸忽伍微叁纖陸沙壹塵柒埃肆渺肆漠

玖湖貳虛壹澄肆清

腳價銀貳拾貳兩陸錢陸分叁厘壹毫肆忽遇

閏加銀叁百陸拾捌兩柒錢玖分肆厘捌毫陸

絲玖忽閏腳價銀玖分貳厘陸毫肆絲伍忽

阜平縣倉小麥折銀叁百壹拾壹兩肆錢

減缺額銀貳百兩

實徵銀壹百壹拾壹兩肆錢腳價銀貳兩肆錢

玖分壹厘貳毫

派剩各馬房倉小麥折銀柒拾捌兩壹錢腳價銀

陸錢貳分肆厘捌毫

永平府庫潤白布折銀壹拾伍兩腳價銀壹錢貳

分

京庫農桑絲折絹銀壹百壹拾柒兩肆錢陸厘腳

價銀玖錢叁分玖厘貳毫肆絲捌忽

京庫地畝本色花絨伍拾捌觔陸兩價銀伍兩貳

錢伍分叁厘柒毫伍絲康熙拾肆年欽奉

上諭事案內改折起解康熙貳拾貳年奉文仍解本色

折色花絨并續奉改折及加增共銀壹百玖兩貳

錢陸分肆厘柒毫伍絲

紫荊關新城倉米折銀壹千柒拾肆兩肆錢捌分

減缺額銀柒百捌拾肆兩伍錢壹分叁厘捌毫

肆絲陸忽玖微肆纖伍沙陸塵柒縵叁漠捌

湖

實徵銀貳百捌拾玖兩玖錢陸分陸厘壹毫伍

絲叁忽伍纖肆沙叁塵玖埃貳渺陸漠貳湖

脚價銀捌兩伍錢玖分伍厘捌毫肆絲

太倉銀庫草銀玖百陸拾叁兩捌錢陸分伍厘

減缺額銀柒百伍拾兩

實徵銀貳百壹拾叁兩捌錢陸分伍厘脚價柒

兩柒錢壹分玖毫貳絲

京庫鹽鈔銀貳拾伍兩貳分脚價銀貳錢壹毫陸

絲遇閏加銀貳兩捌分伍厘閏脚價銀壹分陸

厘柒毫

御馬倉草脚夫壹名銀拾貳兩遇閏加銀壹兩

京庫人丁絲折絹銀壹百叁拾叁兩柒錢

減缺額銀捌拾兩

實徵銀伍拾叁兩柒錢脚價銀壹兩陸分玖厘

陸毫

在京酒醋麵局稻皮銀貳兩壹錢捌分柒厘伍毫

天津水陸兵餉銀貳百捌兩捌錢脚價銀捌錢叁

分伍厘貳毫遇閏加銀拾柒兩肆錢閏脚價銀

陸分玖厘陸毫

旅順兵餉銀壹拾玖兩叁分肆厘脚價銀柒分陸

厘壹毫叁絲陸忽遇閏加銀壹兩伍錢捌分陸厘壹毫陸絲陸忽閏脚價銀陸厘叁毫肆絲伍忽
協濟昌平州銀壹兩伍錢陸分貳厘伍毫
釐剔優免銀陸百柒拾壹兩壹錢玖分陸厘壹毫
伍忽肆纖陸沙柒塵貳埃

康熙玖年并拾貳拾叁拾肆拾伍拾陸拾柒拾捌捌年共開墾額內荒地銀伍拾玖兩柒錢陸分貳毫五微陸纖壹沙捌埃捌渺陸漠柒湖陸虛

叁澄叁清

康熙拾伍年新編人丁銀壹百兩柒錢

康熙貳拾年新編人丁銀叁拾肆兩壹錢

康熙拾陸年清出自首額內漏糧地畝銀貳百叁拾兩捌錢玖分柒厘貳毫叁絲捌忽肆微陸纖伍沙肆塵肆埃陸渺陸漠玖虛玖澄壹清

存留內節次裁扣等項欸

裁按差皂隸工食銀捌拾陸兩肆錢遇閏又裁銀柒兩貳錢

兩經會議裁扣銀貳百肆拾柒兩遇閏又裁銀拾

捌兩

裁迎送上司傘扇銀捌兩

兵部裁減里馬銀玖拾貳兩

戶部裁減里馬銀壹百叁拾捌兩陸錢陸分陸厘

陸毫遇閏又裁銀壹拾叁兩陸錢陸分陸厘

陸毫伍絲

新裁銀叁百肆拾壹兩肆錢玖分遇閏又裁銀壹

拾伍兩貳錢陸分叁厘肆絲捌忽

裁扣各官閏月俸銀玖兩叁厘叁毫壹絲叁忽

補裁井陘道轎傘扇夫工食銀捌兩肆錢遇閏又

裁銀柒錢

裁吏書工食銀玖拾柒兩貳錢遇閏又裁銀捌兩

壹錢

裁廩生糧銀陸拾肆兩遇閏又裁銀伍兩叁錢叁

分叁厘叁毫叁絲

裁教諭經費等銀壹百壹兩壹錢貳分遇閏又裁

銀捌兩肆錢貳分陸厘陸毫陸絲

驛站留作起運銀壹千捌百叁拾壹兩捌錢貳分

壹厘玖毫貳絲遇閏又留銀壹百伍拾貳兩

陸錢伍分叁厘

查出孤貧冬衣布花應裁閏月銀捌錢陸分陸厘

陸毫

奉文科歲貳考應裁半銀柒兩伍錢

奉文全裁各役等項閏月銀玖拾叁兩壹錢柒分

柒厘柒毫陸絲貳忽

奉文實裁存留等銀伍拾柒兩壹錢陸分陸厘陸

毫陸絲伍忽

奉文裁豆草銀壹百陸兩壹錢陸分肆厘玖毫

貳微

奉文裁遞馬工料銀玖拾陸兩閏月銀捌兩康熙

貳拾壹年奉文復貳給銀肆拾捌兩閏月銀

肆兩實裁銀肆拾捌兩閏月銀肆兩

奉文裁接遞皂隸銀拾陸兩閏月銀壹兩叁錢叁

分叁厘叁毫肆絲康熙貳拾壹年奉文復貳

給銀捌兩閏月銀陸錢陸分陸厘陸毫柒絲

實裁銀捌兩閏月銀陸錢陸分陸厘陸毫

柒絲

奉文裁損轎夫銀陸拾兩閏月銀伍兩

奉文實裁銀叁拾貳兩陸錢陸分陸厘陸毫陸絲

伍忽

奉文實裁銀伍兩伍錢

額外

充餉籽粒並自首地實徵銀拾玖兩捌錢玖分壹厘

叁毫康熙拾捌年開墾荒地銀伍錢

馬厰並自首地實徵銀叁拾捌兩貳錢肆分肆厘陸

毫陸絲玖忽壹微肆纖貳沙

學田地實徵銀柒兩捌錢陸分壹厘柒毫貳絲貳纖

康熙貳拾貳年請廣學宮等事案内奉

旨留給貧生廩生之用 入存留

禮部項下共銀壹百貳拾壹兩捌錢叁分捌厘捌毫

叁絲壹忽貳微伍纖

減缺額銀柒拾兩貳錢

實徵銀伍拾壹兩陸錢叁分捌厘捌毫叁絲壹

忽貳微伍纖腳價銀捌錢叁分貳厘肆毫肆

絲

聽差銀壹拾伍兩

減缺額銀捌兩捌錢肆分

實徵銀陸兩壹錢陸分

光祿寺廚料果品銀壹百肆兩伍分伍厘

減缺額銀陸拾壹兩叁錢陸分

實徵銀肆拾貳兩陸錢玖分伍厘脚價銀捌錢

叁分貳厘肆毫肆絲

額外藥材銀貳兩柒錢捌分叁厘捌毫叁絲壹忽

貳微伍纖

兵部項下共銀壹百伍拾柒兩伍錢

減缺額銀玖拾貳兩捌錢柒分陸厘

實徵銀陸拾肆兩陸錢貳分肆厘

滴珠銀伍兩壹錢脚價銀陸兩貳錢遇閏加銀玖

兩柒錢玖分貳厘閏脚價銀叁錢伍分

京班柴薪皂隸柒名共銀捌拾肆兩

減缺額銀肆拾玖兩伍錢叁分肆厘

實徵銀叁拾肆兩肆錢陸分陸厘

滴珠銀叁兩伍錢脚價銀肆兩貳錢遇閏加銀柒

兩閏脚價銀叁錢伍分
五城兵馬司弓兵叁名共銀貳拾伍兩伍錢

減缺額銀拾伍兩叁分柒厘

實徵銀拾兩肆錢陸分叁厘遇閏加銀貳兩壹

錢貳分伍厘

鄒縣弓兵壹名銀捌兩

減缺額銀肆兩柒錢壹分柒厘

實徵銀叁兩貳錢捌分叁厘遇閏加銀陸錢陸

分柒厘

京班直堂皂隸肆名共銀肆拾兩

減缺額銀貳拾叁兩伍錢捌分捌厘

實徵銀拾陸兩肆錢壹分貳厘

滴珠銀壹兩陸錢脚價銀貳兩

太僕寺項下共銀叁千壹百捌拾伍兩

減缺額銀壹千捌百柒拾捌兩壹錢陸分

實徵銀壹千叁百陸兩捌錢肆分脚價銀貳拾

伍兩肆錢捌分

春秋貳季本折馬價銀貳千柒百叁拾兩

減缺額銀壹千陸百玖兩捌錢陸分

實徵銀壹千壹百貳拾兩壹錢肆分脚價銀貳

拾壹兩捌錢肆分

草料正項銀肆百伍拾伍兩

減缺額銀貳百陸拾捌兩叁錢

實徵銀壹百捌拾陸兩柒錢脚價銀叁兩陸錢

肆分

工部項下共銀壹千柒百肆拾肆兩伍錢壹分

減缺額銀壹千貳拾捌兩柒錢貳分壹毫

實徵銀柒百壹拾伍兩柒錢捌分玖厘玖毫路

費銀肆拾玖兩脚價銀壹拾柒兩貳錢捌分

陸厘肆毫捌絲遇閏加銀貳兩捌錢閏脚價

銀貳分捌厘

檣柴夫陸名共銀叁拾叁兩陸錢

減缺額銀拾玖兩捌錢壹分叁厘陸毫

實徵銀拾叁兩柒錢捌分陸厘肆毫脚價銀叁

錢叁分陸厘遇閏加銀貳兩捌錢閏脚價銀

貳分捌厘

營繕司料銀伍拾兩

減缺額銀貳拾玖兩肆錢捌分肆厘伍毫

實徵銀貳拾兩伍錢壹分伍厘伍毫腳價銀肆

錢

磚料銀拾兩叁錢壹分

減缺額銀陸兩柒分玖厘柒毫

實徵銀肆兩貳錢叁分叁毫腳價銀捌分貳厘

肆毫捌絲

胖襖褲鞋銀壹百壹拾陸兩壹錢

減缺額銀陸拾捌兩肆錢陸分叁厘

實徵銀肆拾柒兩陸錢叁分柒厘腳價銀叁兩

捌錢

易州山廠肆季砍柴夫銀壹千肆百柒拾兩

減缺額銀捌百陸拾陸兩捌錢肆分肆厘叁毫

實徵銀陸百叁兩壹錢伍分伍厘柒毫路費銀

肆拾玖兩腳價銀壹拾貳兩壹錢伍分貳厘

順柴夫銀陸拾肆兩伍錢

減缺額銀叁拾捌兩叁分伍厘

實徵銀貳拾陸兩肆錢陸分伍厘腳價銀伍錢

壹分陸厘

以上起運

各部寺折色共銀壹萬貳千捌百肆拾叁兩壹錢伍

分捌厘玖絲肆忽柒微叁纖壹沙柒塵捌埃壹

渺捌漠柒湖貳虛壹澄肆清

減缺額銀肆千捌百捌拾肆兩肆錢陸分玖厘

玖毫肆絲陸忽玖微肆纖伍沙陸塵柒渺叁

漠捌湖

實徵銀柒千玖百貳兩陸錢捌分捌厘壹毫肆

絲柒忽柒微捌纖陸沙壹塵柒埃肆渺肆漠

玖湖貳虛壹澄肆清滴珠銀伍兩壹錢路費

銀肆拾玖兩腳價銀柒拾貳兩肆錢陸分貳

厘貳絲肆忽又康熙拾捌年開墾荒地銀叁

兩壹分貳厘貳毫壹絲玖忽玖微伍纖叁沙

肆塵柒埃叁渺肆漠壹湖肆虛壹澄內除學

田支給貧生廩生銀柒兩捌錢陸分壹厘柒

毫貳絲貳纖實起運銀捌千貳拾肆兩肆錢

陸毫柒絲壹忽柒微壹纖玖沙陸塵肆埃柒
渺玖漠陸虛貳澄肆清遇閏加銀貳百捌拾
陸兩貳錢玖厘玖絲玖忽閏脚價銀肆錢柒
分陸毫肆絲伍忽今奉

旨彙解

戶部

存留

部頒經制存留欸項共銀伍千捌拾兩柒錢柒分
壹毫陸絲貳微遇閏加銀叁百柒拾兩伍錢貳

分叁厘柒毫叁忽

節次奉裁並驛站抵作起運共銀叁千叁百玖拾
柒兩玖分陸厘柒毫伍絲貳微遇閏又裁銀叁
百肆拾陸兩柒錢貳分叁厘柒毫叁忽內於

順治柒年遵

旨會議案內停差按院皂隸工食銀捌拾陸兩肆錢遇
閏又裁銀柒兩貳錢

順治玖年酌定賦役經制案內會議裁扣銀貳百
肆拾柒兩遇閏又裁銀拾捌兩

順治拾貳年遵

旨會議案內奉裁迎送上司傘扇銀捌兩

順治拾叁年查明驛站案內

兵部裁減里馬銀玖拾貳兩

又遵

諭敬陳案內

戶部裁減里馬銀壹百叁拾捌兩陸錢陸分陸

厘陸毫遇閏又裁銀拾叁兩陸錢陸分陸厘陸

毫伍絲

順治拾肆年錢糧入不敷出案內新裁薪廩等銀

叁百肆拾壹兩肆錢玖分遇閏又裁銀拾伍兩

貳錢陸分叁厘肆絲捌忽

順治拾陸年請定給發俸糧案內裁各官閏月俸

銀玖兩叁厘叁毫壹絲叁忽

順治拾柒年遵

旨會議案內補裁井陘道轎傘扇夫工食銀捌兩肆錢

遇閏又裁銀柒錢

康熙元年請停衙役之費案內裁吏書工食銀玖

拾柒兩貳錢遇閏裁銀捌兩壹錢

康熙貳年知會案內裁廩生月糧銀陸拾肆兩遇

閏又裁銀伍兩叁錢叁分叁厘叁毫叁絲

康熙叁年題明案內改裁教諭銀壹百壹兩壹錢

貳分遇閏又裁銀捌兩肆錢貳分陸厘陸毫陸

絲

康熙柒年遵

諭陳言案內奉文驛站留作起運銀壹千捌百叁拾壹

兩捌錢貳分壹厘玖毫貳絲遇閏又留銀壹百

伍拾貳兩陸錢伍分叁厘

康熙拾叁年乞提歲貢路費案內查出孤貧冬衣

布花應裁閏月銀捌錢陸分陸厘陸毫

康熙拾叁年咨請

部示案內奉文科歲貳考應裁半銀柒兩伍錢

康熙拾肆年詳請閏銀之裁扣案內全裁各役等

項閏月銀玖拾叁兩壹錢柒分柒厘柒毫陸絲

貳忽內康熙貳拾貳年奉文復給銀玖拾兩伍

錢壹分壹厘壹毫實裁銀貳兩陸錢陸分陸厘

陸毫陸絲貳忽

又酌議捐省案內奉裁存留各項等銀伍百參拾陸兩貳錢參分參厘參毫柒絲於康熙貳拾年欽奉

恩詔案內奉覆銀肆百柒拾玖兩陸分陸厘柒毫伍忽實裁銀伍拾柒兩壹錢陸分陸厘陸毫陸絲伍忽

又酌議捐省案內奉裁關城驛豆並恒山等玖驛草共銀壹百陸兩壹錢陸分肆厘玖毫貳微

又酌議捐省案內裁遞馬工料銀玖拾陸兩閏月銀捌兩內康熙貳拾壹年欽奉

恩詔案內復貳銀肆拾捌兩閏月銀肆兩實裁銀肆拾捌兩閏月銀肆兩

又酌省驛站錢糧案內裁接遞皂隸銀拾陸兩閏月銀壹兩參錢參分參厘參毫肆絲內康熙貳拾壹年欽奉

恩詔案內復貳銀捌兩閏月銀陸錢陸分陸厘陸毫柒絲實裁銀捌兩閏月銀陸錢陸分陸厘陸毫柒

絲

康熙拾伍年請

旨案內奉裁銀壹百貳拾兩於康熙貳拾年欽奉

恩詔案內奉復銀陸拾兩實裁銀陸拾兩又裁閏月銀

拾兩於康熙貳拾年欽奉

恩詔案內奉復銀伍兩實裁銀伍兩

又暫移存留可緩案內裁銀陸百玖拾兩柒錢伍

分叁厘叁毫柒絲於康熙貳拾年欽奉

恩詔案內奉復銀陸百伍拾叁兩捌分陸厘柒毫伍忽

又康熙貳拾貳年盛興教化案內奉復鄉飲銀

伍兩實裁銀叁拾貳兩陸錢陸分陸厘陸毫陸

絲伍忽

康熙拾柒年請

旨酌量裁減案內裁銀壹百玖拾叁兩伍錢又裁閏銀

伍兩肆錢於康熙拾玖年欽奉

恩詔案內奉復祭祀孤貧等銀壹百壹拾兩閏銀伍兩

肆錢又於康熙貳拾年欽奉

恩詔案內奉復銀柒拾捌兩實裁銀伍兩伍錢

存留實解支共銀壹千柒百肆拾柒兩伍錢叁分
伍厘壹毫叁絲貳纖閏月銀壹百壹拾捌兩玖
錢柒分柒厘柒毫柒絲
本縣修理

龍亭銀壹兩康熙拾柒年裁銀伍錢實支銀伍錢
文廟銀拾兩康熙拾柒年裁銀伍兩實支銀伍兩
巡按皂隸拾貳名每年工食銀捌拾陸兩肆錢順
治柒年奉文全裁
遇閏加銀柒兩貳錢順治柒年奉文全裁

井陘道轎傘扇夫柒名每年工食銀伍拾兩肆錢
順治拾柒年奉文裁銀捌兩肆錢又康熙拾肆
年裁銀貳拾壹兩康熙拾伍年全裁銀貳拾壹
兩於康熙貳拾年奉復實支銀肆拾貳兩
遇閏加銀肆兩貳錢順治拾柒年奉文裁銀柒
錢康熙拾肆年全裁銀叁兩伍錢
本府修倉備辦刑具銀貳拾兩康熙拾肆年裁銀
拾兩康熙拾伍年全裁銀拾兩
管糧通判皂隸拾貳名每年工食銀捌拾陸兩肆

錢順治玖年會議裁銀拾肆兩肆錢又康熙拾肆年裁銀叁拾陸兩康熙拾伍年全裁銀叁拾陸兩於康熙貳拾年奉復實支銀柒拾貳兩遇閏加銀柒兩貳錢順治玖年會議裁銀壹兩貳錢康熙拾肆年全裁銀陸兩

本縣知縣俸每年銀陸拾叁兩肆錢玖分順治拾肆年新裁銀拾捌兩肆錢玖分又康熙拾伍年裁銀肆拾伍兩於康熙貳拾年奉復仍實支銀肆拾伍兩

遇閏加銀伍兩貳錢玖分捌毫叁絲叁忽順治拾肆年新裁銀壹兩伍錢肆分捌毫肆絲順治拾陸年全裁扣閏月俸銀叁兩柒錢肆分玖厘玖毫玖絲叁忽

心紅紙張油燭每年銀叁拾兩順治拾肆年新裁銀拾兩又康熙拾肆年全裁銀貳拾兩遇閏加銀貳兩伍錢順治拾肆年新裁銀捌錢叁分叁厘叁毫叁絲捌忽康熙拾肆年全裁銀壹兩陸錢陸分陸厘陸毫陸絲貳忽

修宅家伙銀貳拾兩順治玖年會議全裁

迎送上司傘扇銀拾兩順治拾貳年裁銀捌兩順

治拾肆年新裁銀貳兩

吏書拾貳名每年工食銀壹百貳拾玖兩陸錢順

治玖年會議裁銀伍拾柒兩陸錢康熙元年奉

裁銀柒拾貳兩

遇閏加銀拾兩捌錢順治玖年會議裁銀肆兩

捌錢康熙元年奉裁銀陸兩

門子貳名每年工食銀拾肆兩肆錢順治玖年會

議裁銀貳兩肆錢又康熙拾肆年裁銀陸兩康

熙拾伍年全裁銀陸兩於康熙貳拾年奉復實

支銀拾貳兩

遇閏加銀壹兩貳錢順治玖年會議裁銀貳錢

康熙拾肆年全裁銀壹兩

皂隸拾陸名每年工食銀壹百壹拾伍兩貳錢順

治玖年會議裁銀拾玖兩貳錢又康熙拾肆年

裁銀肆拾捌兩康熙拾伍年全裁銀肆拾捌兩

於康熙貳拾年奉復實支銀玖拾陸兩

遇閏加銀玖兩陸錢順治玖年會議裁銀壹兩
陸錢康熙拾肆年全裁銀捌兩

馬快捌名每年工食銀壹百肆拾肆兩順治玖年
會議裁銀玖兩陸錢又康熙拾肆年裁銀陸拾
柒兩貳錢康熙拾伍年裁銀陸拾柒兩貳錢於
康熙貳拾年奉復實支銀壹百叁拾肆兩肆錢
遇閏加銀拾貳兩順治玖年會議裁銀捌錢康
熙拾肆年全裁銀壹拾壹兩貳錢

民壯伍拾名每年工食銀叁百陸拾兩順治玖年

會議裁銀陸拾兩又康熙拾肆年裁銀壹百伍
拾兩康熙拾伍年全裁銀壹百伍拾兩於康熙
貳拾年奉復實支銀叁百兩

遇閏加銀叁拾兩順治玖年會議裁銀伍兩康
熙拾肆年全裁銀貳拾伍兩

燈夫肆名每年工食銀貳拾捌兩捌錢順治玖年
會議裁銀肆兩捌錢又康熙拾肆年裁銀拾貳
兩康熙拾伍年全裁銀拾貳兩於康熙貳拾年
奉復實支銀貳拾肆兩

遇閏加銀貳兩肆錢順治玖年會議裁銀肆錢
康熙拾肆年全裁銀貳兩
看監禁卒捌名每年工食銀伍拾柒兩陸錢順治
玖年會議裁銀玖兩陸錢又康熙拾柒年裁銀
貳拾肆兩於康熙貳拾年奉復實支銀肆拾捌
兩
遇閏加銀肆兩捌錢順治玖年會議裁銀捌錢
康熙拾肆年全裁銀肆兩
修理監倉每年銀貳拾兩康熙拾肆年裁銀拾兩

康熙拾伍年全裁銀拾兩
轎傘扇夫柒名每年工食銀伍拾兩肆錢順治玖
年會議裁銀捌兩肆錢又康熙拾肆年裁銀貳
拾壹兩康熙拾伍年全裁銀貳拾壹兩於康熙
貳拾年奉復實支銀肆拾貳兩
遇閏加銀肆兩貳錢順治玖年會議裁銀柒錢
康熙拾肆年全裁銀叁兩伍錢
庫書壹名每年工食銀拾貳兩順治玖年會議裁
銀陸兩康熙元年奉文又裁銀陸兩

遇閏加銀壹兩順治玖年會議裁銀伍錢康熙
元年奉文又裁銀伍錢

倉書壹名每年工食銀拾貳兩順治玖年會議裁
銀陸兩康熙元年奉文又裁銀陸兩
遇閏加銀壹兩順治玖年會議裁銀伍錢康熙
元年奉文又裁銀伍錢

庫子肆名每年工食銀貳拾捌兩捌錢順治玖年
會議裁銀肆兩捌錢又康熙拾伍年裁銀拾貳
兩康熙拾柒年全裁銀拾貳兩於康熙貳拾年

奉復實支銀貳拾肆兩

遇閏加銀貳兩肆錢順治玖年會議裁銀肆錢
康熙拾肆年全裁銀貳兩

斗級肆名每年工食銀貳拾捌兩捌錢順治玖年
會議裁銀肆兩捌錢又康熙拾伍年裁銀拾貳
兩康熙拾柒年全裁銀拾貳兩於康熙貳拾年
奉復實支銀貳拾肆兩

遇閏加銀貳兩肆錢順治玖年會議裁銀肆錢
康熙拾肆年全裁銀貳兩

典史俸每年銀叁拾壹兩伍錢貳分康熙拾伍年
全裁於康熙貳拾年奉復仍實支銀叁拾壹兩
伍錢貳分
遇閏加銀貳兩陸錢貳分陸厘陸毫陸絲順治
拾陸年奉文全裁
書辦壹名每年工食銀柒兩貳錢順治玖年會議
裁銀壹兩貳錢康熙元年奉文全裁銀陸兩
遇閏加銀陸錢順治玖年會議裁銀壹錢康熙
元年奉文全裁銀伍錢

門子壹名每年工食銀柒兩貳錢順治玖年會議
裁銀壹兩貳錢又康熙拾肆年裁銀叁兩康熙
拾伍年全裁銀叁兩於康熙貳拾年奉復實支
銀陸兩
遇閏加銀陸錢順治玖年會議裁銀壹錢康熙
拾肆年全裁銀伍錢
皂隸肆名每年工食銀貳拾捌兩捌錢順治玖年
會議裁銀肆兩捌錢又康熙拾肆年裁銀拾貳
兩康熙拾伍年全裁銀拾貳兩於康熙貳拾年

奉復實支銀貳拾肆兩

遇閏加銀貳兩肆錢順治玖年會議裁銀肆錢

康熙拾肆年全裁銀貳兩

馬夫壹名每年工食銀柒兩貳錢順治玖年會議

裁銀壹兩貳錢又康熙拾肆年裁銀叁兩康熙

拾伍年全裁銀叁兩於康熙貳拾年奉復實支

銀陸兩

遇閏加銀陸錢順治玖年會議裁銀壹錢康熙

拾肆年全裁銀伍錢

教諭俸每年銀叁拾壹兩伍錢貳分康熙拾年奉

裁嗣於奏聞錢糧入不敷出等事案內奉文復

設但復官不復俸其應支俸銀在於原編訓導

俸錢之內分支

遇閏加銀貳兩陸錢貳分陸厘陸毫陸絲康熙

叁年奉裁

訓導俸每年銀叁拾壹兩伍錢貳分

遇閏加銀貳兩陸錢貳分陸厘陸毫陸絲順治

拾陸年奉文全裁

齋夫陸名每年工食銀柒拾貳兩康熙參年奉裁
教諭應裁參名銀叁拾陸兩又康熙拾肆年裁
銀拾捌兩康熙拾伍年全裁銀拾捌兩於康熙
貳拾年奉復實支銀叁拾陸兩

遇閏加銀陸兩康熙參年奉裁教諭應裁參名
銀叁兩康熙拾肆年全裁銀叁兩

膳夫貳名每年工食銀肆拾兩順治拾肆年新裁
銀貳拾陸兩陸錢陸分陸厘陸毫又康熙拾肆
年裁銀陸兩陸錢陸分陸厘柒毫康熙拾伍年

全裁銀陸兩陸錢陸分陸厘柒毫於康熙貳拾
年奉復實支銀壹拾叁兩叁錢叁分叁厘肆毫
遇閏加銀叁兩叁錢叁分叁厘叁毫順治拾肆
年新裁銀貳兩貳錢貳分貳厘貳毫康熙拾肆
年全裁銀壹兩壹錢壹分壹厘壹毫

門斗伍名掌教參名分教貳名每年工食銀叁拾
陸兩康熙參年奉裁教諭應裁參名銀貳拾壹
兩陸錢又康熙拾肆年裁銀柒兩貳錢康熙拾
伍年全裁銀柒兩貳錢於康熙貳拾年奉復實

支銀壹拾肆兩肆錢

遇閏加銀叁兩康熙叁年奉裁教諭銀壹兩捌

錢康熙拾肆年全裁銀壹兩貳錢

學書壹名每年工食銀柒兩貳錢康熙元年奉裁

遇閏加銀陸錢康熙元年奉裁

教官貳員喂馬草料每年銀貳拾肆兩康熙叁年

奉裁教諭應裁銀拾貳兩康熙拾肆年裁銀陸

兩康熙拾伍年全裁銀陸兩

遇閏加銀貳兩康熙叁年奉裁教諭應裁銀壹

兩康熙拾肆年全裁銀壹兩

廩生貳拾名月糧每年銀壹百玖拾貳兩順治拾

肆年新裁銀壹百貳拾捌兩康熙貳年奉文又

裁銀陸拾肆兩康熙貳拾肆年奉文廩生餼糧

准支叁分之壹復銀陸拾肆兩

遇閏加銀拾陸兩順治拾肆年新裁銀拾兩陸

錢陸分陸厘陸毫柒絲康熙貳年奉文又裁銀

伍兩叁錢叁分叁厘叁毫叁絲

學院科歲貳考并本縣季考生員試卷花紅銀壹

拾伍兩康熙拾叁年奉文裁半銀柒兩伍錢康熙拾肆年裁銀柒兩伍錢

文廟啓聖名宦鄉賢春秋貳大祭銀肆拾兩康熙拾柒年裁銀貳拾兩於康熙拾玖年奉復仍實支銀肆拾兩

社稷山川風雲雷雨城隍等神春秋貳大祭銀叁拾兩康熙拾柒年裁銀拾伍兩於康熙拾玖年奉復仍實支銀叁拾兩

三小祭無祀鬼神銀拾兩康熙拾柒年裁銀伍兩

於康熙拾玖年奉復仍實支銀拾兩

春牛芒神桃符門神酒席銀伍兩順治拾肆年新

裁銀貳兩康熙拾伍年全裁銀叁兩

鄉飲貳次酒禮銀拾兩順治拾肆年新裁銀伍兩

又康熙拾伍年全裁銀伍兩於康熙貳拾貳年

奉復仍實支銀伍兩

朔望行香紙燭銀壹兩順治玖年會議全裁

曆日銀叁兩康熙拾伍年裁銀壹兩伍錢於康熙

貳拾年奉復仍實支銀叁兩

修理察院公館家伙等項銀拾兩順治玖年會議
全裁

看守察院門子貳名每年銀壹拾貳兩康熙拾肆
年裁銀陸兩康熙拾伍年全裁銀陸兩於康熙
貳拾年奉復仍實支銀拾貳兩
遇閏加銀壹兩康熙拾肆年全裁
襍支供應過往上司下程中伙坐飯等項銀貳百
兩順治拾叁年奉文裁減銀陸拾陸兩陸錢陸
分陸厘陸毫順治拾肆年新裁銀壹百叁拾叁

兩叁錢叁分叁厘肆毫

驛站工料銀壹千捌百叁拾壹兩捌錢貳分壹厘
玖毫貳絲康熙柒年奉文抵作起運訖

遇閏加銀壹百伍拾貳兩陸錢伍分叁厘康熙
柒年奉文抵作起運訖

關城驛豆銀陸拾貳兩叁錢康熙拾肆年酌議全
裁

恒山等玖驛草銀肆拾叁兩捌錢陸分肆厘玖毫
貳微康熙拾肆年酌議全裁

走遞馬拾貳匹草料銀貳百捌拾捌兩順治拾叁
年奉文裁減銀玖拾陸兩康熙拾肆年半裁銀
玖拾陸兩康熙貳拾年奉文復銀肆拾捌兩實
支銀壹百肆拾肆兩
遇閏加銀貳拾肆兩順治拾叁年奉文裁減銀
捌兩康熙拾肆年半裁銀捌兩康熙貳拾年奉
文復銀肆兩實支銀壹拾貳兩
接遞皂隸肆名每年工食銀貳拾肆兩順治拾叁
年奉文裁減銀捌兩康熙拾肆年全裁銀拾陸

兩康熙貳拾年奉文復銀捌兩實支銀捌兩
遇閏加銀貳兩順治拾叁年奉文裁減銀陸錢
陸分陸厘陸毫陸絲康熙拾肆年全裁銀壹兩
叁錢叁分叁厘叁毫肆絲康熙貳拾年奉文復
支銀陸錢陸分陸厘陸毫柒絲
槓轎夫壹拾捌名每年工食銀壹百捌拾兩順治
拾叁年奉文裁減銀陸拾兩康熙拾伍年全裁
銀壹百貳拾兩於康熙貳拾年奉復銀陸拾兩
實裁銀陸拾兩實支銀陸拾兩

遇閏加銀壹拾肆兩玖錢玖分玖厘玖毫玖絲
順治拾叁年奉文裁減銀肆兩玖錢玖分玖厘
玖毫玖絲康熙拾伍年全裁銀拾兩於康熙貳
拾年奉復銀伍兩實裁銀伍兩實支銀伍兩
吹鼓手肆名每年工食銀貳拾肆兩康熙拾肆年
裁銀拾貳兩康熙拾伍年全裁銀拾貳兩於康
熙貳拾年奉復仍實支銀貳拾肆兩
遇閏加銀貳兩康熙拾肆年全裁
各舖司兵拾名每年工食銀陸拾兩康熙拾柒年

裁銀叁拾兩於康熙貳拾年奉復仍實支銀陸
拾兩
遇閏加銀伍兩康熙拾肆年全裁
更夫伍名每年工食銀貳拾肆兩康熙拾伍年全
裁於康熙貳拾年奉復仍實支銀貳拾肆兩
遇閏加銀貳兩康熙拾肆年全裁
火夫拾名每年工食銀肆拾捌兩康熙拾伍年全
裁於康熙貳拾年奉復仍實支銀肆拾捌兩
遇閏加銀肆兩康熙拾肆年全裁

孤貧肆拾伍名口月糧共銀壹百貳拾玖兩陸錢
康熙拾柒年裁銀陸拾肆兩捌錢於康熙拾玖
年奉復仍實支銀壹百貳拾玖兩陸錢
遇閏加銀拾兩捌錢康熙拾柒年裁銀伍兩肆
錢於康熙拾玖年奉復仍實支銀拾兩捌錢
冬衣布花銀壹拾兩肆錢康熙拾柒年裁銀伍兩
貳錢於康熙拾玖年奉復仍實支銀拾兩肆錢
遇閏加銀捌錢陸分陸厘陸毫康熙拾叁年查
出布花不應扣閏奉文全裁

貳年壹辦

貢生盤費花紅旗匾銀肆拾兩每年銀貳拾兩康
熙拾肆年裁銀拾兩康熙拾伍年全裁銀拾兩
於康熙貳拾年奉復仍實支銀貳拾兩

叁年壹辦

朝

觀造冊紙張銀伍兩每年銀壹兩陸錢陸分陸厘陸毫
柒絲順治拾肆年奉文新裁遇朝

觀年免裁歷年因官吏既未入

觀仍入起運項下起解朝

觀官吏盤費銀貳拾伍兩內典史銀貳拾兩隨朝吏銀

伍兩每年銀捌兩叁錢叁分叁厘叁毫叁絲順

治拾肆年奉文新裁遇朝

觀年免裁歷年因官吏既未入

觀仍入起運項下起解

科舉生員賓興花紅酒席銀叁拾陸兩每年銀拾

貳兩順治拾肆年裁銀陸兩康熙拾肆年裁銀

叁兩康熙拾伍年全裁銀叁兩

會試舉人每名盤費銀壹拾捌兩每年銀陸兩康

熙拾肆年裁銀叁兩康熙拾伍年全裁銀叁兩

於康熙貳拾年奉復仍實支銀陸兩康熙拾年

奉文為請酌定文武等事案內文武舉人按名

均分

新中舉人每名坊價銀捌拾兩每年銀貳拾陸兩

陸錢陸分陸厘陸毫陸絲康熙拾肆年裁銀拾

叁兩叁錢叁分叁厘叁毫叁絲康熙拾伍年全

裁銀拾叁兩叁錢叁分叁厘叁毫叁絲於康熙

貳拾年奉復仍實支銀貳拾陸兩陸錢陸分陸厘陸毫陸絲

新中進士每名坊價銀壹百兩每年銀叁拾叁兩叁錢叁分叁厘叁毫肆絲康熙拾肆年裁銀拾陸兩陸錢陸分陸厘陸毫柒絲康熙拾伍年全裁銀拾陸兩陸錢陸分陸厘陸毫柒絲於康熙貳拾年奉復仍實支銀叁拾叁兩叁錢叁分叁厘叁毫肆絲

新中武舉人每名花紅旗匾銀拾兩每年銀叁兩

叁錢叁分叁厘叁毫肆絲康熙拾肆年裁銀壹兩陸錢陸分陸厘陸毫柒絲康熙拾伍年全裁銀壹兩陸錢陸分陸厘陸毫柒絲於康熙貳拾年奉復仍實支銀叁兩叁錢叁分叁厘叁毫肆絲

新中武進士每名花紅旗匾銀貳拾兩每年銀陸兩陸錢陸分陸厘陸毫柒絲康熙拾肆年裁銀叁兩叁錢叁分叁厘叁毫叁絲伍忽康熙拾伍年全裁銀叁兩叁錢叁分叁厘叁毫叁絲伍忽

於康熙貳拾年奉復仍實支銀陸兩陸錢陸分
陸厘陸毫柒絲

會試膳錄書手工食銀拾貳兩每年銀肆兩康熙
拾肆年裁銀貳兩康熙拾伍年全裁銀貳兩於
康熙貳拾年奉復仍實支銀肆兩

順天鄉試貢院供給銀肆兩每年銀壹兩叁錢叁
分叁厘叁毫叁絲康熙拾肆年裁銀陸錢陸分
陸厘陸毫陸絲伍忽康熙拾伍年全裁銀陸錢
陸分陸厘陸毫陸絲伍忽

凡遇鄉會試年分如中式名多照數徵給

以上起運折色滴珠路費腳價及實解支存留
等項共銀玖千柒百陸拾捌兩玖錢貳分叁
厘伍毫捌絲壹忽柒微捌纖陸沙壹塵柒埃
肆渺肆漠玖湖貳虛壹澄肆清閏月銀肆百
伍兩陸錢伍分柒厘伍毫壹絲肆忽

戶部額外不在地丁之內各項襍稅共銀壹百陸拾
玖兩陸錢捌分玖厘

房地稅銀柒拾柒兩伍錢

牛驢稅銀肆兩叁錢叁分貳厘

猪羊稅銀貳兩伍錢壹分肆厘

牙帖稅銀拾貳兩陸錢

康熙拾陸年議增稅契銀貳拾兩伍錢

又康熙拾陸拾柒兩年議增牙襍稅銀玖兩柒

錢貳分叁厘

又康熙拾捌年議增牙帖稅銀貳兩伍錢貳分

康熙拾玖年新增酒稅銀拾兩

當稅銀叁拾兩

工部額外

匠價銀柒兩貳錢

以上悉照康熙貳拾貳年賦役全書

附錄
鹽課

原額壹千陸百引康熙拾捌年加增陸百肆拾玖

引今現行貳千貳百肆拾玖引

又萬曆九年清丈馬場籽粒記

碑在縣西北隅

遵旨丈田畝清浮糧以蘇民困事本縣于六場牧
馬草場地清丈明白備造文冊申訖各給由帖今

將舊額新增地畝並起科銀兩總撒數目復立石公堂鐫刻于後用垂不朽欽此

一六場牧馬草場地舊額白地五十三頃三十七畝九分四厘三毫原征籽粒銀四十九兩六錢八分七厘一毫四絲六忽新增籽粒銀三十八兩零二厘九毫九絲八忽三微今次實丈白地五十三頃四十七畝一分一厘七毫三絲五忽一微中下起科中地一十二頃五十七畝九分七厘一毫七忽二微每畝征銀二分三厘二毫三絲四忽共該

銀六十兩八錢零五厘四絲七忽五微下地四十一頃八十九畝一分四厘六毫二絲七忽九微每畝征銀一分四厘五毫一絲五忽共該銀六十兩零八錢零五厘四絲七忽五微中下二頃共征銀八十七兩七錢零九厘一毫四絲四忽三微北孟村場中地六十四畝六分三厘五毫每畝征銀二分五厘二毫三絲四忽共銀一兩五錢一厘一毫一三絲九微下地九頃八十九畝二分七厘一毫一絲每畝征銀一分四厘五毫一絲五忽共銀一十

四兩三錢五分六厘二毫七絲急霜村東場中地
四頃一十三畝一分八厘五毫七絲零三微每畝
征銀二分三厘二毫三絲四忽共銀九兩五錢九
分九厘九毫九絲九忽下地六頃五十二畝零二
厘五毫七絲七忽五微每畝徵銀一分四厘五毫
一絲五忽共銀九兩四錢六分五厘一毫五絲七
忽急霜村西場中地二頃六十九畝五分二厘三
毫每畝征銀二分二厘一毫三絲四忽共銀六兩
二錢六分三厘九絲七忽三微下地十頃二十六

畝六分五厘七毫四絲每畝征銀一分四厘五毫
一絲五忽共銀一十兩四錢零三厘二毫八絲一
忽二微崇禮村場中地一頃一十九畝每畝征銀
一分三厘二毫三絲四忽共銀二兩七錢六分四
厘八毫零七忽六微下地四頃二十五畝六分三
厘一毫每畝征銀一分四厘五毫一絲五忽共銀
六兩零七分八厘五毫三絲四忽黑沙村場中地
二頃九十一畝六分二厘八毫每畝征銀二分三
厘二毫三絲四忽共銀六兩七錢七分四厘九毫

臨城縣志 卷二
八絲五忽下地八頃一十八畝八厘二毫每畝征銀一分四厘五毫一絲五忽共銀一十一兩八錢七分四厘五毫四絲七忽三微南磬石村場中地無下地五頃八十七畝四分七厘九毫每畝征銀一分四厘五毫一絲五忽共銀八兩五錢二分七厘二毫五絲八忽

萬曆十年壬午冬十二月知縣易體乾立石

又萬曆十年清丈田糧記

碑在縣堂西北隅

遵旨清丈地畝事竣造魚鱗文冊由帖復立石公


堂鐫原額徵糧新丈地畝總撒數目用垂不朽欽此計縣原額征糧二千二百八十一石七斗一升二合新丈上中下小白地共四千三百三十五頃二十四畝二分足原額徵糧二千二百八十一石七斗一升二合共征夏稅起運小麥三百九十七石六升存留小麥三百一十四石六斗零二合秋糧起運粟米八百九十五石四斗存留粟米六百七十四石一斗一升馬場起運谷草二萬七千五百三十九束存留谷草一千四百六十二束一分

六厘三毫三絲四忽上小白地四百九十一頃三十四畝一分四厘五毫九絲一忽每畝該夏稅起運小麥一合七勺八抄五圭八粟三粒存留小麥一合四勺八撮七圭五粟五粒秋糧起運粟米四合九撮八圭六粟三粒存留粟米三合一抄八撮八圭八粟四粒馬草起運谷草一分二厘三毫三絲二忽七微三纖存留谷草六毫五絲四忽八微中小白地一千三百一十六頃五十畝五分一厘九毫一絲五忽每畝該征夏稅起運小麥一合二

勺一撮八圭九粟四粒存留小麥九勺五抄九圭四粟二粒秋糧起運粟米二合七勺六撮六圭七粟六粒存留粟米二合三抄七撮七圭四粟六粒馬草起運谷草八厘三毫二絲四忽六微八纖存留谷草四毫一絲一忽七微六纖下小白地二千五百二十七頃三十九畝五分三厘四毫九絲四忽每畝該征夏稅起運小麥六勺九圭四粟七粒存留小麥四勺七抄五撮四圭五粟六粒秋糧起運粟米一合三勺五抄三撮三圭三粟八粒存留

粟米一合一抄八撮八圭七粟三粒馬草起運谷
草四厘一毫六絲二忽三微四纖存留谷草二毫
二絲一忽


萬曆十年十月署縣事趙州判官梁 檣前知縣
余啓元知縣易體乾同立石



臨城縣志

四三

內閣文庫		
番號	漢	14433
冊數	6 (3)	
函號	四	163 1



臨城縣志卷之三

官師志

官制

知縣一員

知縣事長洲宋廣業重修

主簿一員

明嘉靖四十年裁

典史一員

儒學教諭一員

訓導一員

明初設二員隆慶元年裁革一員

陰陽學訓術一員

醫學訓科一員

僧會司僧會一員

歷官

知縣 宋金名縣令元初名達魯花赤又名縣令明知縣大清因之

宋

張守度 天禧二年由太子中允任

王日華 天禧五年任陞屯田郎中

陸遠 天聖二年八月以大理丞任陞屯田郎中知太平縣

步可則 天聖四年任

崔維清 天聖六年任

鄭知白 天聖九年任陞員外

周道化 明道二年任

白正元 景祐元年任

薛長孺 景祐三年任教化淪落境內肅然陞員外郎

朱日新 景祐四年任

范褒 寶元二年任

焦盛 康定二年任陞王府翊善

齊恢 慶曆二年任

劉嘉聞 慶曆六年任

孟瑜 慶曆八年任

王士宗 皇祐元年以大理寺丞任

馬著 皇祐四年以大理寺丞任

范褒 至和二年以大理寺丞任

王易 嘉祐四年任

馬奎 嘉祐七年任

王彥遠 治平二年任

高旦 治平三年任

田處恭 熙寧二年任

崔禎 熙寧四年任

朱升 熙寧七年任

鄭宗士 元豐元年任

畢綬 元豐四年任

趙安民 元豐五年任

劉漸 元豐八年任

杜續 元祐三年三月九日以宣德郎任

金

何烈 承安二年任

元

竇公奴 畏吾人由進士
元統二年任

閻 閻 高昌人至正十五年任
以才堪治劇調南宮

山 羊 真定人

以上稱達魯花
赤後名縣令

楊 珪 字均玉平棘人先任翰林院某官至元元年來尹茲邑
刑清政簡邑民稱譽

楊思忠 至元元年任

呂德良 大德十年任

李世基 大定元年任

王炳文 至和元年任

賈思恭 易州人至
順二年任

尹 澄 元統元年任

李 仲 至正六年
任見名宦

李 爰 至正十五年任

安 耀

明

蔡 鏞 洪武九年任

王 太 洪武十七年任

張 綱 磁州人由舉人
永樂七年任

李 勉 宣德二年任

阮居仁 正統二年
任見名宦

李永昌 河南西平人由舉人景泰七年任重修學校縣治倉廩
廟宇城池

張 佐 成化六年任
見名宦

王 理 浙江山陰人由監生成
化八年任新增三社

劉 經 雲南楚雄府人由舉人成化十一年任作興學校弭盜
安民

章忱

成化十年任見名宦

張清

成化二十年任見名宦

郭賓

遼東瀋陽人弘治六年任以才堪治劇改知樂城

高舉

河南原武人由監生弘治十年任

潘銓

南直隸合肥人由監生弘治十一年任重修祠宇見碑記

徐繪

河南寧陵人由監生正德二年任

李璿

山西高平人由舉人正德七年任新修縣治

王希佑

字汝弼山東濟寧人由舉人正德七年任修理儒學

冒鵬

南直隸如皋人由監生嘉靖二年任

徐官

浙江蕭山人由進士嘉靖三年任均賦勸農境內稱理陞主事有去思碑趙州學正余龍記

楊季芸

山西大同人由舉人嘉靖七年任

張鸞

陝西寧羗州人由監生嘉靖九年任繕修學校政尚寬簡改綿州判官民多思之

党承美

嘉靖十一年任見名宦

馬瑞

南直隸揚州人嘉靖十七年任

李獻

山東泗水人由監生嘉靖十九年任

鄧鳳

河南長葛人由舉人嘉靖二十年任修理城池建北郭門樓教諭薛相記

劉皞

嘉靖二十三年任見名宦

陸賓

山西應州人由監生嘉靖二十九年任不憚勤勞務修實政以不善事長吏甫一載罷去

王永興

山西蒲州人由舉人嘉靖三十年任政令嚴明德性溫潤三載政成恩威並著人士稱之曾修縣志

張冲霄

嘉靖三十五年任見名宦

李大觀

陝西武功人由舉人嘉靖三十七年任以被論去

杜一山

湖廣麻城人由舉人嘉靖三十九年任乞休回籍

王之弼

嘉靖三十九年任見名宦

馬時才

山西安邑人由舉人嘉靖四十三年任降州判官

高常

廣西臨桂人由舉人隆慶元年任降無為州判官

鄧之松

隆慶三年任邑人趙進修為作去思碑記
見名宦

王廷孚

山東黃縣人萬曆三年任小心謹畏操守清白五年卒
于官士民哀之

余啓元

萬曆六年任以不善諛迎改教去民刻十好歌頌德
見名宦

易體乾

遼東海州人由歲貢萬曆十年任考察回籍

彭化鳳

山東單縣人由歲貢萬曆十四年任緩刑弛罰操守潔
白後以不稱代去民立碑思之教諭洪邦政記

孫許

山東昌邑人由恩貢萬曆十五年任甫八月以丁母憂
去有去思碑副使岳凌霜撰

吳典學

山東恩縣人由歲貢萬曆十六年任十八年降調閒散
竟高尚不出

羅士光

陝西洵陽縣人由歲貢萬曆十八年任十九年改寧州
學正

楊應丙

號明泉陝西延安衛人由舉人萬曆二十年任調轉江
寧知縣見名宦

劉汝清

號文沼陝西靖邊所人由選貢萬曆二十二年任銳然
有為惜以病改教

程鵬搏

字我圖湖廣嘉魚縣人由選貢萬曆二十三年任修葺
學宮縣治增築石隄設義學修縣志竟以被論去

盛治徵

號貞所浙江嘉善人由舉人萬曆二十七年任修石城
南面及北門易石

侯加邕

山西解州人由舉人萬曆三十二年任卒于官

沈伉

河南洛陽人由選貢萬曆三十四年任

任光統

號赤坡山西蒲州人由進士萬曆三十七年任年飢能
賑全活甚多調繁獲鹿陞至按察司副使

王佐才

號象明河南洛陽人由舉人萬曆三十八年任慈祥愷
悌荒政畢舉陞趙州知州

莊祖詔

四川成都人由舉人萬曆四十三年任平易近人陞
府同知

劉永茂

號彥廷遼東瀋陽衛人由舉人萬曆四十四年六月任

何廷樞

號環應廣西富川人由進士萬曆四十六年二月任調繁栢鄉縣官至侍御史

張渙如

號岱輿山東棠邑人由歲貢博學能詩以老致仕

郭師游

陝西徽州人由舉人天啓二年八月任卒于官

劉光宇

號念午四川宜賓人由舉人天啓三年六月任實心實政仁惠清廉

鄧紹禹

號龍門廣東順德人由舉人天啓六年十二月任調繁盧龍縣

高 灝

號心印山東膠州人由選貢崇禎三年十月任剛果明敏綠林歛迹丁外艱去

于日旺

號仰台遼東海州人由選貢崇禎五年十二月任時值流寇侵城防禦有方用砲退賊士民勒碑記之

井東星

陝西朝邑人由舉人崇禎七年任門守之方後先莫比然以地方失事去

汪時濟

雲南昆明人由舉人崇禎八年六月任

王德璋

山東歷城人由恩貢崇禎九年八月任

蕭時勉

廣西臨桂人由舉人崇禎十一年二月任城陷死難祀名宦

韋自省

四川什邡人由恩貢崇禎十二年二月任

高儒斗

山西永寧人由選貢崇禎十三年閏正月任

茹鳴盛

遼東前屯衛人由舉人崇禎十三年十一月任

王繼祖

字永年號恒竹山西岢嵐人由舉人崇禎十四年四月任

大清

渠淙海

字向若號興龍山西天城衛人由貢生順治二年任陞慶陽同知

胥庭清

字永公號岵青江寧人由進士順治四年任以正文體革

王國柱

號翰宇遼東前屯衛人由貢生順治五年任

李維城

奉天人廕生順治七年任卒于官

陳 謙

號吉菴河南祥符人由舉人順治九年任陞同知

高 科

號魁軒遼東瀋陽人由貢生順治十年任十四年陞雲南上思州知州在縣靖盜有功

許元孝

浙江餘姚人由舉人順治十四年任註誤回籍 張蜚英 浙江慈谿人由貢生順治十年任卒于官

李如泌

字鄴臣四川井研人由舉人順治十七年以諱盜革 曹際飛 字子魚江南青浦人由貢生康熙年任丁憂回籍

陳殿邦

號三銘福建長清人由舉人康熙五年九月任丁憂回籍

崔廷瑜

號容齋順天盧龍籍由舉人康熙十二年二月任陞中書舍人

袁之龍

號登菴山陰人貢生康熙十七年任告病回籍 雷振乾 陝西同州人由舉人康熙二十一年任卒于官

宋廣業

字性存號澄溪江南崇明籍長洲人由拔貢教習考授知縣康熙二十一年任實心愛民修學宮闢雲路立義學修

石堤捍大水賑濟飢民均沾實惠又修志書以垂不朽康熙二十五年丁外艱回籍去任後士民奉長生位于功德祠內

主簿

宋

李公權

治平四年任

金

麻 級

承安五年任

囁

里

太和三年任

賈

灝

太和十年任

元

焦友直

大德十年任

劉 原

泰定元年任

劉 英

高邑人至順二年任

馮 安

栢鄉人至順年任有善政後陞栢鄉尹有張鎮周風

失判不花

遼陽人至正十五年任見名宦

帖木耳

至正二十五年任

明

郭珍

至元間以主簿兼尉

張

裕

至元二十四年以主簿兼尉

田稟

陝西府谷人由監生宣德五年任

陳裔

四川巴縣人由監生正統二年任

杜允

山西遼州人由監生正統三年任

張軫

南直隸通州人由監生景泰三年任

馬驥

山西河曲人由監生景泰十年任

張瓚

山西孝義人由監生天順元年任

張信

陝西涇陽人由監生天順五年任

馬山

山西陽城人由監生成化元年任

梁宏

山東德州人由監生成化八年任

劉芳

山東文登人由監生成化十二年任

馬厚

山西文水人由監生成化十五年任

陳珏

浙江奉化人由監生成化十六年任

楊弘

山東泰安州人由監生成化十八年任

周益

江西弋陽人由監生成化二十年任

羅聽

遼東瀋陽人由監生弘治五年任

解芳

山東棲霞人由監生弘治十一年任

王豪

山東濮州人由監生弘治十五年任

張俊

山東賓州人正德四年任見名宦

范奎

山西榮河人由監生正德七年任

張瑛

山東齊河人由吏員正德十二年任

林海

河南溫縣人由吏員正德十六年任

姬冕

山西靜樂人由監生嘉靖三年任

秦林

山西鎮西衛人由監生嘉靖五年任有修馬政去思碑

朱堂

山東聊城人由監生嘉靖十四年任

王鳳

南直隸儀真人由例貢嘉靖二十三年任

鄭宗仁

四川人由監生嘉靖二十四年任

逯勤

河南人由監生嘉靖二十六年任

王濟美

山西平順人由監生嘉靖三十一年任見名宦

馮希紹

山西保德州人由監生嘉靖三十四年任致仕去

程九萬

黃元吉

陝西清水人監生嘉靖四十年任卽于是年裁缺

典史

宋金及元初名縣尉元大德以後名典史

宋

漢傑

治平二年任

金

王景顏

承安四年任

陳琳

太和六年任

褚斷義重慶元年任
梁漑貞祐二年任

元

劉清

大德八年任

張繼祖

大定元年任

曹讓

真定人至順三年任

楊名

至正十年任

周叔善

至正二十年任
以後稱典史

張誠

大德六年任

孟秉溫

長清人至順二年任

李光祖

至正十五年任

明

梁郁

山東禹城人正統二年任

郭敏

河南鄆陵人正統十二年任

王克勤

陝西伏羌人景泰元年任創講堂

焦榮

河南扶溝人景泰二年任

王鐸

山東長山人成化元年任

衛清

南直隸無錫人成化三年任

劉琳

山東歷城人成化九年任

馬德

山東博平人成化十五年任

扈禮

山東曹縣人弘治二年任

程富

山東禹城人弘治六年任

于景芳

山東黃縣人弘治十年任

吉亨

山西蒲州人弘治十八年任

張俊

與主簿死難者同名同載正德四年任恐誤

袁鳳

河南登封人正德七年任

黃琦

陝西咸寧人嘉靖元年任

葉廷

浙江黃岩人嘉靖四年任

江學溢

湖廣麻城人嘉靖九年任

馮璉

山東長清人嘉靖十五年任

姜仲用

山東齊河人嘉靖二十四年任

李世臣

山東德州人嘉靖二十七年任

梁縉

山東濟寧人嘉靖三十一年任

吳電

陝西涇陽人嘉靖三十六年任

郭瀛洲

河南磁州人嘉靖四十四年任陞倉大使

王泮

河南汜水人隆慶三年任

孟仕

陝西渭南人萬曆三年任陞主簿

陳佐

湖廣應城人萬曆四年任割俸以修祠宇

李有仁

江西豐城人萬曆六年任

宋平穩

河南汲縣人萬曆十二年任

施嘉祥

南直隸南陵人萬曆十四年任勤慎能官陞倉大使

李肇唐

南直隸江都人萬曆十六年任

鄭在顯

福建莆田人萬曆十九年任

曹師彬

山東高唐州人萬曆十九年任嚴毅有為乞休回籍

馬崇魁

山東滋陽人萬曆二十二年任安靜不擾

鍾良玉

浙江歸安人嘉曆二十三年任廉能有聲陞武昌府倉大使民立碑思之

孟養吉

山東德州人萬曆二十五年任

宮磐

山東東阿人萬曆二十七年任精明慈仁

陳大恕

南直隸揚州人萬曆二十九年任

魏鍾寧

郝九霄

王詔

高如斗

直隸鎮江人萬曆三十年任

周士遴

廣西人萬曆四十一年任

姚繼益

浙江餘姚人萬曆四十年任

劉文俊

南直隸蘇州人天啓二年任

謝良臣

湖廣

郭同瑜

浙江人天啓四年任

周文貴

陝西漢中人崇禎二年任

王夢桂

陝西華州人崇禎〇年任

楊繼卿

福建福安人崇禎五年任殉節祀名宦

袁弘宴 陝西富平人崇禎六年任

高出羣 河南新鄭人崇禎七年任

趙世禎 山東滕縣人崇禎十年任明年城陷死節

王端甫 陝西涇陽人崇禎十二年任
曹文科 陝西咸寧人崇禎十四年任

潘國鼎 陝西安化人崇禎十六年任

大清

胡文禎 江南桐城人順治二年任
金弘達 浙江山陰人順治四年任

彭烈 陝西富平人順治○年任陞巡檢
徐卿 江南安慶人順治○年任陞大使

何鳴鳳 浙江紹興人順治十年任
胡公采 浙江山陰人康熙二年任在任十七年陞巡檢

胡承驤 江南句容人康熙十年任丁外艱
時雨濟 江南廣德人康熙二十四年任

元

教諭

王執中 槐陽人由舉人
王克寬 承順二年任

栢烏臺 由舉人至正十一年任
梁師閔 至正十五年任

扈彥鴻 至正十七年任
李元甫 至正二十一年任

明

馮靖 南直隸歙縣人由舉人正統元年任行取考選浙江道監察御史

盧源 南直隸泰州人由舉人正統九年任
張豫 浙江錢塘人由舉人天順元年任

彭瑀 江西萍鄉人成化元年任
吳清 浙江歸安人成化八年任

張弘

浙江人由舉人成化十五年任

吳琪

浙江錢塘人成化十七年任

鄧寶

福建沙縣人成化二十年任

郭禮

河南洛陽人弘治元年任

賈熹

陝西寶雞人弘治五年任

雷文

河南儀封人弘治九年任

周誠

山東掖縣人弘治十七年任

李楨

浙江縉雲人正德八年任

翟秀

河南襄城人正德十二年任

張雲達

山西陽曲人由舉人嘉靖五年任精于舉業勤于訓人陞清苑知縣

周澡

陝西乾州人嘉靖十年任

曹塘

河南陽武人嘉靖十二年任

薛相

南直隸懷遠人嘉靖二十一年任見名宦

鄭文

浙江嵯縣人嘉靖二十八年任見名宦

何鳴岐

山東高苑人嘉靖三十一年任

張蜀良

四川成都人由舉人嘉靖三十三年任

郭近秀

山東人嘉靖三十七年任

袁大賓

陝西慶陽人嘉靖四十年任

盧國珍

山西平陽府人嘉靖四十二年任

萬售

山西岢嵐人嘉靖四十五年任勤教能文陞順德府學教授

任弘道

山西汾州人隆慶三年任

晉福

河南太康人萬曆元年任居官有守陞周府教授

張雲路

雲南趙州人萬曆三年任問學博洽考課惟勤卒于官

李向陽

山東樂陵人萬曆六年任陞山東東平州學正

陳可大

廣東瓊山人萬曆九年任

魏鍾寧

廣西臨桂人由舉人萬曆十一年任陞電白知縣已百按典史教職中有兩魏鍾寧恐有一誤

洪邦政

福建南安人由舉人萬曆十四年任丁憂回籍

王愛

祁州人萬曆十七年任陞天津衛教授

倪承教

廣寧右屯衛人萬曆十九年任陞永平府教授

陳耀

順天遵化人由舉人萬曆二十三年任輯舉業真詮以訓士子

阮思恭

清苑人

蔡永寧

陝西三原人

趙守德

河南輝縣人

袁可學

順德人

張堯賓

鹽山人

譚謙益

舉人以艱去

郭經玠

山東人

張大伸

新安人

詹儀

湖廣黃岡人由舉人萬曆四十七年任陞三河知縣

許汝謙

鹽山人天啓二年任

王有光

字觀之直隸寶應人崇禎元年任陞蘇州府教授博學能詩謙和坦易有息波亭賦今缺

宗麟禎

慶雲人崇禎二年任告病回籍

劉漢尹

河南歸德人崇禎年任卒于官

劉允元

河南人崇禎十二年任卽告歸

大清

張炯

字濬之順天舉人順治三年任陞國子助教官至刑部員外

劉俊

杜樸

字天雅順天舉人順治〇年任

齊可魯

保定人順治十三年任陞山東掖縣丞

趙懿源

字會一武清人壬子拔貢康熙十六年任端方敏決整肅學規康熙二十五年陞任浙江浦江縣令

胡公望

字若采大興人由歲貢康熙二十六年任

訓導

明

劉泰

山東卽墨人正統元年任

趙復春

本府藁城人由舉人景泰二年任

許翰

廣東海陽人景泰七年任

童鏞

直隸上元人天順八年任

楊淵

浙江奉化人成化元年任

胡澤

河南洛陽人成化二年任

林瓚

福建延平人成化七年任

姚宇

直隸上海人成化十年任

任道

河南泌陽人成化十八年任

楊觀

直隸巢縣人成化二十年任

張濂

山東鄒平人弘治元年任

張璞

陝西平利人弘治七年任

梁銘

河南湯陰人弘治十年任

趙箴

浙江臨海人弘治十二年任

蔣鉞

河南河內人正德元年任

張鉞

河南息縣人正德四年任

趙鉞

山西山陰人正德七年任

戴震岳

福建南靖人正德八年任

李尚賢

山西陵川人正德十年任

申彪

山西潞城人正德十三年任

王璣

陝西乾州人嘉靖八年任

張奎

河南鈞州人嘉靖五年任善教人

郭綸

河南考城人嘉靖十一年任存心不苟立教惟勤士得其心印者多大成就

胡俸

直隸天策衛人嘉靖十四年任見名宦

梅和鼎

河南廬氏人嘉靖十五年任見名宦

周悌

河南新蔡人嘉靖二十三年任陞邢州學正

馮應龍

河南鄭州人嘉靖二十三年任

賀常

山東東阿人嘉靖二十四年任陞王府教授

羅維寧

四川威遠人嘉靖三十年任與修縣志

曹瓚

山西蔚州人嘉靖三十二年任

尤孝

山東人嘉靖三十六年任

吳鎧

貴州人嘉靖四十年任

李志學

陝西鎮番衛人嘉靖四十五年任

魏世昌

山西澤州人隆慶三年任明經課士

高炳

河南密縣人隆慶六年任卒于官

楊芳

山東益都人萬曆二年任陞真定縣教諭

劉名久

山東海豐人萬曆四年任持已端莊不愧師範陞山東鄆城教諭

郝九霄

直隸雞澤人萬曆八年任

張應登

慶都人萬曆十一年任陞周府教授

王勳

大城縣人萬曆十六年任博學能詩文卒于官

高攀

陝西醴泉人萬曆十八年任居官慎勤不久罷去士論惜之

馬繼魯

山西大同人萬曆十九年任二十五年陞山西太原縣教諭

楊弘胤

涿州人萬曆二十五年任魁梧博洽千言立就周恤貧寒誘掖英俊士類彬彬興起會鄰封大浸流民萬計佐縣官盛公百計安集民並德之二十八年丁內艱去士民猶稱楊公楊公云

王之土

大名人萬曆三十四年任陞長清知縣

襲承德

遼東人

楊守光

安肅人

樊名揚

沙河人卒于官

徐一貫

山西人陞遼州學正

張進誠

鉅鹿人萬曆四十年任

黃文極

遼東人天啓二年任揮霍有為陞含山知縣

李友竹

平谷人崇禎元年任陞容城教諭

賀玉成

雞澤人崇禎四年任

陳鼎新

南樂人崇禎七年任陞邢臺教諭

張醇儒

新安人崇禎十年任十一年城破死難

王嘉獻

良鄉人崇禎十二年任陞長治教諭

聶慎

號乾所豐潤人崇禎十六年任淳厚長者一塵不染師範無虧陞雞澤教諭卒于任

大清

賀聖典

陝西人順治三年任陞白水教諭

陸宗程

玉田人順治〇年任

客日章

安肅人順治十三年任裁

戈定國

宛平人康熙六年任九年丁母憂

張完真

字率真深澤人康熙十年任坦率和易在任十餘年深得士志陞濬縣教諭卒于任樞過孔道士爭趨哭奠

孫眉

字子白平谷人由恩授康熙二十年任勤於課士寒暑靡輟

名宦

元

李

仲

字仲溫無極人至元六年由蘭省掾知臨城究心精審吏戢其奸軍馬留屯禁樵牧使無侵擾一切綾羅之類

民不可辦懇請蠲之成造諸物止就人匠依樣定價比之他處省三分之二焉十五年春議行和糴力陳去歲薄收居民艱食及秋科下祇應小麥復陳臨城地不宜麥皆獲免鰥寡孤獨連三年未給糧四十餘口計糧三百餘石會邑中綦陽冶戶合納丁糧赴倉艱于輸運申理就給鰥民兩稱其便秩滿人懷其德訴于連帥憲司並嘉獎之見府志

失判不花

字仲博遼陽人至正十五年任主簿下車問民疾苦以邑土瘠稅獨重于他邑請于上減十之二三境有蒙古民為

民害不花總以法蒙古民遂畏威不敢逞訟者至不遽下于理徐以片言折之民皆輸服去之日行李蕭然民攀留不獲立碑頌德焉趙郡張曾記

明

阮居仁

交趾東潮州人正統二年任知縣性嚴明不尚浮華蒞政首重農事使遊手歸農時示勸懲以別勤惰又擇子弟俊秀者俾入學宮蠲其徭以風勵之舊學規制狹隘遂拓基

重建蔚然改觀公暇至明倫堂集諸生親課之品其優劣以示

激勸邑士始知向學又平賦役剔冗費訟平政理吏民畏而懷

之長吏嘉其能不遣一卒下縣迨代去立碑道左紀其遺惠至今歌思焉入祀

名宦載府志

張

佐

陝西臨潼人由舉人成化六年任知縣縮費剔冗減省徭役縣民李春等數百家貧不能耕逃去出牛種助之遂復歸業有婚喪不給者皆捐俸周之城垣學宮圯壞者悉加修築政通民和百廢漸舉士民稱焉有德政碑敘諭吳琪記

章

忱

浙江會稽人由進士成化十五年任知縣悉心諮民疾苦以愛養勸勵為務歲飢民多流竄招徠撫綏給其種食免其徭役民接踵歸業旁邑流民願就編籍者亦數十戶畝券稅牒有久不別白者悉為條格以清其欺隱漁併之弊城北泥河出泉會夏旱率眾築堤引水灌田又教民桔槔以濟高阜邑自是有水利鄉疇舊無醫藥專信巫禱時痢疫大作為檢方

書修藥餌施之所全活者不可勝計修學宮具祭品及諸壇遺館舍買隙地創社學陰陽醫學郵亭養濟院各一所百廢俱興皆措置有方不勞民力而舉公暇親課諸生諄諄以孝弟忠信為訓民有訟不遽用刑明其曲直告以修睦之義多自慚惕引退邑有坐重辟誣伏者獄已成審知其冤力為之辯卒得雪釋時郡帥以非公事欲役邑民公堅不奉命即帥甚啣之不恤也任滿以課最陞太僕寺寺丞民為立碑以永其思右諭德謝遷撰記入祀名宦載府志

張

清

直隸婺源人由舉人成化二十年任知縣廉明有斷歲凶民多流離邑有積粟餘四萬斛公即發之以賑貧困全活者數千家四方就食附籍八十餘戶市地置倉廩數十間儲粟備荒每審徭役以貧富計輕重人稱其平又修水利日巡阡陌勞來之值春時覈丁多寡令人植桑棗數株野無曠土民賴其利村民有劉名者盜斃之于野公馳至其所呼居民盡出斧刃鱗次閱之乃取其蠅集者訊之果為陳廣所殺眾驚為神明其他割斷疑獄多類此任滿陞趙州知州再陞河間府同知俱有宦業詳徽州府志去後數年邑人思之立碑頌德祭酒林瀚為之記稱其廉潔之操如玉瑩然不塵蓋本諸輿論云入祀

名宦載
府志

党承美

山西忻州人由舉人嘉靖十一年任知縣弭盜息爭吏畏民悅又築土堤植柳護城以捍水患迄今民猶思之

有築堤防患碑
訓導郭綸記

胡俸

應天府天策衛人嘉靖十四年任訓導寒暑講課不倦以故士爭自琢磨科目相望皆俸善教之力也陞浙江

海寧縣
教諭

梅和鼎

河南盧氏人嘉靖十五年任訓導博學善詩文且師範端嚴課士勤懇與胡相為頡頏士類咸矜式之至今猶

稱胡梅二夫子云陞
鳳陽懷遠縣教諭

薛相

直隸懷遠人嘉靖二十一年任教諭與諸生講解經義論古今商時事剖析明朗令人聽之忘倦事節母以孝

聞

劉 皞

江西高安人由舉人嘉靖二十三年任知縣清廉不爽公正無私作興士類惠恤困窮前令有誤申徵糧額外

增千餘金者大為民害皞力為之辯改減二百三十餘兩又嘗增修舍宮陞通州知州民攀轅泣留不忍舍去

鄭 文

浙江嵯縣人嘉靖二十八年任教諭勤于訓迪克盡師道乞休歸里士子至今稱之

王濟美

山西平順人嘉靖三十一年任主簿愷悌嚴明清苦尤人所難屢為當道獎重

張冲霄

河南封丘人由舉人嘉靖三十五年任知縣廉平不苛民以召杜稱焉一年以內艱去有去思碑署教諭張蜀

良記

王之弼

陝西涇陽人由舉人嘉靖三十九年任知縣威制豪強顯揚善類性嚴能恕蒞政三年威惠並行盜賊屏息吏

民畏而懷之以才優治劇調文安令歷陞涿州知州薊州兵備副使俱有聲世稱能吏云有德政碑邑人吏部主事李世藩記

鄧之松

廣西宣化人由舉人隆慶三年任知縣政惡苛刻務敦寬厚崇文教以培士氣審編以公平稱又建議築石堤

五十餘丈以護城陞武昌府判有去思碑邑人趙進修記

余啓元

徽州府婺源縣人由進士萬曆六年任知縣傳學能文沉靜不擾而事亦自理縣城西濱泝水舊堤倒塌隆慶三年水漲衝城壞民舍先任臨桂高公補修倒城而無堤衛宣化鄧公修石堤五十餘丈不為全衛公募民積石增修長堤以捍之賴為保障民刻十好歌頌德公居官廉謹蔬食茹蘖推俸濟貧然不善諛迎竟以改教去冰囊不能自歸至臨清稱貸以還至今稱賢父母云

楊應丙

陝西延安衛人由舉人萬曆二十年任知縣明敏豪爽公廉能斷吏不敢欺城垣壇壝文廟館舍有損壞者悉加修葺蔚然改觀政成當路辟之陞留都江寧令竟不持一筐歸士民立碑頌德邑人喬壁星記畧曰余邑故地陬而俗約役賦旁午不減他郡頻歲沴蒸黎若沸主者難之萬曆壬辰春公奉簡書至廉直敏斷守官箴大搜所為民蠹者亟芟之少年不軌悉直于法即津要不賞民始駭然懼繼修葺以次舉而布宣德化無傷無勞民又凜然服也再逾年惡屏欲集廷無伏

野無吠四民恬熙莫知誰之為矣以何聖天子愍東南之困詔公遷守陪都江寧臨人竟無藉寇祗悵然以懼懼然以疑既而公果不可留也復穆然以思思公不見憶其政憶其政益觸其思反側無聊乃屬余言以勒貞珉于是為之歌曰聖主勤民兮爰簡賢良克紹箕裘兮卓魯齊芳福星南耀兮俾我徬徨藏之中心兮何日能忘

張俊

山東濱州人由吏員正德四年任主簿值流賊攻掠州縣公即乘城為備賊至挺身禦之力既不支城陷卒死于難當事者奏聞贈臨城知縣仍廕一子以旌其忠入祀名宦

楊繼卿

福建福安人於崇禎五年任典史流賊之難軍前解餉遇害奉旨贈臨城縣主簿入名宦祠

蕭時勉

廣西臨桂縣舉人崇禎六年任知縣崇禎十一年城陷死難祀名宦

選舉志

進士

唐

李乂

見鄉賢

宋

王驥

見鄉賢

金

李嗣慶

王天澤

馬師周

宋履亨

李嗣祖

李好謙

俱至大中進士

元

喬松

馮逢吉

張淵

張守經

張守約

喬亨

任長寧寺知事

裴源

趙用

喬林

任藁城縣主簿官至戶部主事○以上俱至正中進士

明

薛幹

正統六年進士
見鄉賢

薛珪

幹第三子成化五年進士歷官戶部員外郎

李世藩

嘉靖三十五年進士見鄉賢

喬壁星

字文見號聚垣萬曆八年進士授河南中牟縣知縣行取山東道監察御史巡視北城督運兼理河道巡按應天山西巡視京營掌京畿道陞順天府府丞大理寺左少卿巡撫四川都察院右僉都御史見鄉賢

白受采

字素臣號惺玄本鴉鵲營人父金精醫卜遊蜀漢州家焉生受采年十六中四川舉人邑人喬中丞撫蜀延為仲子師故得與喬恭肅肆力攻苦而學愈進萬曆庚戌中會試第十九名授山東新城知縣改平陽府教授陞國子監助教刑部主事工部員外郎中湖廣叅議陝西按察使加右布政

喬若雯

壁星長子萬曆己卯舉人已未進士授中書科中書舍人陞禮部主事調吏部主事陞山東兗州府知府數月告歸閉門著述有終焉之志戊寅抗節殉難贈太常寺少卿謚恭肅予祭葬建祠廕一子入監讀書

三

卷之四

附錄

12

平津類稿卷之五 金華書院藏

10

卷之五

財

10

五

三子(不登堂)一子(不登堂)一子(不登堂)

舉人

金

韓汝職

王儼

韓汝弼

李大榮

李廷珪

俱正大中舉人

元

馬思恭

任高邑縣教諭

喬思澤

任新河縣教諭

黃思齊

任翰林院孔目

喬松

任彰德路教諭

李擴

任中書員外郎

馮好謙

任蔚州學正

郭敬祖

任經歷

張
銓

任丹陽縣令

明

曹素

永樂六年鄉試中式

薛幹

正統六年鄉試中式聯捷

馬驥

景泰六年鄉試

薛理

幹長子天順三年鄉試任宿遷知縣

薛琦

幹次子天順六年鄉試任山東黃縣知縣後調新野

薛珪

幹三子與兄琦同科中式成化五年進士

喬直

成化年鄉試見鄉賢

閻珩

正德十四年鄉試

趙世相

嘉靖二十八年鄉試見鄉賢

李世藩

嘉靖二十八年鄉試中式三十五年進士

喬壁星

萬曆四年鄉試中式八年進士

岳自勵

萬曆十九年鄉試

趙志鵬

謚之子萬曆二十二年鄉試

白受采

萬曆二十五年中四川鄉試庚戌進士

武科

劉芳周

號美寰鎮內村人嫻弓馬美丰儀豪俠不羈輕利便捷中順治甲午科武舉乙未科進士選陝西興安州守備陞湖廣桂東都司康熙七年竹溪房縣隆山剿賊陣亡九年贈遊擊墓在本村西

貢士

恩貢

拔貢

歲貢

元

李德和

任潤州判官

裴頤真

任襄陽主簿

睢教

任知事

王德昭

任判官

范天秩

任縣尹

李元甫

任教諭

王騰飛

任經歷

明

馮彬

永樂年貢以薦舉授監察御史陞工部侍郎祀鄉賢

楊和

永樂年貢以薦舉授吏科給事中陞工部侍郎祀鄉賢

王讓

永樂十五年貢任荊州府通判

徐思名

永樂十七年貢任代府長史

劉鼎

永樂十九年貢任南陽知縣

王嫗

永樂二十二年貢任浦江知縣

劉敬

宣德元年貢任吏部司務陞寺丞

牛容

宣德三年貢任太原右衛經歷

李真

宣德五年貢任瑞州府通判

武源

宣德七年貢任唐府典儀正

張哲

宣德九年貢任秦府典儀正

李珪

正統元年貢任嶧縣知縣

魯安

正統三年貢任烏程主簿

張羽

正統五年貢任鳳翔府檢校

王英

正統七年貢任即墨主簿

張鏞

正統九年貢任府軍前衛經歷

楊暉	正統十一年貢 任鞏昌府知事	趙冕	正統十二年貢 任西安府經歷
趙玉	正統十三年貢 任絳縣縣丞	趙珪	正統十四年貢 任戶部司務
楊瓚	和之子正統年貢 任太平府同知	李昇	景泰二年貢 任岳州府檢校
郝翔	景泰四年貢 任高苑主簿	李秩	景泰六年貢 任真寧教諭
馮禧	天順元年貢 任伊府典儀正	劉齋	天順三年貢 任鉅野知縣
趙隆	天順三年貢 任樂安主簿	馮楫	天順五年貢 任唐府引禮
王輔	天順六年貢 任山陰知縣	楊獻	天順六年貢 任遠府引禮
趙憲	天順六年貢 任山東濰縣主簿 居官廉明屢為當道獎		
趙濬	天順七年貢 任鄉賢	張鴻	成化元年貢 任稷山主簿

趙純	成化三年貢 任太平府荻港巡檢	張倫	成化五年貢
張翼	成化七年貢 任徐州倉副使	楊安	成化九年貢 任藍田縣丞
魯端	成化十一年貢	高榮	成化十二年貢 任兵馬司吏目
王傑	成化十三年貢 任原武主簿	劉安	成化十四年貢 任高陵知縣
趙克明	成化十五年貢 任渾源州吏目	賈禎	成化十六年貢 任平陰縣丞
張春	成化十七年貢 任西平主簿	馮恭	成化十八年貢 任鄆陵縣丞
趙讓	成化二十年貢 任桃源主簿	趙文	成化二十二年貢 任州吏目
鄭林	弘治元年貢 任蘭谿縣丞	孫麟	弘治三年貢
呂名	弘治五年貢	劉聰	弘治七年貢 任壺關主簿

薛璋

幹第四子弘治九年貢任代府伴讀

馮讓

弘治十一年貢任臨江府經歷

王臣

弘治十三年貢

楊鳳

獻子弘治十四年貢

馮達

弘治十五年貢任唐府典寶

王茂

弘治十七年貢任萊陽主簿

孫鳳

弘治十八年貢任山西行都司斷事

趙琦

爲人倜儻治家嚴肅人敬之未仕卒舊志未載貢于何年

陳鵬

正德元年貢

趙信

正德三年貢

蔡恭

正德六年貢任文登主簿

楊鏜

獻之孫正德八年貢任蒲州訓導陞靈州學正家居數載足不履市親屬貧乏者極力濟之

楊通

正德十年貢任館陶訓導

魏汝贊

正德十二年貢任縣教諭

郝勝

正德十三年貢任泗州訓導

薛彪

正德十四年貢任清源教諭

馮瓚

正德十五年貢

郝希賢

正德十六年貢任大同訓導

呂春陽

嘉靖元年貢任大同左衛訓導

喬宗華

直第四子嘉靖三年貢任濟陽縣丞

閻效

嘉靖五年貢任陽曲訓導

趙錫

琦之子嘉靖七年貢任孝義訓贈知州祀鄉賢

王閻

嘉靖九年貢任平定州同知居官勤慎守城有功紀功御史大加賞異尋以疾卒

劉廷鑑

嘉靖十一年貢任恩縣知縣

喬宗恒

直第五子嘉靖十二年貢任霍山訓導陞鉅野縣教諭

王誥

嘉靖十三年貢所著有桑榆集康熙二十年翰林院爲修明史來徵其書已無考矣

王禎

嘉靖十五年貢任寧州同知

班臣

嘉靖十七年貢任廣德州訓導

崔鵬 嘉靖十九年貢任萬全都司訓導

趙國用 嘉靖二十二年貢任鞏縣訓導

武鎗 嘉靖二十五年貢任延安府通判

賀萬里 嘉靖三十九年貢任屯留縣主簿

趙進修 嘉靖三十三年貢任齊河縣丞

趙學書 嘉靖三十七年貢任齊東縣丞

趙思溫 嘉靖四十一年貢任開封府教授

薛世勳 嘉靖四十五年貢任太原府教授

米濟時 隆慶元年貢志行篤實居鄉謹厚任陝西禮縣知縣

常紳 嘉靖二十年貢任濮州訓導

張遷 嘉靖二十三年貢任平慶州訓導

王謐 嘉靖二十七年貢任趙城知縣

劉偉 延鑑子嘉靖三十一年貢任膚施知縣

李昂 嘉靖三十四年貢任遼東經歷

劉大珍 嘉靖三十九年貢任青州府訓導

侯思明 嘉靖四十三年貢任益都主簿

張實 隆慶三年貢任臨清州訓導

崔相 隆慶五年貢任河南唐縣訓導

馮循禮 萬曆元年貢任蕭縣訓導

趙崇德 萬曆二年貢任盧龍教諭

薛世祿 萬曆四年貢任麻城縣主簿

李馥 萬曆六年貢任安東衛教授

劉璉 萬曆七年貢任平定州訓導陞沁州學正

趙謐 萬曆九年貢任山西長子縣丞到任旬日卒其子孝廉志鵬扶柩歸葬謚為人篤志力學天性弘裕與人交豁如也

孫志義 萬曆十一年貢任東鹿訓導學問純篤科第多出其門

薛問之 萬曆十三年貢任東鹿教諭

張世美 萬曆十五年貢任新安訓導

薛學之 萬曆十七年貢

王之屏 萬曆二十年貢遙授保定府訓導

米千鍾 濟時之子萬曆二十一年貢

張時範 萬曆二十四年貢

○○○ 萬曆三十六年貢 失名 ○○○ 萬曆二十八年貢 失名

張時遇 萬曆三十年選貢任山東濟南府經歷陞山西廣陵縣知縣為人豁達樂易

賀汝楫 萬曆三十年貢任訓導陞王府 劉源溥 萬曆三十年貢任訓導

師道立 萬曆三十年貢任東光訓導陞潞安教授

崔 檟 萬曆三十年貢 李含英 萬曆三十年貢任訓導陞永寧學正

孫自達 萬曆○○○年貢 任○○訓導 朱大弼 萬曆四十年貢

趙志鶚 字秋漢萬曆四十年貢任元城訓導陞陝西平涼縣知縣卒于官

劉鴻漸 萬曆四十年貢 趙志鴻 萬曆四十年貢任完縣訓導陞和順教諭

劉源清 泰昌元年恩選任河南南陽府訓導以署縣印被論歸

趙肖男 天啓元年恩選任湖廣蘄水縣丞

高 擢 天啓○年貢任元城訓導陞肥鄉教諭再陞新泰知縣

趙一鶴 字仲隨號飛垣天啓四年貢任昌黎訓導陞祁門教諭以敘昌黎城守功又陞臨縣知縣卒于官

吳守道 天啓六年貢任狄道縣丞陞經歷卒于官

張鵬翺 字搏九崇禎元年恩選任河南陳州判官陞陝西漢陰知縣

趙志斗 字魁吾崇禎元年貢任訓導陞長武知縣卒于官

趙三元 崇禎三年貢任清豐訓導病歸 孫克昌 崇禎五年貢

孫 綽 崇禎七年貢任長垣訓導卒于官 李含淳 崇禎九年貢任東流訓導卒于官

喬仰高 崇禎十一年貢 張復初 崇禎十三年貢

喬如岳

崇禎十五年貢任新鄉縣丞降苑馬寺錄事

趙敦本

崇禎十七年貢任東光縣教諭遷保定府都司教諭

大清

馮熙朝

順治二年恩貢任東安教諭陞大名府教授

谷成

順治二年歲貢選羅山簿未仕卒

趙翼軫

順治四年貢任邳州訓導陞雄縣教諭未任卒

米霸楚

順治五年拔貢任湖廣安陸府通判丁憂起復補浙江寧波府通判卒于官

劉起鵬

順治六年貢任萬全都司訓導告病回籍

喬已千

字百十若雯子順治八年恩貢考推官改授太安知縣

馮明聖

順治八年歲貢任清豐訓導

馮堯年

順治十年貢任遷安縣訓導

馬化龍

順治十二年貢

路之室

順治十二年貢任廣東博羅縣丞

曹大金

順治十四年貢任浙江烏程縣丞

張秉粹

順治十六年貢

李三友

順治十八年貢

和六字

康熙元年恩貢考授縣丞

劉光

康熙二年貢任阜城訓導

張煥光

康熙九年貢任成安訓導

趙唯燦

康熙十一年貢

王贊

康熙十一年拔貢考授縣丞

宋國鼎

康熙十三年貢

張純素

康熙十五年恩貢

楊大任

康熙十五年貢

張近誠

康熙十七年貢

喬麓

宗華五世孫康熙十九年貢

李元善

康熙二十一年貢

張冲霄

康熙二十三年貢

張衆隨

康熙二十四年拔貢

張謙光

康熙二十五年貢

蔭襲

明

喬已百

若雯長子廩膳生以父若雯殉難崇禎十三年卹蔭入監不就篤學勵行著述甚富佐邑侯宋公修縣志

雜職

明

岳自重

祁村人自勵從弟崇禎二年任清州吏目陞陳州衛經歷戊寅殉難

大清

李經世

韓村人順治年任清華鎮巡檢

趙奇星

竹壁村人順治年任開化縣金竹嶺巡檢

師加福

在城人康熙年任松江府鹽場巡檢

李振綱

賈村人康熙年任潛山縣典史

例貢

張珙

天順五年任南召知縣陞平定知州

張彪

珙子任蒲縣知縣

薛文盛

任山西布政司檢校

趙理

任崇德縣丞

蘇錦

任儀真縣丞

趙廸

任開封府經歷俱成化二十年

高恭

任德州吏目

畢鳳

馮璋

任泌陽主簿

薛文瑞

任淮安府知事

岳麒

任中城兵馬司副指揮陞涇州知州

張附鳳

彪子任德州吏目俱正德二年

楊灌

任洪洞縣丞

趙蘭

任常熟縣丞

岳鳳

任金州判官陞審理俱正德十年

李龍

蘇良輔

張攀桂

彪子臨清州判官俱嘉靖三年

武相

嘉靖十四年任
壺關主簿

呂攀桂

隆慶三年

李穎

世藩長子萬曆四年
年任光祿寺監事

李鎮

世藩次子萬曆四年

李頌

萬曆年

呂崇禮

萬曆〇年任王府審理

賀文龍

萬曆年

趙之頗

崇禎二年任郊縣丞

大清

劉忠

康熙十年考
授州判

劉其裕

康熙十年考授州同

王之弼

康熙二十四年

封贈

明

馮成

以子彬貴封文林郎江西道監察御史妻 氏封孺人

楊從善

以孫和貴洪武元年贈嘉議大夫南京工部右侍郎妻 謝氏贈淑人

楊顯忠

以子和貴洪武元年贈嘉議大夫南京工部右侍郎妻 史氏贈淑人

薛至剛

以子幹貴天順二年封奉直大夫戶部貴州清吏司員外郎妻 氏封安人

岳成

以子麒貴嘉靖十一年十月初四日贈中城兵馬司副指揮妻郭氏贈孺人

趙錫

山西孝義縣儒學教諭以子世相貴隆慶元年贈奉政大夫山東東昌府濮州知州妻楊氏贈宜人

喬輔世

增廣生員以子壁星貴萬曆十二年封文林郎河南開封府中牟縣知縣妻王氏封孺人萬曆三十二年加贈

高城縣志

卷三

封贈

三

中憲大夫順天府府丞王氏加贈恭人萬曆三十四年改贈都察院右僉都御史

人物志

鄉賢

唐

李尚一

房子人開元時為靖源尉

李尚貞

開元時為博州刺史

李又

按唐史字尚質房子人中宗時第進士茂才異等調萬年尉擢監察御史劾奏無避葉靜能怙勢又條其姦中宗不納遷中書舍人修文館學士帝遣使江南發庫貲以贖生又上疏以為江南魚鼈之利衣食所資江湖之生無既而府庫之財有限與其極物不如憂民鬻生之徒惟利所視錢刀日至網罟歲廣施之一朝營之百倍若回所贖之資減方困之民其澤多矣韋氏之變詔令嚴促多又草定進吏部侍郎仍知制誥與宋璟同典選事請謁不行時人語曰李下無蹊徑改黃門侍郎封中山郡公制敕不便輒駁正貴幸有求官者睿宗曰朕非有靳顧李又不

幾除刑部尚書卒贈黃門監諡曰貞人沉正方雅識治體有宰相器
事兄尚一尚貞甚謹俱以文章名有李氏花萼集行世又入祀鄉賢

宋

王

驥

按宋史字總之七歲喪父哀毀過人既長狀貌奇偉舉
進士授婺州觀察推官代還真宗見而異之特遷秘書
省著作佐郎知祁縣通判湖州再遷太常博士提點梓州路刑
獄權三司戶部判官使契丹還判都磨勘司以尚書度支員外
郎兼侍御史知雜事上言方調兵塞決河而近郡灾歉民力彫
敝請罷土木之急者三司戶部副使樞密使曹利用得罪驥
以同里為利用所厚出知湖州徙蘇州還為三司鹽鐵副使時
龍圖閣待制馬季良方用事建言京師賈人常以賤價居茶鹽
交引請官置務收市之季良恃章獻后姻家眾莫敢逆其意驥
獨不可曰與民競利豈國體耶力爭罷之擢天章閣待制判大
理寺提舉在京諸司庫務安撫淮南權判吏部流內銓累遷刑
部益利路早飢為安撫使以左司郎中樞密直學士知益州戍
卒有夜焚營殺馬脅軍校為亂者驥潛兵環營下令曰不亂者
斂手出門無所問於是眾皆出命軍校指亂者得十餘人戮之

明

馮

彬

洪武中由歲貢選授江西道監察御史法度嚴明紀綱
修舉號為剛直永樂十三年陞南京工部右侍郎入祀

鄉賢

楊

和

由歲貢永樂七年授吏科給事中愛君憂國受知於上
至十七年陞南京工部右侍郎洪熙元年採木四川封

祖父如其官
入祀鄉賢

薛

幹

正統七年進士任行人司行人奉使占城人為危之幹
曰人臣事不辭難此吾効命秋也夷然就道及登舟入
洋三日不辨晝夜喻年始還竟達朝
命歷陞遼東苑馬寺少卿入祀鄉賢

趙濬

天順七年貢值歲大飢輸粟賑貧全活者衆不樂仕進遙授散官入祀鄉賢

喬直

濬之子也由歲貢中成化丙午鄉試授江西龍泉知縣大振冰蘖剔刷吏弊每詣城隍廟引神自誓不取一錢

三載告歸呼父老於庭鼓橐示之止故衣數事父老流涕不忍舍行至臨清囊罄貸同年王姓者二十金乃能歸清白絕塵鄉邦師表壽七十四歲

趙錫

嘉靖七年歲貢貌古心莊言寡行篤自幼無聲色貨利之好任山西孝義縣訓導師道尊嚴諸生有稱不孝者

委曲訓誨士皆化焉方迎母養值大同兵變遂致仕歸平生事親孝退休時已近七十猶朝夕定省不倦親卒居喪恪遵家禮不作佛事遠近稱之以子世相貴贈濮州知州入祀鄉賢

喬輔世

御史喬壁星父字德夫號樂天修撰蕭良有為之傳其畧曰喬之先出樂平莊簡公族國初有名士進者始為

臨城醫學訓科署趙州鄆城驛其後以儒業顯喬直為龍泉知縣生宗華為濟陽縣丞宗華生公蚤有異質年十二為博士弟

子屢舉不第乃專精性命之學敦孝友辨義利常分宅以育姊之孤孫志義竟得力學成博士減糶價建義學作鐵牛以鎮水患邑人德之訓子成進士為縣令惓惓以廉隅之飭為義方比為御史持節直指郡國者凡三每過里門外必發橐裝無長物然後命入公出無僕從處無珍玩即膺封典不一再御章服有司固請不見也鄉人語曰若鄉士夫盡如喬公即百家非多享年八十有五入祀鄉賢贊曰饗忌濫分利惡尚有封君見及此乎侍御有志操所至並著聲稱諸子姓復林立天之厚君以量世有作法於侈乃一務封殖為子孫作馬牛者其子若孫何如哉

李世藩

嘉靖丙辰進士幼喪父依母劉與兄世芳同居篤志力學既登第任臨晉令時值地震後設法賑濟全活者衆

以課最擢戶部主事後坐誣左遷磁州同知歷陞常州府判松江同知復擢南京戶部郎中母劉罹疾世藩親嘗湯藥衣不解帶每夜焚香籲天願減己算以益親年上疏乞歸行至淮陽母疾不起哀毀踰禮食不入口者累日扶櫬抵家杜門謝客坐此亦病及病革謂其子頴曰吾幼失怙賴汝伯以有今日凡此遺業宜與二姪均分之違吾言者非吾子也後果如約梓里咸稱

其孝友焉
入祀鄉賢

趙世相

錫之子嘉靖己酉舉人授山東濮州知州按奸究修廢墜首以作興人材為己任編州徭以公平稱又移編三

縣徭聲稱益著陞山西平陽同知比行適沛縣建滿家橋閘督河尚書廉知其才特疏保留公設法調度五月告竣邦人樹碑頌之及抵平陽會有邊警石州陷居民甚恐公簡勁兵分屯諸要害敵聞避去署府篆聚土補南城築東關堡連亘九里以備不虞劇寇李九經等侵掠龍門積石等處公親冒矢石斬首八百餘級直指使疏薦加俸欽賞金幣擢山西按察司僉事兵備寧武時朝廷許俺答互市公與會於水泉營宣布國家威德酋首奉命後坐誣遂左遷潁州知州復有政迹蠲浮稅置學田禁卑頭私索民至今稱之陞大同府同知每歲互市卒賴調停幣額不增得馬以萬計乞骸骨歸歸之日足不涉公府惟以敦族裕後為事有兄年八十餘公年亦逾七十猶親調其寒溫候其起臥人稱友愛萬曆改元以恩例進階四品卒入祀鄉賢

程鵬搏曰余觀臨之人物若李貞公王忠穆之勛

烈炳炳尚已近世馮楊二公發迹胄監致位九卿
豈其才固有大過人者與乃其事不少概見何也
薛少卿遠使絕域危身奉主可以為難喬龍泉冰
操著譽其孫喬德夫樂道衡門慶流後裔以鬱為
令族積善之報焉可誣耶李民部不私遺產有足
多者趙司訓居官端嚴子僉憲公能世其家以後
先輝映陪祀學宮不亦美乎然而明興二百年來
纔有此耳譚何可容易也夫地靈於人傑君子而
有見於此數公者亦可以興矣

三十一

節烈

明喬若雲

萬曆己未進士山東兗州府知府以病回籍戊寅城陷殉節贈太常寺少卿謚恭肅廕一子

喬若霞

兵部守備

劉源清

南陽府學訓導司

岳自重

陳州衛候缺經歷

馬騰雲

趙其廉

趙汝鎗

孫益菁

膳生以上廩

喬卽登

趙煥然

李于化

杜廷弼

以上增廣生

趙祖襄

趙祖懋

孫為儀

劉光祚

劉胤祚

張弘濟

趙琅

喬欲植

龐嗣統

薛懷禮

劉祖堯

趙瑞

以上附學生

趙汝鈐

喬順則

張施溥

三人俱庠生

龐士英

儒官

孫善述

儒士

趙治本

醫官

兵民趙一蘭

劉思香

于轉江等

以上俱以崇禎戊寅城破殉節

孝行

明

張誥

字鳳池增廣生員母死廬墓父死亦如之一時鄉人推重萬曆十九年巡按御史何出光題請旌表墓在城南

一里楊家灣有碑記

張思武

本縣民嫡母吳氏生母郭氏吳患病且革武焚香告神祈以身代食不下咽者數日吳思肉武割左股熟獻之

吳食病愈

宋廣業曰身體髮膚不敢毀傷之謂孝焉有戕其身以行孝者然而閭巷之民何知彼狃于習俗之傳聞以為割肉可以愈疾斯行之矣故見有親不

知有身以急于愈親之疾亦孝思之所迫也况更有出於浚閨弱質者乎并錄如左

周孝女

小字明星縣民周朝宣女年十六母張氏臥病二年不起女焚香告天願以身代母忽思肉家貧父兄不在無能辦女割股烹進母食病愈割時不甚痛且無血人皆以為孝感所致知縣王之弼申報旌之

賈孝婦

縣山南頭村民婦事姑孫氏甚孝謹姑病思肉婦割股烹食之姑病立瘳署縣訓導蔡光宇旌其門

周孝婦

木工袁澤妻即明星姪女也姑喬氏年六十餘癆疾濱死一日思肉澤在外婦無以辦割左股和麵餅以進姑啖而甘之宿恙漸愈萬曆二十年知縣程鵬博申請旌其門奉本道叅政吳為給門匾

喬壁星曰士有百行孝實基之余邑以廬墓稱者獨張生余嘗過其處遐想其野眠淒楚之狀令人

慘然若生者不可以風哉張思武與周賈輩俱愚夫愚婦未嫻詩書之訓者割股愈親發自真悃卽見表錄又何所豔慕之也為善無近名周賈以下有焉

蔣烈女

小字安閑儒學訓導蔣鉞女河內縣人夫沒守節隨父在任正德六年盜賊蜂起剽掠郡縣是年冬賊入臨城掠鉞資財已盡繼至者無得梓鉞並妻李氏欲殺之舉刀下者數次安閑藏暗處見父母迫險出語賊曰父財盡在我手如釋吾父母我盡與汝賊遂釋鉞而求財女曰給汝也我有何財賊怒欲殺之賊悅女姿色曰不如挾之至營女堅拒不從遂遇害事聞給銀殯葬樹貞烈碑於旌善亭卽中汪舉為之記墓在城東南一里楊家灣記見後

喬壁星曰蔣烈女夫亡守志為義親危出救為孝

拒賊殺身為節以一身挈萬古之綱常還之天地
其有裨於世教豈淺眇哉第烈女不產於臨而節
著於臨固當與臨諸節婦同垂不朽余因詳次其
事如右云

按蔣烈女夫亡守志足以完其操矣乃其烈著於
臨城者緣孝而見故附于孝行

劉氏

監生趙學書妻嘉靖癸丑寇掠其家執其姑閻氏劉冒
死往救以計給賊賊遂舍姑執劉欲加非禮氏堅拒不
從料不可脫遂赴火死編修高儀記其事宋廣業曰千古綱常
以孝為重安閑以貞烈稱夫安閑本為救父出非為死節出也
救父其本心死節其操行烈因孝而顯非孝因烈而著也數十
餘年而有劉烈婦以救姑死其事畧同並列於孝不亦宜乎

義行

喬深

直之父天順二年援例授七品散官委管易州柴廠事
成化壬辰歲大飢戶部郎中沈奉命勸借深輸粟千石
活數萬人沈曰公積德深厚後其興乎
無何子直舉於鄉其後繩繩不絕云

閻敬

珩之祖成化二年大飢捐粟三百石賑濟授輸粟散官

李鳳

剛方好義敦重儒術鄉人有爭訟者多詣門求判數語
譬曉各自輸服至有勿為不善見絕李公之語其孫世
藩成丙辰進士人
以為積善報云

烈婦

明周氏

縣民劉繼祖妻夫故即欲殉之姪嫂防之不果後防者少疎夜分自縊而死遠近歎惜迄今稱為烈婦事未奏聞大中丞喬壁星賦詩美之

喬壁星曰存亡不二心盛衰不改節古烈女所稱

如是吾邑若周氏自縊殉夫可謂繼美矣余故闡

發幽光用愧丈夫之懷二心者

高氏

郝家庄李松園妻本唐山人歸於李崇禎六年流賊之亂抱子從夫與其本生父母避於漆峪之西山賊至呼之隨行不應賊欲殺其母乃從之行將至峪知不能免遂竦身跳入澗中澗淺不死引之入室又不從擗之無數血流滿身終不從夜半自縊死崇禎十二年督學御史吳道昌題請旌表

魏氏

灰林村魏登科女年十四歸內丘縣民胡懸三朝回母家賊至呼行不從強掖之馬上墜馬者三賊以刀逼之女曰殺則殺耳不從賊賊怒斷其右手罵益厲遂殺之

趙氏

祁村人適岡頭村民劉改宅岡前有高崖民避寇者輒緣絙而升一日賊起村民皆升其舅姑先上婦不及升賊見其貌下馬疾往執之婦疾趨不顧賊三刃之終不止曳其髮挺持不前賊力拖數步終不順遂殺之

梁氏

梁家庄人適漆峪民王有澤與高氏同遇寇呼之隨順二婦皆不從而梁氏出言尤厲賊殺之山坡之上已百按此四烈婦同一時事崇禎十三年一併公舉申請學憲吳止題高氏一人亦未旌表今因修志而附見之

誥封恭人贈淑人高氏

故四川巡撫喬公繼室原任兗州知府喬恭肅公繼母崇禎戊寅城

陷恭肅公先死恭人繼之

魏氏

廩膳生員喬已百妻崇禎戊寅聞城破即投井死撫憲黎玉田具題崇禎十三年閏正月奉旨高氏贈淑人與

魏氏並建坊旌表

馮氏 生員龐士風妻

張氏 生員趙汝鈐妻

任氏 民趙一轍妻 並于崇禎十一年城破死節

節婦

明王氏 縣民李讓妻讓故王甫二十五歲孀居四十年始終無玷洪武六年旌表

喬氏 縣民王祥妻祥故子欽甫七歲家貧守志養姑育子終無他志成化四年旌表

李氏 縣民王慶妻生子方五歲慶故李氏堅心恪守婦道成化四年旌表

劉氏 縣民陳敖妻生子僅一歲敖死劉年二十誓不他適孀居數十年成化七年旌表

石氏 縣民武才用妻生子方六歲用故石年二十六姑欲奪而嫁之石誓無他心卒完其節 年旌表

喬氏 縣民孫銳妻銳故氏年二十有二晝夜號泣繼姑蘇垂白遺孤志仁志義皆幼氏憬然曰吾從夫遊地下志願畢矣高堂弱息托之誰乎遂忍死為養姑存宗計夜勤紡績晝拾野糞艱苦萬狀永無他念姑蘇即世殯葬如禮志義竟為名士以貢為東鹿訓導氏年七十有七始卒有司累表其門

張氏 縣民朱朝臣妻朝臣故時張年二十有一子世崇方數齡世岩猶在腹張事姑育子數歷凶荒卒完其節孀居六十餘年卒有司旌其門

薛氏 縣民楊濂妻濂故氏年十九無子家貧孀居七十年人無間言有司表其門

趙氏 僉事趙世相女適知縣劉偉子源濬成婦十九日源濬暴疾卒氏年十六號泣不食者五日乘夜自縊柩側姑馮覺而救之得不死或誘以無嗣更適毀容誓不再醮後親識屢勸焚香誓天且求速死見夫地下聞者歎息自幼沉默寡言笑足不踰閨閣父器異之果以節稱有司累旌其門

黃氏

縣民趙廷芝妻芝故氏年二十有一守志不嫁有司旌其門

樊氏

縣民鄭登妻登故氏年二十七遺孤邦重方四齡邦重在腹家無斗粟誓不再嫁六十三歲卒有司屢旌其門

王氏

縣民閻佳器妻器歿王年二十有九自矢靡他家貧親操井臼紡績蠶桑事姑撫遺卒以孝慈稱姑歿窘甚殯

葬以禮遺孤成立世業不墜有司累旌其門

董氏

生員楊時登妻年二十有二登故止一女堅志守節雖貧苦不堪畧無他念時萬曆二十五年年七十四矣

張氏

縣民趙一清妻二十二歲而夫亡後七月始生一子祖猷子母伶仃孀居守志

崔氏

縣民張世威妻二十九歲而夫亡家貧守志萬曆二十五年年七十有九有司旌之

李氏

生員劉桂妻二十七歲桂卒子女俱無甘心守志年六十二歲有司旌之

趙氏

縣民王尚化妻化死氏年十八以遺腹子守志以上見舊志

楊氏

南程村民劉思賢妻自十八歲居孀至九十六歲萬曆四十六年巡按劉廷元旌表匾曰正氣凌霄

陳氏

南高村民劉世勛妻順治五年巡按鄧孕槐旌表

趙氏

趙村民陳三畏妻自十八歲守節至三十三歲歲歉家貧舅姑逼嫁自縊而死康熙十六年訓導齊可魯旌之

張氏

解村民馮明時妻為婦二年而寡自十八歲守節至七十七歲知縣崔廷瑜旌之

李氏

明中書舍人趙思學妾南和縣人知縣張煥如旌之

楊氏

明庠生張弘猷妻萬曆時人貧而無子守節四十餘年

郝氏

馮村人張崇喜妻崇禎十一年張崇喜遇難氏守節五十年見今八十四歲猶存

義姑

魯義姑

不知何代人昔有盜至義姑避難而奔盜問曰媼何負長而攜幼氏答曰負者吾姪攜者吾子盜嘉之曰吾不

可犯義姑里遂北去盜僭稱王人遂稱其村為駕迴北

程鵬搏曰余聞義姑魯人齊伐魯義姑以婦人仗義感齊軍而回其師其言曰子之於母私愛也姪之從姑公義也凜凜兩言一古為烈臨何以有義姑而亦魯其稱耶如謂卽回齊師之義姑則臨固晉地而非魯地如謂事有偶同恐事可同名可同而魯之稱不得同且古書明載齊伐魯而義姑之實有所據此云昔有盜不明言何盜為傳聞事可知又謂盜僭稱王其別為一事又可知然而舊志

載之必有自來余生也晚宰臨於數百年後喜道其事而為之說以備考

喬已百曰程公之疑亦有所疑乃百近至駕迴北村見義姑塚在南岡上一塔巋然土級高丈餘上有文云奉旨旌表不詳何代徘徊久之而後知義姑之說非誣也既有村名又有墓塔則其人與事之真可知又附近村中魯姓甚多其來已久魯或義姑之姓非齊魯之魯也又竇建德嘗稱王於此死於牛口峪去此正北不數里似可為據耳太史

公論許由以塚為證吾於義姑亦云

義姑塚非有碑之營山又其墓前亦無碑正其地
墓道和城大相連林中曾掘其墓其來山其地
故之跡非無也其地亦不遠矣其墓前亦無碑
亦大云奉旨葬來不葬則亦無碑矣其地亦不遠矣
林是義姑塚身南岡上一營山其地亦不遠矣
喬子百口縣公之墓亦在村前其地亦不遠矣
其事而為之者亦不遠矣其地亦不遠矣
姑之墓亦在村前其地亦不遠矣其地亦不遠矣

隱逸

元

劉栖楚

元至正時人張錄菴學田碑稱栖楚字國標隱居不出
又云劉君初無萬金之積也乃能以百畝之田割為學

田其尊聖教重人倫
設心之厚為何如哉

仙釋

明

澄 普

西禪寺住持迂頑沉鬱不甚解梵典然性淳謹終日危坐中不可測隆慶三年壽八十餘無疾跌坐而死

宗 曉

號三空南京人萬曆初年自北京循西山而下遍選名山而卓錫於邑西之聖水坪剏建鸞喜寺樹松栢千萬

株遂成一方巨觀年八十餘乃逝所學不可知而行則苦矣

仁 常

號無盡邠村人姓楊氏土人稱楊禪削髮出遊叅訪幾遍天下頗有所得而歸卓錫於贊皇之獅子坪剏建彌

陀寺弟子百衆兩縣諸山刹皆其苗裔

技能

明

張雲鵬

兩口村人性聰慧自云掘地得石函有書皆朱書符篆能布武侯八陣自往兵部投賢不售歸而作八門燈一

盞以自娛極其工巧其人馬戈兵出入往來之狀令人目炫能詩詞工畫所畫有留侯品簫圖氣韻生動水墨朱文公小像題贊曰規模之大海濶天高義理之精繭絲牛毛云

臨城縣志卷之三 終

臨城縣志卷之三
藝文志
知縣事長洲宋廣業重修

臨城縣志卷之四

知縣事長洲宋廣業重修

藝文志

御製文

宋真宗御製至聖文宣王贊并序

又加號詔
碑在文廟東廡

若夫檢玉介丘迴輿闕里緬懷於先聖躬謁於嚴
祠以爲易俗移風旣仰師於藝訓崇儒重道宜益進
於徽章增薦崇名聿陳明祀思形容於盛德爰刻鏤
於斯文贊曰立言不朽垂教無疆昭然令德偉哉素

王人倫之表帝道之綱厥功實茂其用允臧升中既
畢盛典載揚洪名有赫懿範彌彰
大中祥符元年十一月二十四日東封禮畢鑾輿幸
闕里追謚至聖文宣王詔曰王者順考古道懋建
大猷崇四術以化民昭宣教本總九有而致治丕變
人文方啓迪於素風思肇揚於鴻烈先聖文宣王
道膺上聖體自生知以天縱之多能實人倫之先覺
至功侔於簡易景樂配乎貞明惟列辟以尊崇為億
載之師表肆朕寡昧欽承命曆曷嘗不遵守彝訓保

又中區屬以祗若元符告成喬嶽觀風廣魯之地飭
駕數仞之墻躬謁遺祠緬懷遐躅仰明靈之如在肅
奠獻以惟寅是用徵簡策之文昭聰獻之德建舉追
崇之禮庶申嚴奉之心備物典章垂之不朽誕告多
士昭示朕懷宜追謚曰至聖文宣王仍令所司擇
日備禮冊命并修飾祠廟祭器其廟內制度或未合
典禮並令改正給近便五戶以奉塋域仍差官以太
牢致祭故茲告示想宜知悉治平四年八月二十六
日朝奉郎守秘書丞知趙州臨城縣事兼兵馬都監

武騎尉高旦立石並書

宋徽宗大觀聖作之碑

御製御書○定以八行取士碑在戟門左高一丈六尺闊三

尺二十厚一尺三寸

學以善風俗明人倫而人才所自出也今有教養之法而未有善俗明倫之制殆未足以兼明天下孔子曰其爲人也孝弟而好犯上者鮮矣不好犯上而好作亂者未之有也蓋設學校置師儒所以敦孝弟孝弟興則人倫明人倫明則風俗厚而人材成刑罰措朕考成周之隆教萬民而賓興以六德六行否則威

之以不孝不弟之刑比已立法保任孝弟睦婣任恤中和之士去古綿遠士非里選習尚科舉不孝而弟有時而容故任官臨政趨利犯義訟訕貪污無不爲者此官非其人士不素養故也近因餘暇稽周官之書制爲法度頒之學校明倫善俗庶近于古○諸士有善父母爲孝善兄長爲弟善內親爲睦善外親爲婣信朋友爲任仁于州里爲恤知君臣之義爲忠達義利之分爲和○諸士有孝弟睦婣任恤忠和八行見于事狀著于鄉里耆鄰保伍以行實申縣縣令佐

審察延入縣學考核不虛保明申州如令○諸八行孝弟忠和為上睦婣為中任恤為下士有全備八行保明如令不以時隨奏貢入太學免試為太學上舍司成以下引問考驗較定不誣申尚書省取旨釋褐命官優加拔用○士有全備上四行或不全一行而兼中等二行為州學上舍上等之選不全上二行而兼中等一行或不全上三行而兼中二行者為上舍中等之選不全上三行而兼一行或兼下行者為上舍下等之選全有中二行或有中等一行而兼下一

行者為內舍之選餘為外舍之選○諸士以八行中三舍之選者上舍貢入內舍在州學半年不犯第二等罰升為上舍外舍一年不犯第三等升為內舍仍准上法○諸士以八行中上舍之選而被貢入太學者上等在學半年不犯第三等罰司成以下考驗行實聞奏依太學貢士釋褐法中等法待殿試下等依太學下等法○諸士以八行中選在州學若太學皆免試補為諸生之首選充職事及諸齋長諭○諸以八行考士為上舍上等其家依官戶法中下等免戶

下支移折變惜借身丁內舍免支移身丁○諸謀反
謀叛諸大逆子孫同及大不恭詆訕宗廟指斥乘輿
為不忠之刑惡逆詛罵告言祖父母父母父母別籍異財
供養有闕居喪作樂自娶釋服匿喪為不孝之刑不
恭其兄不友其弟姊妹叔嫂相犯罪杖為不弟之刑
殺人畧人放火強姦強盜若竊盜罪杖及不道為不
和之刑謀殺及畧賣總麻以上親毆告大功以上尊
長小功尊屬若內亂為不睦之刑尊屬相犯至徒違
律為婚停妻娶妻若無罪出妻為不婣之刑毆受業

師犯同學友至徒應相隱而輒告言為不任之刑詐
欺取財罪杖告屬者耆鄰保伍有所規求避免或告
事不干已為不恤之刑○諸犯八行縣令佐州知通
以其事目書于籍報學應有入學按籍檢會施行○
諸士有犯不忠不孝不弟不和終身不齒不得入學
不睦十年不婣八年不任五年不恤三年能改過自
新不犯罪而有二行之實耆鄰保伍申縣縣令佐審
察聽入學在學一年又不犯第三等罰聽齒于諸生
之列○大觀元年九月十八日資政殿學士兼侍讀

鄭居中奏乞以御筆八行詔旨摹刻于石立之官學
次及太學辟雖天下郡邑二年八月二十九日奉御
筆賜禮部尚書兼侍講鄭居中以外所賜刻石通直
郎書學博士李時雍奉敕摹寫太師尚書左僕射兼
門下侍郎上柱國魏國公食邑一萬一千三百戶食
實封三千八百戶蔡京奉敕題額

元成宗加號大成至聖文宣王詔

碑在西廡前

蓋聞先孔子而聖者非孔子無以明後孔子而聖者
非孔子無以法所謂祖述堯舜憲章文武儀範百王

師表萬世者也朕纘承丕緒敬仰休風循治古之良
規舉追封之盛典加號大成至聖文宣王遣使闕里
祀以太牢於戲父子之親君臣之義永惟聖教之尊
天地之大日月之明奚罄名言之妙尚資神化助我
皇元大德十一年七月○○日

明太祖欽定學校格式碑

碑在縣學名宦祠東

洪武二年十月二十五日左丞相宣國公欽奉聖旨
今後立學設科分教禮樂射書數你每定擬來欽此
會集省臺部官逐一議擬于十月二十七日早朝奉

天門奏奉聖旨節該學校合行的勾當教秀才每用心講究着行欽此欽依會集到各項事理于十二月十八日中書省楊右丞陳叅政睦叅政右侍郎都事禮部崔尚書于奉天門東板房內奏奉聖旨准教立定罪名同這格式各學校都鐫在石碑上

學校格式

一生員入學定例 凡各處府州縣責任守令于民間俊秀及官員子弟選充必須躬親相視人才俊秀容貌整齊年及十五之上已讀論孟四書者方

許入學其年至二十之上願入學者聽在內以監察御史在外按察司巡歷到日逐一相視生員有不成材者黜退另行添補 上項生員如果赴中書省各行省相視誠恐路遠不便

一選官分科教授 禮律書共為一科訓導二員掌教禮教律教寫字于儒士有學行通曉律令諳習古今禮典能書字者 樂射算共為一科訓導二員掌教樂教數教射于知音律能持弓能算法者上項訓導禮樂射書數律但是能一等能兩等者

從各處守令考驗各取所長相兼教訓 府教授
州學正縣教諭掌講明經史務使生員知孝弟忠
信禮義廉耻通曉古今識達時務及提調各科訓
導教習必須成效 上項教官從各處守令于儒
士有才德有學問通達時務者選充官為應付行
糧脚力悉赴中書省考驗
一生員習學次第 侵晨講明經史學律飯後學書
學禮學樂學算未時習射弓弩教使器棒學演重
石學此數件之外各有餘暇願學詔誥表箋疏議

碑銘傳記者聽從其便

一禮樂二事現行集議比及成書頒降時學

一生員額數 府設四十員 州設三十員 縣設

二十員

一師生廩膳 每人日支米二升柴油鹽在內于本
處係官錢糧內放支

一學內設空閑地一所以為射圃

一教官出身俸給定立等第如果教有成效異材出
衆者不拘資格優加擢用俸給就于本處係官錢

糧內放支

一生員入學姓名每季申報合于上司置立文簿附寫某州某縣某鄉某戶

一守令每月考驗生員觀其進退揖讓之節聽其語言應對之宜背讀經史講通大意問難律條試其處決講禮務通古今寫字不拘格式審音詳所習之樂觀射驗其膂力又能中的稽數明其乘除口手相應守令置立文簿同教授紀載諸生所進功程如一月某生學不進則紀載于簿至此科三月

學不進者罰此科訓導月米半月罰多不過一月
一監察御史按察司巡歷去處考試各府州縣教官生員府生員十二員學不進者罰守令俸錢半月教授某科訓導各罰俸錢一月二十員學不進者守令罰俸錢一月教授某科訓導黜退二十員之上學不進者守令笞四十州生員八名學不進者守令罰俸錢半月學正及某科訓導各俸錢一月十六員學不進者守令罰俸錢一月學正及某科訓導黜退十六員之上學不進者守令笞四

十縣生員六員學不進者罰守令俸錢半月教諭及某科訓導各俸錢一月十二員學不進者守令罰俸錢一月教諭及某科訓導黜退十六員以上學不進者守令笞四十

一設學之後子弟習學各科限三年有成隸中書省者貢至中書省考試中選者就便量才錄用隸各行省者貢至各行省考試其中選者貢入朝廷選用

一各處府州縣于洪武三年正月為始開學務要實

效責任所在有司守令每月提調在內監察御史在外按察司每歲考覈學生功課比上年有進有司官教官便是稱職若學生比上年學不進有司官治罪教官黜退

一學校生員每府四十名州三十名縣二十名府州縣各設教授學正教諭一員訓導四員今擬府州生員四十名者設訓導四員每縣二十名已有教諭又設訓導四員似為過多今擬州縣學正教諭外每處止設訓導二員其讀書生員如有增廣不

拘定額及北平陝西河南地面人民稀少每州縣除學正教諭外止設訓導一員相應

一欽奉聖旨今後教各府州縣儒學好生訓誨生徒每日講讀文書罷于學後設一射圃教學生習射但遇朔望的日子要試演過其有司辦事閒暇時也與學官一體習射若是有司官與那學官不肯用心教學生習射的定問他每要罪過欽此一吏部議到學官品級先擬教授正九品學正從九品教諭授省劄今擬教授給都省劄付學正在內

授吏部劄付在外授行省劄付訓導授各府州劄付身先令試驗三年候有成效然後照依已定品級實授相應

一戶部議到教授學正等官改擬試職俱全訓誨生員所據俸給量擬教授月支米一石五斗學正月支米一石三斗教諭訓導各月支米一石錢米三七兼支相應奉部堂准擬

明太祖禁約生員臥碑

在縣學明倫堂

洪武十五年頒禁例于天下學校鐫勒臥碑置于明

倫堂之左永爲遵守。○今後府州縣生員若有大事干于已家者許父兄弟姪具狀入官辯訴若非大事含情忍性毋輕至于公門。○一生員之家父母賢智者少愚痴者多其父母賢智者子自外入必有家教之方子當受而無違斯孝行矣何愁不賢者哉其父母愚痴者作爲多非子孫既讀書得聖賢知覺雖不精通實愚痴父母之幸獨生是子若父母欲行非爲子自外入或就內知則當再三懇告雖父母不從致身將及死地必欲告之使不陷父母于危亡斯孝

行矣。○一軍民一切利病並不許生員建言果有一切軍民利病之事許當該有司在野賢人有志壯士質朴農夫商賈技藝皆可言之諸人毋得阻當惟生員不許。○一生員內有學優才膽淡明治體果治何經精通透徹年及三十願出仕者許敷陳王道講論治化述作文詞呈稟本學教官考其所作果通性理連僉其名具呈提調正官然後親齎赴京奏聞再行面試如果真才實學不待選舉卽行錄用。○一爲學之道當自尊敬先生始凡有疑問及聽講說皆須誠

心聽受若先生講解未明亦當從容再問毋恃已長
妄行辯難或置之不問有如此者終身不成○一為
師長者當體先賢之道竭忠教訓以導愚蒙勤考其
課撫善懲惡毋致懈惰○一提調正官務在常加考
較其有敦厚勤敏撫以進學懈怠不律愚頑狡詐以
罪斥去使在學者皆為良善斯為稱職矣○一在野
賢人君子果能練達治體敷陳王道有關政治得失
軍民利病者許赴所在有司告給文引親齎赴京面
奏如果可采即便施行不許坐家實封入遞○一民

間凡有冤抑于于自己及官吏賣富差貧重科厚歛
巧取民財等事許受害之人將實情自下而上陳告
毋得越訴非干已事者不許及假以建言為由坐家
實封者前件如已依法陳告當該府州縣布政司按
察司不為受理聽斷不公仍前冤抑者然後許赴京
申訴○一江西兩浙江東人民多有不干已事代人
陳告者今後如有此等之人治以重罪若果鄰近親
戚全家被人殘害無人申訴者方許○一各斷發克
軍及安置人數不許進言其所管衛所官員毋得容

許○一若十惡之事有干朝政實跡可驗者許諸人密切赴京面奏○一前件事理仰一一講解遵守如有不遵並以違制論

明世宗御製敬一箴並序

碑在明倫堂後

夫敬者存其心而不忽之謂也元后敬則不失天下諸侯敬則不失其國大夫敬則不失其家士庶人敬則不失其身禹曰后克艱厥后臣克艱厥臣五子之歌有云予臨兆民如朽索之馭六馬為人上者奈何不敬其推廣敬之一言可謂明矣一者純乎理而無

雜之謂也伊尹曰德惟一動罔不吉德二三動罔不凶其推廣一之一言可謂明矣蓋位為元后受天付托承天明命作萬方之君一言一動一政一令實理亂安危之所係若此心忽而不敬則此德豈能純而不雜哉故必兢懷畏懼於郊禋之時儼神明之鑒享發政臨民端莊戒謹惟恐拂於人情至於獨處之時思我之咎何如改之不吝思我之德何如勉之不懈凡諸事至物來究夫至理惟敬是持惟一是協所以盡惟天子之職不忝厥祖厥親由是九族親之黎民

懷之仁澤及於四海矣朕以冲人纂承丕緒自惟涼德寡昧勉而行之欲盡持敬之功以循致乎一德其先務又在虛心寡欲驅除邪逆信任耆德爲之匡輔敷求哲人布列庶位斯可行純王之道以坐致太平雍熙之至治也朕因讀書而有得焉乃述此以自勗云人有此心萬里咸具體而行之惟德是據敬焉一焉所當先務匪一弗純匪一弗聚元后奉天長此萬夫發政施仁期保弘圖敬怠純駁應驗頓殊徵諸天人如鼓答桴朕荷天眷爲民之主德或不類以爲

大懼惟敬惟一執之甚固敬天勤民不遑寧處曰敬維何怠荒必除郊致恭誠廟嚴孝趨肅於明廷慎於閒居省躬察咎儆戒無虞曰一維何純乎天理弗參以三弗二以二行顧其言終如其始靜虛無欲日新不已聖與法言備見諸經我其究之擇善必精左右輔弼貴於忠貞我其任之鑒別必明斯之謂一斯之謂敬君德旣備萬邦則正天親民懷永延厥命光垂後嗣綿衍蕃盛咨爾諸侯卿與大夫以至士庶一遵斯謨主敬協一罔敢或渝以保祿位以完其軀古有

盤銘目接心警湯敬日躋一德受命朕為斯箴拳拳
希聖庶幾湯孫底於嘉靖

嘉靖五年六月二十七日欽文之璽

明世宗御製范浚心箴註

茫茫堪輿俯仰無垠人於其間渺然有身是身之
微太倉稊米參為三才曰惟心爾往古來今孰無
此心心為形役乃獸乃禽惟口耳目手足動靜投
閒抵隙為厥心病一心之微衆欲攻之其與存者
嗚呼幾希君子存誠克念克敬天君泰然百體從

令右心箴

堪輿是指天地說無垠是無有界限宋儒范氏浚作
心箴說道茫茫然天地廣大無有界限而人居其中
便似太倉中一粒粟米天地這般大人身這般小人
與天地參為三才者非以形體而言惟其心耳蓋心
為一身之主吾心先正則百體四肢莫不聽其使令
若心有一毫不正則被聲色所移物欲所攻便動與
理反豈不干人道違哉故范氏之作箴雖是常言西
山真氏特錄于大學衍義之中以獻時君宋君雖未

能體察而為後世道其致意也深其用功也至是余所嘉慕而味念之箴之作本于范氏非真西山發揚其孰能之哉嗚呼念哉

一明世宗御製程子四箴註

與心今本虛應物無迹操之有要視為之則蔽交於前其中則遷制之於外以安其內克已復禮久而

誠矣

右視箴

視聽言動四箴者宋儒程氏頤之所作也程氏曰人之生也其性本善後被物慾交攻而此性始有不善

視聽言動四者或不能中此乃受病之處居中而制萬事者心也心之所接必由視聽得之視聽之不明不聰則言動俱違夫理然視居其首焉程氏說凡人于視不無被那諸般物色所蔽惟中心安之凡視無不明勿使外物蕩其中常使中制于外可也書云視遠惟明卽此意也要操存之在吾心無有遠邇視之如一辨其是非觀其善惡以吾心之正為體察然後可免于昏亂之失矣朕惟人皆以視為明而人君所視者尤為要焉果以此為則深為益也凡觀其邪正

辨其賢否不為奸巧之所惑庶幾忠與不肖不得並進用舍不至于倒置矣嗚呼察之

人有秉彜本乎天性知誘物化遂亡其正卓彼先覺知止有定閒邪存誠非禮勿聽

右聽箴

此程氏言聽之要說道視聽乃為出言之機一或有差患必至矣前言視之之道此言聽之之道夫人之于視或能察之然又恐聽之未善也目視之既善耳聽者須盡其善可也耳目之間視聽之際均為要焉若聽之不審則無以知其是非故聽言之際當分別

其邪正勿使甘佞之言從入其心心既受之必為誘惑書云聽德惟聰卽此意也蓋人生于天具耳目口鼻之體口之與鼻無所禁者惟耳目為重故以視聽為戒朕論之曰口與鼻之無所禁乃彼知之自然也耳目之于視聽乃彼之不能先覺者也如口之嗜味知其甘辛酸苦嘗之自能別也鼻之臭物知其好惡嗅之自能擇也目之于色則受其豔麗耳之于聲則受其音律殊不知豔麗音律皆人為之所以反受其害口鼻之覺故異于耳目也故程氏箴云卓彼先覺

知止有定謂既能先覺卓然先覺則是有定向而人君之聽尤當審辨之也書云無稽之言勿聽又云庶頑讒說震驚朕師此皆聽德之要也人君于聽納之間當辨忠讒而已忠言逆耳近于違我讒言可信近于遜我不能審擇其患豈淺淺哉但使吾心泰定不為讒佞之徒所惑則所納者未必不可所屏者未必不當惟吾心審斷之而已嗚呼審之

人心之動因言以宣發禁躁妄內斯靜專矧是樞機興戎出好吉凶榮辱惟其所召傷易則誕傷煩

則支已肆物忤出悖來違非法不道欽哉訓辭

右

言箴

樞機者譬戶之軸弩之牙也戎是兵戎好是喜好程子之意說凡人所言必謹其妄出輕發如弩之發矢度而思之務求其中焉言易則至于狂誕言煩不免于支離非聖賢之法言不敢道之于口所以告來世之君子也朕因而論之曰凡人所言必求其合諸道理準諸經傳然後可以為言也夫言以文身也書云惟口啓羞大學云言悖而出者亦悖而入孝經云非

先王之法言不敢道斯之謂也人之于言必加謹焉
而人君之言尤當謹之先儒云王言如絲其出如綸
王言如綸其出如綍人君之發號施令皆言也令出
之善則四海從焉一或不善則四海違焉故凡出一
言發一令皆當合于天理之公因諸人情之所向背
若或徒用己之聰明恃其尊大肆意信口不論事理
之得失民情之好惡小則遺當時之患大則致千百
年之禍可不戒畏之哉程氏之作箴其用心也至矣
嗚呼謹之

哲人知幾誠之於思志士勵行守之於為順理則
裕從欲惟危造次克念戰兢是持習與心成聖賢

同歸 右動箴

哲人是明哲之人志士是有德行之士誠是念之實
守是行之篤理即天理欲即人欲程子說凡人所動
作便不可輕舉妄動當審事機可否之如何天理人
欲之所在思其事之巨細為其所當為然後動與道
合無有墜失狂躁之病戰兢惕勵如此者惟哲人乃
能之君子可不謹之哉朕因而論曰凡人所動為當

求合乎道理察其當爲與所不當爲精別而行之可也而人君之所動爲尤重焉蓋君者以一身而宰萬事不可適已之欲與夫聽信讒佞輕舉妄動或恃中國之強而好征伐或盤遊無度而殘虐百姓凡此類者不可枚舉姑就其大者言之舉動之間上違天意下拂民心而敗亡之禍隨之是不可畏懼也哉程氏之作箴其用心也至矣嗚呼畏之斯四箴者作之在于程頤以斯四箴而致其君者乃吾輔臣張璪也頤之作箴其見道之真如此而動與禮合宜朕未

之言君子必知矣夫今璪以此言而告朕與夫昔議禮之持正可謂允蹈之哉朕聞于學特因是註釋其義于以嘉璪之忠愛于以是君子之人嗚呼箴之功宜不在程氏而在于璪也哉用錄此于末云爾
嘉靖丁亥歲季冬越三日註

明世宗聖諭六通

聖諭內閣輔臣楊一清謝遷張璪翟鑾朕因十三日講官顧鼎臣解說心箴連日味思其義甚爲正心之助昨自寫一篇並假爲註釋與卿等看嘉靖六年十

一月十八日○大學士臣張璫謹奏是月小至日伏蒙賜內閣范浚心箴註一通臣稽首對揚乃竊歎曰至哉聖人之用心乎漢董仲舒有言人君所為必求其端于天令陰極陽生實君子道長小人道消之時也在易之卦為復曰復其見天地之心乎自非聖人心學得之天其何能體發如此臣思竊有感焉臣昔讀書之日揭范浚心箴程頤四箴以自勵蓋人心之微衆欲攻之者多從視聽言動而入程頤四箴實養心之要目也況人君一心萬化之主其視聽言動尤

當加謹焉者也臣于御製心箴敬摹宸翰付工刻石傳之天下萬世謹錄程頤四箴乞留神省覽○聖諭輔臣張璫午間得卿錄來視聽言動四箴朕甚喜悅朕前日因聽講官講心箴回宮浚加愛尚欲釋其義不能自己之心未肯放過只勉強註畧仍咨于卿等欲為藻潤以成所論卿何便付工刻石豈不取人笑乎朕自念荷天命為人君長當務學以致其知待粗有領會之時再註四箴尚賴卿贊之故諭嘉靖六年十一月二十二日○臣張璫謹奏昨者伏蒙聖諭仰

見皇上緝熙聖學之至也宋儒朱熹有言自古賢聖相傳只是理會一个心臣以謂范浚心箴舉其綱程頤四箴列其目相為發明者也臣以此用功餘三十年莫不有得今聖明啓發一至于此其盲者之日月瞽者之雷霆也臣何能贊一詞第當刻石頒布以覺斯世以廣聖學之傳臣伏而思之真聖人復生非特堯舜之治見于天下而堯舜心法之秘道統之傳盡在是矣程頤四箴尚願聖明啓示謹當摹勒宸翰與心箴註並行刻布以為斯民斯道之幸○聖諭輔臣

張璠卿前日錄來程氏四箴昨勉強註解朕復思之程氏見道分明慎敬如此以教後人其功至矣但于濮議之中未免力爭邪說誣君奪子故朕又述數語云與卿先藻潤停當然後書示內閣嘉靖六年十一月二十六日○臣張璠謹奏伏承頒示御註程頤四箴臣仰惟大哉皇言皆根諸身心達諸政事真見帝王之學與儒生大不同者也何能復贊一辭但末加獎譽臣實不勝惶懼臣竊自念所務之學雖不逮程頤而所遇之主實萬萬過之頤在英宗朝代彭思永

為濮議論猶未定况皇上繼統與英宗繼嗣事大不同使頤居今之世議今之禮豈得復守濮議之說哉謹將御註四箴與范浚心箴通摹宸翰並行刻布以加惠天下後世○聖諭輔臣楊一清謝遷張璁翟鑾大學士張璁以宋程頤所作視聽言動四箴來告朕深切有益于學朕讀以旬日輒附數語權為註解用錄出以示卿等嘉靖六年十二月初三日○臣楊一清臣謝遷臣張璁臣翟鑾謹題皇上所註范氏心箴及程頤視聽言動四箴俱已刻石乞敕工部于翰林

院後堂空地蓋亭監立以垂永久復敕禮部通行兩京國子監并南北直隸十三省提學官摹刻于府州縣學使天下人士服膺聖訓有所興起荷蒙采納但亭宜有名伏乞聖明敕定頒示內外一體遵行臣等又仰思皇上前所著敬一箴發明心學甚為親切宜與前五箴并傳合令工部將敬一箴重刻一通設于亭中五箴並節奉聖諭共六通分列左右以成一代之制良有裨益謹題請旨嘉靖七年二月二十一日奉敕旨卿等所言都依擬行亭名與做敬一禮工二

部知道

明太祖加城隍封號詔

王者奉天明命行政教于天下必有生聖之瑞受命之符此天示不言之妙而人見聞所及者也神司淑慝爲天降祥亦必受天之命所謂明有禮樂幽有鬼神天理人心其致一也朕君四海雖明智弗類代天理物之道實罄于衷思應天命此神所鑒而簡在帝心者君道之大惟典神天有其舉之承事惟謹臨城縣城隍聰明正直聖不可知固有超于高城深池之表者世之崇于神者則然神之受于天者蓋不可知

也茲以臨御之初與天下更始凡城隍之神皆新其命睠此縣邑明祗所司宜封曰監察斯民城隍顯佑伯顯則威靈丕著佑則福澤溥施此固神之德而亦天之命也司于我民鑒于邑政享茲典祀悠久無疆主者施行洪武十九年月日

大清頒行學規

順治八年題准教官生員不遵教條生事違法者學臣嚴行懲究若與武職兵丁有爭教官生員聽學臣處治不許武職擅責武職兵丁聽該管衙門處治不許生員結黨爭抗九年題准刊立臥碑置於明倫堂之左曉示生員永為遵守一生員之家父母賢智者子當受教父母愚魯或有非為者子既讀書明理當再三懇告使父母不陷於危也

一生員立志當學為忠臣清官書史所載忠清事蹟
務須互相講究凡利國愛民之事更宜留心
一生員居心忠厚正直讀書方有實用出仕必作良
吏若心術邪刻讀書必無成就為官必取禍患行
害人之事者往往自殺其身常宜思省
一生員不可干求官長交結勢要希圖進身若果心
善德全上天知之必加以福
一生員當愛身忍性凡有司官衙門不可輕入卽有
切已之事止許家人代告不許干預人詞訟他人

亦不許牽連生員作證

一為學當尊敬先生若講說皆須誠心聽受如有未
明從容再問毋妄行辯難為師者亦當盡心教訓
勿致怠惰

一軍民一切利病不許生員上書陳言如有一言建
白以違制論黜革治罪

一生員不許糾黨多人立盟結社把持官府武斷鄉
曲所作文字不許妄行刊刻違者聽提調官治罪

以上
臥碑

又定各提學官督率教官生儒務將平日所習經書義理着實講求躬行實踐不許別創書院羣聚徒黨及號召他方遊食無行之徒空談廢業因而起奔競之門開請託之路違者提學御史聽都察院處分提學道聽巡按劾奏遊士人等問擬解發一儒學教官士子觀法所係提學按臨之日考其學行兼優教有成效者禮待獎勵仍據實列薦其行履無過而學問疎淺者姑行戒飭責令勉進有老病不堪者准令以禮致仕若鑽營委署橫索束脩

卑污無耻素行不謹者不必試其文學卽行案奏分別究革其有學霸生員書役門夫行私惑誘者一并究擬重治

一孝弟廉讓士子立身大節有敦本尚實行誼表著者提調官細加體察取具本學師生及本族鄰里甘結申送提學覈實卽加獎賞以勵頽俗若有平日不務學業囑託把持武斷包攬或捏造歌謠興滅詞訟及敗倫傷化過惡彰聞者體訪得真不必品其文藝卽行黜革其行優者不許通同賄冒行

劣者不許徇情姑息併不許輕信開送致被挾私中傷違者從重叅處

一府州縣提調官宜嚴束生徒按季考校凡學內殿堂齋房等屋損壞卽辦料量工修理其齋夫膳夫學糧學田等項俱以時撥給不許遲悞尅減生員之家照例優免除干謁賣擾外俱宜以禮相待勿得橫肆凌侮至于非禮諂諛嚴行禁斥

一該管有司官於諸生進見須設立門簿詳悉填造或以公事或以私事悉登姓名或自構訟或爲人

訟或自爲證或被牽證全載情節如有事不干已輒便出入衙門乞恩罔利議論官員賢否許卽申呈提學官以行止有虧革退若糾衆扛幫聚至十人以上罵詈官長肆行無禮爲首者照例問遣其餘不分人數多少盡行黜革爲民

一淡薄質素儒者家風如以浮靡輕佻相高縱酒宿娼蕩閑踰檢自等于市井年少之輩有犯必黜不得少貸凡遇

聖節元旦冬至及丁祭一應禮儀務須整齊嚴肅有高

臥不赴與叅錯驕蹇者卽行責治至于謁見上官毋失禮毋足恭務須循循雅飭師生教學胥此可覘

一名宦鄉賢孝子節婦及鄉飲賓饌皆係大典風教所關今後提學官遇有呈請務須覈實確據非年久論定者不得舉鄉賢名宦非始終無議者不得舉鄉賢賓饌如有受人請求妄舉者師生人等卽以行止有虧論其從前冒濫混雜者徑自查革十年題准生員犯小事府州縣行教官責懲犯大

事者申學臣黜革然後定罪如地方官擅責生員該學臣糾叅

順治十二年

上諭各學生員令提學御史提學道嚴飭府州縣衛學教官月加課程不得曠廢亦不得假借督課凌虐諸生其歲考科考場中原卷解部稽察不許換卷謄改仍將各學廩增附名數細查在學若干黜退若干照數冊報出示各該府州縣衛張掛俾通知的確姓名然後優免丁糧十三年題准提學嚴

考教官除文行兼優及文平而行無虧者應薦應留其文行俱劣者開送撫按題叅罷斥十五年題准凡各學劣生有不遵條例者教官揭報學道嚴行褫革如教官徇情不報罰俸六個月至三名者革職其學臣經據教官揭報不行盡法懲處者倘被撫按糾叅每一名以上罰俸六個月三名以上罰俸一年五名以上降職一級七名以上革職至於教官開報務須真正劣衿學霸不得僅用小疵腐儒舉優行者以孝弟為先不得以操履平

常充數如有挾同受賄情弊察出將教官重處

順治十六年

上諭士習不端結社訂盟把持衙門關說公事相煽成風着嚴行禁止後有犯者該學臣卽行黜革叅奏學臣徇隱事發一體治罪又題准惡衿身列黷宮見充吏胥者該督撫按究革問罪其生員內有原係積年衙蠹經犯罪名者提學嚴查不時除革治罪應考童生有現在衙門應役朦朧應試者嚴查重治廩生教官扶同保結者并行議處○十八

年題准紳衿貢監在地方抗糧不納并伊兄弟親戚宗族包攬串同倚勢不完及廢紳黜衿抗糧不納嚴拿解京送刑部照悖

旨例從重治罪如

旨到完納免其提解議處

康熙二年題准教官徇情不報劣生者一名革職提學不盡法懲處者一名降四級二名革職○九年題准中式真文准其謄寫選刻發賣如遇鄉會科場預先召集多人妄造文字假稱新墨卷傳

賣及直省生員濫刻選文窓稿傳賣者禮部及科道督撫查訪將假造之人如係現任官員罰俸三個月未選官員於選官日罰俸三個月舉人罰停會試一科貢生罰停廷試一年監生罰多坐監六個月生員降為青衣儒童行令該地方官責二十板如有冒名私刻罪坐假冒之人亦令該地方官責四十板又題准生員關係取士大典若有司照民例扑責非

朝廷恤士之意今後如果有欠糧重情地方官先報

學院學道俟黜革後治以應得之罪若詞訟小事
應責治者發該學官懲責


臨城縣志卷之四終



臨城縣志

六五

內閣文庫		
番號	漢	14433
冊數	6	(4)
函號	四	163 1



臨城縣志卷之五

知縣事長洲宋廣業重修

藝文志

誥敕

明馮成

以子彬貴封江西道監察御史敕命無存

楊和祖從善

制曰國家量德授任弼成治功推恩之典視其子孫
祿職以為等差所以勸忠于孝也南京工部右侍郎
楊和故祖父從善積善于躬慶流于後厥有賢孫顯

臣等奉 命 于邦家揆厥所原宜有褒贈是用贈爾為嘉議大夫南京工部右侍郎顯秩榮名永賁泉壤

制曰國家登進賢能用圖治化褒封之典及其祖禰勸忠于孝厥有舊章南京工部右侍郎楊和故祖妣謝氏婦德姆道垂裕于家乃有賢孫顯庸于國是用贈爾為淑人尚啓爾後克諧厥終

楊和父顯忠及本身

制曰朕惟積善在躬慶垂于後效庸于世寵及其先盖天之報施由本達支國家褒崇沂流而源也南京

工部右侍郎楊和故父顯忠潛德弗耀為時善人篤生令子貳佐冬官茲特贈爾為嘉議大夫南京工部右侍郎尚其欽承用光胤祚

制曰朕惟賢才效庸于國亦典視子之祿秩所以隆恩禮昭善教也南京工部右侍郎楊和故母史氏恒德宜家篤生令子顯用于時宜有褒贈是用贈爾為淑人服此恩榮昭於永世

制曰工部掌百工山澤之政令其為務實繁而南京材用所聚其務尤繁具卿及其貳佐必惟慎擇乃克

稱職爾嘉議大夫南京工部右侍郎楊和有和易之
資謙恭之行初為給事中事我皇考克效勞勤擢貳
冬官薦歷年歲久而不懈厥績用著朕良嘉之茲特
錫之誥命爾尚益敬厥德益懋厥庸慎終如初光我
榮命欽哉

洪熙元年正月二十五日

薛

幹

父至剛誥命遺失

制曰地官司國計掌錢穀而實生民休戚所係故置
屬特詳焉苟非得人奚稱任使爾戶部貴州清吏司

員外郎薛幹登名進士擢職行人暨遷今官克勤且
慎是用進爾階奉直大夫錫之誥命以為爾榮爾其
益秉廉公以勵志節尚圖後效稱此茂恩欽哉

制曰夫婦人之大倫故朝廷推恩羣臣命必及之爾
戶部貴州清吏司員外郎幹之妻張氏克勤內助茲
特封為宜人祇服榮恩永光閨闈

天順二年四月十七日

岳麒父成

麒本身敕命遺失

敕曰人子之志孰不欲顯揚其親然必能效職于國

家者乃獲推恩以酬之所以體其心而勸孝也爾散
官岳成乃中城兵馬指揮司副指揮麒之父善積于
躬慶延厥子養雖弗逮恩則宜頒茲特贈爲文林郎
中城兵馬指揮司副指揮九原有知尚克歆服
敕曰母之賢于子徵之故緣子貴母國有令典朕奚
靳焉爾郭氏乃中城兵馬指揮司副指揮麒之母躬
著母儀訓成令子爰頒寵命用勵顯揚茲特贈爲孺
人其慰往靈永光來裔

嘉靖十一年十月初四日

趙世相父錫及本身

制曰士有效于時而志不盡究厥嗣有興者乃克光
顯之天道福善之休朝廷待臣之厚蓋交相成也爾
故山西孝義縣儒學教諭趙錫乃山東濮州知州世
相之父潛心理學勵志詩書毓秀茂才入官司訓邊
邑聿彰夫聲教宦紀名流廬墓獨深于孝思鄉崇賢
祀教子登顯尤徵義方茲特贈爾奉政大夫山東東
昌府濮州知州於戲善積慶餘仁必有後雖未霑祿
養而亦旣食報矣爾尚其歆服之哉

制曰夫父母之于子俱有罔極之恩焉蓼莪之感古今所同也國家體人情以率下故追恤之命靡不覃施爾楊氏乃山東東昌府濮州知州趙世相之母溫惠貞良祇慎婉淑相夫以敬而克振其業教子以義而不溺于慈子今顯榮祿養弗逮朕甚愍焉茲特贈爾為宜人 不昧者靈有著斯渥

制曰環數百里之廣而有州州有長上承省郡下倡諸邑俾牧其民而安輯之任亦重矣乃茲素號衝劇土瘠民慄匪有治才詎可輕畀爾山東東昌府濮州

知州趙世相蔚以文學擢茂鄉闈知爾敏修授之州牧乃能闢田野興學校恤流移輕徭役愛民若子德政久著于輿評處國如家才譽屢馳于薦牘庶幾國之循良民之父母已茲以覃恩特授爾階奉直大夫錫之誥命於戲居官以盡職為忠已徵善績保譽以令終為善勿替初心茲懋勳庸嗣膺顯擢欽哉制曰詩人有鷄鳴雜佩之詠語士君子獲聞達于時者必有閨闈儆戒之助故綸命每並及之此令典也爾山東東昌府濮州知州趙世相妻李氏出自聞閥

歸于德門勤儉敬恭壺彝允協爾夫服官于外而私家罔念惟爾實能相之爰錫寵命以彰化本茲特封爾為宜人匪惟頒從爵之榮亦以表宜家之則
隆慶元年三月十九日

喬壁星父輔世及本身

敕曰詩云愷悌君子民之父母夫令有能為朕子民者朕于其父母顯揚之恩曷靳乎爾喬輔世乃河南開封府中牟縣知縣壁星之父蔚表儒林卓為高士克昌賢嗣效績清時睠惟牧邑之良實本過庭之訓

茂膺祿養既壽且康茲封爾為文林郎河南開封府中牟縣知縣祇服龍章式昭燕翼

敕曰古稱及親而仕三釜為悅乃若俱存遂樂而並命貤榮豈非臣子尤幸與爾王氏乃河南開封府中牟縣知縣喬壁星之母秉德儉勤禔躬淑慎相夫偕老勗子能官用表徽音均敷彝典茲封爾為孺人荷綸綍之載揚彰庭闈之咸慶

敕曰朕嘉與四方長吏茂臻康乂之效有能奉職循理績敘登聞者特下璽書褒顯之爾河南開封府中

牟縣知縣喬壁星器資端雅才識練明軒對掄英邑
符試政撫字澤翔于百里廉平聲著于一方薦牘交
揚課在異等茲授爾階文林郎錫之敕命朕覽古良
吏想見其人爾在事有聲庶幾踵其芳蹤光於往詒
尚益懋乃猷崇乃績朝廷將有不次之擢焉欽哉
敕曰錫命酬膺暨厥閭閻卽旣歿不遺焉嘉其相成
而酬其往勩也爾河南開封府中牟縣知縣喬壁星
妻陳氏夙有令範嬪於哲人秉德無違降年弗永匪
頒新渥曷表舊勞是用贈爾為孺人歆茲顯綽賁爾

元局

萬曆十二年十月二十日

又

制曰士有隱德植行不以身顯而有子承志效用清
時則聲施奕世其令名與之俱焉惟朝廷之愍綸申
孝思于罔極也爾封文林郎河南開封府中牟縣知
縣喬輔世乃原任順天府府丞壁星之父性賦端醇
名高孝友早蜚聲于黌序庭衍一經晚養重于鄉閭
功兼衆善成令子之介節著繡斧之清風鶴髮雖被

乎龍章燕翼追酬乎馬鬣茲以覃恩加贈爾為中憲大夫順天府府丞表水木之慶源賁松楸之寵耀制曰朕惟雋不疑為京兆尹庶獄多所平反則奉母教以稱善治焉卽鼎養之未克久膺而遺訓遵于無斁亦足以怡志于幽矣爾封孺人王氏乃原任順天府府丞喬壁星之母德協恒貞儀符異順筥筐自淑鹿門高偕隱之風莞簞鍾祥鳩杖流有餘之慶栢棬遺慕綸綍宜申是用覃恩加贈爾為恭人欽再命之歆承莫九原而嘉慰

萬曆三十二年十二月初七日

制曰朕惟京師為四方取則之地設丞貳以仰承大化而協心彈壓自非治行卓越奚以肅清輦轂為寓內郡國觀乎爾原任順天府府丞喬壁星凝重性成而精勤任事方嚴自律而愷悌宜民脫穎廷掄分符巖邑馴雉紹神君之令譽乘驄著烏府之風猷獨立敢言抒忠靡移于百折當機卽剖理劇不眩于盈庭吏民不欺豪猾斂跡昔人所稱今其再見矣茲以覃恩授爾階中憲大夫錫之誥命夫今之畿甸歲歉賑

飢防姦視昔尤當厪念焉爾尚益持敏慎其有壞法
干紀不難以柱后惠文治之庶布澄清之夙志聿收
保釐之實功嗣有顯庸旌乃丕績欽哉
制曰人倫好合斯于偕老而榮約共之乃蓬蓽克贊
夫潛修而簪履遽遺于通顯幽靈未泯寵錫宜承爾
原任順天府府丞喬壁星妻贈孺人陳氏女誠夙嫻
哲人作儷杼軸佐下帷之業縞綦襄懸魚之操琴瑟
方諧願忽違于中道象服雖賁命有待于申重茲以
覃恩加贈爾為恭人再渙紫綸之貺永揚泉壤之芬

制曰朕觀周南大夫以羔絲之操光于簡冊惟其得
蘋藻之助佐于閨闈其遺風可挹也有能修閭政以
弼我良牧其于褒封又奚靳焉爾原任順天府府丞
喬壁星繼室高氏柔嘉無遂靜正有齋處裕能勤宵
旦罔弛于筦鑰用勞成愛撫摩益勵于燕熊官政克
贊閨彝允迪茲以覃恩封爾為恭人聿有光于燕喜
益申儆于鷄鳴

又

制曰朕惟學道之用宏施于家者漸施于國詩書之

效遠發于子者猶發于身睠殿邦之藉重臣樂考室
之有賢父望彌隆于貞憲恩豈靳于詒謨爾累贈中
憲大夫順天府府丞喬輔世乃巡撫四川等處地方
提督軍務都察院右僉都御史壁星之父韶年升秀
壯歲引恬學無所不窺而行敦其大貧有所不取而
德務其滋遺甥植于藐諸伯姊堅于髡彼鄰之安土
里以寧居維仁者之為德一鄉以享以祀啓鉅卿之
于匡四國之紀之綱是用覃恩改贈爾為中憲大夫
都察院右僉都御史壽考維祺介自天之景福令聞

不已揚在地之章光

制曰國有名賢譬之喬木其寄任也重其托根也奇
未有楨榦之才生于培塿之土爾累贈恭人王氏乃
巡撫四川等處地方提督軍務都察院右僉都御史
喬壁星之母穆如懿度謨爾貞規甘滑修虔融融子
舍酒漿肅給婉婉公宮佐之下帷豈無年而弛業饁
彼南畝嘉有相以宣勞羨黃髮之相莊令妻式頌緬
白髮之初秉壽母于儀是用贈爾為恭人象服山河
夙偕榮于大耋龍光廟祀長流耀于遐思

萬曆三十四年五月十四日

制曰益州稱用武之國幅員特控荆雍盛府推獨坐之班節鉞兼資安攘匪儒英而不任矧蓁蕪之方芟言仗干城式酬弓矢爾巡撫四川等處地方提督軍務都察院右僉都御史喬璧星沉毅達以方廉恢弘持以縝密剖符大邑振翮內臺墨吏解于望風阜囊殆無虛日爰資彈壓久借蓋轡道教肅于一圻稷鼠城狐之並戢聲實騰于三輔春兒竈婦以皆知爾瞻之節巖巖所居之名赫赫平星暫寄卿月高騫頃以

蜀中大創之餘屢關心于瑕釁乃者輦下諸臣之望盡屬目于碩閔用從輿論之公特委中權之重合川東西而宅牧分閩內外以專征惠彼西人作予南仲而能推保釐之澤坐護油幢以綱紀之宗親○嚴刁斗巫雲熨雨重關消鋒燧之塵蜀咏巴歛通國頌黍禾之蔭兼壯力與老謀兼運將遠來與近悅攸同茲加恩詔授爾階中憲大夫錫之誥命於戲蜀已多端人方久困枕茵藉牀之狀猶在目前伐山牽水之勞正煩將作念翦彼之不易思糜淖以何方靖帶牛佩

犢之風還之禮樂堅使馬如羊之節約以安恬期王
壘之常安庶金甌之永固欽哉

制曰宣威疆場代終績裕于安壤協德閨闈正始禮
隆于作合蓋内外有相成之誼肆歿存敷並賁之榮
爾巡撫四川等處地方提督軍務都察院右僉都御
史喬壁星妻累贈恭人陳氏性以貞而善下儀維儉
而能恭聚百順以豫二人明章婦事勵三餘以襄一
德光贊儒修方岐嶷之在孩輒棄捐而弗子睠惟迺
疆廼理之○彌浚我梁我笱之嗟用仍贈爾為恭人

廷綸追隱約之勞泉壤習榮光之數
制曰明光之錦七襄采非一製瑯瑯之籥六間音以
合成眷是蒼珩班于清貫匪資齊德曷稱殊休爾巡
撫四川等處地方提督軍務都察院右僉都御史喬
壁星繼室封恭人高氏紹徽無斁職饋惟虔樂我縞
綦默贊絨紞之度湘彼綺釜仰裨膚敏之猷乃操約
以戒于方盈每忘勞以成其有逸嘉此外威之烈綱
紀四方實惟內正之功肇修三事用仍封爾為恭人
賁珈第以斯皇飭衿鞶于勿替

萬曆三十四年五月十四日

趙志鵬父謚及本身

敕曰士勤一生以得一官甫履治而不祿則其子之播榮于時必且日長炎炎蓋挹注之理固然也爾原任山西潞安府長子縣縣丞趙謚乃陝西平涼府平涼縣知縣志鵬之父膠序著名赤墀登試奉親撫弟孝誠允篤家庭濟急拯艱慈惠溥施閭里方臨丞壁遽泯松吟遺慶嗣人茂猷民念茲特贈爾為文林郎陝西平涼府平涼縣知縣用作教忠之報益堅移孝

之思

敕曰人臣奉母訓以効忠必借君恩而將報卽鍾釜之養莫致而綸綍之命煥于幽局亦足用慰報忱矣爾劉氏乃陝西平涼府平涼縣知縣趙志鵬之母淑婉性資端貞德度承尊孝敬夙追蘋藻之規迪嗣懇勤不替杼機之儆桂階衍慶萱幄閔光茲特贈爾為孺人恩耀徹于泉穴旭暉引乎斧封
萬曆四十一年三月十八日
敕曰宰邑者將疲黎是綏戢頑俗是提撕至其政成

而四境於變功在民社非淺詎不可頒渥數與爾陝西平涼府平涼縣知縣趙志鵬丰標凝重才幹敏周拔俊都闡簡膺劇邑而爾靈機徹照大器裕投求樂利之謨而布諸衙宇四封之凋瘵回熙偵猾豪之蠹而剔之閭閻一境之風暉昭泰農桑充闡流徙歸厯茲以歲閱授爾階文林郎錫之敕命平涼地瘠而宗繁瘠則產入薄繁則祿給浩以薄入而供浩頒宜上下日嗷嗷也爾調劑得宜其益閔永賴之規朕于爾有重毗焉

敕曰夫爲學登庸服官奏最無卽安無岐念用畢潛修而基顯伐以此徵其內助閭淑亦可知已爾陝西平涼府平涼縣知縣趙志鵬妻武氏溫良成性雍肅爲儀佐肄董帷夙謹燕婉之節從游偃室益襄羔素之風繄維爾實克家乃爾夫能敦職茲特封爾爲孺人祇膺象翟之榮彌勵衿鞶之訓

萬曆四十一年三月十八日

後志鵬陞任鞏昌府寧衛軍屯水利同知又錫誥命無存

喬若雯父壁星及本身

制曰橋居陽而梓陰物著從朔之義昭克明而穆順
禮尊報美之文矧金鏡丕振其家聲則緇衣愈章其
世德爾原任中議大夫巡撫四川都察院右僉都御
史喬璧星乃吏部文選清吏司主事喬若雯之父沉
幾先物弘濟熙民方筮仕于中年已秉心而外徹均
徭則壤石壕之吏無呼佩犢栽花萑澤之雄誰嘯五
鳧五桀奠神媪而開阡再渠再堤嬰陽侯而作砥爰
遺棠蒂晉陟蘭臺飛輓方艱岱宗播其靈雨軸轡如
舞箕伯反其尤風南都聚赤白之丸甫鳴枹而築觀

西寇借梓桐之蔭竟破柱以懸街尋貳平星允宜嘉
石遂命標銅于鳥道聿觀秉鉞于蚕叢貢筵蠲○機
杼減靡蕪之淚採材佐帑斧斤蘇箐峭之魂至晰水
蘭之反形卽指招招而繕怒蓋桃蟲維鳥當時或訝
其興戎而纖葉成柯今日追思其蚤見眷言哲士更
啓令人是用覃恩仍階爾中議大夫錫之誥命嗚呼
壯猷莫展細蠹何陳子爵未答其鴻庥後勁將占其
燕翼

制曰潤川蔭岳萬物資大德之生報海嗣河四望著

先源之義邇膚功于節鉞若內助有未竟之猷勞永慕于蓼莪慰後人申罔極之孝禮隆元母典渙新綸爾累贈恭人陳氏乃吏部文選清吏司主事喬若雯之母穆著前儀幽疏嗣業添膏攻苦相萬卷于哦窓苗秀維艱存一夔而足鼎佛成有自蜀天之鴻烈巍然仙逸雖遙銓署之鳳毛蔚若實母儀之開大裕世慈休挹郎選之清通邁時明雅故列鍾弗逮乎養而如綍未厭其施是用覃恩仍贈爾爲恭人芝露渙泥賁萱靈于不昧鸞徽封安闡鴻慶以長輝

制曰膚髮重所受而怙恃有倍劬之恩元繼均所慈而裏毛成篤至之愛故望郎清立鶴姿之燕喜在堂壽母正康鴻霈之鳳綸渙陞祥敷家慶游被朝榮爾累封太恭人高氏乃吏部文選清吏司主事喬若雯之繼母凝順端承含章厚載素絲勉室嗣靜好之鸞絃白簡來朝匡嚴莊于豸繡約春山而絕画肅儀範于京兆之幃佐秋寺以滋清弼明允于理卿之月匹勤王事不言蜀道之難克輔鈴謨畢峻中丞之烈專養雛之哺翼鶴有孤成稟介石之貞慈鳩無別愛先

夫榮而後子顯白頭仍紡維之勤外督撫而內提銓
紫誥疊絲綸之命是用覃恩仍封爾為太恭人挹河
山之令度純嘏靡涯霽雨露之所濡慈休方迓

崇禎三年四月三十日

敕曰朕惟銓管之任夔同繭絲謁選之人次若鱗集
室倖竇豁滯津典劇要務也然此猶其小者採楠梗
以肩崇厦掃籬棘以闢周行分拔茅泰否之關乃提
衡綱維之大爾吏部文選清吏司主事喬若雯擢第
增祭戟家聲拜官得絲綸美秩班推玉筍乃以蘭畹

而謝桃蹊地傍金閨肯就冰○而辭暘谷卽此片時
之枯苑卽占素履之端方比覲見而雪消猶霽瀾而
霧障爾能吐乾坤鬱結之氣流諧媚腥穢之風以此
望重南宮清香豈留其澄澹旣號人倫東國明鏡宜
用以綜銓憶當年噦噦朝陽雅擅九流品藻宜此時
悠悠月旦共稱六典廉平第季女初事尊璋毛羹未
適迨娣姒肩隨娣姒管鑰徐關而今任議攸分勝負
相倚宜秉憂國憐才之念務合人情政體之公若味
旣判于淄澠功必資于烹飪爾旣饒有正骨遇潰瀾

而申激汰之權更願殫厥苦心祈調琴而發和平之響若夫朱書絕迹石紀無功在昔稱能于今爲細茲用覃恩授爾階承德郎錫之敕命昔山濤啓事曰吏部郎典碎事非但正己貴在正人而先朝名文選林林春有言曰選曹之職欲上通君相與冢宰之心下通選人與天下人之心居其間欲兩合焉難矣此格言也借我最勉之鸞文共作賓僚之龜鑑

敕曰提英鑒乎列星國重典劇之選聽朱絃于遺韻士懷元始之音况我韞子佩之盟有易教責祥之似故相敬備至而終訣增淒明逮齊榮幽章載錫爾吏部文選清吏司主事喬若雯妻贈孺人張氏誕靈孝子之門奠吉通儒之室情淡兩姓曾以姑顏掬母而亦兄禮事夫德辟百儀卽以婦道持家而且女師作相胡蘭芬之早歆繫玉潤之修嗟績旣懋乎望郎休重申于元配是用覃恩贈爾爲安人釋茲管蒯永歆紫綈之恩眷爾伉儷長作黃鑪之賁

敕曰中助難言必如賓之能敬前徽易迥或從顯而自驕睠特立之清郎資謨天秩惟有齋之季女取重

風人爰申渙慶之綸聿闡婉休之配爾吏部文選清
吏司主事喬若雯繼妻封孺人李氏儒家毓秀宦室
牽絲布荆恬居室之常豈曰入門而貴色笑得慈嫜
之豫疇云為婦稱難異秉視靈丹穴之鳳雛不隻奇
分攬瑞藍田之璧種成雙祛膏肓志倣于玉臺畢襄銓
鏡約語詎移于帷壺克佐提衡是用覃恩封爾為安
人昭女史以流芬渥郎封之未艾

崇禎三年四月三十日

贈太常寺少卿喬若雯母高氏

殉節

制曰朝服坐臺廬奕中裛大節家資餽戰虞潭教本
慈模惟君臣重乎天經肆母子同其義烈爾原封太
恭人高氏乃中議大夫原任巡撫四川等處都察院
右僉都御史喬壁星之繼妻原任山東兗州府知府
喬若雯之繼母星躔寶婺德儷太微鸞儀夙著于蘭
閨鷄傲襄勤于栢署鳩慈均其勞愛佑啓銓衡燕喜
介乎壽康光輝珈第屬畿輔罹兵火之慘致養堂損
陵母之軀女中嬰杵同芳閭內甘逢奇遘是用贈爾
為淑人一門碎首共成得所之令名同穴遂心不失

中臺之正氣爭光日月垂懿鼎彝

崇禎十四年五月初九日

贈太常寺少卿喬若雯

殉節

制曰忠扶社稷賴見危致命之臣氣作山河嘉取義
成仁之烈書于冊府樹此風聲爾原任山東兗州府
知府喬若雯鍾鼎名流光岳正氣王裴通簡齊周尺
于玉衡召杜清循付陶辭于松菊屬畿輔遭夫兵燹
爾卿士奮乎鷹揚從容就義絕命猶雄是用贈爾為
太常寺少卿於戲九地黃泉碧化萇弘之血千秋白

日丹留王蠋之心渙以絲綸光乎箕尾

崇禎十四年五月初九日

敕書

敕戶部主事李世藩先該巡撫山西都御史等官奏
稱偏頭寧武鴈門三關等處倉場邊餉錢糧數多原
設有州官一員管理緣官卑責輕人心不服以致積
弊滋蔓事無統紀又寧武關在二關適中之地舊有
庫藏公館要得改設主事一員總司出納之任使二
關各營堡官軍關領錢糧往來兩便等因該部議覆
特允所請今命爾前去寧武關駐劄總理三關糧儲
收受各府州縣解到錢糧斟酌本折坐放各衛所司

隊官軍俸糧草料及因時因地酌量主客兵馬糴買糧料草束支用凡合行事宜有應與撫按官計議者亦須計處傳當敕內該載未盡者悉照該部原擬施行所屬有司衛所官吏人等敢有不遵約束并豪強之家包攬作弊等項輕則徑自拏問重則奏聞處治候三年滿日將任內糴買過糧草收放過錢糧數目造冊奏繳青冊送部查考爾膺此邊計須持廉秉公正已率下務俾積弊肅清新政修舉庶副委任如或怠緩誤事責有所歸爾其欽承之故敕

嘉靖四十一年三月二十五日

敕山西按察司僉事趙世相寧武關地方適當北陲要衝不可不嚴為之備今特命爾前去整飭彼處兵備駐劄寧武關分管八角利民神池寧武四守備并中路叅將地方兵馬平時則專一修繕牆墩整飭兵馬計處錢糧防秋則各照信地監督將領巡視堡砦收斂人畜查革奸弊紀驗功罪一應有司軍衛事務悉聽施行其近議屯田等項爾卽查照該部題准事理着實舉行爾受茲委任須持廉秉公修舉武備務

使邊方寧謐寇盜屏息斯稱任使如或因循怠忽致誤邊事責有所歸爾其欽承之故敕
隆慶五年二月十九日
敕監察御史喬壁星今特命爾前往瓜儀徐淮等處經理催督該年糧運事務爾宜查照該部題准事理先將各總屬回南船隻督行各該官司極力催僱各回水次聽新運至日嚴督各處管糧叅政等官親押幫船依期過淮四月以裏盡數過洪入閘取具過淮日期船糧數目陸續報部查考如有起運遲延到淮

違限各要追究緣由盡法叅治若過淮之後各官不行親自催僱濫委武職兵快因而索害官旗及官旗故意停泊盜賣插和假捏漂流等弊應拏問者拏問應叅究者叅究其濟寧一帶河道閘壩會同河道衙門轉行管河管閘等官督率淺夫乘時修理毋致臨期悞事如有疏築無法撈淺無人及閘座啓閉失時致誤糧運者悉聽查照議單不時叅究事完回京照例接差更替爾為憲臣受茲重委務要盡心催督圖稱任使如或因循怠玩責有所歸爾其欽承之故敕

萬曆十五年十月初三日

敕巡視京營監察御史喬壁星朕惟京營戎政國家重務皇祖考世祖皇帝遵復祖制仍五軍營易三千營為神樞及神機為三大營其餘諸營舊哨司掖去其瑣列設總督大將及協理文臣各一人各營有副將叅遊佐擊練勇等官分領兵馬操練法制甚修但恐文武各官不能體國奉公仍襲舊弊清查不實訓練無方徒費芻糧不堪調遣今特命爾與同給事中前去巡視爾宜查照兵部題准事理不時巡歷用心

點閱凡各營軍士缺少及操練不如法馬匹瘦弱器械不精貪賄科尅庸懦不職者將領官員無論大小悉聽爾等指實叅奏以憑究治朝廷以爾為耳目之官特茲委任爾務殫厥心力除革奸弊俾戎務修舉斯稱任使如或撓於權要畏避不言因循故縱罰不爾貸其開操之日暫免朝叅爾其欽承之故敕

萬曆二十一年二月○○日

諭祭贈太常寺少卿喬若雯

維崇禎十六年八月初三日皇帝遣直隸真定府知府丘茂華諭祭原任山東兗州府知府贈太常寺少卿喬若雯曰惟爾秉鑑銓衡留棠岩郡丘園獨賁忽屬鐵騎之薄畿忠義素持誓必捐軀而報國闔門殉節慘禍堪憐忠貞旣以不渝彝典豈容獨後卹恩寵被旌未泯之忠魂敕賜專崇勵將來之風化英靈如在尚其祇承

其尚其承

正德改元之六年盜賊蜂起剽掠州縣民物被害延
及真定是年十二月十一日賊入臨城進學舍掠訓
導蔣鉞資畜已盡繼至者無得將鉞并妻李氏舉刀
欲下者數次勢甚急鉞長女安閑見父母迫險奔出
泣言願代親死賊見女容欲污之堅拒不從遂被害
邑侯徐君繪以其狀從州府報申巡按御史王查勘
得實具奏勅准旌表為給殯葬錢監貞烈碑于縣側
旌善亭以垂不朽適邑侯高平李君璿蒞政之初遣

旌表蔣氏安閑貞烈碑

在縣前

正德改元之六年盜賊蜂起剽掠州縣民物被害延
及真定是年十二月十一日賊入臨城進學舍掠訓
導蔣鉞資畜已盡繼至者無得將鉞并妻李氏舉刀
欲下者數次勢甚急鉞長女安閑見父母迫險奔出
泣言願代親死賊見女容欲污之堅拒不從遂被害
邑侯徐君繪以其狀從州府報申巡按御史王查勘
得實具奏勅准旌表為給殯葬錢監貞烈碑于縣側
旌善亭以垂不朽適邑侯高平李君璿蒞政之初遣

使徵余記之余惟天地之正氣至大至剛人莫不具
民鮮克舉之臨變而能致身全節者益難矣况女流
柔質猝遇强暴能不受污者有幾蔣氏臨難救親堅
正不屈可謂能人之所不能貞烈何如哉女名安閑
父鉞母李河南懷慶府河内縣清上鄉人死時年三
十二生而清婉淑德表然及笄適人正靜自持寡居
十餘年誓不再嫁親老無子隨任奉養茲冒白刃以
活二親節孝不可覘乎其與曹娥竇氏同符者乎薰
香上騰碧落直氣下貫黃泉州縣上之臺憲薦之聖

恩旌之史筆錄之正氣磅礴萬古不磨矣是宜著之
碑以爲倫紀重爲風俗激余因李君之請而樂爲之
紀以甄永永明正德七年壬申秋八月賜進士出身
奉政大夫兵部職方清吏司郎中錢塘汪舉撰知縣
事高平李璿立石

奏疏
平河之喬壁星

請復總河大臣疏
萬曆十五年時為巡漕御史

先是總理河道專設尚書或侍郎一員尋用
言者議罷之以漕運總督兼攝至是河復衝
決漂沒民居運道淤塞於是壁星疏請復之
漕運河工各有攸司督運治河事難兼攝黃河之在
天地間猶人身之腸胃也上接咽喉下通尾閭中蓄
五味之精以滋五腑百骸而要之總屬於心一有滯

塞心必知之或清其上或理其中或洩其下使其血脉流通無不周貫然後腸胃調而人身亦安今治河大臣即腸胃之有心也乃廢而不設徒以督臣兼之各省撫臣兼之則居上流者不知中下之受病居下流者不知上中之為梗也地各有疆域而浮沉廣狹安得順其勢以施工人各有分屬而緩急呼號安得刻其期以趨事原委隔而不屬血脉澀而不通無惑乎河之漲漫於梁衛而泛溢於淮泗倒灌於古洪而填蝕乎運道也臣鏡往事酌時宜諏輿論叅職掌真

見復之為便

疏奏允其所請復設總河大臣萬曆十五年

特薦交城典史疏

萬曆十九年

御史王之棟以言事降黜壁星巡按山西上書申救

交城典史王之棟向為御史諍臣也糾彈自其職掌首叅大將軍李上谷不效量移晉鄙竟以剝削干公議勒令解任則棟之言驗矣繼叅都御史朱○後乃衰病浸尋交際如故果與碌碌無奇之言相符合准其回籍則棟之言又驗矣繼論趙錦衰老不宜起用遂降今職然錦勉強一出中途物故棟之言更驗矣

三言事而三忤旨三忤旨而一一皆中是真骨鯁有識見之臣奈何投之荒邑抑之下僚乎伏乞召還原職以鼓豪傑之氣倘異日不捐糜以報願甘連坐之誅此外一切建言獲罪諸臣併敕銓曹照常酌量推用將衆正滿朝太平可致矣

疏入稍遷之棟潞安府推官萬曆十九年

請槩補用臺省諸臣以廣言路疏

萬曆二十五年

時壁星服闋赴補仍爲山東道監察御史諸言官候補在前者尚未補用故上此疏

畧曰國家稽古建官量衙門定員額科額五十員道額一百一十員今科臣現在者止十有一員道臣除

差占外止現在四員一人兼攝五差奔走苦於難周一官委署七篆事體因之叢脞觀風者荏苒二載而未得息肩宰邑者歷俸七年而不獲釋負近且巡視缺人甚至議及首領爲二百三十年未有之事又臣於舊年六月內起復抵京原任臺省諸臣有先臣捧檄而至者有後臣捧檄而至者雖服闋病痊不同均之舊爲朝廷耳目應復故物者且諸臣中獨臣謏劣復除之詔先諸臣而後臣可也不然補諸臣而罷臣亦可也臣今忽被綸音再列臺班諸臣守株待兔踰

歲經年范無拜命之期况今國步多艱倭寇交訐於外金穴橫開於內此何等時也卽寤寐賢豪猶懼不足以致大難而鞏金甌諸臣來自田間練習有年老成持重正可以濟緩急而效一臂之力者奈何棄之如遺也

疏入不報
萬曆二十五年

請救朝鮮疏

東封之事樞臣石星堅持其議及冊使往而關白受封無禮反捏朝鮮過惡以肆狂逞於是壁星上疏

畧曰國家以六年士馬之力數百萬之費從事異域祇欲保全朝鮮耳茲冊使已回而謝恩之表文竟成烏有釜倭如故而大兵之過海愈益加多此其意不

甘心於朝鮮不已也夫朝鮮殘破已極其折而入倭也必矣朝鮮入於倭則近而遼左登萊遠而天津永平輻輳而臨清淮揚皆其跳梁叫嘯地也天下從此多事矣夫倭心最狡而蓄謀叵測東事之敗誤舉朝知之無奈當事者執迷不悟今朝鮮危亡近在旦夕其望天兵之援不啻疾痛之呼父母雖被髮往救猶恐無及昨部議必待督撫諸臣奏到議覆而後往恐遠水無救近火謂宜馬上差人速調薊鎮臺兵遼東馬步兵遣謀畧大將驍勇裨將統領刻期前去直抵

王京協同彼國將士據險死守倭如悔禍徐議班師若負固求逞鼓率朝鮮戮力剿滅是在將兵者隨機運用有不可以逆計者又曰本兵石星才識昏庸事多欺誑信細人之邪說誤國軍之大機譬之醫者不效便當更醫乞將本官速賜罷斥亟擇才望大臣代之庶局面既更而安攘有賴

奏上着候會議行
萬曆二十五年疏

又疏 萬曆二十五年

題為倭情桀驁殊常宗社安危可慮懇乞聖明大破常格亟行議處以伐狡謀以保萬年治安條陳四議

一曰臨朝謂一人勵精則臣民競勸一人怠玩則臣民懈弛今卽不能如萬曆十五年以前三六九常朝請間一御門或於便殿召見閣部大臣面商禦寇方略將上意所嚮人心鼓舞三軍之士不戰而氣自倍一曰發帑謂不難於聚而難於散聚而不散則瓊林大盈祇為厲階况興師十萬日費千金請發內帑數十萬解赴督撫衙門犒賞東征將士則重賞之下必有勇夫關白之頭可以立致一曰簡樞臣謂大司馬掌邦政卽四郊無壘猶不可一日虛席矧倭兵壓境

乎請於原推蕭大亨等五臣就近簡用一員以濟然
眉以紓東顧之憂一曰弭內亂謂自曠穴橫開而軍
民病自邸店暴斂而商賈病所在囂然喪其樂生之
心倘有奸雄之尤者奮臂一呼揭竿四起恐季孫之
憂不在顓臾而在蕭牆之內請暫罷曠店

疏入不報

請博求端揆以清政本疏

萬曆二十六年

畧曰伊尹曰任官惟賢才左右惟其人故三公坐而
論道宰相代天理物此其責任宜如何重鉅者而可
以匪人廁其間哉粵稽唐虞三代或登於歷山或聘

於莘野或舉於傅岩或獲於魚鹽渭水且不必求之
在朝况刻舟膠柱乎三代以前遐哉弗可尚已三代
而下周勃厚重少文卒安炎劉田千秋無他學術居
位自稱半部論語趙普以之致太平四六不能司馬
光以之杜邊釁之四臣者漢宋用之豈拘拘於雕蟲
小技者哉明興洪武中設殿閣大學士不過代草然
每犯輒罪斥永樂初始建內閣於東門內命編修等
官入閣辦事尋升侍講後漸升至學士及大學士加
部銜官銜一切章奏得以票擬由是內閣之權漸重

無異宰相之設然未嘗專任詞臣也天順間李賢由銓曹進正德間楊一清由督撫進功業爛然可鏡邇來專用翰林稽之會典亦無開載為閣臣者正宜感恩圖報精白乃心以贊上理可也奈何居正之後復有張位者出乎其間大孤恩遇致煩皇上處分眾口稱快毋容喙已今當論相之秋正更化之會臣謂宜用外任名世大臣二員詞林端練老成大臣二員一同辦事各殫忠赤共濟時艱內閣鮮專擅之奸朝廷收眾思之益近法二祖列宗遠追唐虞三代漢唐宋

不足拜下風矣

疏入不報
萬曆二十六年

請信詔旨行實政以弭天譴疏

頃者祝融為祟三殿成塵繼報泰山崩裂一里有餘此等災異一時疊見不獨二百年來未有亦振古所希聞者昨奉聖旨上天示警朕心兢惕不寧這所奏修省合行事宜關係朕躬的已知道了其餘各件着該部作速看議來行務修實政以回天意明詔一布率土歡呼願觀更始之政者已延頸二旬矣僅修代謝詔諭之彌文舉選取起補之故典而餘無行焉夫

天之愛皇上以實而皇上之應天以文此何可以救災而回天怒也除郊廟朝講冊婚關係聖躬候旨舉行外所有其餘各件該部議而未行者臣等敢合詞以請一曰早罷開礦自仲春等倡議而金穴橫開總計解進不過二萬而供億賠累之費有什伯此者則礦之得不償失明甚且省直之間或因礦洞塌陷而壓死多命或被棍徒苦索而相率逃亡至於採礦刀上火光尤為非常之異請召回差官盡輟礦務則山川效靈而神人胥悅矣一曰早罷店稅自趙承勛等

妄意奏聞而中官之遣至再畿輔千里遍樹黃旗細民尺布斗粟靡不攘奪不幾於燎原乎夫鈔關既有正稅胡為額外橫征商旅詛訛釀成災變非計也請停止店稅取回權使將湯沐之民歡然若出水火矣一曰早雪冤獄刑部錦衣衛犯人有奉旨加罪未合律例者有候旨未下并干連輕罪者有風聞追贓難以結正者累累百餘人久繫黑獄怨氣冲天如火益熱矣昔燕臣抱憤而飛霜孝婦含冤而致旱匪細故也請速霈寬大之恩加罪者減候旨者下干連并難

結者分別疏釋庶園墻一清而協氣畢凝矣以上三
事皆明旨所謂其餘各件該部作速看議來行者先
是戶刑二部作速看議具奏迄今遲留不下其何以
行之哉皇上益勵初心行此三者而又策免不職之
首揆則君臣交修天心悔禍尚可為也不然明旨不
信實政罔修下無以孚四海臣民之心上無以對天
地祖宗之望不知其所稅駕已不報

收養孤貧疏

萬曆二十八年時為順天府府丞

天地之大德在於好生帝王之善政先於不忍昔周

文惠鮮之仁惟鰥寡孤獨最切漢文米帛之詔雖疲
癯殘疾均霑盖元元億兆其休戚本相流通矧簌簌
流離奄奄殘喘其勢誠急而情尤可憫也書曰不虐
無告不廢困窮詩曰哿矣富人哀此惇獨古聖帝明
王率先於此以故膏澤究閭閻太和盈宇宙用此道
矣我列祖加意窮民如收養孤貧之條載在會典設
養濟院以居之給米粥以養之後又申令增葺屋舍
以安流移載給衣藥以救凍天其法至為詳備我皇
上如天以育萬物法祖以綏四方萬曆二十三年曾

允臺臣之請下戶部轉行臣府議將本地貧民收養如例附近者給印照路費以歸之遠省不能還鄉者照本地一體收養今在冊養濟者二千餘名口咸感浩蕩之恩得少延須臾無死手額祝聖壽億萬斯年猗與休哉但頻年以來流民漸夥今歲尤甚臣待罪京兆承乏攝符民瘼得於觸目時艱益切拊心若連秋京東之水潦瀰望數千頃今夏近畿之蝗蝻綿亘幾百里來牟悉為蚕食禾稼盡化污萊且綱益秋茶絲增春繭十室九空一衣百結掘草本齧木皮烏面

鵠形僅存殘息至苦矣坐視流徙京師行乞者衆加以入冬天氣沍寒貧民益困道路之啼號聞者酸鼻餓莩之枕藉見者墮淚一日之間所僵仆而斃者殆且百數卽令鄭俠繪圖恐不能述其狀者夫以輦轂尺五之地至近也民命國脉所關至重也乃今百物凋耗生理日蹙顛連無告景象愁慘若此臣竊哽咽焉夫民安則樂生窮則思亂恐老稚旣轉於溝壑強梗且攫於市衢攘奪成風災異因緣而起其仰辜聖澤上干天和匪細故也臣謬叨芻牧之寄靡遑曠鰥

奔告君父之前不敢秦越伏望率循舊典推廣新恩
比照二十三年之例急下明詔再加議處優恤令臣
等得以欽承德意着實奉行集中澤之鴻鴈嗷嗷幸
免於哀鳴甦涸轍之鮒魚幸咸俾之得所將見湛露
霑濡於重地和風翔洽於普天施仁之大政不獨媿
周文於前賑貸之嘉名抑且陋漢文於後矣奉旨這
流徙貧民可憫着戶部便議處優恤來說欽此

曲處珠寶金料商價疏

萬曆二十八年

臣自七月攝篆以來節奉部劄催督商人買辦珠寶

等項錢糧夙夜皇皇嚴加追比已經節次進部若干
未完珠寶臣等念典禮及期需用孔棘不敢一毫推
諉不敢頃刻遲延催併各商星速辦完上納關移載
路篁楚盈庭祇期借手竣事以仰副德意嚴併間據
珠行徐汝桂等告稱承辦婚禮錢糧節蒙府廳嚴催
揭債捐資進過珠價共六十五萬七千餘兩候領至
今祇得價銀三十五萬兩尚欠血本三十萬七千餘
兩豈料前價未償後珠迭摧絡繹比併勢急如火竊
思購買必須關領價值價未處給珠將何買桂等叩

借豪門遍及京畿力已盡絕計莫再施懇乞俯憐各商貧苦早為達部亟賜價值購辦完公

云

又據寶

石行楊琦等告稱蒙派婚禮錢糧焉敢抗違部府追比只得揭借勢債買辦恭進過錢糧價銀一十二萬餘兩御前揀收至今前價未給琦等徒受府縣嚴刑責比體無全膚無奈只得揭借勢債客貨以利塚利賠累日久家無立錫苦欲再賠空手焉能買物卽立斃杖下事終無益乞懇俯念極苦移文部司速賜價銀以救多命

云

又據

金行秦魁等雜料行孫鉞等

告乞移文銀庫賞給價銀尋買各等情到臣臣念珠寶錢糧將供目前大典之用而冠○冊立尤係臣民屬望之殷臣等方幸以奔走為榮豈願以遲延賈罪真恨不能不費帑藏之饒悉羅商賈之有以效寸誠而襄盛美也惟是珠寶藏於商販必現持重價方可購求而錢穀各有司存非越俎代庖所能幹濟臣職司牧遍搜府庫並無纖毫買辦錢糧此朝廷所共知而該科所明析者臣等雖欲效無米之炊以自致其欸欸其道無由也向來累係商役日日嚴追敲朴徒

勤價值無措各商既以空手稱難慶典又且舉行在即腐心殫力計無復之惟有束手延頸以待鈇鉞之誅耳各商流涕控籲乞達部司處給價值彼誠萬不獲已之情不知計臣方以軍費繁興蒿目匱乏前此之價業已不敷後來之費諒亦難處然價值不給則珠寶何求珠寶難求則典禮何恃臣亦萬不獲已冒焉入告倘蒙敕下戶部多方區處量給價值庶各商得以盡力購辦不致耽延則上供可完重典可舉而臣等亦可少追溺職之辜矣

不報

懇允營建以濟貧民疏

萬曆二十八年

客冬長安陌上赤貧載道白骨枕籍臣日觸見聞酸鼻墮淚不揣草疏上請收養奉旨云云欽此隨該戶部覆題奉聖旨依議着各該有司加意設法救濟俾需實惠欽此部劄臣府臣檄治中及二縣五城官分投點審臣覆文明白收過老疾張才等六百五十八名口業已入院養濟矣此輩濱死復生皇慈再造卽堯舜之如天好生何以加焉而春和議賑貸者猶不足以及拜下風也猗與盛哉此外尚有孤貧詹保等一

千八百九十七名口驗係少壯例不收養臣雖行縣給粥顧倉儲甚少春和卽停今猶叫號於白晝攫奪於昏夜其僵仆可憫而其意外可虞也臣有司也恭繹設法明綸願佐一籌可乎粵稽古人救荒之政多興工作宋皇祐間吳中大饑范文正領杭州諭諸寺以荒歲價廉可大興土木於是諸寺工作鼎新又新廩倉吏舍日役千夫監司難之文公謂欲發有餘之財以惠貧者使工技傭力之人皆得仰食於公私不致轉死填壑荒政之施莫此為大是歲惟杭饑而不

害又莆陽一寺規建大塔工費鉅萬或欲禁之陳正仲曰建塔之役莫非傭此邦之人為之也是小人借此以得食而贏得一塔耳當此荒歲惟恐僧之不為塔也以上二事荒政侈為艷談夫寺猶可新塔猶可建而況於廳事乎臣署自萬曆二十五年祝融為祟迄今四年所矣誠及是春和景明之時皇上沛然明詔俯從修復臣號召詹保等執畚鍤之役日給傭金在彼自食其力在皇上不賑之賑將見老羸壯者均霑實惠皇上功德無量勝建浮屠千萬級也豈非荒

政一奇策哉况節歲以來臣等鳩材覓土諸凡粗具
毋煩內帑不費水衡但徵御墨一字之批可以活流
民數萬之衆等因

不報

為民窮財盡懇停新法以收人心以固根本重

地疏

萬曆二十九年

臣代庖京兆接得通灣少監張曄手本為殫力摧徵
等事內稱奇異珍寶晴祿金玉等項商牙與京城內
外當舖係順天府宛興二縣所屬及戶部等衙門俱
有卯曆合行取討姓名仍委官輪管照依原題則例

經收務足前項課銀解進等因到臣夫大典並興內
帑告匱我皇上不忍加派小民為一切權宜之計由
外服而漸及京邸誠不得已之盛心也何容置喙第
天下事有利未嘗無害使此事行而無害害而與利
相半即不半而究竟無甚大患臣奉公之念亦自信
不下於人亦安敢不首先竭蹶以副聖懷顧臣私憂
過計殊有見其大不可者請直吐於君父之前蓋聞
裕國必在理財而理財尤宜厚下蓋下者財之所由
出也京師者非文皇帝定鼎之京師聖子神孫千萬

襁豐芑之重地乎年來黃封盈衢株連籍沒加以省直權稅關津把截商賈不通米珠薪桂都人囂然喪其樂生之心非一日矣正宜滌煩苛之令流寬大之澤行慶施惠與民休息他年國家有事所與仗節排難捍衛而弗去者彼都人士也漢時尚徙豪傑以實京師皇上為何創二百年未有之事一旦與細民角蠅頭之利乎夫奇珍異寶燕市所希牙僧者流所謂市井無賴劉大倫先年曾充經紀今游手無生業信如每兩三分之說豈能盈一萬五千之數願捐牙稅

將何以爲衣食俯仰之資也非人情已勢必假天子之寵靈以肆其谿壑之慾波及大小當舖騷擾小本出灘等項指一科十頭會箕歛剜心椎髓鷄犬靡寧朝廷未收其分毫之利而閭閻先被其無窮之害譬之病者四肢久已痿痺腹心又爾枯槁必無幸矣且臣等節奉部檄催辦珠寶錢糧敲朴日嚴纔完三分之一耳所未完者雖該部壓欠商價太多乎亦由商販之寥寥也今無端而下權稅之令恐外而客商裹足而不敢前內而舖戶閉肆而不敢開不惟珠石

購買愈難大典舉行無日卽小民典賣無由將何所
借以餬口哉自古黷貨之主有括富商錢括僦櫃質
錢又以宦者爲宮市使至令沽漿賣餅之家皆撒業
閉門者彼其所得非不多然而京城內潰禍不忍言
卽下罪已之詔何嗟及矣往事昭然可爲商鑒曾不
意我皇上以堯舜之主躬蹈覆車之轍使他日青史
書曰二十八年春京師初算牙稅豈不爲聖德累乎
臣竊惜之先是百戶夏榮一本爲魚葦課稅久虧餘
鹽積久可惜等事節奉聖旨彼處鹽場係畿輔地方

豈可擾害困累罷該衙門知道欽此我皇上不殖貨
利之真心也猗與休哉夫長蘆猶然畿輔地方也都
城乃輦轂重地也不可擾害困累於彼而顧擾害困
累於此臣仰體宸衷必不其然固有不待臣言之畢
而幡然報罷者詩曰民亦勞止汔可小息惠此京師
以綏四國臣於今有厚望焉伏乞皇上念京師去天
尺五憫窮民十室九空早渙綸音俯從罷免仍下劉
大倫於理以戒作俑將都人士手額歡呼共祝聖壽
萬年而國家靈長之慶端在是矣方今人心洶洶所

為疾首感頰而告者無人無日不然京師與外省不同一有動搖必驚君父聖衷即甚憂貧豈果遂忘慮患臣職掌所關與其言於異日無益事情不若言於今日倘天聽可回則猶足以收人心而弭禍本未必非臣忠君愛國之一念也

不報

為雨澤愆期三農失望亟圖修省以格天心疏臣代庖京兆接得部劄為祈禱雨澤事奉聖旨天旱不雨深軫朕衷依議着該府竭誠祈禱欽此仰見我皇上勤卹民隱真不啻若內溝中臣即擬遵旨祈禱

而甘霖正沛臣竊沾沾自喜謂皇上一歎而時雨先飛庶幾可以潤既槁之苗而甦垂斃之民矣不意靈雨雖零尚未霑足旬日以來蜚蠊又復為祟三農皇皇恐遂無秋昔諒輔為太守以夏旱出禱謂已為郡股肱不能盡納忠言和調陰陽至令萬物焦枯引為已咎今歲京師亢旱實臣溺職使然除臣席藁以待斧鉞並齋戒沐浴率屬遵旨遍祈禱外伏念臣藐焉偏佐及僚屬二三卑官胡能一時格天仰副德意顧舉朝文武臣工縱無地方之責均抱雲漢之憂即不

必躬代皇上禱於郊壇恐齋居默禱謝絕賓筵共殫精誠挽回天怒或亦其所當有事者謂宜敕下禮部通行各衙門一體虔誠一如古鞠疚諸臣之意可也至於禁止屠沽亦祈禱緊要事臣雖三令五申而鼓刀如故酒旗猶懸已則不誠而欲望天和之迓其將能乎謂宜敕下都察院劄行五城御史督兵厲禁之敢有公行及私鬻者兵馬緝究如法貴介阻撓御史以惠文彈治之臣猶記往歲旱魃爲虐皇上命真人張國祥禱於黑龍潭甘澍隨應今早旣太甚遠近望

雨甚殷皇上若肯以往歲之命命真人則甘澍亦必以往歲之應應皇上矣然臣所言皆文也恭惟皇上尊爲天子精神血脉與上帝相爲流通倘一留心昭格必速稽古湯時大旱禱於桑林以六事自責大雨方數千里宋仁宗時久旱罷新法凡十八事是日大雨遠近沾洽天人感應之理毫髮不爽如此臣不敢望皇上舉昔年步禱盛事但願撒樂減膳齋心祈禱點檢時政凡徒害於民罔裨於國有類六事及新法者不難一朝報罷則民心悅而天意得陰陽有不調

風雨有不時者臣願甘妄言之罪

不報

明邑侯程

鵬搏

建議加修護堤申詳

臨城縣爲河水衝堤城池危懼酌議增築以保無虞事據本縣在城地方孫得順等呈稱本年六月初三日未時城外泝水河猛水驟發勢若潮湧頃刻傾瀉百里行人趨走不及有栢暢社民賈宗禮人馬俱被衝倒流近岸旁救起有解村民郝廷秀中流無救溺死比時迅發難當護城石堤幾遭衝卸三十年來纔又一見等情到縣據此本縣先於初二日赴獲鹿聽候考察至初七回縣聞之不勝

駭愕隨卽會同儒學教官及本縣典史親詣踏看水勢雖去水痕尚存踩驗石堤間有一二崩潰而浪之自上漫入者則直抵城脚矣其勢如此續據里老李滿倉朱輝等告欲趁時增築爲照縣治僻在府之南隅西面多山下有泝水河一道衆山水發會流於河一遇猛雨湍瀉不及則水頭高懸河身潰溢繞城脚以東流而城被害矣從來有堤以爲城衛考之舊志嘉靖初年有知縣党承美者曾請之當道得贖鍰千金爲築土堤捍禦者若干年

至隆慶三年秋雨連旬汎濫橫流將城西南一角衝卸崩陷民居數十家據老宿指視今之河身卽昔之堤址也惜當時有千金之費僅以土堤衛之而沙土難禁驟浪卒至衝潰使其有先時之見益之費而爲石堤也不其迄今存哉自此年大水南城衝沒於河將城改築而南門之崩毀者移置爲建今門不惟勞費財力且使街道窄狹幾不成縣隆慶六年知縣鄧之松佑議申動庫貯官銀一百八十餘兩鑿石築堤五十二丈五尺於八蜡廟旁

以衛尋被水衝其半至萬曆六年知縣余啓元復建議自鄧堤起北行至龍王廟止用槩縣馬頭夫築石堤共一百九十三丈五尺三十年來幸無隆慶三年之水得其防禦而城賴以無虞據報今之水比之隆慶三年矣其日獨幸本地無雨水自西山一帶發來者隨到隨瀉不至爲患如使遠天之雨若彼而本地又有積雨以湊集之則高一尺之波而近築之城又未可知矣災切剝床修築宜急本縣爲此曉夜圖惟所以設費興工者因思昨年

初任時相視城池比有本縣鄉宦今山東道監察御史喬 在家同詣河邊巡行堤上與同父老子弟百人在隨謂此河水之爲本縣患也前時曾有沿河膏腴之地若干頃是民用以富饒者而今衝洗殆盡不可復追矣徙而折入於城縣治之存亡呼吸間耳以蕞爾之小縣而有此難禦之河洪安所得借費資力以成一勞永逸之功顧贖鍰之請究知縣而後不可爲矣而肇造於鄧知縣與增築於余知縣者俱有設處大段藉民之力以有成功

由今觀之彼其托始之難修砌多不如法且其丈尺低窄水猶得以入焉殊非堅久無虞之計及今若欲重加修築工費須數倍之但以連年苦旱民用不支未可申請本縣反覆詳看得是堤也城之防衛賴焉修築之役誠不容已今以丈尺計之自縣南八蜡廟起西行北上至龍王廟止見在一百九十五丈而八蜡廟之五十二丈五尺拓基於鄧知縣者乃水流急處最為喫緊所砌之堤卽係城脚而濶止一丈五尺每水一到浪之激而噴起者

潑城而濕其根脚危莫甚焉須是幫築一丈加高三尺乃能禦此湍流其一百四十一丈五尺增築於余知縣者今并龍王廟基量之實在一百四十三丈地勢稍上不用外幫酌議於內填土築之腹中實以小石頂面覆以大石比舊要高三尺濶四尺蓋以今年之水勢度之而知其不如是不足以保萬全也已經行據舊役老人張世科劉學之及省祭官趙懷德孫鎬等酌議去後據各回稱城堤之築所緊用者灰石與椿木三事也先任議築俱

以本縣產石石工頗衆而燒灰之戶亦有數十餘家可以不借用於他所其人夫與樁木則取給於槩縣馬頭行之已有定例民情亦頗相安又今年雨水充足苗稼頗盛倘得全收則及時而用其力似不爲厲况以一百八十名馬頭分築此一百九十五丈石堤每名不過一丈有零又何畏難之有其各願築之情如此本縣則以民力之可用者人夫耳而石工鑿石灰戶燒灰與夫樁木等項資用儘多若不自官設處槩以取之於民事體有所未

便除本縣自行捐俸及別項湊辦已足百金堪以一面付各役領造外其餘費用俟細行估計數目多少并別行設處所以經費資工者另文申請以給工役務底於成通詳行縣條議覆帖仰高邑縣知縣金四科蹂踏酌議停妥着令如法修築

按是役以萬曆二十六年三月十五日起工至七月七日工成詳見事紀

臨城縣志卷之五

終

臨城縣志卷之六

知縣事長洲宋廣業重修

藝文志

碑記

金沃州臨城縣重修宣聖廟記

碑在殿前右

沃之臨城古趙上邑也宣聖廟在其城之東南以歲月逾久其規模制度多有遺闕明昌乙卯遼陽伯德公來主縣簿始鳩衆工卽殿之左右而營兩廊主上以來孜孜政道經籍之間尤所銳意每三歲詔示天

下十路旁求儒雅東濱麻公諱汲字公直妙齡穎悟秀出士林越承安改元之明年暨乃兄公度同登進士第逾年夏五月代伯德公貳政是邑公素有作成人材之志下車後乃出誠言集諸生示諸父兄曰邊封寧晏居食無憂宜督子孫勉從師友于是邑人從之率子弟來學宮公乃朝夕遊焉循循提誨無隱乎爾以冀其有造因覩殿庭淺隘像貌渝剝廼命工計費出已俸三萬以圖完葺諸生翕然相悅謀曰學廟之成一邑之盛事乃公勤切如是我輩視之能無動

乎遂歸語而家各分厥工縣令浦察公縣尉王公下逮稅務主者捐其資各有差至于吏民亦多所助僕爲之監董其役乃重飾聖哲之容造雕帳三座重簷三間階陞戶牖殿額供具不旬月輪奐一新又于廊下命匠者聖壘其壁繪六十一賢之像及後大儒釋聖人之辭箋聖人之義發明聖人之道者左丘明等十有餘人而並圖之邑人瞻之者莫不聳然而敬歡然而喜僉曰鄉校久不振非公至是孰能復修而重起之古有文公今見之矣公猶有歎者碑樓之未建

齋廚之未興以逼于瓜代力所未暇後之被寵命而為是邑者如能完其所缺新其所敝廣集秀選藏修乎其中使文明煥然益甚于斯日亦承流宣化之善也事既告成予為之記非有意于求予予以謂君子有美詎可緘默而不稱故慕其為人嘉其用心謹撫實而誌云承安五年涑川鄉貢進士王翰撰

元臨城縣儒學記

碑在明倫堂前左

盛事待其人而興有懲愚以裨贊之在知人之當務而關乎民彝世教蓋甚重而不可緩也儒校是已國

家右文偏建廟學秩官以典薦祀專訓誨之席而責夫司民社暨持憲者宣明勉勵在在藏俎豆之容溢弦誦之聲期化行民變人材輩生應斯世之用其意則至矣故觀夫學校之修與廢則守之賢否鄉俗之嫩薄不待察而可知也臨城古屬趙地魏晉為節度雄鎮泚水映帶北跨山上有前宋避暑爽亭遺址蔡京書刻故存然則為名郡也尚矣國初楊思忠為縣尹父子繼任創建孔子廟正殿至元丙子李仲尹是邑續建東西廡暨講堂六楹草昧之際規制卑隘大

德丁酉間主簿孫公弼乃築西齋爾後數十年則無復嗣葺者矣今主民部事喬林昂霄自鄉童肄縣庠長而伴子讀階是嚮用焉泰定改元主藁城簿俄丁外艱歸于家以東齋屢諷尹李世基辭以迫于瓜期昂霄應之曰願盡左右之力時諭董守禮者嘗主贊皇趙侯館博雅通變亦感激是李意遂決基構未幾而代猶親董其役訖工乃去亦賢矣哉然兩齋勢壓于講堂而等威弗稱又有待于來賢之改作也至順庚午藁人王炳文字仲彬尹是邑謁廟禮畢登斯堂

而歎曰此傳道明倫之所育材宣化之源若斯可乎昂霄曾與仲彬同遊橋門知其可主斯文之盟也告之倦懇仲彬慨然卽捐已俸經營措畫而昂霄弟松亦縣學生進身適任教諭志不期同于是僚屬協謀士夫樂助撤其舊而新之崇其卑弘其隘輪奐翬跂虛明靜浚足以正表儀聳觀瞻矣初廟兩廡僅容七十子像增繪周程張邵涑水考亭南軒東萊暨許魯齋十儒而朔望春秋之奠蠲潔明備躬勸生徒課業條約一新似欲並鄒魯爲列邑之最其賢又何如也

嗟夫百里之邑前後垂百年更數尹昂霄輩始終裨贊而學方致完萃美于今日則天下之事苟有創于前而後無繼之烏能克終成功乎吁難矣哉僉曰宜鑱珉以紀其績猥屬筆于擴事盛而文則陋矣徒以擴嚮鼓篋是昂霄仲彬皆上舍友故不得而辭也然仲彬在弱冠時才學過人毅色讜論已覩其有為有守而涉練識治之本所謂枳棘非鸞鳳所棲而羽儀天朝竚乎有望也姑並序之而系以詩曰臨城古邑遵名○里襟以太行帶以泝水風土渾龐鄉俗淳美

曾是捨攘旣荒旣圯楊尹父子權輿疆里牖民有方廟黌載起于規于隨孫簿跋之于始于終李公體之廼崇廼宏王宰成止孰協孰贊僚吏耆士孰裨孰益喬氏兄弟維殿維廡維堂維齋巍巍岩邃廓廓弘開爰采芹藻袵珮聿來菁莪樂育期儲德才絃歌盈耳敷同市槐蒲鞭匪施仁惠允懷善教善政今孰與儕其需柄任俾熙泰階剛柔正直罔不受裁斯文有賴風動九垓元至順三年歲次壬申十一月冬至前一日陝西諸道行御史臺監御史奉訓大夫陝西等處

地方行中書省左員外郎李擴撰

臨城學田記

碑在約禮齋前

臨城縣學自中統間邑官相續葺理固已成趣惟無田可仰為可閔元貞乙未張震以逋民蘇用之田言諸上官而入之然而田少不給所需也逮至正七年縣人劉栖楚與弟文淵夔謀以百畝來獻由是春秋祭祀及官生日用始有盈裕十三年監縣閭閻縣尹李夔主簿失判不花又能以學校為急務內而殿廡庖廚外而門閭垣墉無不一新已而聞劉君之施田

也曰有善如此而不記之可乎卽伐石徵文于余余謂人之所以為人者以有人倫也而吾夫子乃人倫之所由出故上而王公下而黎庶莫不崇奉瞻仰以之取則焉奈世降俗薄有家累萬金田連阡陌不知少一鎰分一畝以報聖人者而劉君兄弟初無萬金之積也乃能以百畝之田割而獻之則其尊聖教重人倫設心之厚為何如哉視夫好淫祠奉釋教者萬不侔也縣官表而出之可為勸善之道矣栖楚字國標隱德不出文淵字朝宗今為國子伴讀聞其所學

迥出同輩則異日登廡仕而用力于聖道當不止于斯而已也元至正十四年歲次甲午三月穀旦趙州鈍菴張曾記

臨城縣學殿廡講堂學田記

夫事之興廢因乎時爲之勇決存乎人義不當爲而強爲之不明也義所當爲因循苟且而不爲之不勇也故限於時則已不然循序而圖之未有不底于成者臨城自金末學宮墮廢元興四海一統詔天下立學校登用儒者量撥荒閒田地爲養士之基自中統

壬戌縣尹楊思忠世係邑人也重修先聖正殿延及至元己卯中山無極李侯仲來尹是邑創建兩廡及講堂三間繪九十七賢像元貞乙未書吏張震查出縣北東韓村有蘇用戶絕地計一百六十三畝呈于憲司撥充瞻學地土及大德己亥主簿孫公弼佐是邑締構西齋三間意欲修講堂建東齋以瓜代去大德己巳東十二月朔諸儒生會集明倫堂論及殿蕪齋廊學田所由然者乃知四公循序所爲也夫事不必成之于一人義所當爲及時而爲之則後人亦必

有繼我而為之者矣余因記其事以為繼至之君子
勸元大德十年歲次丙午二月望日儒學教諭王執
中撰

臨城縣重修儒學記

碑在明倫堂前右

主臨城縣簿失判不花喜儒術崇聖道其設心有足
多者蒞縣謁廟之日既以敬遵遺訓是告周視宮中
惜殿廡皆敝制作未完喟然曰學校禮儀所出可置
諸度外乎以縣人郭堯明勇于義語以所謀冀其協
力郭方俟山北憲掾之辟家居無為即諾之乃撤殿

瓦而為一新推餘而裨兩廡又飾聖人及配享之像
櫺星門制度雖完而不耐久乃更為樓以門其下外
而宮垣亦築以法市祭器三百且創庖廚為烹飪之
所堂則庥其前後以防風雨之侵凌而亭則葺理其
朽敗莫不材良斲堅而有永久之望役始至正癸巳
四月為日二十一旬為錢二十五萬有奇凡此皆邑
民所樂助者蓋人飲食猶必每種各出少許以祭始
為飲食之人不忘本也今夫君臣父子兄弟夫婦朋
友賓主有各止其止而不失所以為人是孰使之然

哉皆聖人之教也然則明彝倫以善人心視彼為飲
食以養人之體者輕重不侔矣乃反忘之耶宜乎二
君圖報所本于上復圖報所本于下捐資竭力朝昏
不怠而廟遂為一縣之甲也主簿遼陽人有猷有為
非世吏之可比教諭梁師閔謀刊其績而請文于余
余嘉簿之斯舉為能知先務也又嘉郭之為人謀而
忠也乃為之書元至正十五年歲次乙未四月穀旦
趙州鈍菴張曾撰

明阮邑侯居仁重建文廟記

學校之設所以明彝倫興孝弟美教化厚風俗端本
澄源之地教育賢材之所也三代以上治教休明賢
材輩出誠不可及也三代而下學校之盛者莫漢唐
宋若也其間建功業于當代垂聲名于後世光照史
冊耿耿不磨非由學校興而得賢之盛其能然哉臨
城趙之上邑周旋四顧左有堯峰之勝右有太行之
峙泝水抱其前董岡擁其後形勢之盛非他邑之可
擬也城東南隅有宣聖廟焉肇自大宋崇寧大觀大
元中統至正迄今前後相續修建非一代宰是邑者

非一人今而交趾阮公居仁來尹是邑謁廟行香春秋釋奠觀廟宇規模隘陋聖位不尊賢次弗辨憮然歎曰廟貌之不振是吾之責也時與寮佐謀曰廟學不整皆由官者因循歲月不能修飾于我何難僉曰學校有司首務風化本源所係尤重非細故也理當修飾于是經營逾年乃董工鳩匠登太行涉泝水隨山刊木整材會于太行之麓載木聚于學校之東親董其事夙夜惟勤掄梁棟而扣成運甓瓦而見數撤舊殿爲戟門立新材爲大殿明間前之兩楹乃丹墀

之栢木通之六楹重簷朱楹深邃洞明奉聖像居正尊列四配于左右十哲以次秩秩東西兩廡十間肅然廣潤恢宏壯麗明倫堂兩齋號房射圃饌廚之房庫庾之所儒學道育賢街周圍垣墻燦然一新而廟學大備矣肇造正統八年十二月十六日落成正統九年閏七月初四日凡學所宜有者無一不具而未嘗損于民皆阮公欲沒其能不銘翠琰主簿陳裔典史梁郁前掌教今浙江道監察御史馮靖司訓劉泰相謂曰吾邑廟學維新辛酉壬戌科進士薛幹名

芳朝野可紀之以示後者知其修建之年不可泯然
無聞于是致仕官張敬等來請會文勒諸石以彰公
之績也余固辭弗獲乃謂之曰凡士初入學則釋菜
于廟以禮先師故有學必有廟所以事夫子也蓋以
夫子道德高厚與天地同其體教化無窮與日月同
其明古今帝王之道非夫子無以明天地生來之理
非孔子無以知上明堯舜禹湯文武之道而集厥大
成下傳顏曾思孟及諸賢皆以斯道著今焉游歌學
校佩服格言誦其書求其道非不欲聞一而知十然

而道德光輝不可得而見必立神棲聖止之地以萃
其敬迎之心此學校之設必有廟存焉洪維國朝宏
建太學謁先師幸太學釋奠講經恩禮逾厚而南北
京畿學校則銓監察御史各一員外而府州縣學校
則銓按察副僉各一員提督又命府州縣正官仍舊
提調月覈旬考務成實用天下之士莫不感慕奮發
以圖自効于萬一其崇儒重道立學設教之意視古
昔大有徑庭矣由是觀之吾邑阮公建學立廟之意
可謂有功于聖門有功于學者士寧不激勵自強以

期無負于作養之意乎余既稔公之政而喜神棲聖止之地宏敞崇麗足以萃敬迎之心也謹誌正統十一年丙寅孟夏臨城儒學教諭維揚盧源撰

明臨城縣典史王克勤創建講堂記

夫學校者育才之地致治之本根堂齋者講明之所致治之本堂齋不肅則師生無所講明亦不足為致治之基是以欲育賢而講明治道乃在乎興學校而嚴肅堂齋也臨城古趙名邑其學之來已遠盛衰興

廢存乎其人陝西伏羌王君克勤來幕是邑每于朔望祇謁之餘覽視學宮徘徊再三慨然歎曰斯邑之學殿廡堂齋號舍廚庫廩庾之所俱前知縣阮居仁所建其規制固無以加第年湮日久雨剝風催雖為凋敝圯壞易為補葺而獨缺者後講堂實不足以為師生討論游息之樂余聆其言喜不自勝乃謂之曰此學後講堂從有學迄今未聞建立君今日此舉實千萬載之幸誠勝事也克勤遂謀于知縣李永昌主簿張瓚各捐已俸收積材木乃于明倫堂後創建講

堂高深修廣悉皆稱制隆棟厚礎極為鮮美其兩廡明倫堂齋房庫廚廩庖之零落者悉撤其舊瓦而覆以新甍輪奐之美學者翕然是以或藏或修而講求乎堯舜禹湯之道或息或游而推明乎孔曾思孟之傳父子之親君臣之義莫不由此而闡夫婦之別長幼之序靡不從斯而著蓋有不待求之日用彝倫之外而成已成物者皆自學而至也所以然者皆王君興學之所致焉然王君非獨學也學校興而賢才出賢才出而治化隆由是秀士之從此而登于仕版者

必能施明德新民之方而措天下于太山之安展致君澤民之術而奠國家如磐石之固則賢才之出其有以裨于世道而王君興學之意莫大矣矧王君發身刀筆而能興學育賢如此誠足以為知本君子而超于等倫也經始于天順五年八月落成于是年十月後之登堂而講誦于是者使有以考故因而記其始末焉天順六年十一月穀旦臨城縣儒學訓導藁城趙復春撰

明張邑侯佐重修廟學記

臨城趙之鉅邑堯峰峙其左太行拱其右泝水帶其
前董岡擁其後自昔號稱山川奇麗風俗淳厚士知
書而知禮矧今在畿甸千里內聖化所先被者其士
風民俗宜何如盛哉臨潼張君佐之爲令也材周于
事惠澤于民顧視舊學圯陋有弗稱愜曰是不足以
風勵士民乃圖撤而新之經始于成化二年再明年
冬落成蓋自廟及廡及堂齋以至宿息庖廩庫藏之
所敝者葺之頽者興之隘者闢之堅甃良材次第完
善而凡所以祀若享之器百爾具備而其區畫有緒

民不告勞于是學之師弟子感樂道張君之善教諭
錢塘吳君琪以書來請記余惟學校王政之本古先
聖王之所浚致意也考諸唐虞夏商周之學可見矣
後世稱治者曰漢唐宋漢興八十有三年始置博士
弟子員宋興八十有四年始命州縣建學唐雖自貞
觀時學校已盛而天寶之後浸以廢弛我皇明受天
明命撫有四海自太祖高皇帝干戈甫定卽興文教
崇化勵賢以風四方內自京師外及海隅徼塞靡不
立學列聖繼繼承承迄今百餘年而學校日新月盛

絃誦之聲相聞是固聖朝作興之功亦由賢有司能祇奉德意而然也然學校所以興焉者豈徒如師弟子逸居坐食誦說于其間以為太平之美觀也哉政欲其相與明聖賢之道以為國家輔下以化民而成俗耳語曰百工居肆以成其事士游于學而不思所以致其道則反工之不若也已不亦為學校羞耶夫所謂道者始于致知終于治國平天下其說寓于書而其理具于吾身吾讀書以窮其理反求諸身以踐其實則聖賢之道在我矣道在我以之黼黻皇猷贊

襄治化而綿國家億萬年之祚于無窮矣則豈徒不負聖朝作育之恩維賢有司亦與有榮焉余既重吳君之請嘉張君之知務而望臨城士子之學其識所輕重也因為之記成化五年歲次己丑春正月穀旦賜進士出身翰林院侍讀兼經筵講官同修國史安成彭華撰

明張邑侯清重修儒學記

臨城縣儒學在正統中嘗一再建取具苟完歲久復敝雖數更其令而莫或究心者成化甲辰鄉進士婺

重熙累洽之運被○○○○○○○○列聖之
化最久且先顧可使夫絃誦之堂有愧乎魯哉然非
君之才之識出乎世吏之上則亦烏足致此雖然學
校之所為重者有本有文興修者文也其本則何如
在士之求復其性而已蓋其說莫備于曾子之書而
學之不以為常談者幾希也曾子傳之子思曰修道
莫先于率性子思傳之孟氏曰謹庠序必申之以孝
弟其說同也豈若後世從事乎口耳以文詞利達為
得哉復其性以基之則文詞足以明道利達足以匡

時而天下之治可以復古矣豈不益有重于斯學哉
此臨之人士之幸也張君生朱子之鄉誦服其遺書
不可苟簡之習其治臨城也律已之嚴接下之誠守
之甚固而部使者及大府有難決之事難明之說皆
質之其學校又不獨興修而已親課諸生為之講授
敦諭作興士氣益振臨城人以為百年來未有也鄧
君常分教朱子之鄉友於張君甚稔斯學也典史馬
德訓導任道實相其事而儒學生王璽趙琦鄉老侯
圮陳明咸與有勞法得附書遂為一一書之以郵示

平張君焉弘治元年歲次戊申秋八月穀旦賜進士出身誥授中順大夫詹事府詹事翰林院侍講學士新安程敏政撰

明張邑侯清重新祭器記

聖朝右崇文教自京師及于天下郡邑咸建學校以作養人才而學必有廟以像先師配以先賢朔望展謁春秋報祀俾學者知斯道之所本教學之所自至于事神之禮享祀之儀悉為定式令有司慎守而祇行之示隆重也臨城地屬畿甸凡百教令霑被莫先

然前之為令者率病于繁劇于文教有所未遑成化甲辰婺源張君清來牧是邑到官無何而百廢具舉于學校尤在所先若堂齋則作新之號房則增築之至于報祀之際躬率諸生恪恭厥事見前之祭器損失殆盡遽憮然曰吾有司因循有如是是何以進薦廟堂對越先聖乎遂捐俸鬻工稽式製造既成乃釋菜而陳之士心歡悅邑之人咸願一觀于是教諭鄧寶訓導胡澤張濂狀其事實率生徒馮讓趙琦冀來請余文以垂永久順衆心也余聞張君之令臨城其

善政之在人者多矣然知君為政之善而不知其所
以善者有自也夫禮樂皆先王制作法乎天地本乎
人心為斯道之所寓學者少而習之以為學壯而行
之以為政則民咸化而歸于治故子游為武城宰而
聖人與之彼不知道者視禮樂為末務俎豆為虛器
謂于政治無所損益廼忽易之恬不加意豈不為聖
人之罪人乎今君之作邑廼致謹于學校而于禮器
莫不修飾備具如此則于善其政也宜矣余知其春
秋報祀籩豆既陳簠簋在列而罇俎有序俾為士民

者奉之而致其誠瞻之而起其敬其得古人禮樂為
政之意可謂篤信于道不負朝廷作養人材隆重先
聖之典矣若君之政績卓異則載于士民著于當道
已被朝廷優典茲不贅君名清字一之徽之婺源人
弘治六年歲次癸丑六月既望真定府學教授閩泉
張賢撰

明張邑侯希佑重修儒學記

臨城古趙地也今隸真定趙州儒學在縣治前歲久
傾圯正德甲戌王君希佑以明經鄉薦拜令茲邑越

二年政平訟理化洽境內乃登諸生顧僚佐曰學校以明教化育人才簡畧而弗治有司者任也余其無寧茲謂典史袁鳳曰鳩工集材余則不敢後顧令職實繁弗克兼舉子其夙夜事事無或怠忽也乃相舊趾狹隘拓地仍餘繞以崇垣修正殿戟門兩廡齋號易其棟楹防撓折也級以甃石慮傾頽也塗以丹雘昭文章也廼作西門鍾形勝也浚井得泉可用汲也以丁丑春三月首事庚辰厥績用成役不後期而民不告勞王君之賢益彰矣庠生郝希呂春陽輩咸謂

當勒石以紀其事乃俾鄉進士某屬余為記竊惟聖賢之化海內同風燕趙在今為畿輔近地涵育尤深且士多豪傑慷慨有古遺俗好德而嘉義其習則然也抑其過引其不及以約于中庸之道不無望于良有司賢師儒者焉孟子曰待文王而後興者凡民也諸士其景行前修勵志忠孝以仰答我國家尊崇儒教之典是則所願也區區文藝之末惟學者餘力所及要非本務之所在弗可驚此而遺彼固不俟余言矣王君蓋能加意于學校則其教士必能識所本也

君字汝弼山東濟寧州人鳳字國祥河南登封縣人
正德十六年歲次辛巳十一月穀旦賜進士出身山
西道監察御史臨清王道撰

明劉邑侯呷重修儒學記

臨城僻處萬山中學在治南肇于大宋崇寧大觀間
國初因之正統中始重建焉自是以來日敝月圯守
令以為故事不加省嘉靖甲辰豫章劉君至乃喟然
歎曰學校者教化之本風俗之原凡政之施孰有大
于此者而可以易忽之若是夫報本弗虔而望士之

尊道敬學弗可得也肄業無所而望士之進德修業
弗可得也茲非守令責歟乃毀淫祠出公羨以修理
又恐率作無漸至于疲民之力而傷民之財也為之
從容調劑先之殿廡而啓聖鄉賢名宦次之堂齋號
舍泮宮騰蛟起鳳二門又次之坊表泚泉亭官廨庖
廩又次之四踰年而告成于是廢者起頽者興舉數
年之曠典而一旦新之奐然翼然士氣相與鼓舞興
作若有不能自己者于是邑博薛相周悌等撰述劉
君之績至栢鄉徵余文為記余以草茅之言不足以

彰君之績為諸君重也固辭不獲乃為述其實事以歸之且加以勉勵之言俾其歸而勒之貞珉以垂不朽且退而自修以期無負于朝廷作養設教之意與良有司勤勤懇懇修造興作之本心則余之所厚望也諸子勉之劉君諱皞字廷儀別號筆峰江西之高安人由舉人嘉靖戊申正月既望順天經元浙江餘姚黃釜撰

明王邑侯廷孚重修儒學記

國家所以化民成俗崇儒重道興賢育才惟學是賴

故有司之賢者必先加意于學臨之有學肇于唐宋之時其來遠矣國朝因之益加壯麗歲月既久不無傾圯先是萬曆癸酉之歲前令宣化鄧公嘗銳意修之經營未訖輒以陞任行以故缺者未完舊者未新繼成其美不無望于後之賢者明年甲戌我王公奉命來尹茲土見前功之未就也即曰學校者賢士所關教化所由出也今若此何以妥聖靈而副朝廷作人之意此有司責也乃捐俸金聚財物命典史孟仕以鳩工經度營表修廢舉墜缺者補之舊者新之顏

者起之于是自大殿以及啓聖兩廡自敬一亭以及堂齋廚舍與鄉賢名宦之祠義路禮門之建掌教分教之宅罔不奕然一新神牌祭器凡百具備規模制度有加焉以臨兆民可以壯觀瞻以祐先聖可以妥神靈以居師生可以勤德業其有裨于吾邑之風教夫豈淺哉大工底績神人胥悅于是邑博張九衢揚雲輿率諸生薛學之等來屬余記其事余自分荒廢已久不足以揚偉績固辭不獲乃從而應之竊惟國家之立學豈徒飾太平之美觀而已哉有司之修學

豈徒爲一時之文具而已哉君子之居學猶百工之居肆肆不修而欲工之成其事不可得也肆旣修而不成其事可乎君子之于學亦猶是也王令君以天挺人豪童年入學潛心大業發跡賢科義方家教爰及賢郎青雲接武黃甲可待文章德業後先濟美今日學校之修蓋欲諸生之亦如是也未仕之日則以成其身者成其子已仕之日欲又以成其子者成諸士可謂視邑如家視士如子矣公其賢哉諸士體公此意藏焉修焉息焉游焉專心致志爭相奮發觀輪

免之美則思為朝廷之棟梁沾廩餼之恩則思為生民之乃粒科第羣集德業遠大他日之人謂之曰此其學之所出也此其官之所造也居學者有成則修學者有功矣諸生勉哉然王公之善政不止此也如蠲徭役以專士之業助婚喪以周士之窮省刑罰以寬民之生出廩粟以濟民之急革羨餘以杜政之弊有不可殫述焉至于純一無偽信可以孚豚魚清白存心操可以矢天日尤人所難及也孟子曰人有不為也而後可以有為公之謂矣公諱廷孚字司鳳

岡其別號也山東登州府黃縣人萬曆三年歲次乙亥秋七月○○日原任陝西膚施縣知縣邑人劉偉撰

明楊邑侯應丙修學記

國家立學以明倫育才其事在守令最先務也畿南邑有臨城拱太行環泚水風俗淳朴而士多俊偉然必由學校教養之乃可以備君相之用其學建自國初雖繕葺相繼而易時輒敝萬曆壬辰延安楊君應丙補授臨城令始至謁文廟畢顧視頽剝之狀惻然

曰此非長民者責與卽與衆謀葺修之或以工鉅費
繁諷君曰果爾學宮將鞠爲茂草矣其何以修祀事
育英才耶遂捐俸置材用閱數月材用具乃卜日肇
工自大成殿啓聖祠敬一亭兩廡以及明倫堂時習
日新兩齋鄉賢名宦祠宰牲所外而宮牆坊表無不
增易完固黝堊丹飾之是役也不縻上不擾下規制
大備各協其度過者皆爲改觀旣畢工君爲更時習
日新之名爲博文約禮易騰蛟起鳳之名爲禮門義
路而題其門曰萬年風教培斯地百代英賢出此關

蓋公之望于臨城士子者其遠且大如此嗚呼是足
以稱朝廷立學之意可謂知先務矣故爲之記

萬曆甲午六月穀旦國子監助教弋陽陳九德謨

明劉邑侯永茂重修儒學記

公諱永茂別號彥廷遼東寧遠人起家賢科有治才
丙辰之夏分符臨城蒞任之明日謁先師周視殿廡
梁摧墮脫窓牖毀折內外無所障蔽公惕然曰此安
侑聖賢之所而造士之區也忍令頽壞至此乎說者
以歲飢省費爲言公曰敝而不修將聽之敝乎圯而

修之所費不更不貲乎且學宮不飭何由飭士吾方嘉與多士維新是可緩乎乃括囊中費餘許許辦材鳩工刻日而就正殿兩廡以及櫺星門啓聖祠明倫堂名宦鄉賢宰牲等祠宇無不整飭棟宇輪奐戶牖檻堦壯麗全好丹碧輝煌非復向者簡陋矣公刻意興文大校諸生于公署手定甲乙人人悅服其賞格之厚六十年來所未聞者朔望掣簽講書義有未妥者當下剖決人盡解頤所頒賜有差卽嚴寒甚冗弗間也又六十年來所未聞者月再會文輒詣會所品

隲諸卷辯疑釋義出而觴之殷殷懃懃情興淋漓諸不能舉火者周之學行優者獎藉之才堪向上而誦讀無資者時時破格餽遺之冤抑者申之詞訟相干者逐之貧不能葬者捐俸助之甚有過十數金者作士志勵士節詳悉曲盡間有跳梁者正色戒之曰吾遇諸賢原以作養人材若輩不率教提調獨無法乎人復悚息震懾以故人爭濯磨文風日成習尚日端雍雍彬彬洒然一新公所謂飭學宮以飭士者于斯驗矣公精明博大事無苛求政無反覆甫一載吏畏

民安而士化期月政成豈虛語哉人爲青衿時責望上官無所不至一朝結綬不啻弁髦疏遠之挫折之惟恐一假詞色囂競莫制公獨撫之以恩裁之以義愛之若子弟疏通其滯而洽比其情士喁喁向風服習其教化而感佩其恩私藹然如家人父子之相親公之治術果有大過人者于時司訓者五臺徐一貫省工則著勤勞教士則揚雅化與公同心共濟興起斯文勒石日適署諭黃岡詹儀來任斯土例得並書萬曆四十五秋七月

賜進士出身國子監助教邑人惺玄白受采撰
按劉君後以貪酷被逮遣戍而行獨其加意學校
一事實從前未有此文亦絕無一字溢美錄而存
之使功過不相掩可也邑人喬已百識

重修臨城縣學記

真定於畿輔爲都會所統五州二十七縣而臨城
最爲下邑治在太行山之麓羣峰矗立纍纍相屬不
可數記而指名者率皆臨城之地山戴石無土草木
不生過一驛或得一平地然僅一二里許輒有重岡

復澗綿亘其中地皆沙土疎惡下又有石不可耕幸遇平歲人或饜糟糠不幸年穀一嘆卽交走死無弔以故其民貧瘠地又四達旁州他省攻剽椎埋之奸出沒往來山中者不可詰問聚落必擊柝出入必挾弓矢以自衛至于四方商賈無所求而來騷人墨客揆奇好異之士無所爲而至聞見淺陋習以爲俗以故其民椎魯無文章而爲吏者見其然往往愁居歎息引領思去於是因陋承弊求免負殿已爲意外之望何暇論經術講禮讓如古循吏之爲蓋臨城學校

之廢久矣余之始至見其門庫道狹又無桓表齋房包漏有傾圯者每慨焉興歎以爲是邑雖山埜荒陋然距京師纔八百里漸被風化莫此爲先而習俗固陋黷序不修此有司之責也因與學博趙君會一孫君子白謀所以新之皆曰唯縣大夫命余於是出俸金買地於邑之趙氏得五十餘丈闢以爲道縮版立垣列於東西烏頭綽襖顏而額之列樹表道樊人出入經始于癸亥年八月訖工于乙丑年四月不徵於民不取於官而傾者正圯者立凡殿廡祠屋星閣

橋門以及周遭垣舍莫不巍煥一新於是人士歡欣有挾冊抱書而來遊者因相與請記以垂示後之人余盖有感於漢文翁之治蜀也史稱文翁見蜀地僻遠欲誘進之起學宮於成都市招下縣子弟以為學宮弟子除其更繇與明經飭行者俱使傳教令出入閭閻由是大化比於齊魯其後遂有司馬相如王褒揚雄之流先後嗣起為漢一代文章之宗而巴蜀之饒亦甲他郡夫蠶叢鳥道之險與臨之羣峯矗立者遠矣荒陬邊徼之地與臨之密邇京師者遠矣然

文翁一為之倡而率先向化至於如此豈非天下無不可移之俗不可教之民顧上之所以治之者何如耳余雖雅慕文翁而弇鄙固陋無能為役惟冀後之來為令者無廢前功而更張大之拊循勞來使就滋植然後力行教化潤飾吏治吾見臨之民雖貧瘠椎魯將必有如司馬相如王褒揚雄者出而為國家用者矣謹以一言立之學廡以俟趙君名懿源武清人孫君名眉平谷人皆有功於是役而縣尉時君雨濟及薦紳馮君堯年太學生王君之弼各助木石材

料縣學生賀雲開張衆隨等亦能力董其成皆宜附書者也是為記

康熙二十四年孟夏敕授文林郎臨城縣知縣宋廣業撰

附學宮刊圖立石

今圖已列入卷首

儒學舊基四面方正無缺明弘治七年知縣郭賓截取東北角一空營舍與譚隆居住七年奉巡按監察御史張案驗為侵占學基事案照先據臨城縣儒學廩增附生員馮讓趙琦等呈稟前事已經提解前來將譚隆等問罪發落訖仰縣即用好石一塊將殿宇學舍并倉庫等房間數刊圖于石上及將四至各若干丈尺鑿寫明白豎立于風雨不及之處或嵌砌于明倫堂牆壁之內庶弊端可

杜將來無虞不然後之宰縣者好尚不同必復有
如今日者惑于奸人之言而侵為不急之用逞一
已之私以掩衆人之功為學宮之害不淺也仰候
刊豎完日繳

現有圖記立石堂西

重修臨城縣署記

國家承平四十年幅員之廣人物之衆未有如我
朝者定制自京師而外有省有府有州縣莫不以京
師為主自一縣而內有城有鄉有鎮寨莫不以縣治
為歸故京師者天下之首縣治者亦一邑城鄉之首
也上而承流宣化號令於是乎出下而息訟安民政
教於是乎興縣治顧不重乎哉故門階堂廡之制與
統數郡轄數州者無少異焉吏乎此者固宜完其固
有而時補葺之無使滋壞乃或視為傳舍恣其傾圯

朽蠹而漫不加省類而推之將必城郭摧亭堠廢田野不闢游手無禁而諸事弛矣其于民社之責修舉之義不幾負乎余來臨城其縣署不修已久余有志補葺特以初至未暇歲甲子旱飢民嗷嗷若待哺然余因出貲募民修之令傭工以取給於是易其腐支其顛蓋其缺漏正其頽側凡若門若堂若庫若寢室皆完其所固有也又增葢迎旭堂志君恩也介齋明已志也豐慶園爲民祈年也舞綵軒梧桐書屋宛在軒以養親也皆舊之所無也乙丑冬落成楚藩大叅

葉蒼巖公井陘觀察李梅崖公適過臨邑顧而喜之嘖嘖稱善二公清介自矢固不輕予人者謂是舉乃修廢舉墜之大端且不傷民之財用民力而適以濟民之困更有合于救荒之善政因相與歌詩以誌其事并爲題額夫余祇自盡其職守之所當爲耳竊幸爲清介如二公者所許益勉其所不逮庶幾坐此堂治此邑得共臻太平之盛而上宣

聖天子之德意於無窮也是爲記

康熙二十四年歲次乙丑嘉平月長洲宋廣業撰

建立宋孝廉功德祠碑記

嘗攷記傳能禦大菑者則祀之能捍大患者則祀之
未嘗不瞿然而作歎禮制之於祭法蓋至嚴而甚重
也故澤被一方活全萬命禮在所必崇苟不其然享
為濫祠為淫亦禮在所必棄惟棄淫濫而後崇祀者
愈嚴而彌重在昔論定諸賢得與春秋典者尚亦其
峻伐豐功入人最深合數千百至不齊之黃童白叟
無不一心一口不憚匍匐遙集所司以請必思有以
報之所司核實輒許可其請亟思有以風之是誠千

秋百世足示來茲而光俎豆者矣我

皇清敕封文林郎直隸真定府趙州臨城縣知縣孝廉
宋公出平允刑憲之嫡派乃節義名臣之冢君奕葉
芳馨累傳恪謹尚希伊洛究濬性命之源潛訂古今
儲就經綸之畧行足以勵世文足以翼經黨重彥方
宗依文正誠無愧於孝廉二字允堪享夫春秋五鼎
然大公自昭於鄉邦非臨邑人士所得具論者也至
志氣集於厥躬而禎祥萃於公姓一時名盛後世恩
垂尤非等倫所可冀及公同母弟即今 師相方佐

聖天子順四時和萬姓平階有象翊運無疆而公長公
是為我侯澄溪公臨城彈丸大峰環巒抱沙漫礫鋪
土瘠民貧河北無雨然與恒屬三十二城同一縣治
徭役煩苦殆畧相等凋敝難振由來遠矣自公來牧
五載於茲潔已愛民始終如一無煩鉅筒公自生明
薄示蒲鞭廉自生威弭奸宄於未兆清游情於無形
履畝勸農婦子為之安止開學課士人文為之蔚蒸
百弊胥釐百廢咸舉擬於神雀五鳳循良稱最方之
林慮中年治化無異是以雖承疲敝俗漸以和連歲

嗇荒民不甚病推原所自咸本過庭之訓乃知民之戴我侯之德者蚤已戴封公之德於我侯也深矣我侯性至孝數請迎養封公曰體國愛民是吾養也而不養志而體養與遂終不行迨至甲子邑苦旱自正月不雨至於六月土赤禾焦民艱於食封公聞之乃愀然曰臨民不堪命矣遂典易大庭尉遺產囊千金以來比至歲且云逼雖我侯不惜計部考成輒停徵務與休息而尚懸起運六百三十餘金催檄如雨封公曰此我所以來也慨然代輸遂囑我侯出不責償

明示四野歡聲震地當時復業者一千七百餘戶而封公猶以爲目前之困蘇矣來春之饑奈何乃復出其餘貲三百餘金買米以貯明年春設廠煮粥待麥成熟差有以餬口而後止所全活更復無算嗟乎三月不雨則弔災莫大也七日不食則死患莫大也戶至一千七百有奇實括一方餘一千七百戶之口殆幾萬命微代輸其課寧免流亡微日給之食豈猶全活災孰禦之而造我一方曰孝廉宋公患孰捍之而活我萬命曰孝廉宋公公家世清白非饒於財也薄祿

養以不就軫民生而遠來皇皇焉如有求而不得惟利濟是圖豈思食報者哉乃民之戴封公之起其死而肉其骨日思有以報之而未得今忽聞封公赴召玉樓又以憂且奪我賢侯去人之哀之如失怙恃盡邑之五十三村父老相與謀曰吾儕小民誠愚然竊聞能禦大災者祀能捍大患者祀直道在人惠鮮難泯於是創宋孝廉功德祠於北關之衢請於督學使者暨諸當道司直大人特預春秋之大典准照動用經制一例致祭仍許自置守祠人戶公論既定

輿情允孚其建祠也鳩工庀材成於不日其奉祀也鄰邑士夫孺婦環聚來觀百里如續莫不舉手加額曰芳馨哉惟不經見之遺愛是享奕世不祧之榮典是舉也允堪示來茲而光俎豆矣而我侯甘棠之愛卽於去之日奉長生位於功德祠之後宇鑿石紀盛得並書焉是爲記

康熙二十六年春二月吉旦勒石臨城縣八十歲布衣喬已百撰

功德祠記

恒山臨城縣宋孝廉功德祠者祀江南長洲儉齋宋公也盍祀乎爾公有功德於臨城也公家江南於臨城乎何功德公冢嗣官臨城尹迎養公公因以功德之也 大中丞于公題額曰報德酬功著民情也不稱封公稱孝廉者公不願以子貴從先志也康熙二十三年曠乾大無禾麥臨城饑民流亡令君停徵抵十月國課尚懸羣危之令君不顧願以官殉會公以迎養至歛歔長歎曰吾志未衰本不願祿養聞臨城饑汝為牧民官恐無以救有負

朝廷茲割吾家庭尉公遺產得千金攜來代輸賑救令君拜受命隨榜示出金抵完懸課六百餘免徵聞而復業者千有餘戶次年春又蠲三百餘金購米賑粥又活得數千人邑百姓建祠尸祝令君援功令諭止二十五年十二月公卒於里訃聞百姓如喪考妣號泣震山野於二十六年正月二十一日版香伐鼓迎公木主入祠通聞各上官旌公德而嘉民情乃定春秋致祭比於祀之在典者焉嗟乎古者鄉先生歿而祀於社公則非土著也有功德於民則祀於宦地公

則不在官也以子居官而父遺愛古所罕覯昔曰求忠臣於孝子之門今而後則循吏必慈父之子矣噫亦異矣哉茲因而為公幸也人生顯身易而行道難吾儒讀書學道志在濟世安民彼彰纓縹組徒饜富貴者無論卽有賢者出而據要津膺民社事會未逢道虛志鬱未免與庸碌同老卽或志遂道行無甚顯赫大端不得流芳百世亦究與寒烟衰草同歸蕪滅孰有如公之適逢其會得以禦大災捍大患遺愛在人而永不朽也若然是公之志已遂道已行正不必

以公之未顯為恨矣余昔遊江南多士君子交與公家氣誼更篤迄今三十年來同學故人皆大貴獨公落拓屈抑行將賫志以歿不謂今成千古傳人享萬年俎豆人之升降時命寧在及身顯晦也哉因感其事而為之記按祠落於臨城郊關之北門額曰宋孝廉功德祠儀門五楹中三楹祀公主東西各三楹東為更衣所西為祭器庫紀公功德暨敘崇祀顛末之石凡三卽樹甬道旁後虛三楹邑人感令君惠政祀令君於去之日其制差小翼以兩楹以配前儀門五

楹云公初諱德寬字御之改名宓丁巳孝廉

敕封文林郎臨城縣知縣令君諱廣業號澄溪壬子拔


貢

康熙二十六年歲在彊圉單闕之余月上浣燕山陳

僖撰

臨城縣志卷之六


終



臨城縣志

八七

內閣文庫	
番號	漢 14433
冊數	6 (5)
函號	四 163 1



臨城縣志卷之七

藝文志

碑記

明張邑侯

佐德政實蹟碑

知縣事長洲宋廣業重修

余幼讀書有志于功名將以行其所學也苟得一縣亦可小試何也縣令于民最近其德澤所及最速舉世瞽瞍焉薄此職專務已肥遑恤民瘠君德壅蔽不得以下達怨氣充塞無間于閭里致使陰陽失序寒

暑乖和十有八九脩有人焉操廉明之能行公恕之政愛民如子則民得不仰之如父母思之愈久而不忘哉今臨城張令是也令諱佐字良輔陝西臨潼世家發身科第來宰是邑下車之初意謂邑之政有六莫先于賦役之均也首查文冊詳審槩縣人民除老幼殘疾役占等項外定精壯人丁五千有餘易州砍柴夫每月則有八十六名昔每名有二三丁朋合者赴部皂隸一十七名昔每名有八九丁朋合者事無一定未免有不均之歎民甚病之張曰不然此國事

也豈可如是于是開展公道咨謀詢度每柴夫則定四丁一名每歲總四千二百一十有八丁赴部皂隸則定二十四丁為一名以歲計共四百有八丁遞年輪流依期更換上無累官下不勞民每遇春初坐派國用等項先將上戶或五兩或二三兩量力出辦一次次將五百餘丁曰空閑人丁同柴夫錢命各社里長將各甲收貯若有公用命大戶于各里長處照價支給赴縣記銷富戶空丁又不足年終公用通前五百有餘丁俱分三等上戶一丁出銅錢二十文中戶

十五文下戶十文仍令各里長同前收支有餘者次年通支貧民李春等五百餘丁勸借牛具籽粒種以助其耕雜役俱免老疾無依鰥夫李興等十有餘丁重建養濟院隨時依例存恤得所婚不能配者設多方以助之則有張寬等焉喪葬不得舉者給棺木以賻之則有郝六等焉國稅之征上戶遠撥下戶存留絲絹之輸每丁出絲六錢每疋十九兩五錢以輸歲額至若馬政國之大事免糧喂養以充國用舊例也小民每苦于賠償令則查其遠年免糧空閑之家度

其馬錢多寡亦分三等照耀出備銀帛通議和錢亦令各社里長收貯仍將欠馬人戶審各羣長以上中下三等除上戶不領外中戶二兩下戶三兩下下戶五兩當庭唱名給領買補貧有甦困之樂富無買免之患民甚德之所以續來遠年逃民李春等三百餘戶若繼春來者又未可以數記焉則其賦役均戶口增為可驗矣且臨城一邑東西南北廣袤幾百里許山岡地瘠民不知糞之足以肥地令則照例社設木鐸老人每歲孟春家喻戶曉俾皆積糞培地及其收

利加倍于昔預備倉向皆空虛今多方勸糧尚有一萬四千餘石備民年凶慮蚕無食勸民多種桑棗躬親點視已成效者五十二萬餘株成化三年令每一甲出桑子一合每一里長一升一里一斗一十六社種一石六斗成化四年令每一甲首出一合每一里長一升一里一十六社種一十六石當庭點齊就令各長領散各甲槩縣人民皆種一畦今已成效可移栽種植田無荒蕪賦亦有餘老弱安悅所以盜賊屏息犬不夜吠民俗不變而自無詞訟以干上司有强

梗令則設木牢令各甲勾喚到縣理其曲直罔有留滯所以囹圄空虛刑罰不用雖理屈抵罪靡不心服然五事既舉學校風化之本尤着意焉其重修續建太史彭公有文以勒石茲不重載縣政大綱既舉縣治之凡所當為纖悉畢舉修築城垣以備不虞重建廟宇以妥神鬼太史黎公述文以記亦不重書城樓三座城門三合裹以鐵葉外又設三關門以禦防其侮山川社稷壇申明旌善亭察院府館縣治六房譙樓三座倉廩重建創建三百餘間各鄉社賽廟宇舉

廢一十六所各鄉厲壇牲房創蓋四十有八間若修與造工費之需皆令平日措置如衡之平無所低昂由是民不知勞而官亦不知所自來百里之內一如春鄰邑蒼黎恨不得為臨城之民德之敷于民者如此若夫驗之于天凡遇雨暘愆期祈禱莫不隨時而應又誠之格于天也得民之心感天之祐非有清平之德者能如是乎旌敕之褒豈虛語哉雖然令之所以大過人者無他要皆本于廉明公能之所致然世固有優于德而短于才亦有優于才而短于德者

而令兼有之然廉又才德之本歟吾故循衆人之請為之錄其實蹟如此俾勒諸石以為後來者法

成化六年庚寅冬十月穀旦邑教諭武林吳琪撰

明章邑侯

忱

禱雨有應記

臨城為邑所隸六鄉土田半在山谷晴未十日則告

旱者至矣成化十五年己亥章君景恂

諱忱

以名進士

來令吾邑越五年甲辰春境內彌月不雨民心弗寧君愀然憂形于色翌日丁亥夜漏半率僚佐禋祀山川社稷之神俎豆未撤霖雨大注川流驟漲彌漫數

十里旣而不雨者復彌月君遂赤日走神所以祈其
應乃五月朔丁亥大雨竟夕至庚寅又雨惟霑足于
六鄉而鄰邑不雨民乃大悅咸以爲神之所賜而歸
德于君傳播于燕趙之間聞之郡守余公親書誠格
上天惠乃下民以遺之而君辭以偶然處之若無當
焉者然初禱之而立應似偶然也再禱之而又立應
豈亦偶然哉君之爲政治民以仁事神以誠素行合
于天也久矣是故無求而不得無感而不應也不然
何鄰邑之不雨耶昔雨降于桑林雲開于衡山火熄

于江陵感應之機振古如茲今君處一邑其政治已
若是卓卓使居要地展所學功業可量哉余目覩其
事有不能不令人歆且慕者遂撫其實而記之且系
以詩

葭爾臨城附庸于趙土田山谷民以旱告維我章君
視民如子撫綏輯寧俾安田里維暮之春蘊隆蟲蟲
章君禱之零雨其濛四月維夏旱災孰勝章君禱之
靈雨旣零旣優旣渥旣霑旣足無大無小徧藝百穀
荏菽旆旆黍稷彧彧瓜瓞嘒嘒人民咸育農人相慶

蹈舞蹁躑且歌且謠擊壤以言繼此甘雨迄用康年
匪由民力德孚于天我有賦稅可以供給我有鬼神
可以血食章君有心與天為一維國維民咸食其德
詩詠雲漢史書有年不有長材盛事曷傳爰作此詩
以頌偉績民其思之觀此貞石

附章公謝雨文

誰謂天高下視則明誰謂人卑上格無聲桑林之禱
霖雨斯傾善言之出熒惑退更一念感格如影隨形
忱等何德亦動神明思春不雨民莫以耕方虔雩祭

雨沛雲行思夏不雨耘耨皆停登壇復禱雨降雷驚
農歌于野官慶于庭兒童踴躍草木芳榮噫一天時
雨上帝之仁愛此下民庶物咸亨實勝金珠實勝瑤
瓊爰陳肥腴爰潔粢盛敢不報祭以赫厥靈成化二
十年甲辰夏六月望日遼東苑馬寺少卿致仕邑人

薛幹撰

明張邑侯

清

禱雨有應記

弘治五年京畿之南自夏徂秋不雨歲祲兆形民生
皇皇控訴無路時之職郡縣者欲為民請命俱牽制

于常法必候上官移文然後舉事臨城尹張清獨曰
此吾牧民者不職所致生民何罪罹此旱災豈可坐
視悠悠而不之恤乎卽于七月十三日辛巳齋沐易
處省躬思咎又謂古者歲凶則索鬼神而祭之禮也
越三日甲申廼天禱神詞情懇至復越三日丙戌
四更卽率士民歷禱境內神祇旋繞殆十里許蓬足
行露草間每五步一稽首以叩天且冀神靈之祐以
回天意也于時不知雲從何作隨結縣境須臾甘雨
大澍禾苗勃興民無老幼相率扶携忭舞于田野間

曰吾民今茲得是雨者皆吾父母之所賜也凡鄰邑
之民亦相與稱歎咨嗟曰彼民有父母如是尚何患
乎邑父老以此德不可忘廼不遠詣余蒲伏曰吾民
生長吾邑也有年矣歷歲之旱荒亦不知其幾矣然
于禱而應應而如期如期而復優渥以慰民望者未
有若今之雨奇速而神異且吾父母之所雨吾民者
豈特是哉吾民之困于飢寒者霑其澤以衣食之吾
民之陷于刑戮者疎其網而寬宥之至于賦役之一
有不均則思以均之削弱之一有不振則思以振之

無一念而不在吾民無一事而不當乎天則平昔之
所以雨吾民者多矣是以爲吾民禱而天之所以應
之者奇速而神異也余曰民之休戚攸係莫先于近
民張君是也遂爲之序其事次其言俾歸鑱于石以
驗諸來者弘治五年壬子季冬真定府學教授閩泉
張賢撰

明党邑侯

承美

築隄防水碑

碑在城西北一里許

臨城之建依山阻水恃其險足以壯城郭衛人民當
茲之初水循其道而遶南去城里許岡莫厥位而踞

其西爲城障流邑民安堵不知泝水之爲患也數十
年以來上流轉曲而北衝岡日以漸而湮沒波濤奔
騰密邇于邑高城則覆浚池則平屢經侵削方城之
勢祇見其狹而小矣昔之爲令者有張潘二公曾築
隄壘石爲備厥後苦其勢之難禦與夫功之難成束
手無策去來更相代者不知幾人矣間有知恤民患
者以其材智之不足有有材智者又以力量之不大
有兼材智力量而有者或存旅邸過客之心因循苟
延莫爲備禦也邇者秋雨兼旬山水會流驚濤連雲

勢吞城邑居民通宵篝燈裹衣而寢惴惴焉惟懼其身家之不保于時党公忻州世家早膺鄉薦來尹茲土一旦登城西顧按其形狀不啻痼瘕乃身為畫計曰小修之則無益大修之則費廣顧旱蝗相仍豈堪重役正思慮之方殷適當道之巡歷公率諸生呈稟計議大役斯定始而慮財用也除在庫設罰無碍而察院贖罪銀兩者益之不下千餘兩既而慮徒庸也蠲老弱貧乏之丁中者役之不下二千餘人百○既具卜日興作先以丈餘木椿列于外指連而整繼以

石貫荆困條于內鱗次而集又以沙之不可隄也買田一方盡其赤墮操畚鍤負囊簣者窮日展力党公輟政之繁日三往視之用椎鎚以驗其虛實因虛實以別其勤惰賞罰勸懲每每如是也經始于仲秋越明年暮春乃成上有數仞之高橫有五丈之濶迢遙數里如岡如陵又築陂隄以固城本栽密柳以結泥沙誠足以截驚濤而遠墊溺而一邑人物咸賴之以為安也豈惟此哉他如城池學校廟宇門廊公館倉庫橋梁道路習武養濟亭院因罪行罰不擾于民備

以修舉前而巡按梁李二公知其才智力量有為有
守政平以理盜省民安禮獎二次巡撫推為循良第
一禮獎一次提學一見決循良禮獎一次馬政○修
課金獨最司馬部官各獎一次卽今大役告成衆樂
其事致仕楊灌監生王閭與夫耆宿士民思其疇昔
衣被之澤感其今日捍災禦患之勞咸願立石以記
之余亦習見其事惟據實而道焉耳非敢阿所好也
嘉靖十四年乙未春三月日儒學訓導葵丘郭綸撰

明羅邑侯

堯

逐蝗異感記

臨邑八蜡神祠未詳鼎建何時嘉靖中諸生趙應魁
新之剏立石柱繪塑神像享春秋之祀諸所捍禦惟
誠則格萬曆辛卯關西羅公來宰是邑期月化洽民
熙卓有成績且也其中虔潔其表凝肅勤民至意昭
格于神明素矣歲六月飛蝗逼境公聞報惻然心動
率衆詣蜡廟虔禱隨令縣倅四分踏勘之遍諭鄉民
有捕蝗至斗者給穀抵數不逾月而蝗已薨薨然去
焉夫食民之所天禾食之所出公慮稼穡之艱念小
民之依獨令蝗不為灾民可計日而享粒食之慶不

亦異哉然非獨神相之力廼公之素政有以感之耳
公不虐彫中物來順應謙撫御下明教省刑蝗兀而
來兀而去則天人相與之說宜其不待吞之而自息
不假鳳食而自化不勞焚瘞而自消也意者或如晉
之赴于海耶抑不敢蔽宋之日耶胡其在野不食禾
尋颺而遠去若有神驅之也試與蝗不入境蛟鱷逃
形諸君子比德度異奚啻後先哉而江陵之反風滅
火弘農之虎北渡河匪專嫩也於戲我臨嘆乾之變
數矣非鼎食之家則十室空十而趨向猶爾澆靡暨

蠶螟蝗天心所以示警也致厯公慮竟以積誠感之
應如響焉四方方嗷嗷哭傷而我臨獨歌稔歲矣政
成異感臨民有厚幸哉公且暮擢晉秉衡清世俾城
無狐社無鼠野無犬吠塞無狼烟昆蟲變草木蕃太
和雍熙皆此去蝗之政通之也於是爲記公諱士光
號繼塘陝西洵陽縣人由歲貢萬曆十九年夏六月
教諭王愛撰封中年知縣邑人喬輔世等同立石

臨城縣知縣題名記

碑在縣堂東北隅

夫邑長之名歷代不一曰宰曰尹曰令曰公曰大夫

其以知縣名則肇自建隆而明因之主其邑政撫乃
鰲黔俾各安田里而無愁歎者其職也臨古晉邑有
此治地即有此治人余生也晚莫知其所以惠養斯
民以稱塞是職作之型范謂有上世之先我者求其
姓氏僅從志載中索見天禧後張守度以下諸君子
而志且幾于脫落不治為邑文獻計而如此得乎因
請于鄉先生侍御喬公治志行之竊見侍御公于其
邑之先大夫事有可據者多所與可亦致慨于世次
降而無傳者夥也此不忘遠之思忠厚之道也則庸

訪如余者亦既藉公以附列諸君名後矣乃余所不
能忘者以諸君子皆後先治臨者也余所談理之堂
諸君故所臥治之堂也諸君子政治失得在泝水盤
山者今可無揆揭獨其名不堂列使吾儕後進不克
旦暮瞻承以景行行止則以語于必有我師者媿焉
矣因命工鑱石列張守度公而下二十五人由金而
元十人以及于我明興二百二十年來四十四人爵
里姓氏備書如志庸謫廁之冀與侍御公志並永刻
且成也為之記曰史載齊侯封即墨烹阿事嘉其不

蔽則即墨大夫之得不受蔽者亦幸矣倘非其鏡簪行也毀言日至者惡得以勝彼譽言而為觀今日侍御公所為志其邑之先大夫而與可之者李公仲阮公居仁以及王公之弼等為十數輩其玉新不瑕是良墨綬余所欲為執鞭者也婺源之余非以才守稱者耶而不免受毀此何以故余而下若易若韓若吳若羅俱未至有失政而亦俱不免又何以故父老長者曾為余言賢明受誣事切齒于彼含沙之蜮謂其蓄之毒以待來者審如是是又不盡在彼左右中矣

余惟士君子學古入官能盡所得為于已不能調眾口以求全况彼桀黠之口諸君何能川防之而不使玉碎余今乘其後矣伉拙豈能有所以下于諸公者而故轍自在亦奉余職以俟耳後之君子得無以余為不即墨而過許乎得其防川帥使辛螯靡所施則固可以玉成之者也是在來諸對境考圖之耳如云立之碑以樹觀也余豈此堯峰片石乎明萬曆二十五年丁酉冬十月穀旦知縣我圖程鵬搏撰

明王邑侯

集

禱蝗感應記

讀湖州祭鱷文每歎昌黎公精誠格神必有攝之于幽者而非盡其文之工也吾臨頻遭荒旱民無孑遺洛陽王主君諱佐才分符適至切若痼瘵調卹安集不遺餘力今歲四月麥復不登而蝥蝗薦至主君悲憐不勝卽日齋沐剪爪親製韻語祝文一篇一字一淚虔禱于神云果本職貪酷無狀卽降予之災以謝百姓如該縣氣運適逢寧減予之壽以救生靈勿縱蝥蝗之虐以遺四境之憂謹積萬衆之誠以迓尊神之祐是夕不周風驟發詰旦視之掃地盡矣旬餘甘

霖大霑頓成有秋今且銍艾焉主君慈祥愷悌鞭朴不輕用贖鍰不輕罰每季積穀不抵數輒節省已俸以足之仁惠一念孚異類極幽靈禱蝗如響豈偶然哉因勒之石以昭感應而扁其廟曰逐蝗如響至今存焉當與祭鱷之文並垂不朽萬曆三十九年辛亥七月庠生李春茂識

明王邑侯

繼祖

新製火器記

石在縣堂後

兵家之長技無如火器而守禦尤要但承平日久匪惟不習並其具而無之嗚呼亦何怪乎逆寇猖狂日

久不熄而到處無堅城也余令臨城適遇外警戒嚴兵荒之後守禦一無足恃一切城頭料理嘔盡心血而火器全無止有滅寇大將軍二十餘位却無敢放之人余一面募人教演一面鳩聚工匠十五人出囊金如式製造石砲火礮鳥鎗火鎗等項四閱月始畢製造甫完分布城頭而寇又至矣火器既精人心鎮定彈丸山城幸得無恙此雖衆志成城未必非火器之力也但恐日久相沿官取之豪有力者取之漸成烏有孤余苦心而守禦依然無備也爰命石工勒一

小刻將所製諸器一一誌之庶其物不致星散而孤城之備禦有賴矣條列如左

鳥鎗三十杆

火鎗五十枝 鉞斧

三眼鎗一百二十杆

火箭七十枝

石砲一百五十尊

火礮五十箇

鎗一百把

悶棍二百根

合藥法每硝一觔黃二兩五錢灰四兩五錢共為細末用燒酒和勻再碾細為火撚火撚即與內藥一般只更加細

其大將軍雖非余製亦留裝法于後以有所傳授也
一洗炮 二看火門 三下信 四下藥 打三椎
崇禎十六年七月岢嵐王繼祖立

撫院郝公德政碑記

昔召伯巡行南國而德政所及之處民頌甘棠今觀
之撫憲郝公豈不有明徵哉公以名進士撫畿南敦
本務實寬猛相濟屬吏歲時來見教言一出肺肝樽
節愛養之外專意與民休息省刑抑訟有事下邑胥
徒計期而至拘攝不擾教化大興六郡翕然仰頌青

衿頌于學宮農夫頌于田野商賈頌于道途公奚有
于是是亦以德政及民焉爾余邑蕞然在萬山中西
與三晉接壤自崇禎六年流賊屠虐已不可言從此
無歲無兵至十一年十二月則屠城矣十二年十月
則土賊數千又斬關而入兼之連遭凶儉飛蝗蔽日
二麥不收十三年周歲無霖顆粒弗獲其食草子樹
皮蒺藜甚至有父子夫妻兄弟相食者十四五六順
治二年二月二十四日邑渠大尹到任見邑治荒涼
民遭疾苦查舊冊原額人丁二萬四千七百五十四

丁死者一萬七千四百五十七丁逃者二千三百八十三丁見在者止四千七百三十四丁而已原額糧地七百零九頃零六畝四分荒蕪六百三十一頃八十三畝有零僅可耕種者七十七頃二十三畝有零而已日夜痛心追征急而民之積欠積逋苦無以應思縱將一二未死之游魂抽筋剗髓何益幸而郝公巡歷至臨城一觀焚毀荒蕪之狀為之惻然乃疏之于朝得免荒涼之派又聞代隆平解馬三十匹行查豁免則公之恩澤于臨何如哉至于禁邪教勸土寇

懲衙蠹修城池墾荒田嚴保甲恤孤貧防盜賊儲糧草備軍器之類諄諄訓迪又不止臨城獲福也渠大尹為公屬吏端謹務實以公為模範相對晤時談公德政不休且有所請曰臨之民視郝公有祖道焉臨之尹視郝公有師道焉祖有嘉績不可不張師有至行不可不紀甘棠遺愛其謂是乎夫德以經政政以垂澤異日者觀甘棠而思召伯其在斯乎遂書以記
順治三年丙戌夏四月

原任陝西興安州漢陰縣知縣邑人張鵬翽撰

按院鄧公題免荒地糧丁碑記

直隸真定府趙州臨城縣為窮民生聚未復荒亡併累難堪仰乞

聖明一視同仁以奠畿輔事本年三月二十三日蒙本府姜帖文抄蒙 欽差整飭井陘等處兵備僉事原案驗蒙 欽差巡撫保定等府都察院右僉都御史于案驗准戶部咨福建清吏司案呈奉本部題覆前院鄧題前事內稱據本縣申詳節年荒地亡丁請乞具題蠲免以蘇民困原由等情由道呈報到臣臣思

人丁現奉

旨編審嚴責各官核實審明補徵外其荒蕪地土隨行各道查核自滿官清丈之後有無開墾若干隨具井陘道臣原毓宗呈真定府屬臨城縣順治元年荒地四百九頃六十三畝零亡丁一萬七千三百八丁二年查勘過荒地照數蠲免隨漸次開墾實在荒地四百五頃五十畝零逃亡人丁一萬七千三百八丁除招撫復業并幼丁增補實在逃亡人丁一萬六千三百九十一丁三年除開墾外實在荒地三百七十八

頃四十六畝零逃亡人丁仍舊四年除開墾外實在荒地三百一十四頃二十五畝零逃亡人丁仍舊之因具由覆詳到臣該臣看得民以地為生也竭力耕種官賦其一民得其十則荒蕪豈民之願哉良以非無人則無力非荒亡則絕烟稍行寬政尚堪勸之以耕種一行併追則生者代死熟者代荒將見相率流移荒亡愈甚矣伏乞

聖明一視同仁比照河南各省例將滿勘部覆荒地錢糧照例蠲免仍將荒蕪地畝嚴飭道府州縣查有主者令其設法開墾照例起科無主者聽縣官招募給種從此三五年間榛莽可盡闢為膏腴而逃竄者亦可漸歸復業矣既經各道呈詳會同撫臣于清廉合詞具題伏乞

敕部議覆施行等因順治五年五月二十五日題六月初六日奉

聖旨戶部知道欽此欽遵通抄到部送司奉此相應議覆案呈到部該臣等看得真順廣大四府二年曾着滿官查看題奉

俞旨蠲免額賦一年今據撫按二臣疏報前勘荒地三四兩年有盡墾成熟者有開墾多寡不等者亦有全未開墾者緣地方疊罹兵荒民多逃亡無力墾闢錢糧包賠良苦援各省荒田恩免成例為民請命而未開明有主無主似應仍飭該按確查某州某縣有主荒地若干無主荒地若干造冊報部以憑奏奪其亡丁候編審完日彙奏開除可也既經該司案呈前來相應議覆恭候

命下臣部轉行遵奏施行等因順治五年六月二十日

題二十一日奉

聖旨是欽此欽遵抄出到部送司奉此卽移咨撫按清查真順廣大四府所屬州縣有主無主地確數去後今該都察院咨據巡按真順廣大御史鄧孕槐呈據井陘道冊報真定府屬臨城縣有主荒地五十五頃五畝無主荒地二百五十九頃二十畝四厘又該保定巡撫于清廉造冊並咨前來送司奉此相應議覆案呈到部該臣等看得真順廣大四府所屬州縣衛荒地先經撫按二臣奏報臣部覆奉

俞旨行該撫按查勘分別有主無主奏請定奪今准都察院咨送按臣鄧孕槐撫臣于清廉咨送各勘回文冊開有主荒地共八千一百六十一頃二十三畝零無主荒地共三萬四千四百八十二頃十畝無主者似應悉與豁免其荒照數收入部冊有願開墾者地方官一面聽其開墾一面報部有主者免其六年以前未完額賦自七年以後照例起科其已完在官者盡數解部可也既經該司案呈前來相應議覆恭候命下臣部轉行順治六年二月十四日題十五日奉

旨是欽此欽遵抄部送司咨會到院案行本道轉行到府等因蒙此擬合就行為此帖仰本縣官吏查照本部覆奉

旨內事理欽遵施行等因蒙此擬合就行除欽遵蠲免

開墾外仍勒石通衢使民共知以志不朽

順治六年己丑夏六月知縣王國柱奉文立石

宋邑侯廣業禱雨感應記

天人感應之理莫備于洪範洪範之言曰王省惟歲卿士惟月師尹惟日蓋謂五事修而休徵乃應也故

夫天下之大寒燠以時四方無疾風甚雨海不揚波固王者盛德之所致若一方數百里之水旱經月旬日風雨不時謂非卿士師尹之咎乎後世郡縣之長往往遇水旱以祈禱為勤民其應與否則聽之神而莫敢任吾不知其省于五事者何如也今觀乎宋公之禱雨而雨應乃知天人感應之微洪範之言益信而有徵矣歲丙寅大旱臨邑田禾枯槁懿源從公步禱于郡廟日必再至貌之肅辭之切足以感動斯神是日有雨自西北行東南獨臨城涓滴不下公堅跪

不起厚自刻責夜將半震雷忽從簷前老槐樹中出頃刻風迴雨澍田野無不霑足於是遠近人民歡呼駭歎謂雲何以興雷何以奮風何以迴雨何以霑足此神之應而公之有以感之也記曰有不虞之備而皇神相之詩曰愷悌君子神所勞矣其弗信矣乎然懿源以為五事之修本乎身者也祈禱徵乎外者也公為人寬而栗蒞事勤以恕平日修省之心默鑒于神久矣豈特祈禱之誠足以仰邀神貺乎哉是為記
康熙二十五年六月臨城學教諭趙懿源撰

明阮邑侯_{居仁}德政去思碑記

為治之道在於得其人也得其人者民受其賜而庶政修舉不得其人民受其殃而百事廢弛矣此有國之確論也臨城古房子邑其地則衣冠文物之區賢人君子往往有焉苟非明于治體愜于民心鮮能當矣惟交趾新安府東潮州阮公居仁發自胄監擢任河南陳州經衛以九載考滿陞授知縣來治是邑時正統二年也公性嚴明不尚浮華務敦朴素下車之日首以農事為急使民深耕易耨不奪其時民皆鼓

腹而歌為之愛戴公則勞之以勤罰之以惰使向之赤地變為綠雲無不受賜之家又擇其良家子弟之俊秀俾入學宮作養捐其差徭公暇至明倫堂集諸生講學試其優劣以勉勵之故其學焉者率皆可觀今登仙版及在庠者歷歷可舉其視學校規模狹隘則命工師求巨木重建大成殿三間畫梁拱斗塑飾聖賢肖像乃以舊殿立為戟門重蓋東西兩廡各五間置木供桌四十張與神龕祭器無不備具又廣學舍建明倫堂及日新時習二齋新增東西二號房二

十間以為諸生退息誦讀之所廟學前後煥然一新誠非他日之學宮可彷彿矣經始于正統八年冬落成于九年秋凡一載躬詣提督雖飲食政事常居學宮之旁其盡心也何其至哉公臨蒞之際仁威並行紀綱不紊及遇賦役從公點差僚友不容私衆胥不敢詐事皆翕然而集不擾而辦州府聞其能不遣一役下縣而民獲其安居者公之惠也可謂一方得其人矣九載之間始終如一適瓜期而趨朝士庶遮道涕泣洒淚送之既遠徬徨而不忍去今復除湖廣岳

州府臨湘縣知縣而臨城之民咸曰彼民何幸而享吾慈父母之治也迨及三載以禮去官朝廷仍賜半俸以贍終身恩遇之隆何其盛哉然去之已久而民猶惓惓不能忘于懷今故舊耆老宋英等請余為文勒石以誌輿情僉曰使君已去而不復見覩斯文猶見也余雖未能陳去思之萬一然斯文之作一則見夫聖朝委任得人而民受其賜又以見臨城之民愈久而不没人善又其大者可以激勸于後人故即其實政刻石于公解之首是古之甘棠復見斯邑也

天順二年戊寅冬十月邑教諭武林張豫撰

明章邑侯

忱去思碑記

會稽章忱以進士授臨城知縣三年績優考最又二年上命為太僕丞其去也民思之于是邑耆彥相率謁余出邑庠生鄭琳馬進所敘請曰章君吾父母也不可復得矣公為同鄉知章君必深願一言以紀吾民之思按臨城附真定之趙州為畿內近邑所隸六鄉土田半山谷故其土薄其民貧而賦繁役重有司每病于催科不有厲于民則將拙于政矣成化己亥

冬君至才足以濟物政足以裕民始下車即悉心咨訪凡民所欲惡事以次建罷一以養愛休息化導勸勵為務歲自壬辰大飢民多流竄不復君為招徠撫綏給其種食免其征徭民是以接踵來歸不遠千里旁邑流民願就編籍者亦數十戶畝券稅牒有久不別白者悉為條格以清其欺隱漁併之弊城北泥河出源泉流漑甚博民初罔利之庚子夏旱君率眾築堤引水灌苗又教民為桔槔以濟高阜邑自是有水利鄉鄙舊無醫藥病輒事禱禳坐以待斃庚子辛丑

痢疫代作君為檢方書修藥餌施之且諭一醫時驗視所全活者不可勝計壬寅水患尤甚君先為開濬以放之民不見潦且修學宮具祭品及諸壇壝館舍百廢一新既又買隙地創置社學陰陽醫學郵傳養濟院各一所皆不勞而舉公暇則引諸庠社生為親課其業且諄諄以孝弟忠信之道告之士用知所自勵每春令民會男女節其婚嫁之宜不得論財貨民是以鮮怨曠淫邪之病或以訟至庭則為之明示其曲直告以講信修睦之義民多自慚惕而退嘗有告

人命誣伏者卷案已成君審知冤力為辯之乃得復異郡帥嘗非公事役諸邑民君獨堅不奉令郡帥啣之亦終不能害也凡君所為皆類是民所以德之不能忘也嗟夫有司之聲實每定于解組之後世固有厲下眩上以為常者亦豈不足致譽一時然章綬方脫而流風已泯然矣甚者乃或有遺怨焉章君純實寬簡跡其所為政平易篤厚求自致而已初非欲為赫赫之譽而令民不能忘如此豈古所謂循吏之流詩曰愷悌君子民之父母又曰有斐君子民不可諉

今其章君之謂矣因述其民之意而爲文以歸之
成化二十二年歲次丙午春二月望後五日

賜進士及第奉訓大夫右春坊右諭德餘姚謝遷
撰正德六年城破碑焚遺文在志琢石更新以
見愈久不忘之意嘉靖十三年正月合縣士民重
立

明張邑侯清去思碑記

臨城畿內邑也凡官員之賢否政治之美惡不旬日
而達于京師而殿最出入係焉非有杰出之才卓異

之政欲安其位亦難矣况欲久任于斯旣去民猶思
之不忘也哉婺源張君清者成化間以鄉貢進士來
茲邑其持已也廉其養民也惠其治事也果其剖獄
也明歷數載間聲價轟然動于朝野監司風紀入其
境者交章以同遂擢守于趙今逾六七載而邑人思
之猶一日也在仕籍鄢陵馮恭龍泉喬直詣余告曰
吾邑學頽圯歲久我張公實作新之今堂齋壯麗軒
舍虛明而士勤經修業者賴焉吾邑嘗遭凶歲民多
菜色或至流移我張公預已積粟餘四萬斛至是則

賑恤貧困獲生全者千家復其遠徙者四十家收其自外附籍者八十餘戶而民命之復甦者賴焉其修倉廩也市民地六七畝架廩五十六間視前增三之一菽粟之儲積有所也歲定徭役以家之貧富計輕重適均而人無間言民生由是安矣春植桑棗以丁之多寡計人率十株而野無閑地民之衣食由是足矣吾邑陰陽生劉明者嘗遺白金數兩于道而楊瓚得之乃送至公庭請召其主還之德化之感人如此村中有劉明者為盜所戕斃于途我公馳至其

所呼居民悉出斧刃鱗次閱之乃取蠅集者訊之遂云為陳廣之刃而殺明者即廣也民咸驚歎以為神明其他剖斷疑獄申雪冤滯亦多類此是以鄰封有訟上官者皆願就公判之况廉潔之操如冰如玉瑩然不塵我公德政大率如斯請紀之以彰吾邑不忘之一念幸也余曰張君善政吾之所聞者正如此而予之所述者亦如此去思之碑誠不可不立也遂援筆次第其事俾刻于石以俟傳循吏者攷焉世之為邑令者不因是而有所感也夫

弘治十一年夏四月

國子祭酒林瀚撰

明井陘道楊公

經德政碑記

歲壬午七月既望余方兀坐書齋靜中理會頤養天和以固周身元氣因思天下民生日煩元氣日促無培植根本之人與之講調元壽世計忽有羣父老持狀來謁乃臨城耆民為井陘道楊公救民勒石而丐文于余者也因進父老而諭之曰公方敷歷中外樹勛揚芳建不朽事業作天下第一等人麟閣註勛蘭臺紀績豈彈丸黑子之區里巷顛蒙之輩遂足以揚

公盛德乎不亦小之乎視公也哉父老曰吾儕小人也焉能知此第就吾邑而言之耳吾邑自癸酉歲流氛作孽土寇狃焚戮之慘不堪見聞而人事不臧天行應之旱瘟交作四載不登人存者十一地蕪者十九親民者顧復撫循殫心竭力而無米之炊巧婦徒苦一二子遺自分無生之望矣幸逢我公握符而至巡歷屬邑目擊鳩鵲難民蒿萊景色不禁涕泗交下急進縣令而諭之曰治民者如父母之撫嬰兒治臨城者如父母之撫病兒哀此災民能恻然乎且春

澤醇醲歷年未有可乘時勸農以答天庥于是以回天巨力運愛民實心請發常平倉穀五百石而無種者有餘種矣又慮種乏犢稼用不成乃以已意置木牛數百隻官為營造佈散民間而無牛者有餘力矣且運送之費造作之需出自公帑不許科派小民而邑王令又善承其意運散有法工造惟勤俾我凡民均沾其澤今日者綠塋喧耕耨之聲四境起桑麻之色居者有生流者漸復臨民飲水思源羣聚而謀曰公實生我何以報德計惟勒石通衢垂之永久使後

之君子觀是碑者知公之救此一方民懇而切也吾儕小人智術短淺朝不及夕一念戴德之誠激于由衷不能自己耳惶恤其他余應之曰是不可以無紀也宇宙元氣培之則壯削之則耗而培養元氣者必存其人今天下元氣耗極矣外警內亂邊腹丘墟追呼愈煩剝削益甚誰謂憂淡于國本而念切于蒼生者公獨于誅求煩促之日為綢繆根本之圖興保障黜繭絲緩催科勤撫字使垂盡遺黎大有起色從此溫養愈淡元氣愈固含哺以嬉鼓腹以遊未有其事

不終者國計民生兩得之爾臨城知公之造于民者
大不知公之益于國者更大也老誠卓識豈俗吏所
能揣摩者哉臨城去吾邑僅一舍吾固知公之造于
臨者最稔因循父老之請而為之紀其歲月云公諱
汝經字石夫中州睢人丁丑進士王令諱繼祖字永
年山西岢嵐人癸酉舉人

崇禎十五年歲次壬午秋七月

日

誥授榮祿

大夫太子太保禮部尚書兼光祿閣大學士高邑李
標撰

附錄去思碑碑文遺失者

元主簿失判不花去思碑

趙郡張曾為之記其辭曰雲山東麓邑有臨城粵若
賢簿治績可稱簿以倅令宜瞠其後簿乃歸然反出
其右嗟彼未歸民厭其殃而簿已去民則不忘不忘
伊何於民能愛由始厥終弗苟弗怠貧亦不貪厥德
尤美歸橐無金玉壺秋水

明徐邑侯

官

去思碑

趙州學正余龍撰

明張邑侯

冲霄

去思碑

教諭張蜀良撰

明王邑侯

之弼

去思碑

邑人臨晉令李世藩撰

明鄧邑侯

之松

去思碑

邑人趙進修撰

明彭邑侯

化鳳

去思碑

教諭洪邦政撰

明孫邑侯

許

去思碑

副使岳凌霜撰

明于邑侯

日旺

禦寇保城碑

崇禎六年立石于護堤龍王廟側水大堤崩陷沒文不能

考

臨城縣志卷之七

終

臨城縣志卷之八

知縣事長洲宋廣業重修

藝文志

碑記

大普利禪寺興修記

余治泝水之明年夏五月栢林法嗣龍泉住持僧明主普利禪寺來謁余言曰是刹興于唐盛于五代暨宋徽宗下晉陽過此賜今名焉金季擾攘燬于火至元辛卯僧性剏建殿宇齋堂廚舍大德戊戌僧德江

及縣佐孫弼加塑其像今也明就是居謹繚以垣墻
補其毀敗既鑰其石矣敢求立言君子記之以示永
久余因思古語賢之興愚之廢此理勢自然且佛氏
之教以無為為上乘以空洞為治法上下千餘年為
禪為律油然興圯然廢者蓋亦數矣豈特其剝如斯
乎且天下物無或不然大而天地日月小而草木蟲
豸其理一也觀其朝暮之變遷寒暑之往來又奚足
詫哉若夫興修之始終固不可不志之于是乎書元
元統二年甲戌秋九月縣尹會川尹澄撰

嘉禾亭記

嘉禾謂一莖兩歧雙穗甚至四五穗蓋有社稷者政
事修德澤溥民人和風雨順時草木呈瑞惟禾為嘉
三代以下載于方冊著于歌詩昭然可考今夫薄海
內外豈乏禎祥然嘉禾未有若泝水之奇特者兩莖
相去二尺亭亭而上穗巨異常相向而對合為一無
纖毫痕跡猗歟奇哉昔誌以文至元間主者釐為戒
石厥像幸存詢諸耆艾僉曰國初時禎也願復之監
縣文公煥章縣佐木公從之允其請廼命工刊石于

山而摹勒之樹于亭上因扁其亭囑余記焉夫物之
瑞因時而興由人以著苟政事之不修德澤之不溥
徒恃威刑安有是禎噫禾之嘉見于當時厥後乃晦
至于今始昭抑有由矣夫二公春秋鼎盛黽勉從事
匪易量也後之君子登茲亭覽是跡亦將有感于斯
文以恢光前人之烈不亦偉歟元統甲戌十月旣望
會川尹澄記

達魯花赤文殊奴

主簿木八刺沙重立石

臨城縣重建城隍廟記

國家倣古創制內自京師外達府州縣皆建城隍廟
章服儀衛擬于諸侯山川英靈畀之管攝凡守令初
下車必先祇謁受誓約乃敢行事每舉祀禮預移牒
文而歲時有祭滂旱疾疫有禱皆所以敬神明也臨
城縣舊有城隍廟規制卑隘且歲久傾圯臨潼張君
佐以鄉貢進士釋褐胄子來為令始至率官屬展祀
顧瞻頽廢有感厥中乃鳩工簡材撤舊為新建正廳
間五左右廊十及外門三繪執事神像于壁勸善懲惡

一如京師所為經始成化四年四月迄明年十月落成四方來觀之宏麗靜淡神屬備而威靈壯民日刲羊擔酒祈報神庥而令長素明恕有為他政事具有調理見者大悅于是太史氏採民情以題其廟曰惟天地運一氣以生萬物實理乘氣體物不遺故明則有禮樂幽則有鬼神禮樂行治道備鬼神妥氣化全今築城以設險鑿隍以護城實有鬼神司之也爾神居冥冥之中遭逢聖朝獲遇賢令衣冠爾形容堂宇爾家室劍佩爾左右卒伍氣則神矣像乃人之可不

思恪恭乃事乎其必發靈闡異贊襄賢令以弘其養以博其教以清平其政刑輔翼校師以育成其弟子降毓山川之貞淑使鍾于人以產俊傑節宣四時之風雨使順于時以蕃百穀調燮寒暄之氣以適于民以消百病其或科條未備則密助之惠澤未敷則陰祐之孝子慈孫義夫節婦有由于道者則默相之其不信道悖于是者則譴責之無作神羞以怠厥官時廟神聞言皆樂太史氏曰未也此言無事時也其或有事時尚當率勵百神戮力匡保俾使為豫之象所

謂重門擊柝以待暴客不可為泰之象所謂復于隍弗用行師斯允莫乃位矣于是主者肅然起敬其百神受教戒皆勤效職業靡有敢違者太史氏乃復為之歌曰恒山儲秀兮泝水流祥神贊其陰兮人理其陽神人合德兮永福此方千秋百禩兮黍稷馨香明成化五年歲次己丑冬十一月長至後二日賜進士及第奉議大夫左春坊左庶子華容黎淳撰文邑士民立石

西北關重修三義廟記

天地之間有正氣也而亦有常數數有盈虧氣無間斷故在天為日星在地為河岳在人為忠義日星有晦明而忠義無晦明河岳有遷變而忠義無遷變是誠不待生而存不隨死而亡者矣是氣也使其值乎數之盈則發而為都兪之聲激而為防風之戮名成功就復何言哉不幸而虧則山河改色時事咸非雖假以有為之人持必為之志回難為之機而立見可為之勢然而君相非人權奸勢熾萬事瓦裂矣是天之不佐斯人哉將以發人之正氣也正氣存乎其人

而國脉亦繫乎其人使國而猶可眷也則數亦可回也君臣皆非矣則數亦不可回矣以不可屈之氣而值乎不可回之數故寧奪其人以完其氣無寧奪其氣以完其國此天之所以處漢昭烈君臣者蓋非偶然也當夫桓獻之朝乾綱不振妖孽數興奸雄屢出天柱崩而地維拆昭烈帝室之胄挺身奮起關張國士附之以匡扶爲已任小戰百餘大戰數十率皆忠義之舉所以董曹權奸相繼匡復之志雖不遂而卒成三分是知天之所以生昭烈君臣者寄正氣以示

人知有忠義也天之所以移漢祚者以漢之不足眷而數之有常不可回也是故忠義之在人初不以世代之遠近而忒感慕之至公魏晉迄今千有餘年先正咸以義稱三氏故三義廟徧天下而血食不啻山河至今而流峙也日星至今而照臨也于此益見正氣之在天地間磅礴無間數之盈虧何足道哉我臨西北隅有是廟不知創自何時先弘治間廟貌頽壞鄢陵丞馮君恭臨江歷馮君讓昆季因而新之又十餘年頽壞如昔恭之子秀讓之子瑞慨興繼述之舉

遂捐資修葺如故特立石而屬余紀其歲月不敏嘗
讀陳壽三國志知昭烈志在匡扶不輕自立而壯穆
之辭曹操桓侯之釋嚴顏及其侍立昭烈于稠人之
中竟日不懈忠義之感人愈久而愈彰也將來廟貌
不無再圯而靈爽之流峙于古今照臨于寓內者千
古常存有其舉之莫敢廢也志忠者無使馮氏父子
兄弟專美于前則可矣明嘉靖二十五年秋八月誥
授奉訓大夫原任陝西涇州知州邑人方竹岳麟撰
文邑士民立石

石家欄重修昊天觀記

夫道之爲道窮天地而不見其朕越宇宙而不出其
宗語其至精則窈冥恍惚而不可形迹求語其至秘
則昏默淳悶而不可名器著玄之又玄不可測其門
妙之又妙不可識其戶此道之所爲道也自黃帝問
道于廣成而道之名立自老子著書與尹喜而教之
名彰迨周穆王時尹真人草樓之建召逸人居之而
觀之體以肇至後世習其教者必設像以起敬因顯
以窮微而觀之建益多矣臨城昊天觀在縣西六十

里溪山之內元至正十一年平山劉志溪同邑人都
統武均所建未幾燼于火所存者基址而已國初洪
永間亦有修復者而未竟其業天順元年道人張志
廣同本村士趙能鄧底施主張剛等同發願力掇拾
煨燼剷除荆棘以漸圖興復經始于天順三年告成
于天順六年其制正殿三間左右司各三間雕像繪
容輝煌光彩觀門垣墉高深修廣皆稱制其地理形
勢面功德峪負望仙山廟菴嶺縈其左杏樹岩峙其
右隱然驂鸞跨鶴之區吐霧興雲之境矣風晨月夕

清寂無垢俾餐霞服氣之徒煉修于其內闡元關颺
妙諦雖天華上宮靈岩妙跡不難于彷彿也茲當落
成特立石以志歲月庶使後世知興復之所由云明
天順六年壬午冬十一月 日臨城縣儒學訓導
藁城趙復春撰

聖水坪創建鸞喜寺記

聖水坪在臨城縣西大山上其初一荒境耳弘治初
有僧德果與其徒圓宗住持于此萬曆七年七月八
日僧宗曉號曰三空金陵人遍遊叅訪由京師循西

山而至此悠然有會于心曰山名三鳳是為瑞山水名聖水是為法水有地如此復何往哉遂卓錫焉于是刊木鑿石漸次蕩平之起前後二殿東西向鐘樓鼓樓山門香積按位排列而顏其門曰鸞喜取與山名相合也拾橡為食經營勤苦種松栢檜十二區日取聖水獨力澆灌皆已成功居然一叢林矣微三空之定見定力烏能至此德果之跡已泯一鐵鐘高三尺五寸則猶果之所遺也空師之功為人所忌伐其木焚其居自云山主空師質之官經兩斷而未得志

萬曆四十八年正月縣尹王君諱佐才者良吏也始為判明立一田界東至鴻溝西至嶺南至鳳山頂北至田鼻腦共折籽粒地一十一畝八分每年納籽粒銀一錢一分八厘蓋皆本僧價買當官稅契過糧非由原主施舍入寺與所稱山主者何與案已定欲勒石紀其事余為實書之俾壽諸石以遺後人永為遵守無相侵犯也萬曆庚申吏部觀政進士吳國楨撰臨城小邑梵宇不下數十處而碑文獨存普利及此者以其地最勝也已百識

聖水坪創建水神祠記

邑西諸勝以聖水坪為最萬曆庚申春日同友人趙一鶴王三才往訪焉杖履而登諸峰羅立松栢成列清幽翳鬱別是一天及門一老頭陀出迎年可八十許形貌奇古與之談能推吾儒為中正之道若禪玄可以活身耳不免偏枯非淡于禪不能為是言叩其家則南中問其號名宗曉稱三空上人住此四十餘年開山墾土松栢數千株皆手植食余以橡飯余甚甘之相攜周覽菴左有池澄然可鑑飲漑皆取給焉

卽大旱不竭聖水之所由名也盤桓甚久晚復同榻次日始尋舊徑而返訂以再遊余欣然納之不敢忘後踵余至者頗多王宗舜李應選邑所謂善人往見水際有龍王像暴露日中僅覆以茅遂鳩同輩捐資建廟妥神其中友人張復初請紀其事因所曾遊之地是以詳之但宗上人老矣其弟子輩未必能為山林主他日使松栢不摧為薪上則賢令公下則衆檀越共為護持無恙則廟與之共永矣明天啓四年甲子冬十月邑人喬若雯撰

普利寺飯僧記

天下最尊崇者無如浮屠法梵宇星羅頭陀林立幾塞宇宙間甚至冠進矣名有髮僧居然稱奉佛弟子代拜手以和南士者且然何怪于愚夫愚婦乎余以謂此道真可信則祥見于周夢兆于漢骨入于唐皆幻冥浮游無可証據卽曰其法能禍福人質之聖人之言無有也謂不可信則歷千百年以至于今幾人聖幾人賢止于口伐筆攻竟不剷滅此又何故哉客歲之春有佛子募飯萬僧人各一飽約食升米而薪

蔬鹽醫之費不與焉是不米百石乎以吾邑之酷貧詎易辦此乃邑之人爭先奔走甫浹歲告成事焉倘執施者而語之曰某貧士飢欲死分與一杯羹有粟紅而不為耶何浮屠之教能奔走乎人若是也然倡募之者猶愈于飯酒肉而成之者亦大破慳囊矣倡者為誰普利寺僧信梅也余為諸生時結社寺中知有戒行重其請因以是說歸之列檀越于碑陰明萬曆四十二年癸丑春二月邑人喬壁星撰

聖井岡廟亭記

井以聖名神之也鑿地得泉而乃于崇岡之上意者其神靈之爲乎不然何出之甚奇用之不竭禱之輒應乃爾也聖以旌其井復廟以奉其神崇其德而報其功也井之力以及民而神之靈以祚水所謂有功于民則祀之也邑東有岡堯峰之後麓岡之嶺有泉其鑿而爲井不知昉自何年而居者行者皆便焉天順初大旱典史李克勤禱于是而其應如響遂神異之廓其祠宇嗣是崇奉者日益衆修整不絕然皆仍李之舊未有加也嘉靖己未邑太學生薛○與其弟

○謀新之邑官師共襄義舉士民咸樂爲助期年厥工告成正廟三間南向前爲榭如廟數又前爲門如榭數中爲井亭亭之前爲池繚以垣墉塗以丹雘其制濶于前而其文炳于舊燦然一邑之勝矣夫廟以棲神亭以覆井而爲之池者抑又何也蓋養魚種藕因以爲遊觀之所也余以爲傳有之君子明乎天地之性者不可惑以神怪明于萬物之理者不可罔以非類夫有山則有水有水則有神神卽水之靈而已而必求其形狀名號則非其本然矣余雖應其請而

為之文不敢曰是何神也但有功于民則祀之禮固然耳若夫往來于茲者陟斯岡憩斯亭飲斯水可以對時育物可以撫景怡情抑又不為無補也遂援筆而為之記明嘉靖四十五年歲次丙寅春三月上浣之吉賜進士出身戶部山東清吏司主事邑人龍岡李世藩撰

長生岡記

次于山之下為岡邑故多岡而嘉名殊少城西六七里有一岡西山往來必由之道昔有一石若婦女之

形後其石雖不存而土人襲呼為石老婆岡既而譌石為死庠生劉鴻漸家于岡後惡其名丐余易之余易死為生而加以長劉生請其說且求文勒諸石以移衆口無致復譌也余曰地以人勝禮可義起反死為生因而長之永不死矣但所謂長生者非清靜無為黃冠羽服吐故納新之謂也要在人倫日用間耳我國家教民以孝順尊敬六事所以全生理也生理全則長生矣民葬物則之在天地間萬古不磨何長如之是故敦倫睦族立身行已生理之懿備矣果能

欽崇而實踐之則昌大門楣培養壽命雖王喬偃佺何以加焉此長生久視之實也詩云三壽作朋如岡如陵如之斯名之矣劉生曰善因勒石樹之岡上明萬曆二十年仲春山東道監察御史邑人喬壁星撰

桃源洞記

在九尖山麓下

桃源洞不知所由名搜斷壁一石碣則宋時物也有飛雲觀記云昔有道士修真于此王公貴戚無不感應其文僅可辨識餘不能讀又有石鐫金大定年間重修其地四山拱向西為大覺堂東有僧舍北山之

陽怪石懸墜中為洞口洞長三十尺濶半之純石無撮土上列三大士旁侍二神像及供案皆雕石為之雖炎暑洞中寒氣逼人下數級有小石洞僧結茅以居有泉自石中出味甚甘冽遇旱不竭近山居民咸取給焉名曰普濟復建屋三楹存飛雲觀舊址益以門樓鐘樓泠然亭于泉旁為遊息之所郡人魏大用記

乞了寨石洞避兵記

乞了寨在城西五十里載在邑志四面可望百餘里

余幼嘗登其上見墻垣煨白之類知爲前人避難之區崇禎以來民愁盜起時鄉衆見其房屋灰燼牛馬顛仆百物摧殘之狀目不忍視乃相與謂曰人有所經于前宜有所戒于後遂努力修葺工粗完而寇復至矣得此保障遂無懼怯之心有道人劉陽林至與居民約已常居山瞭望有警鳴鐘卽登寨避之衆遂恃以無恐可殫力于耕稼也于是募貲鑿石洞溪二丈許度村民男婦可容乃已夫重門擊柝以禦暴客自古慮之矣由是有備無患非天之不遺斯民而賜

之生乎是不可無記邑庠生○朱樂歲書

遊三峰記

三峰去臨邑百里自空上人住錫其名著向聞喬銓部談海內奇勝謂三峰不減山陰塵網糾纏數年神往今歲重陽雨兒試畢稍暇遂同諸友挾而西逢人輒問三峰險處而登者絕少間有至者面矜口呿未嘗以造極自許也今者堅意一往旣憩青龍寨募導者引至魏家疇望三峰在天半萬仞壁立一徑蜿蜒如鳥跡蝸涎不覺心悸自是皆澗中行萬水西來懸

崖決溜與亂石相激坪甸之聲聞數十里蹣跚千步
始至山足由回鼻旋折而上越兩盤鄙南六城點點
可指山寺晚爐青煙一縷飄入雲際視泚水諸河如
暴足練亂岫吐霞蒼茫不測眩暈欲返者久之已而
念十年懷想慕其險耳山僧日夕往來彼獨非臂指
乎令兩健兒扶拽而前十步一休頃之踰絕崖度塔
嶺見山骨如削拔地而生無復寸膚纔至山腰飛岩
滴翠画壁攢青倦怯之意爲之頓盡從此而上一步
一叫絕直至其嶺諸友曰何前怯而後勇也余大笑

周覽峰巒玲瓏幽異雷奔海豎不可狀悉山石立者
如屋臥者如船方者如几圓者如甕皆若疊若鏤似
墮似崩穠花異草幔山而生青碧紅白燦爛奪錦椽
栗數千松檜萬株皆空上手植蘭若之右聖水一
泓甘滑如飴早不竭潦不溢坪以此名則上人初住
錫時神應也上人有慧眼一蒲團三十年悟闡宗乘
旁徹吾儒格致之理余浚以不及面叩爲恨是日宿
方丈與其徒談上人舊事夜將及午魑呼虎嘯若在
几席間余徬徨不能寐攬衣擁枕繼成四絕曉起呼

兩兒至絕頂仙人橋看雲在大壑白淨如綿奔騰如浪旋升山頂變態非常余因歎人世升沉蜃樓海市誰能撒手石火光中跳入清涼佛土上人枯坐深山獨開淨域亦濁世之至人世上褰裳繭足數千里外求名山至人而禮之三峰近在百里當面錯過東家者丘豈非吾鄉之耻耶吾鄉知重三峰當益拓上人

歲次壬申秋七月穀旦栢鄉恩選貢生魏栢祥撰

後累贈光

自有此山無此一篇好文字錄之以為山靈生色但山原是三鳳非三峰而仙人橋亦非絕頂若使到得彼處又不知若何叫絕矣邑人喬已百跋

泥溝石橋記

今縣惜漏卮費罷不急工而闕闡尤濫觴施伊蒲塞余竊瘖之所恃堤狂瀾者耆英清要無乃與有責虐然此衣帶胡為虜橋哉蓋此距城二里許田間泉津而為渠舊有權差便徒者車焉騎焉逞逞陷其中不可度先僉憲大人與執輩喬封君省田惻此欲橋其

上奈鮮執牛耳者且止居無何翳各羽化甲午春兄
衛使者思義繹成先志謀之直指喬公公封君嗣也
是其舉唱從弟思武等督理采石畚梏蹲鴟負石廣
十五尺袤二十有一浹旬訖工往往履坦涂不濡足
嘖嘖稱利矣夫費廉而利鉅眊施伊蒲塞徼報于已
去相萬也又豈費漏卮工不急者埒與屬余記余曰
杠梁之政傳有之重利涉也因艷封君提躬無點浣
晚食以當肉安步以當車先大人亦比肩爾爾邑俗
景法不靡且直指公業按漕及吳晉坐鎮雅俗為中

流砥柱因濟巨川靈源中自有慈航在兄周急市義
霑河潤殷殷詎惟橋哉嘻斯舉也惠軼輿濟心蹤荻
渡在家言孝在鄉言仁余此窳寡聞謬託諷以志成
聲稱不朽耶大人名世相封君名輔世直指名壁星
邑人趙思學記

鴉鴿營瓜市記

夫瓜市曷以記云也蓋鴉鴿故隸臨籍村落距邑遠
三十里許土原民周俗椎魯黠文而勤于本業無論
壯夫即髫髻童兒亦惟是南畝之事是務它商販匠

作悉棄去不道也會萬曆初歲數旱無禾民困于生計益用修桔槔踵邵平故事以自濟後鬻之以輸官錢每歷夏徂秋町畦穰穰鄉人僉議曰立市集便哉備陳之當道許可月凡六集集日市賈方野次菑停車馬盈于街曲徐而雜以它貨殖等鴉鵲蓋不止為瓜市矣要之市原瓜起也私給藉是公課藉是以臨土瘠而窮非此不可三十年所矣頃者大江村民垂涎錐末謀奪之臨人用是不平若鄉耆若里老以迨闔學士嘵嘵辯訴主者分土分民劃有定守彼奸人

一旦割所素利事且有變時藩叅吳公與州牧王公三覆訊察之稔得其直在臨也是用移檄文地方令臨得自有其市栢不得越奪詞甚確地方得石勒之為世守夫臨人失所本利則怨栢人窺臨利而室計不得伸得無亦缺于望哉余惟我國家瑩精太平以淳理理天下期於修衆庶之和俾之無相凌越爾也臨以宜瓜建市栢而有也得自市無亦市瓜于臨可矣神農立虞舜成太王歸此非順民之明效乎不審於地不達於情而惟以已意自用侵尋鄰境昔以罔

市利羞今而罔市矣竊謂栢非通計也蓋鴉鴿營市所自有有得市之名大江村不市所本無無失市之實矧栢地饒而登富不市無恙也臨民無此則東北之利盡矣且也栢卽奪臨市臨人卽忍弱不言它郡寧無豪猾者執強併以責栢而後奪其市尤而效之栢其何辭此事之不必然而彼此當惕然深慮者也故鴉鴿瓜市不變民得守其利而德守令守令不有而歸之臺府臺府不居民相忘于利而莫知所爲作瓜市記邑人岳自勵

重修息波亭記

在昔良有司之治其疆土也必盡力于河渠溝洫使旱澇不爲災蓋水能利亦能害也上流宜蓄下流宜洩蓄洩得宜民用豐給魏之劉元穎鄭文公晉之鄧士載杜元凱有焉若乃當水之衝湍急奔迅則惟捍禦之疏殺之期于無害而止傳祇之沉萊堰夏侯夔之蒼陵堰是也臨城西南皆山其嚙城而數爲民患者相傳爲泚水泚水之源或云出敦與或云出封龍或云出中丘皆不可攷獨是地處衆山之麓夏秋霖

潦山水橫發百里瀾漫馬騰雲駭無論非泚即泚亦莫辨為何水矣勝國世宗之初邑令党承美為築土堤至穆宗時水大至堤決城潰漂民居數十家邑令鄧之松改築石堤尋圯其半神宗六年邑令余啓元因鄧堤而增築之越二十年水復大至邑令程鵬搏相度水勢拓基一丈加高三尺堤始堅完乃建亭其上名曰息波亭以幸安瀾重民力也功不偉哉又越八十五載為吾

皇清康熙二十一年澄溪宋侯來治茲邑政寬民和水

不為厲歲乙丑秋七月積雨浹旬水自諸山下者震蕩驟忽勢如建瓴吏民怖伏不敢仰視宋侯肅衣冠止亭中陳牲醴再拜祝曰令之不德于民何尤願委身此波以答天譴祀已令民縛柳為埽如治河法投之急流水觸埽而勢漸緩雨亦尋止水退堤完屹然無恙于是百姓羅拜亭下曰微令君吾其魚鱉矣是歲大有年宋侯感神之貺鼎新斯亭會井陘觀察使李公案部見之嘉令之績手署其額懸之而屬余為記因憶漢書載王延世為河堤使者以竹槩盛小石

兩舟夾載下之凡三十六日堤成賜爵關內侯今治河之埽即效此法乃治河者不效而宋侯一用遂效良有司之感召豈偶然哉維時積雪初霽寒樹迷離夕陽橫山烟波映紫于是舉酒屬客相與賦詩而別嗟乎自有此山即有此景顧他令不暇賞者無以回天變而民氣不樂也今日之景天以娛令而令即以娛客豈直為遊觀之地已歟 康熙丙寅春正月賜進士出身朝議大夫湖廣布政司叅議前庶吉士雲間葉映榴撰

序

臨城宋邑侯 太翁儉齋先生暨管太君六十雙壽序

五福之來其萃於忠孝世德之門乎蓋忠孝相繼克昌厥後此歷稽之古今而不爽者也勿論周召賜履翼亮匡贊奕葉承休即降及君牙之命曰惟乃祖乃父世篤忠貞服勞王家厥有成績紀於太常乃惟由先正舊典時式昭乃辟之有父若後世需秉賜彪克紹箕治綽威瓌頤震煜隋唐而呂文靖范文正諸家

象賢繼武猗歟盛哉由其本大者末茂源深者流長
故子孫振振繩繩咸立功業於當代也以吾觀於
儉齋太翁其閥閱之元愷而縉紳之僑肸歟儉齋翩
翩佳公子也姿性穎悟絕人其於經史子集無不博
覽而陟其閫奧咀其英華爲文滔滔汨汨一瀉千里
十四歲卽爲文宗賞識時值兵火喪亂侍御旭初
公攬轡山左殉節而沒儉齋匍匐尋骸沿路號泣哀
動路人每登歷下之城痛哭不絕聲後又偕弟蓼
天公詣闕陳情蒙賜大理寺卿由是忠魂見褒大節

昭著遠邇知契莫不歎儉齋童丱之年而至性血誠
之迥過於人也母王太夫人黃鵠興悲熊丸立教
風雨漂搖門戶艱難儉齋與仲弟蓼天季弟疇三明
發不寐力供甘旨外侮之來犯而不校兄弟茹荼味
藥自相師友雪案螢窗雞聲午夜蓋不知幾歷寒暑
矣然尤虛心擇友吳中故多名流得濂洛關閩之傳
王唐瞿薛之祕如彭雲客章素文尤展成汪茗文計
甫草陳其年徐立齋暨族兄旣庭諸公道義文章朝
夕講貫戊子辛卯蓼天疇三相繼登賢書癸巳之春

吳梅村先生狎主文壇讌諸名士於虎阜梅村先生
執爵而酹曰吳中雖多英俊儉齋尤其白眉也已衆
咸服以爲月旦定評母王太夫人春秋六十儉齋之
友雲集飈舉登堂拜母卷軸盈溢輝煌堂壁閭里稱
爲盛事未幾母卒兩弟以公車北上儉齋哀毀骨立
幾至滅性凡含殮棺槨衣衾無不竭盡心力爲諸昆
子姓之儀型焉蓼天成進士官翰林洊登崇班時儉
齋寓書以古名臣相勗勉耻言及溫飽輕肥也家居
澹泊自持訓誨子姪臧獲數百指守分退讓蓼天公

常稱曰余仕宦三十年不獲罪鄉黨者長兄之力也
然儉齋之才過高識過奇學過博爲文不肯趨時好
屢困場屋或勸其詩酒自樂儉齋曰業患不能精無
患有司之不明行患不能成無患有司之不公昌黎
言之矣吾豈可中道已乎益自淬礪至丁巳而主司
擊節其文中式前茅價重雞林及南宮見蹟儉齋曰
吾於聖賢之學終身從事而已矣得與失命也有子
三人長曰性存次曰義存再次曰閑存皆履規蹈矩
世其家學性存即吾父母也平日以濟物爲心不

欲作自了漢策試明經高等筮仕臨城椿萱命之曰
臨城瘠邑也汝處已以清事上以敬臨下以寬遇事
以慎庶不隕越遺父母憂性存奉命惟謹既蒞任太
行在望峰岫連接多石田不可耕而又屢歲厄魃爲
虐於菟不時出沒於村落町畦間以噬人性存下令
捕之虎就斃民得安枕脩學校濬池隍講鄉約設義
學緩征收簡詞訟曰此非我能吾奉太翁太母之訓
如是也即一話一言有關治理來民之謳誦者曰此
非我意吾奉太翁太母之訓如是也教士子讀書作

文論及經義治事修身理物之道曰此非我說吾趨
庭之所聞如是也於是房子之民莫不舉手加額曰
邑侯之加意學校如是邑侯之修築池隍如是邑侯
之成人有德小子有造如是邑侯之愛民若子省刑
薄斂如是皆本太翁太母之教吾儕小人飲水而不
知其源可乎適性存遣使迎養太翁太母不肯行曰
地瘠祿薄奈何溷汝爲性存再三固請不得已太翁
乃登車其來也萬衆欣然鼓舞焚香羅拜民請於士
士請於師曰將何以祝我公之父母五福俱備而常

綏父我黎庶也乃懇庠師趙子會一踵予門以士民之公詞請爲雙壽祝予竊歎世族之家鮮克有禮自古稱之矣而况以大廷尉之冢嗣今相國之長兄恒舞酣歌優童寶馬連錢屈戌以遨遊於蘇臺洞庭之間其誰不瞻望咨嗟震驚而畏焉者而太翁謙以處已和以接物言行坊表不忘忠孝富貴之色澹然忘之矣其赴臨邑也曰吾觀其風土益飭吾子使知所以治民事神者耳太孺人生長名門爲管東溟先生之孫息理學世家壺範有素性存戲斑衣之綵同老

萊之孝則士氏今日之祝太翁太母者正以性存父母之心爲心因愛父母者尊親父母之二人出於至誠而不可已也余故喜而爲之序又爲之詩曰華胄遙遙肇於廣平驄馬東出山岳爲傾天運陽九禍患是櫻尋骸濟上擬於崩城當宁感動乃錫名卿介弟對策禮樂縱橫位晉冢宰金甌覆名蕭然寒士服蘭佩蘅讀破萬卷文價連城光燄萬丈丁巳蜚英令嗣弱冠作令冰清西園黛色姑射前楹旣和以理民慶更生君子偕老跋涉遐征老穉歡呼夾道來迎百壺

清酒芹曝惟誠匪私匪諛怙恃則宏太行之陽泝水
之旁同我婦子樂此無疆翁之喬梓德音允臧爰歌
以頌山高水長 昔

康熙歲次甲子小春之吉

賜進士出身光祿大夫太子太傅保和殿大學士兼禮
部尚書栢鄉魏裔介頓首撰趙端梁清標喬已百孫
梗崔華劉元慧魏勦張光豸喬文錦高去伐魏勰趙
玉振滑藻德田象三趙懿源孫眉馮堯年王贊喬麓
和六宇張冲霄趙唯燦李元善張近誠張煥光諸邦

道劉忠劉其裕張衆隨李偁賀雲開趙鼎等公祝

宛在軒序

澄溪宋子出宰臨城三年以來修舉廢墜吏民安之
會大飢倣蘇文忠開封救荒遺意即其治後隙地肖
舟製屋屋纔三楹首尾畢具鑲窓映碧雕欄如画舫
東湖石亭亭不減雪浪西有牡丹臺紅白數本兩旁
古木參差如岸憑檻扣舷不知其爲屋也其尊人孝
廉儉齋先生顏之曰宛在軒以視羊祖忻之通梁水
齋孫德璉之泛江置酒風調豈相上下哉余偶經其

地澄溪挽留數日飲而樂之忘其在客賦詩十章且為之序

詩彙見九卷

康熙二十四年冬十二月雲間葉映榴撰

引

修禊小引

宋廣業

上巳修禊祓除不祥歷代相沿誇為韻事遊人贈藥
宜聖不刪溱洧之詩名士流觴晉人爭豔蘭亭之序
其最著者也緣簿書之無暇致典制之久湮今特與
諸君子約屆期復古無分少長各具尊壘二簋一壺
共聯勝會五風十雨用祝豐年一者享神以慶安瀾
一者樂民以遊化日攜童挈冠須知此地有雩沂飲
酒賦詩况復同人多王謝喜羣賢之畢集衆可合歡

期好樂之無荒吾寧從儉時不可失歲以為常

附祭泚水神文

宋廣業

惟神出自南山注于彭水澄徹清冷千古不竭維茲
暮春之初舊有祓除之禮廣忝為民牧痼癘切身謹
率官紳士庶人等恭修禊事伏願祓除之後體泰身
輕已往之愆與東流而俱逝方來之福共西水以長
流陽長陰消上承天運剛興柔退下比坤行土地人
民均沐光華之德澤昆蟲草木咸沾浩蕩之恩波進
吉消凶惟神是賴謹以清酌庶品之儀式陳明薦

功德祠徵詩文引

蓋聞義動齊墟羣奉樂公之社風高峴首爭傳羊傅
之碑故食德報功尸祝必綿於百世而禦災捍患祀
典永秩於千秋况乎事異當官便已風移畏壘恩由
非望固當感佩桐鄉既俎豆之維馨自謳歌之繼作
恭惟 儉翁宋太老先生忠貞世裔孝友名家少稟
惠和比高辛之伯奮長漸道素同荀氏之慈明當侍
御殉節之年正太翁垂髫之日徒行匍匐魂飛石窞
之村野哭蒼茫淚溢陳濤之水廼積燐成碧先軫之

元不歸瀝血殷紅溫序之喪莫返於焉抱仲孺之痛
遐邇頌其義風詢秦訓之占鄉黨推為孝子繼而偉
元篇內久廢蓼莪李氏集中還題花萼加以同人之
推挽適當文事之蔚興三鳳齊鳴共主珠槃之會二
龍先躍廣聯縞帶之交簫鼓山塘爭飛鶴蓋月泉吟
社競集雞壇乃荏苒數奇偏後屠蘇之席迨風塵徧
踏始泛孝廉之船值令子之分符涖山城而作宰幸
邀良牧復觀馴雉之風適上公車暫覩垂魚之拜有
同徐勉不問贏金豈若薛宣但看園菜維時子分赤

縣心惟日念茅簷弟在黃扉身自如遊蓬戶未幾而
邑逢炎燄火雲燒六月之天人盡陷危熱坂圻三秋
之地投葛陂之杖未解成龍累闕里之泥空聞立鶴
十行書下例索租庸八口計窮分甘捐瘠公時里居
歎息若推莘野之溝鬻產經營徧乞臧孫之糴亟走
三千餘里無殊拯溺而救焚代償六百餘金遂乃弛
征而已責更捐餘羨廣設粥糜生荒舍之青煙頓還
殘魄起高原之白骨復長豐肌趙氏感恩詎止翳桑
之客黔敖施惠曾無蒙袂之人活寧僅於千家頌有

騰於萬口蓋賢父母行局中之事固常保赤以如傷而大父母沛格外之仁更若抱孫而置膝祝應有益願千載以長延天豈無知迺百身而莫贖既痛善人之謝世復悲賢令之去官巷哭聞聲處處聖門罷市鄰春輟杵家家醑絮焚香於是共建專祠寢廟遂成於不日徧陳憲府烝嘗永奉乎他年庶幾絲繡平原杯酒惟澆於趙土祀修無忌溪毛頻薦於羹門瘠地常勞每念恩勤之義高才能賦可無歌詠之文伏願鉅筆宗工鴻詞碩學長言短幅分題琬琰之章累牘

連篇並煥縑緗之色春猿秋鶴寫麗句於羅池土鼓竹枝變俚音於荆硯則仁風洋溢與泚水而俱浚德望巍峩偕盤山而並峙矣戶部尚書恒山梁清標撰文恒郡紳士趙端張暎牛樞喬已百孫梗魏勦高去伐李偁王贊張衆隨賀雲開等公啓

傳

宋孝廉儉齋先生傳

右贊
善 尤 珍 長洲

先生諱德寬更諱宓字御之別字儉齋姓宋氏蘇之
長洲人高祖諱純仁刑部郎中曾祖諱道明國學生
祖諱琦諸生考諱學朱崇禎辛未進士歷官侍御史
巡按山東以殉節死事載明史中先生幼異穎有至
性八九歲能屬文無童子之好十四補博士弟子員
侍御公殉節訃至先生哀號欲絕匍匐赴濟南濟南
以兵火後積骸成莽有小吏指公遇害處從其言徧

求之灰燼中刺血滴叢骨晝夜號泣終不得乃招魂
返葬葬偕弟伏闕請卹哀感 黼座贈大理寺卿遠
近稱為篤孝先生以父為忠烈名臣思欲振起家聲
無墜前人志晨夕奉母之暇與兩弟發憤力學互相
師友名譽隆隆然起四方知名士往來吳中者納交
恐後一時推東南文壇之冠比之月泉吟社立誠文
社衣冠文物之盛相肩也順治戊子弟文恪公諱德
宜舉於鄉辛卯弟正誼先生諱德宏繼之乙未文恪
公成進士先生躍然喜曰是可承前人業慰母氏心

矣後太夫人疾終哀毀骨立幾於滅性經營喪事必
誠必信觀者歎盡禮焉先生邃經術工舉子業然學
豐遇嗇向時同學皆聯翩捷去仲弟官禁近列卿貳
日益通顯而先生猶困塲屋人皆為惋惜先生無幾
微愠色曰吾益利吾器以俟時耳丁巳舉順天鄉試
而先生幾老矣時長君廣業以明經登仕籍知真定
之臨城有善政歲甲子畿輔災大無麥禾臨民逋正
額甚夥且艱於食長君停征徭與民休息歲暮尚縣
起運六百餘金先生里居聞之典先世遺產得千金

驅車至臨代民完逋賦戒長君勿責償民皆感泣先生曰占太行雲氣明春饑荒恐更甚奈何乃復出餘貲三百餘金設粥以濟俟民食新麥乃已所全活數千餘人及先生卒臨民請於官建功德祠奉春秋歲祀詳載功德祠碑記中先是長君蒞臨城時屢請迎養先生曰爲國牧民是吾志也與其養體毋寧養志終不行至是聞民飢乃行其篤於好義如此生平存心濟物不勝數此尤其大者乙丑試南宮歸鍵戶著書治廢圃蒔花澆藥督諸孫誦讀其中嘗誦老氏言

曰得時則駕不得時則蓬蓽而行此素志也越明年丙寅以疾卒於家年六十二先生恭慎儉約處衆以和惟恐得罪鄉黨南史稱趙廣仁爲相功被江左而其兄光衍如寒素士先生近之爲文章原本六經通三史八大家諸書不務講學而先賢異同之辨判然胸中後生有一善欣然如已出亟爲稱揚晚歲家居四方從學者甚衆皆因材而造就之其於詩不名一家而杼寫性情滔滔自運非流俗可及所著存笥稿若干卷玉壺堂詩若干卷子三人廣業由臨城知縣

歷任濟東僉事道定業浙江紹興府知府紹業河南安陽縣知縣皆有政聲

論曰近世之士知取科名為重耳至孝於親惠於民此德與功之卓然者而人忽焉不講可歎也先生成童時即能奮不顧身刺血以求侍御公骸骨可謂孝矣代民償逋弛征已責起白骨而肉之可謂惠矣不幸艱於遇不能大行其道殆所謂跡屈朱軒志隆衡館者耶假使進用於時古人臣致君澤民之業豈異人任哉

墓誌銘

唐孟蒲圻墓誌銘

君諱客字賓其先瑯琊人遠祖廩陶侯食邑全趙因而家焉始封于周承卿相魯金柯堂構無虧玉葉箕裘不墜公降靈山岳餘慶倣尊忠孝盡于家邦精博窮于簡策屬隋唐之際鼎沸山鳴公避亂歸安類阿衡之醜夏翔而後集異文子之違齊暫申投筆之謀纔展報兵之効再靜風塵苴茅錫寵武德中授左驍衛永壽府蒲圻縣男食邑三百戶春秋八十有三薨

于里第以大周延○元年

按武氏改國號為周初元如意再改長壽三改延載四改天冊萬歲

五改萬歲通天六改為神功七改為聖曆八改為久視九改為大足旋改長安無重見延某年號者則此為延載元年無疑十月

二十三日與夫人尹氏合葬于房子縣東十五里之

原令妻馮氏並久沉泉壤遷窆後坐痛感幽冥冀垂

不朽廼作銘曰十亂匡周三卿相魯餘徽不絕尚傳

茅土醜惡歸仁所征無敵白茅報德朱輪表績彼蒼

不祐奄從窀穸哀哉陟岵痛掩佳城孤魂杳杳長夜

冥冥恐桑田之或變爰勒石于泉扃萬曆三十年邑

人順天府府丞喬壁星為之修墓修廟樹栢功畢謁

拜時方十一月有蛇長數尺於數十步外昂首來迎

至前點首數四類謝狀及去回顧者三見者咸以為

異云

宋處士王子立墓誌銘

蘇文忠公撰 喬恭肅公於蘇集中檢出列入邑志補

子立諱適趙郡臨城人也始予為徐州子立為州學

生知其賢而有文喜怒不見得喪若一曰是有類子

由者故以其子妻之與其弟適子敏皆從予於吳興

學道日進南東之士稱之予得罪於吳興親戚故人

皆驚散獨兩王子不去送予出郊曰死生禍福天也

公其如天何返取予家致之南都而子立又從子由
謫于高安續溪同其有無賦詩弦舞講道著書於席
門茅屋之下者五年未嘗有慍色予與子由有六男
子皆以童子從子立遊學文有師法人人自重不敢
嬉宕子立實使然元祐四年冬自京師將適濟南未
至卒于奉高之傳舍蓋十月二十五日也享年三十
三銘曰知性以為存不壽非其怨也知義以為榮不
貴非其羨也而未能忘於文則猶有志於傳也嗚呼
百世之後其姓名與我偕隱顯也

明喬封君輔世墓誌銘

萬曆庚辰余校禮園士得趙城喬子壁星以邑全高
第徵拜御史治辦有名迹乃薦紳間則極稱御史有
賢父蓋謂喬子父諱輔世字德夫別號樂天真定臨
城人也其先與樂衆莊簡公同族洪武初士進者為
醫學訓科始家臨城為邑人士進生景新新生興興
生溪有隱德溪生直舉於鄉為江西龍泉令用清白
顯直生宗華以歲貢授山東濟陽丞卒於官公之父
也母班氏生公有異質年十二補博士弟子其學無

所不窺高視闊步耻於流俗為伍既試有司數不第則屏斥故業專精性理之學不復求仕進及御史令中牟上最封公如其官然公雅尚恬適無鮮腆之奉章服亦以布為之曰聊以明朝典耳有司欲見公輒自引匿常夏月行田間持蒲葵障面褰裳涉水人不知其貴也御史按郡國報命嘗省公於家公止之門外視橐中裝無他而後命之入御史按晉時或饋公一○字及桑椹膏一罌竟謝不受其廉介如此公性莊嚴而篤於內行事親孝執喪哀毀踰禮姊嫁孫氏

而寡遺孤熒熒公能贍姊育孤孤以儒顯姊以節立族指甚繁然矜寡孤獨無失所者比鄰雖寡甚無他徙者親故交遊無敢憑籍氣勢為暴於里中者咸以公故公又倣常平法穀賤則增價以糴貴則減價以糴邑人賴之歲飢傭人受錢公所輒得倍蓰所全活甚衆韓家庄積淹公損田鑿渠水至有所洩一方安焉又建義學羣邑子弟都肄其中斌斌多文學之士公之樹義樂施皆此類也里人之言曰鄉紳若喬公百家非多千歲非久蓋沒而歆歔歎息無間然公年

八十有五乃卒配王孺人八十有四無何亦卒孺人
出自右族父讓母戴少而端重婉孌通書史既歸喬
公能左右公力學而兢兢事舅姑以孝聞歲凶家匱
率黽勉拮据以自給所需咸咄嗟辦有強禦竭公門
孺人不較亦不令公知凡以濟公於艱而安公於既
老者孺人也公生正德己未六月六日卒于萬曆癸
巳十一月十五日孺人生正德庚午九月二十七日
卒與公同歲爲閏十一月十九日子男三南星邑諸
生娶李氏璧星庚辰進士今山東道御史娶陳氏繼

高氏中星武生娶張氏女二一適閭張鑑孫男五如
霄如霞如霆如露如電孫女三御史卜以二十二年
甲午十一月十日奉公孺人合葬于韓家庄之阡而
以趙吏部南星狀來請銘諸墓余聞之官評與鄉論
交相衡也御史飭憲砥節宣力公家卓然有譽然非
公疇克成之公絕嗜寡營闇修質行施利澤於其鄉
鄉人慕德誦義不容口沒而同聲推奉俎豆於學宮
則操何術而致是蓋公論之在人心者若此語云是
父是子信哉銘曰維才韞奇而行履方抱樸含腴爲

德於鄉廸哲教忠厥施彌昌我懷其人令聞不忘璞
玉自珍谷蘭自芳有媛從之永安斯藏
吳郡申文定公時行撰

喬大中丞壁星墓誌銘

邇來黔蜀用兵老師匱財迄今未有寧宇蓋逆藺之
遊魂遁入水西西翼之以窺我貴竹今兩酋雖授首
而水西蕩平尚未有期嚮使斬茅謹穴制之於早卽
不然或貳其踞嚙之性預為鞅紲猶不至犇踴蹂躪
而當時吏於黔及黔之士大夫愛護之如驕兒崇獎

之如貞臣有因其反形漸著欲以漢法制之羣而反
唇相擊且青蠅之矢中外攢集使不得安其位以旣
而去其說驗矣此天寶幸蜀之後韋元素之先見也
夫能慮安酋於二十年之前者惟蜀撫喬公而公之
去蜀也竟以此公諱壁星字文見別號聚垣其先山
西樂平人與先朝名臣莊簡公同族洪武初有士進
者至臨城家焉士進生景新新生興興生直至直始
從乙科起家為龍泉令著廉吏聲直生宗華以選貢
授濟陽丞華生輔世增廣生封文林郎中牟縣知縣

贈中憲大夫都察院右僉都御史卽公父也其生平具申文定誌中娶於王而生公負異姿十八補弟子員二十以高等授餼是時督學使者羅四郡譽髦卒業恒陽書院艾先生穆擁臯比司其月旦公每試必首丙子舉於鄉庚辰成進士試爲令得河南之中牟中牟自仲康著三異上下千餘年莫可比京公下車則釐剔奸藪邑有徭役畚而趨者胥吏得以意勞佚之公絜爲令作止有常豪右匿膏腴不報藁秸不入官公履畝會之得田四百五十頃有奇以不毛之地

招流亡耨之又闢地三百餘頃邑之北濱大河其南地多墳壚孝宗朝賜輕粉數千鍾胥吏得以意爲予奪公又絜爲令低昂有準小清河犇流嚙稼開渠十二里築堤三十丈河不爲災邑故多盜公獲一盜使緝盜以自贖盜竟息鄰邑有被盜者索盜於公公曰吾民無盜也比就擒其人皆鄰邑也索者歎謝公行冠一方凡他郡邑有棘手事及疑獄不可讞者爭就公公賈其餘勇辦之指戲定矣民有病不能療者予之藥自鬻其子女者助之贖全活者絜泣詣公謂公

真吾父也。螽蟥崇公下令捕之，計所入代輸餒廼克。有秋至，若雩禱輒應，蓮並蒂冰為花，與仲康又各自為異焉。邑人於仲康祠畔建公祠，彙其善政成集曰：光魯上計為天下第一，尋被召授山東道御史，出視漕政，水涸艘蟻附不前，公禱於岱，未還雨大霑，舳舻遂啣尾進。劇賊劉汝國蔓延江黃，盜竊名字，公按應天而汝國擒，曠寇張守清締婚於天潢，踞五臺山勢張甚，公按山西而守清擒，所至損贖，餒却饋遺以薦剡。陳謝者皆無所納，兩袖清風，視于忠肅之撫晉聲。

實相亞不率者，柱后惠文，彈之有某尚書，強納一姬。姬自刎，公旌其烈，尚書坐罷。采風賞拔如金陵朱公宛陵湯公蒲圻張公，異日皆瀛洲上選。公知之，最蚤前後上封事，皆諤諤正論，嘗請召還直臣王侍御，作敢言氣。戊子京闈，見輔臣有哆口辯者，疏規之，應變陳言切中時弊。又嘗請元子冠婚，請選閣臣輔言官，請易名之典以彰直道，多人所忌。諱公發抒自如，繳嚴旨無少異，然橫目眈眈矣。還自晉視京營，以外艱歸，服闋掌京畿道歷臺班，又得丞京兆，則蘇珠寶之。

商寢各行之稅飢授糜寒授縑熒黎賴之猶在中牟時而旋以場屋事浮言及之抽簪歸矣歸四年用原官召進大理寺左少卿尋以僉都御史撫四川甫下車列按晉時裁革交際語榜於戟門卽朱邸無敢以承筐見匠作所需榱梓美材必取之蜀丁男採木者多實命箐峭中公始而取其傭繼乃出公帑代之千章蔽錦江而下閭左晏然黃太史有采木記其事蜀故當貢筵費一裹蹠無算公每歲裁去三千柄權稅中貴性無饜公嘗以羨贖補尋具疏歸有引其他惠

愛亦猶任中年時若大而關軍國者無如討水西先是永寧匿印不出阻兵抗命而土婦水要也實倚強臣兄弟自固強臣弟堯贅於隴氏殺隴氏三子奄有其地兩罪皆麗不赦公謂撫之轉益驕使蠻夷効尤留此酋在西陲終不靖誅之便而黔之建閫與其鄉人譁然與蜀爭公無以難會播州始平朝廷亦厭苦用兵兵意寢而公內計遭忌者之口或言其胎於此公旣謝事不得代於邑不聊而外有建南之亂又特疏起劉珽將軍迄賴將軍奏膚功然公自此勞憊成


疾矣既得代還里第方與親朋握手相歡不四月而
病病卽却藥餌弗御曰大數至矣無苦我遂端坐而
逝公生于嘉靖庚戌七月十四日卒于萬曆癸丑四
月十日得年六十有四娶陳氏累贈恭人先公卒繼
高氏累封恭人加太恭人子二人長若雯成己未進
士今爲吏部文選司主事娶張氏贈孺人繼李氏封
孺人若霞加銜守備娶高氏高恭人撫二子如已子
感之忘其爲繼母也故不言所出公又嘗撫兄之女
爲女適平涼縣趙志鸚孫二人已百增廣生娶魏氏

已千附學生娶趙氏吏部君出孫女四人吏部君出
者二守備君出者二吏部君業以萬曆乙卯三月二
十四日奉公祔葬于城北韓家庄贈公之原今相國
高邑公爲吏部時爲之狀朱宗伯爲之傳孔端尹表
其墓矣乃地下之石留以屬希孟孟而弗敢念吏部
君同籍意氣相許逆閹始敗以數言雪余於塵囂之
餘視他人倍摯而希孟少習掌故於先達達達闕一
班知喬中丞一代寶臣也立朝岳岳自峙持論偉杰
不伐異不詭同至黔蜀用兵之議人或駭爲喜事然

水西跋扈雅非一日矣速發易制且公非漫焉徒手搏者使縣官假便宜毋或中掣籌邊之機必有發蹤秘畧卽他日小用之建南他將弗任任劉將軍可想已自太和以迨潁川皆以身翼衛水西輕憐痛惜不使微風吹觸日夜養癰飼虎而不之覺至其勢已成思公晚矣白骨爲原殷血成川撫臣霄元幾喪我黔日邊渠魁以遁以殲於鑠王師尚未凱旋嗚呼喬公之靈其不揚霓旌乘雲輶而注盼於巫峨之巔也耶若公之奉身以約執喪以禮被於親者多推於鄉國

者溥則一善士能之皆名臣之細節也畧夫論論其大者而係之銘銘曰漢中牟著魯恭稼穡穰穰無留蝨雉將雛狎兒童迄來慈輪瞽宗配者誰繫喬公攷厥政春與冬凜煦一元氣通不相師將無同竇車騎燕然功恭也涕求銷鋒羣不逞橫小東開恩信厥角蠶公治蜀震天風思斬茅絕蒙茸伐鬼方馘元兇志未酬謗已叢滿篋書橐矢弓岷江水聲溶溶轉悽咽恨靡窮惟鸞鳳暨罷○又神羊乘花驄兼數人庀天工攷范史光龍從公視之豈顯融一坏壤數畝宮永厥


藏千秋封萬曆乙卯二月賜進士奉議大夫修正庶
尹右春坊右庶子掌坊事兼翰林院侍讀吳郡姚希
孟撰



臨城縣志

十九

內閣文庫			
番號	漢	14433	
冊數		6 (6)	
函號	國	163	1



臨城縣志卷之九

知縣事長洲宋廣業重修

藝文志

詩

太行山歌

知縣
宋廣業

太行山高嵯峨青峰直與青天摩
袤延北走燕然界
迴巒邈迤南臨河橫亘一千六
百里中峰特起峙房
子房子城在山隙可憐民貧地多
瘠雪飛鐵嶺凍雲
根月照喬莊慘沙磧猩猩啼雨
虎吟風芙蓉簇簇烟

重重洪崖赤松不可見祇有厓嬴旱魃時相逢我為
臨城宰忍見斯民日憔悴痼瘕在抱日疚心開衙常
與茲山對嗚呼太行踞地脊遙望何崔嵬鼓旗二山
左右立擁護神靈陟降于天臺維天雖高天聽卑我
上天臺拜手謹陳詞山之靈兮惠我私雨暘時若無
愆期願我民兮世世不聞號寒與啼飢

釣盤山

教諭 吳清

嵐翠空濛曉未乾井陘西指路漫漫成安已去三千
載泝水依然繞釣盤

又

中丞 喬壁星

暖風纖草滿盤山泝水東流去復還桃花半笑自春
色愁聽啼鶯髣髴斑

又

知縣 宋廣業

魚入釣盤中成安自此終淮陰決一戰背水得奇功

天臺山

教諭 張弘

雲根高出古城西一片蒼蒼望轉迷幾度遊觀攀石
磴巍然疑是上天梯

又

訓導 胡俸

天臺之山何崔嵬崇崖絕壁依雲隈苔經細雨翠煙
滴赤虹繚繞驚風雷層巒碍日回飛鳥凌空俯視羣
山小綠陰田田帶朝霞陟遐頓覺紅塵少南跨黃河
西太行山靈自是非尋常鍾英毓秀知多少豪雄千
古爭翱翔

又

訓導 梅和鼎

太行何蜿蜒燕趙青未了隱隱數千峰掩映連昏曉
鬼目見天臺峻拔孤雲遶儼若冠冕士傑立風塵表
晴嵐襲人衣濃綠迷歸鳥疑是翠滴成非煙更裊裊

崧嶽興賢佐降神事非眇含靈既相同崛起當不少
咄咄往來人莫哂臨城小

又

訓導 李志學

天山屹立鎮城西翠積層巒入望迷爲問臨城多峻
傑冲霄原有上天梯

又

喬壁星

天臺人道是丹丘上有五城十二樓今日登臨無覓
處白雲蒼樹對清秋

又

郡人 魏華玉

石磴岩堯鳥徑分眺吟下界不相聞止有一僧掩靜
室時聞鐘磬出孤雲

杏山

教諭張弘

萬里陽春景色同層巒溪處杏花紅應知造化呈春
態盡入遊人賞翫中

又

喬壁星

十里春山十里霞遊人不管夕陽斜興來無佩堪沽
酒且向前村問杏花

堯峰

喬壁星

絕壁孤峰落曉霜烟籠遠樹色蒼蒼層巒陟盡眺吟
目僧倚雲根開竹房
上得蒼苔一徑深東風弱柳逐春心最愛野花知我
意日曛猶自笑孤岑

聖井岡

岡上有泉夏旱
不竭禱雨輒應

訓導

梅和鼎

陂陀上崇岡有泉何盎盎澄澈隱龍湫甘芳敵酒釀
坤靈自鍾奇地脉咸流暢曾聞洪河源亦在崑崙上
滲縮有降升此理未為妄混濫搖月星湛寂絕風浪
靈液霈然施驕陽不敢抗瞻彼百穀成慰此三農望

盼嚮信不誣咸秩古所尚惟肥藉香蘭傳芭近神仗
於此見民心詎敢答神貺

又 憂旱作

知縣 程鵬搏

滿目瘡痍正可傷何當旱魃又為殃堯岡日炙土皆
赤聖井沙飛草欲黃才慕商霖知國是歌賡雲漢仰
天章不堪坐對嗷嗷者牧養無能愧此方

又 喜雨作

程鵬搏

步禱勞君共幾朝西風飛雨忽盈宵敢云一念通冥
漠自是諸靈普鑒昭澍澤頓消前日酷土膏應長及

時苗卽看聖井泉流滿佇立岡頭四望饒

聖母洞

上有聖母
祠禱雨應

知縣 徐官

碧玉山頭一竅天吞雲吐雨復生烟臨民辦得心香
在匝地都成大有年

又

梅和鼎

蒼崖懸百丈朗然藏洞天瑤雲封洞口琪樹生岩前
幽棲澹塵慮遐步凌朝烟凝着青霞帔來讀雲笈篇
復疑蕊珠宮貯此瑤臺仙靈旗忽颯颯玉珮常娟娟
曉風促鶴馭夜月歸雲輶頗能動禍福正直民流傳

豈不驅疵厲一方得安全春秋靜壇宇瞻禮無窮年

又

訓導

李志學

靈洞誰成聖母宮只因神妙與天通休徵不說循良吏有禱都歸造化功

又

喬壁星

重岡幽洞鎖春烟一屋神祠列洞前野人時效桑林禱曾沛甘霖潤石田

桃源洞

郡人

魏大用

命酒雄歌對大觀台星午夜燦高巒山岬好月千峰

曉鐘送西風萬木寒人坐峰頭雲漢近香飄蘭若梵光漫清尊不惜成佳賞曙色東昇醉眼看

泥河

宋廣業

軍入泥河陷生擒廣武君神謀出水上誰敵此雄軍

青龍潭

宋廣業

每當苦旱日靈液出龍潭環翠如雲覆深淵若海涵齊心事虔禱入洞恣幽揆天意同人意薰風雨正酣

栢暢亭

喬壁星

栢暢亭頽梵宇新春風沙鳥趣遊人王子封疆何處

覓空留鐘磬伴松筠

又

郡人

魏華玉

眺目荒蹤日已西
斷碑斜臥草萋萋
山僧不解封侯
事夜半唯聞杜宇啼

又

宋廣業

此亭名最古千載憶王孫
漢室江山改藩封爵號存
泉聲任鳴咽鳥語自爭喧
弔古情何限賢侯德弗諼

栢暢城

喬壁星

長岡斜枕雷音寺
栢暢烟籠泚水濱
幾個閒僧逢竹

院數聲清磬出風塵
桃花照眼遊人景
柳絮牽風故國春
漢代侯封頻眺目
放歌淺酌任吾真

又

魏華玉

青草芊芊雉堞平
荒垣空有漢封名
分茅原自天潢
派故國誰堅帶礪盟
碧澗泉流鳴咽水
綠楊鳥語斷腸聲
行人日盡頻回首
唯見蓬蒿帶月明

房子城

喬壁星

荒城遙見數家村
燈火微茫半掩門
目對西風傷往事
新豐宅第已成原

房子侯鄧晨

宋廣業

漢室凌夸日懿親靖難時王姬遭喪亂都尉痛流離
茅土今何在藩封昔尚遺古城衰草遍彌望不勝悲

回車城

古越

鄭一麟

從來衛郡有朝歌墨子迴車蹟未磨可怪荒城遺趙
境不須張目徑馳過

鵜鴒井

吳清

楚漢交征未息兵真龍出水自潛形天令雙鴒來棲
守強項從教釋戰爭

又

知縣徐官

赤龍蟠處水華寒白鳥飛來住此間人物到今俱不
見獨留芳草護頽欄

又

訓導李志學

失鹿紛紛競起兵沛公時戾井藏形詎知鴒集由天
意枉使梟雄着力爭

又

喬壁星

胥井荒踪不任秋真人從此遂興劉強項那知天意
定殘兵猶自鬪諸侯

臨城伯廉頗

宋廣業

廉君古名將配祀武成王一飯傾人主三遺棄國良
負荆交誼切拊髀繫思長列爵公侯並追封異代彰

漢王霸墓

宋廣業

滹沱冰可渡一語定中興天意歸真主人謀協瑞徵
雲臺傳繪像古墓並丘陵瞻掃郊原外英靈儼若憑

爽亭

宋徽宗過此駐蹕命
蔡京書二字于石碣

吳清

昔聞駐蹕寓行宮勒石名亭敕上公今日斷碑無處
覓落花啼鳥幾春風

文廟漢松

湖廣
大叅葉映榴

一枝西向指斜曛勢欲騫騰徑入雲風逆霜皮枯墨
皴苦緣錯節碧螺紋得依漢曆誇年代幸免秦封漏
斧斤千尺孤根蟠泮水好憑雨露長龍文

漢松次蒼翁韻

宋廣業

翠拂朝曛與夕曛亭亭偃蓋似層雲千年榦聳嶙嶒
勢百尺鱗圍錦繡紋幸託泮宮歌勿伐誰來璧水敢
揮斤徂徠移植知何代溯曆依稀紀漢文

唐槐

古越鄭一麟

房子問古蹟尚有唐時槐老榦蟠地蛟龍出翠葉不
受風霜摧參天直上數十尺靈根豈識誰移來繩墨
終逃匠氏顧櫟社未料明堂材噫嗟秦松漢栢歲已
久此槐亦在千年後大椿未獨誇為壽試問輞川宮
槐陌上枝同時不識今在否

又

程鵬搏

山中說有千年樹今見三城廟裏槐夾道深根盤歲
月屯雲老榦逐風雷兵戈儘歷身無恙寒暑頻更花
任開涉世那從稽甲子鐫題追識自烏臺

喬中丞為
立石表識

天寶初年城泚水此槐莫自此胚胎後凋豈少凌寒
節連抱驚看異代材最是土膏能發育多緣神力有
滋培目前恍似槐安境笑指南柯莫夢猜

又

署教諭
陳耀

樹有千年不老槐時今木古信奇哉根盤地窘蒼龍
隱節錯天空彩鳳來歲月久更神未減風霜愈歷氣
偏培分明顯示生成意豈為人間梁棟材

又

葉映榴 蒼巖

但言天寶已堪哀傾國花魂葬馬嵬此地結根非建

始問誰移植向蓬萊婆娑猶自含生意臃腫都應是
散材無奈里人喬木思青碑勒字號唐槐

再咏唐槐

葉映榴

偶得盤根古廟中成陰結實待秋風記年何幸同仙
李入爨偏能做井桐豕腹枵然誇老大虬枝笑爾不
玲瓏但留此榦堪鑽燧迸出寒冬一點紅

丙寅大旱四月不雨余祈禱郡廟夜半震雷忽
從簷前老槐樹中出甘霖大霈田野霑足相
傳此樹為唐槐也漫賦紀異 宋廣業

四月天不雨禾黍盡焦萃上帝本好生胡然降災異
帝怒民受災厥咎在守吏祈求無一應旱魃厲為祟
密雲自西馳滴雨不我賜我民徒倉皇我心實滋愧
庭中有古槐云有神靈閼屈曲盤螭虬青蒼集翡翠
洵是天寶物喬柯蔭庥庇長跪前致辭乞神鑒微志
俯念禱祀誠勿吝惠澤施待命夜方半一聲驚辟易
雷從樹飛出電激震天地玉樞驅靈符鞭起乖龍睡
簷端急溜飈奔流繞盈遙知郊原外芄芄滋稂穗
萬物槁復蘇寸心喜不寐四野起謳歌三秋免况瘁

苟非槐樹靈利澤何由致紀茲千年木實係一方寄

草堂寺

寺在紫金山之巔陟巔一望千郡人山競秀萬派爭流一奇觀也

趙希龍

古寺空山裏堂依勝地開斷碑猶字跡畫景入詩裁
避俗留高士叅禪弔梵臺林丘何日是相與共徘徊

又

魏大用

從古如來地年多晚翠淡梵宮堂谷口冷磬出高岑
鴿水添僧覘猿聲伴客吟山靈曾有約何日一登臨

又

郡人褚其高

花宮連碧落草色滿青山水遶堂偏秀雲封戶自閑

小菴傳梵跡喬樹隱峰灣獨羨卜居者孤村日往還

又

邑人岳自勵

登山遊古寺丹崖問歲年雲低晴晝迥天近磬聲傳
榻度松陰冷爐浮栢子鮮老僧談偈畢不道有西天
空山疑鷺嶺古殿起龍宮石室閒雲白松窓慧日紅
花香浮遠岫林影動清風曲徑羊腸細遊人心賞同

又

米千鍾

石鼎烟沉一縷微偶從天外問禪機山僧飲我胡麻
飯片片閒雲落素衣

雷音寺

栢暢村

魏華玉

閑來欲共青山語古寺松陰帶夕陽白頭暗自愁中
換情逐東風春草長

石佛寺

射獸村

魏華玉

秋深黃葉梵宮過鐘磬荒涼盡薜蘿剝落斷碑人不
識牧童吹笛夕陽多

謁鵲王廟

元不忽木

一勺神漿浩滿襟天開明哲豈難諶齊侯無幸菑殘
速守子有緣惠澤浚磊磊山形千古秀巍巍廟貌四

方欽惟王授我剝腸術換盡人間巧偽心

元帝廟

程鵬搏

遠岫烟含碧殿浮驚看彩筆壯清幽

王吏部之棟
先有題詩

維元帝

德天同運暮雨晨風萬井秋

蔣烈女

喬壁星

燕爾良人中道捐冰操泣誓栢舟篇方悲鸞鏡成孤
影驚見山城起野烟心似曹娥名更烈身甘詹女事
堪憐殘文碑碣啼鵲淚行路聞之亦慘然

又

魏華玉

漁陽鼙鼓揭連天萬戶傷心生野烟健兒椎城擄人
婦親亡家破都不顧蔣君數奇宦燕南正遇兵戈猛
如魁悍賊欲殺青氍士蔣女忽出垂雙淚願乞活親
殺妾身妾身原是未亡人狂寇不知烈女意翻言此
女真嬌媚欲驅粉黛上兵輶烈女怒發氣英英妾身
一片無瑕璧焉能從賊活朝夕親命既全妾身死賊
卽偷生能幾晷紅顏翠質肉刀頭鬢畔池邊碧血流
泝水難比烈女清秋月難比烈女明水有潄時月有
缺惟女千古稱完節

周烈婦

劉繼祖妻夫死
後自縊殉夫

喬壁星

烈女冰霜照素秋完名一夜表貞柔滿胸碧血寒星
斗太史應編入栢舟

夜宿高村點社學童子各為起名 程鵬搏

社學相沿舊有因我來今着奉為真高村問戶家三
百願得都為易使民
濟濟兒童向我迎挑燈點數氣英英他年成讀知誰
是蒙養無辜此命名

後五日復過高村感事言懷 程鵬搏

東風吹凍雪初乾春意濛濛未改觀敢以玩遊追杜甫願將化誨學劉寬勞民且布三章約報國仍懸一寸丹最是傳家清白在真誠到處儘人看

春日樂天書院聯句

勝日尋芳柳色融

陳耀

習池酣飲醉春風

馬繼

踏歌聽罷

青幡捲

喬壁

山引夕陽烟霧空

魏革

春日春盤集草堂

壁星

金尊銀燭夜輝煌

耀

掖爐醉飲

情猶劇

繼魯

數點殘星喚曉光

華玉

殘臘方回今復春

繼魯

乾坤驚見物華新

耀

與君今夜

不須寐

壁星

共為東風作主人

華玉

客窓春思正茫茫

壁星

驄馬開筵春晝長

耀

荏苒韶光

君莫戀

繼魯

百年惟願汗青香

壁星

和前

程鵬搏

寒谷春回淑氣融堯岡宿草舞春風羣星夜集春臺上簪筆題春萬景空

好春偏向仲舒堂春酒春宵燭影煌春興於吾元不減肯將吏冗負春光
青氊座上已逢春柱史堂前春釀新吟罷春聯稱絕

唱隔窓誰是和春人

春日悠悠思渺茫勞民一念自春長春杯不共春賓

醉韻次陽春郢雪香

隍中觀新荷

城東濬池既畢植蓮盛開

岳自勵

首夏遊東郭新荷傍柳妍貼水浮清影牽風繞翠烟

淤泥藏玉白滴露走珠圓淨植稱君子誰云獨愛蓮

和

程鵬搏

濬池因備險瀦水恰宜蓮不謂花初麗恰令觀者憐

六郎今孰似十丈昔空傳何得追潘岳花栽滿縣鮮

招撫紫河套山賊

宋廣業

負固潛溪窟萑苻敢自雄剪除非善術綏輯有微功

聖世無遺教山陬盡嚮風從今太行畔閭井樂和融

賑荒感賦

宋廣業

六月不雨禾黍槁衆口嗷嗷俱莫保狂風日夜天無

光白草黃沙千里道河渠試望盡揚塵井底無波泣

涸鱗幸有九重恩澤降天心重念一方民

義塾課士

宋廣業

太行鍾靈秀濟濟毓儒宗吾道欣有託君才故自雄

高文擢錦繡列宿貫心胸金玉俱時彥還期追琢功

大水

宋廣業

泝河之水出太行奔流浩淼何湯湯太行山城小于彈崩騰衝突勢莫當我來房子已三載安瀾差賴民安康水伯胡然忽肆虐一朝汎濫失故常郊垌處處馮夷館民居在在蛟龍藏有如風雨驚驟至趨避不及空倉皇有如轟雷震寰宇一聲懼伏魂飛揚又如呼聲動天地千乘萬騎爭沙場更如海門怒潮湧銀濤搏激千仞岡動如騎鯨搖五岳靜如明鏡浮三湘

民幾魚鱉鳥獸散草木渰沒黍稷荒况當淫雨三晝

夜百流騰集水益張乘風掀簸真差

音差事

女墻撞

擊垂淪亡

水撞西門入而復出者再

城中不浸僅三版彷彿汾水灌晉

陽守陴官民危累卵更無善策營隄防聊縛柳埽效

古法觸埽水勢仍披猖洗滌志慮敬齋戒惟有虔肅

禱彼蒼小民何辜臣之咎小臣有罪民罹殃血書手

勒投水府為民請命吁闔閭展誠旃檀香一縷牲牷

玉幣同相將神靈肝饗昭報荅洪流漸次徙他方蜃

渦蛟涎腥沫遠移灑改霍多殘傷天柱地維還舊觀

更祈造化時雨暘勿謂太行之神不可賈微忱感格
明彰彰勿謂泝河之水不可滅捍禦疏殺安其鄉周
田撫撫民情樂王道平平天日光重修息波舊日亭
亭成作歌永無疆

僉憲梅崖李公重書亭額少參
蒼巖葉公作記并歌詩以紀之

柏鄉攝篆

宋廣業

此行殊越俎作吏况多疎淡懼忝厥職寧誇刃有餘
房城幾命駕鄙邑重驅車緬昔善為政風流愧不如

邵子昆曾為
柏鄉縣令尹

與陸稼書邵子昆兩先生夜話

宋廣業

兩君同臭味我亦附參盟剪燭談心密浮尊挹氣清
盱衡今古事酬唱主賓情夜半秋風起悲歌感慨生

大補上已息波亭偕士民修禊

有引
見前

宋廣業

風光愛元已景物媚芳辰榆柳家家火鶯花處處新
被邪循故事禊飲樂吾民不似蘭亭會情淡感慨頻
雪後飲息波亭二十韻

葉映榴

寒風凝夕陰微雪衆山曉聯鑣出城西初日懸樹杪
一片浩空明長隄亙天矯崔嵬息波亭勢欲接飛鳥
吐納雲外音控排秋中潦晚霞映層水隔岸見烟草

地迫市無喧情親客皆好當杯容我酣振策恣幽討
口如洪河懸氣與諸峰杳山水偶裴徊心神遂縹緲
况吾賢主人興寄棲羣表琴清聲不繁賦就梅開早
作意挽頽波中流鼓輕棹頓使狂瀾安稍以潤梁稻
獨惜亭四隅碑碣徒擾擾風流豈無人殘墨堪一掃
敘語未及終斜陽在山少林巒却望遙空翠猶了了
大醉得人扶據鞍忘我老千家燈火光不覺山城小

臨署雜詠十二首

宋廣業

思補堂

吏散鶯啼退食遲焚香靜坐有餘思誰言衾影能無
愧正是心殷補過時

迎旭堂

曉日初明出震方八窓洞啓迓晴光舉頭自是長安
近竊效傾葵向太陽

瞻雲樓

憑高極目五雲開瑞氣氤氲自北來遙識宸居衆星
拱中天萬象正昭回

舞綵軒

南北迢遙定省違數緣新構奉庭闈敢誇祿養陳珍
膳聊學孩提戲綵衣

射圃

閒同射耦聊觀德六藝兼通此一端試看太平無事
日山城長得保民安

豐慶園

嘉名特錫此園中但願時和慶歲豐隙地盡教栽稼
穡民依彷彿見豳風

介齋

夙夜齋居慎自持心堅如石幾曾移三公不易前賢
操望古常懷柳士師

梧桐書屋

一庭敷蔭葉萋萋掩映簾櫳翠色齊解帶調琴殊自
好高枝應有鳳來棲

雪浪石

玲瓏一拳秀移來貯盆盎疑是定州物蒼巖題雪浪
齋以介為名庭中峙尺璧

石在介齋庭中

擬欲攜之歸得毋傷

清白

用坡公句

蓮花池

亭亭翠蓋氣迎風
菡萏初花映水紅
不染汙泥比君子
聊將微尚托元公

牡丹臺

鬪豔休誇百寶闌
洛陽名卉殿春殘
官貧却愛花如綺
不作人間富貴看

宛在軒詩十章

有序
見前

葉映榴

萬里乘風仗此航
一篙香水憶橫塘
碧紗開處湖山好
暫泊西灣似故鄉

空濛不見錦帆涇
況是殘冬密霰零
卻賴西風吹得穩
蓬窓已對牡丹亭

大雪初消烟霧清
要乘月夜剡溪行
解維不用黃頭櫂
船尾曾無打鼓聲

書画移來貯此中
玉簫金管溯春風
晚晴好繫垂楊岸
樹裏桅燈萬點紅

陸海無潮水不鹹
終朝倚棹傍雲巖
他年若告江東假
不向長康借布帆

回頭披舵欲如何
志在澄清擊楫過
宦海浮沉憑一

葉急流終不畏風波
船頭闌楯似高臺可是昆明習戰來遠望却如天上
坐桃花春漲不教開
江南生長羨漁家簑笠衝風壓浪花此地偶逢新雨
足可能移棹釣魚蝦
十丈長艣踞上流朱闌碧檻看來浮憑他多力渾如
冢敢說生平善盪舟
門外全無車馬喧青山兩岸不聞猿陸居非屋船非
水只合名爲宛在軒

宛在軒十首和葉蒼巖先生韻 宋廣業

官閣蕭閒類野航憑闌錯認白公塘原知宦海無歸
着覽泊山城似故鄉
仰天報國心徒赤對月思親淚暗零縱使片帆風正
利何如放棹返林亭
雪霽雲巖天氣清半塘昔日記曾行而今一枕江南
夢煙水空濛欸乃聲
無限憂思小艇中羈人愁水復愁風晚來疑傍蘆花
岸牕外斜陽一抹紅

河水微甘海水鹹世途歷盡盡巉巖問津直欲乘槎
去咫尺銀河擬挂帆
一船風月意如何倘有王琪張亢過使舵晏稍今已
正危磯端不畏風波
笑他水榭與層臺不及吾家画舫來四面雲峰俱入
望一簾蒼翠為誰開
天涯到處即為家風簇浮漚水聚花只有秋高最堪
憶松江鱸膾太湖蝦
籬根疏濬引泉流彷彿移家水上浮春漲浪高應有

待乘風萬里一孤舟

琴書滿載遠塵喧還望青鸞與白猿忽報故人遠相
訪停橈抗手接高軒

贈臨城縣趙廣文懿源

葉映榴

才華卓絕冠羣賢絳帳晨開手一編篝火談經常達
曙生徒算曆欲忘年盤炊首蓿和羹美句艷芙蓉映
日鮮借問風流誰得似平原時譽舊翩翩

贈臨城縣孫廣文眉

葉映榴

芳蘭竟體口含馨領袖諸生校六經雙規尚分淮水

碧一瓊遙接太行青籠中多採參苓貯帳後能翻樂
部聽今日幸窺孫綽賦相將回首息波亭

宋明府第二子出見年甫六歲拜揖成禮耳白

過面下垂如珠因以貽之

葉映榴

因訪而翁得見而春風變化有鯢鮪他年雲路垂天
翼定是趨庭大耳兒

蘭茁階除滿室香休誇童子奉車郎從來小宋魁天
下記取君家政事堂

蒼翁以詩貽稚子志益賦謝

宋廣業

駒齒尚未落何當錫大篇但期能早慧慎勿負前賢
勤謹殫吾職詩書賴爾傳槐堂有故事屬望繼蟬聯

雪浪石

石在介齋中余以其形
似也遂以此名贈之

葉映榴

奇巧青山色玲瓏白石盆定州移到此猶帶太湖痕
也足跨坡老真堪拜米顛介齋看玉立應不讓平泉

乙丑除夕二首

時寓臨城

葉映榴

今宵恰恰在春前花信先從漏刻傳客裏看人忙到
夜鏡中笑我暗添年同為遊宦逢賢主共見新星換
舊天一醉不堪誇守歲青燈留燄照孤眠

此身無歲不天涯今夕燈前轉憶家料得老親思綵袖因憐新婦領椒花弄孫雖有含飴樂遊子難將視膳誇南望故園千里外太行山外白雲遮

丙寅乙丑二首

葉映榴

醉裏微聞曉漏催薰香猶撥舊爐灰雖無絃服追年少但掃華顛及老來萬國此時隨仗散一鞭滾望及春回

謂望梅崖
觀回也

他鄉風日頗晴暖三徑梅花開未開

客中冠佩不朝元徧揖親朋似故園萍梗因風依北道韭花入饌得南飧偶開倦眼為遊戲欲脫冬衣且

負暄此夕賓筵思壽母遙擎栢酒祝春萱

留別宋明府二首

葉映榴

飲饌常供數十人一飧能令主翁貧火添商陸過殘臘酒送屠蘇又早春醉裏生平多說盡客中肝膽轉相親臨歧愧汗兼珠淚併下沾濡馬足塵不知別後各何如南北音塵看手書風月我思雪浪石江湖君羨武昌魚一官清白憐同調千里家園念倚閭相訂宦成齊解組山塘佳處結茅蘆

酬別葉蒼巖先生入楚之任

二首

宋廣業

知已天涯有幾人君能樂道我安貧襟懷落落淡如水笑語融融藹藹若春恨不易逢偏易別喜今相見倍相親何堪忽唱驪駒曲又逐征途車馬塵別時情緒各紛如別後無乖一紙書赤壁迢迢憑隻雁湘江渺渺惠雙魚得閒載酒尋潘老休事投閒弔屈閭虛席旋看宣室召承明會直舊時廬

先生係廬常外轉

臨城宋明府偕趙孫二廣文及喬百一諸明經

上舍餞飲蒼巖祠即席賦謝 葉映榴

醉來輕欲別臨發重分攜班馬心馳北離筵日漸西

一聲無故咽雙眼忽然低幸是春初草王孫路不迷蒼巖祠下路杯酒餞蒼巖碩果容誰剝同心合筮咸古情溪水澹世味鮑魚鹹無物堪留別牋詩手署函

蒼巖祠餞送蒼巖先生次荅 二首 宋廣業

蒼巖山下路好友惜分攜把酒不忍別斜陽已向西馬嘶衰草亂鴉散暮雲低何處荆襄道茫茫烟樹迷座中推老輩氣象自巖巖

謂百一先生

顧我同樗櫟諸君盡

籍咸雨雲多反覆嗜好別酸鹹此去無他屬時時望

寸函

贈喬百一

宋廣業

忠節昭前代清風繼後賢望推遺老重名讓布衣傳
邑乘徵文獻如椽續舊編愧余真俗吏還喜共周旋
攝理渚陽水泊為害余先請蠲賦隨濬漳淦下
流不兩月而水歸故道喜賦 宋廣業

聖朝念切求民瘼呼籲微忱徹九天

大中丞于振甲先生特疏蠲賦 兩

月焦勞除積患一時蠲賑荷生全功成溝洫田家利
名紀河渠太史編敢謂代庖非我事此行似不負前

賢

前任令尹今少司農王麓臺先生請之于上委余攝篆

功德祠詩

孝廉 孫 暘 常熟

孝廉當日未居官格外施仁濟物難清白久聞貽子
訓租庸不惜代民完祠高遙拱盤山秀澤暖常消泯
水寒捍患禦灾符祀典芳名留與後人看

相國

徐元文 崑山

十年風雨憶山村壯志凌雲功德存囊解千金非市
義澤流萬姓共沾恩春秋享祀同樂社祠宇崢嶸耀
薊門一自遼東愁化鶴空餘野老泣聲吞

太學生 弟 涵 溧陽

仁人百世自流芳廉吏居官本義方已見捐金輸國
課更聞貯穀弭災荒澤施房子詒謀遠廟祀恒山食
報長今日几筵一瞻拜脊令餘痛淚淋浪

太學 吳 藹 吳縣生

百尺棖題煥千秋俎豆崇吳山鍾間氣泝水播仁風
鬻產蘇民困貽書訓子忠瘡痍看盡起膏澤喜常融
合展明禋典難忘捍患功謳思留北地賁志限南宮
謝傳亡來久羊曇恨未窮低徊拜祠下淚洒夕陽紅

浙江 王 揆 太倉學院

粵稽古祀典功德食報長捍災與禦患春秋重烝嘗
太翁起孝廉品望逾珪璋鄉里頌頌德海宇慕文章
長君令房子種花學河陽絃歌訖四境畿輔稱循良
無何天降虐草野罹奇荒仇離病未起逋賦愁難償
雖有賢父母剜肉難補瘡維時公在籍聞之正徬徨
變產攜千金慨然代輸將餘貲備旱潦貯穀盈倉箱
溝壑日以起瘡痍漸以康窮簷與蔀屋感泣淚數行
昔我過恒山謳歌載道旁太翁雖已逝民心永不忘
願為公報德廟祀比桐鄉有司從所請士民爭趨蹌

庀材復鳩工不日成祠堂棟梁何崇隆丹堊何輝光
盤山峙終古泝水流蒼茫山川永不改明德千年彰

北直
學院 顧藻 崇明

仁風被一邑高義重千秋慷慨非同俠瘡痍早厘憂
蠲金輸國賦貯穀為民謀功比堯峰峻德同泝水流
謳歌滿茅舍遺愛徧遐陬騎箕悲逾切專祠志未酬
烝嘗符祀典廟貌報洪庥竊抱羊曇痛追崇永勿休

孝廉 吳諶 長洲

人生三不朽功德居其二緬維古人中求備良非易

我舅孝廉公宿學抱經濟時懷澤物心拯救靡不至
長君令臨城雅化並馴雉撫字與催科一一凜公誨
忽焉天降災生民鮮活計戶口幾流亡閭閻漸凋敝
公聞長歎息輾轉心如悸先世有遺產不惜千金棄
驅車泣花封為民償國稅稅足尚餘金積穀為荒備
起彼溝中瘠置之衽席地萬戶獲安全皆拜我公賜
臨民感公德謳思永勿替巍巍建崇祠烝嘗歷千禩
酬德與報功真不忝斯義

酬德報功于大中丞
手書祠內扁額也

庠生 謝有輝 長洲

男兒生當封侯死廟食二者自古難並有但令功德
在人名在史百世難忘堪不朽我師宋公忠臣子滴
血尋骸事傳久齟齬之年以孝聞物望羣推鄉祭酒
提躬績學衆不如五十始獲登賢書哲嗣繼起善爲
政出宰房子才有餘愛民如子清白吏一秉庭訓爲
治理歲在甲子天降災大旱赤地幾千里公時聞信
心憂傷救焚拯溺食不遑不惜捐金鬻遺產軀車亟
走恒山陽代民完逋踰六百欲起瘡痍肉白骨積粟
還紓來歲憂處處炊烟生冷突歡聲動地夜祝天願

公介福躋大年胡天不弔遽奪公如喪考妣摧肺肝
巷哭哀哀淚成雨耕耨耨耨耨耨耨耨耨耨耨耨耨
典不日鳩工建祠宇吁嗟乎子居官父遺愛古昔罕
聞傳紀載捍大患禦大災春秋俎豆何忝哉櫟題何
赫奕粲盛自豐潔焚香伐鼓競羅拜四時報賽勤勿
絕盤山鬱鬱泝水悠悠銘功載德靈爽長留當時施
濟不望報豈知今日廟食垂千秋吁嗟乎男兒如此
志亦得安用更封萬戶侯男兒如此志亦得安用更
封萬戶侯

太學
生 陳培脉 長洲

捍禦紆民困酬功自不輕子登循吏傳父得惠人名
遺產千金棄流風百世傾春秋修祀典尸祝遍臨城

其二

未得居官位恩從局外施孝廉仙去久父老至今思
祭比樂公社名齊子產祠盤山泝水路過客幾題詩

臨城縣志卷之十

知縣事長洲宋廣業重修

述考志

事紀

周敬王四十九年冬十一月趙稷奔臨十二月弦施

逆之遂墮臨

安王二十四年趙與中山戰于房子

魏文侯雖克中山不絕其祀及武侯擊嗣

位中山復興與趙構兵日紛紛相尋矣

赧王八年趙畧中山至房子

先時中山負齊之強攻取趙地武靈王十九年春正月大朝信

宮乃召肥義與議天下事五日而畢遂畧中山之地

四十年趙廉頗攻魏房子拔之因城而還

漢王三年韓信下趙井陘斬成安君陳餘於泚水上

擒趙王歇

漢更始二年大司馬劉秀自薊走信都發兵擊中山

拔盧奴真定元氏房子皆下

時真定王楊起兵附王郎衆十餘萬秀遣劉植說降之因

納楊甥女郭氏爲夫人進擊元氏房子皆下

唐中宗朝

李乂第進士茂才異等調萬年尉擢監察御史遷

中書舍人昭文殿學士進吏部侍郎知制誥典選
事改黃門侍郎封中山郡公

唐玄宗朝

開元初李乂爲刑部尚書未幾卒贈黃門監諡曰

貞

宋真宗朝

王醜舉進士第授婺州觀察推官代還遷秘書省
著作佐郎知祁縣通判湖州遷太常博士提點梓
州路刑獄權三司戶部判官使契丹以尚書度支

員外郎兼侍御史出知湖州徙蘇州爲三司鹽鐵副使擢天章閣待制判大理寺後以左司郎中樞密直學士知益州

宋仁宗朝

景祐四年王醜拜右諫議大夫同知樞密院事

寶元元年王醜參知政事

二年王醜遷工部侍郎知樞密院事

三年王醜罷知河南府旋卒贈戶部尚書謚曰忠

穆

元招討使耶律天祐從元帥史天倪畧趙州臨城等縣籍其民五千餘置吏安輯之

元統二年嘉禾生

有記

明洪武 年歲貢生馮彬選授江西道監察御史

洪武二十一年戊寅遷山西澤潞二州民之無田者安置真定等府開墾荒蕪免其賦役仍戶給鈔二十錠以備農具

永樂七年歲貢生楊和授吏科給事中

九年辛卯賑臨城饑民三百餘戶給糧三千七百石

有奇

戶部疏請上曰國家儲蓄上以供國下以濟民故豐年則斂凶年則散但有土有民何憂不足隋開皇間大旱民飢文帝不肯開倉賑濟聽民流移就食未歲計所積可供五十年倉廩雖豐民心不固煬帝無道遂至滅亡前鑒具在今後但遇水旱民飢即開倉賑勿令失所

十三年乙未監察御史馮彬陞南京工部右侍郎

十四年馮彬免

十七年己亥吏部給事中楊和陞南京工部右侍郎

十八年庚子令真定府屬州縣養馬人戶二年一算

駒俱免糧草一半

洪熙元年乙巳工部侍郎楊和奉命四川採木

本年被論免

正統七年壬戌薛幹登進士第授行人司行人

一年行人薛幹奉命占城封王踰年復命歷陞

遼東苑馬寺少卿

九年甲子知縣阮居仁修理學宮移聖殿於正北上

四十二步改舊址為戟門

成化五年己丑薛珪登進士第

七年辛卯夏四月大旱民饑流移時大旱又雨雹二

麥枯槁斗米百錢民流殍四方不可勝計

八年壬辰知縣王理新增三社號曰新析民

十九年壬寅夏六月蝗傷稼

弘治七年甲寅春三月大疫民死者無算

十四年辛酉秋七月大水衝毀西城湮没人畜

時泚水泛溢城

郭通衢水深丈餘壞民居不可勝計城西面被衝因堵西門

正德五年庚午六月黑青大作

黑青不見形遇人輒刺面流血居民晝夜恐怖喊呼擊鑼

鼓以驚之

六年辛未冬十有二月十一日流賊劉六劉七等寇

臨城主簿張俊死之

見名宦有傳

賊殺烈女蔣氏

訓導蔣鉞女名安閒

因救父母被殺有碑記

十三年蝗大饑

嘉靖八年己丑夏六月蝗蝻食禾稼殆盡民饑相食

詔作粥賑恤之

九年庚寅春三月大饑疫山下村民周佐食妻及子

時隆平贊皇等縣皆大瘟疫人死過半臨民周佐食妻及子其事尤慘巡按御史蔣賜施方藥以濟之間有全活者

十一年壬辰穀秀雙穗

十三年甲午知縣党承美築土堤於西城外以防水

患

十四年乙未秋九月星隕大如斗

羣星百數自西流芒入東南頃刻天鼓震鳴如

雷

十五年丙申冬十月地震有聲

十八年己亥冬十二月令真定府屬州縣暫徵折色

馬價

三十一年壬子知縣王永興創修縣志

三十二年癸丑夏秋淫雨大作兩月有餘傾城池房

屋墻垣殆盡斗米錢百五十文餓殍盈野詔多方

賑濟之

三十五年丙辰李世藩登進士第

三十九年庚申飛蝗蔽天歲大饑民流移河南者大半

四十一年壬戌流民復歸

三月戶部主事李世藩奉命總理三關糧儲

偏頭寧武雁門

三關

四十五年丙寅旱六月始雨

隆慶二年戊辰知縣高常增築城墻建門樓三座角

舖四座敵臺十四座月臺二座遷南門稍東

三年己巳秋大雨連綿泚水泛溢衝去西南城三十

餘丈毀南門

五年辛未趙世相陞山西按察司僉事備兵寧武

萬曆六年戊寅知縣余啓元創建石堤於舊土堤之

外

八年庚辰喬壁星登進士第授河南中牟知縣

十四年丙戌喬壁星為山東道監察御史

十五年丁亥御史喬壁星奉敕催督漕運

有請復河道總理官一疏

見藝文

十六年戊子御史喬壁星巡按應天

十九年辛卯御史喬壁星巡按山西前御史王之棟

以言事降山西交城典史壁星上疏救之

疏見藝文

二十一年癸巳御史喬壁星巡視京營

本年九月告歸省親

二十二年甲午邑士公舉封中牟縣知縣喬輔世入

鄉賢祠

二十四年三月二十二日午時地震有聲

四月隕霜殺麥

二十五年丁酉正月喬壁星服闋復為山東道監察

御史

時候補臺省者未得盡補喬星先補請緊補以廣言路疏見藝文

三月二十一日大風霾晝冥如夜

狡倭背封約謀犯朝鮮御史喬壁星上疏請亟更

樞臣以早定戰守大計疏入不報

疏見藝文

知縣程鵬搏重修縣志

六月十三日大水漫堤知縣程鵬搏建議加修

申文

見前

六月十九日三殿災有詔頒示中外七月二十七

日至臨城開讀御史喬壁星上疏請信詔旨行

實政以弭天譴不報

疏見藝文

二十六年戊戌春不雨泚水河竭知縣程鵬搏加修

護城石堤一百九十五丈較舊堤加高三尺厚四

尺以三月十五日起工七月七日河堤告成

六月御史喬壁星掌京畿道照刷北京文卷

次輔張

罷有旨論相御史喬壁星疏請博求端

揆以清政本

不報
疏見藝文

一十七年己亥御史喬壁星陞順天府府丞署府尹

印

三十年壬寅知縣盛治徵修南城及北關門易以石

三十三年乙巳府丞喬壁星陞大理寺左少卿

冬喬壁星復陞都察院右僉都御史巡撫四川提

督軍務時四川土司安堯臣奢世續協謀作亂

匿印抗命喬壁星疏請討之不允

三十七年己酉大荒

三十八年庚戌大飢有食人者

四十一年癸丑四川巡撫喬壁星告歸卒

三年中九疏乞歸皆不報至是

得歸抵家十二日而卒

四十四年丙辰歲荒人食蝗

四十七年己未喬若雯登進士第授中書科中書舍

人

派遼餉一年旋即停止本縣獨不停止

天啓元年辛酉二月十八日天雨土

二年壬戌六月大水沒堤東山陷

城東南堯峰岡陷十餘丈深六七尺

七年丁卯春公舉四川巡撫喬壁星入鄉賢祠

禮部主事喬若雯扈送瑞王之國漢中府督沿途

祀事

崇禎二年己巳二月風霾晝晦

禮部主事喬若雯復命上書言瑞王沿途之苦劾
魏忠賢傾陷親藩並論賢姦諸人奉旨俞允用
四人卹二人處六人

四月調喬若雯為吏部主事

三年庚午命吏部主事喬若雯典試陝西取舉人楊
畏知等七十二人回陞山東兗州府知府

四年辛未兗州知府喬若雯以病請告回籍從此杜門
教子有終

焉之
志

五年壬申正月初四日流賊掠西山趙莊等村

五月掠西山等村攻破石城南門焚殺共傷二百

六十餘人井陘道中軍守備崔繼泰迎戰於趙

莊全軍覆沒繼泰陣亡

賊首姓賀自稱陝西飢民願求招安
時缺知縣莫敢許賊眾遂肆猖獗

本縣典史楊繼卿解餉軍前遇害

奉旨贈臨城縣主簿
家人扶柩給與路費

入名
宦祠

郝莊村民李松園妻高氏漆峪村民王有澤妻梁

氏岡頭村民劉改宅妻趙氏灰林村民魏登科

女魏三姐俱死節

以上四人俱詳烈婦志中

井陘兵備道寇從化領兵鎮守往來元氏贊皇臨

城三邑之間半載

巡按御史衛楨固奉命察勘西至石城

十一月流賊大掠西南北三面鄉村至栢鄉寧晉
而回

大名兵備道盧象昇領兵自栢鄉來西入淡山勦
賊賊衆聞名遠遁內丘告急遂自栢暢之內丘
闔縣歡呼迎送

總兵鄧玘奉命來勦賊寅夜引兵至栢暢村斬獲
七十餘級

賊衆漸近知縣于日旺知其必來侵城自引兵在

城埋伏用炮擊退賊從此不敢窺伺

前後引兵至者惟遊擊田  既能殺賊又不擾

民民甚安之此一年之內官紳士民在城在鄉

總無安枕西偏一帶人民盡攜家入城學宮寺

廟官民閑房填塞俱滿幸保無事

十一年戊寅九月喜峰口有警官紳士民復備辦守

城諸事務

十月有旨在籍官員與有司協守城池功罪一體

同論

十一月二十四日城門閉

十二月初三日城陷知縣蕭時勉死之

同時殉難官紳士庶男婦姓名

見任官二員

署印訓導張醇儒

典史趙世楨

鄉官四員

吏部主事喬若雯

南陽府學訓導劉源清

兵部守備喬若霞

陳州衛候缺經歷岳自重

生員馬騰雲

趙其廉

趙汝鎗

孫益菁

以上廩

喬卽登

趙煥然

李于化

杜廷弼

以上增

趙祖襄

趙祖懋

孫羽儀

劉光祚

劉胤祚

張弘濟

趙琅

喬欲楨

龐嗣統

薛懷禮

劉祖堯

趙瑞

以上附

武生趙汝鈐

喬順則

張施溥

雜職龐士英

儒官

孫善述

儒士

趙治本

醫官

兵民趙一藺

劉思香

于轉江等

婦女生員龐士風妻馮氏

民趙一轍妻任氏

趙汝鈐妻張氏等

北門城樓及縣署六房大門典史教諭宅宦舍民房內外俱燬

十二年己卯春土賊大亂

五月十二夜土賊攻東城壯丁師餘糧等擊退

十三年庚辰大旱蟲蝗斗米千錢民剝樹皮掃蒺藜椎草子以食祖孫父子兄弟夫婦俱有相食者真定知府范志完繪饑民圖以進工科給事中范士髦代獻之詔發御前銀賑濟臨民得八百兩

十月初一夜土賊焚掠北關三街攻西城一夜城

上炮石擊退

十二月巡按御史韓文銓統兵勦撫煮粥賑飢親

臨粥廠放飯

井陘兵備道桂一章親臨竹壁寨招安斬其渠魁

二人良民悉受招安下寨進城居住事平方回

設練總

欽定保民四事全書一冊
各州縣添設練總一名

十四年辛巳大旱瘟疫盛行民死過半

十五年壬午大荒知縣王繼祖教民食蓬子

井陘兵備道楊汝經發粟賑飢

二月縣民劉增盛趙力仁張九思詣闕上書極陳

荒殘情狀懇蠲賑工科給事中范士髦為轉達

之

十六年癸未春城守復戒嚴至三月以後方解

三月逃兵掠射獸等村

十七年甲申三月初四日闖賊偽令段獻珠來上任

索餉銀毀坊扁免荒稅

四月流賊掠泥河等村

偽防禦使白足長來巡察殺刑房吏王光嗣

五月初七日知縣王繼祖率縣民擒偽官段獻珠

初八日流賊攻北城索偽官聞官兵至遁去

十七日知縣王繼祖復任

衆人擁戴之也

二十二日闖令段獻珠伏誅

大清詔到各府州縣夏稅秋糧悉照萬曆初年舊額

順治二年乙酉秋七月薙髮

三年丙戌易冠服

七年庚寅改朝儀

康熙三年甲辰三月三日大風傷人

七年戊申六月十三夜大風雷雨拔木偃禾

七月初八日大水圍城

自初二日大雨連日不止至初六初七則連夜不止矣初八日自朝

至午雨若盆傾水自西岡至東岡南岡皆成一片潰堤直入三面圍城獨留北門一路傾城出避于北郭閣廟獨縣官與已百兩人看守午後雨止水瀉如注人心始安各歸家室初九日大晴倒塌官民房屋無數衝去地畝見後

十年辛亥春旱五月不雨六月酷暑傷人

東北鄉與柏鄉相鄰地方一夜

有熱死至二十人者

蠲免錢糧

康熙七年水衝沙壓上中下小白地若干頃屢次委官檢踏上下清算共折徵糧地一十頃零二畝七分

此年文到盡行蠲免

十一年壬子作墻濠

時以地方多盜巡撫金世德建議各村莊俱要墻濠如府州縣城池之例墻高八尺

收頂五尺濠深八尺闊八尺

十六年丁巳丈量地畝

荒地既多賦稅缺額奉文清查令民自首

二十二年癸亥五月五日雨雹

十月初五日地震

二十三年甲子大旱賑濟饑民

時本府通判王懋功奉文來賑知縣宋廣業散給有方饑

民四千五百餘咸得均霑又封翁孝廉宋宓聞臨邑飢荒鬻產來臨代無力之民完本年錢糧六百三十餘兩又捐銀三百兩于次年春買米煮粥賑濟其詳俱見喬已百記

二十四年乙丑七月初二日大水齧堤

水勢洶湧直撞西門已入而復出者再決

堤數丈知縣宋廣業虔禱於神撤額屋為椿東柳為埽盡力捍禦三晝夜水乃退西門外滙為一潭宋侯隨築決堤并修息波亭以祝安瀾

二十五年丙寅知縣宋廣業增修縣志

夏四月不雨閏月五月不雨飛蝗蔽天宋邑侯齋宿城上夜半太風作蝗入西山中死又日夕禱雨郡廟六月得澍雨旱不為災

冬十二月知縣宋廣業丁外艱士民追念封翁宋孝廉宓蠲賑之恩建功德祠于北關外春秋崇祀二十六年五月初三日趙州知州李夢白奉文詣功德祠舉行始祭

禁約

釣盤山禁約碑

臨城縣為培地氣壯龍脉以昌文運以固國本事據志書所載城東南五里許有釣盤山一座東至官道西至廷字堡北至泚水河南至民地連珠峰翠起伏若龍環連丙丁之方一縣文明之氣此山主之聞有豪強恃勢圯毀斷絕龍脉因此示諭槩縣軍民石工人等自此以後再不許鑿石圯坎即前後左右種地人戶亦不得借口糧地故意開墾敢有兇豪不遵法

紀仍前擅圯者許諸人指名稟縣鎖拏重責枷號申
究決不輕恕恐年久易于違犯故令刊石永為遵守
使文明風氣常新古跡萬年不朽特諭
萬曆四十二年九月初十日知縣王佐才立
萬曆四十五年九月二十日知縣劉永茂重立

刑部禁約碑

在縣門左

刑部為三陽伊始萬物維新仰體聖明好生之德申
飭紀法以重民命以保太和事天啓四年二月二十
日奉本部送刑科抄出本部議覆大理寺卿林題前

事內稱詞訟一事禁約官民者共八條 一人命自
有正法不許移屍搶財 一盜情未入監即審不許
攀及良善 一有男子可告不許告及婦女 一告
詞須真正鄉貫不許冒籍匿名 一一詞只告一事
不許變幻多情牽告多人 一人止告一詞不許
更名圖准多插黨與為証 一原告不出即便立案
不許躲閃拖累 一事已經結不許聽唆希圖翻案
天啓四年甲子秋七月知縣劉光宇奉文立石
奉憲申飭野狐舖交界無護送銀鞘例碑

直隸真定府趙州臨城縣為護送銀鞘各有分界事
蒙本府帖文抄蒙本道憲票蒙總督部院馬 批據
內丘縣申前事蒙批仰井陘道嚴飭報等因通行到
縣奉此遵行間案照先蒙本府帖文蒙總督部院批
委清軍廳同知杜親詣野狐岡踏勘得銀鞘大事從
來檯送必由驛路此定例也內丘栢鄉兩縣驛遞相
通凡銀鞘在內丘牌由內丘徑到栢鄉護送接替從
來無扳臨城之例因臨城原無驛所銀鞘之來不由
臨城不惟不能支亦猝不及應也今踏勘已明除內

丘徑送栢鄉無詞再與兩縣從公議妥各願聽從永
無爭端等情申報本部院蒙批如詳行繳等因通行
到縣遵行在案已經二載矣昨卑職未任事之前內
丘署官不遵舊例不查地勢妄申憲臺強扳臨城護
送似乎于理不合而臨城署印梁教官亦以事不切
已唯唯不置一言卑職切思銀鞘一事關係匪細經
由驛路南縣直送北縣取有北縣印信甘結方完南
縣之事此舊例也已于順治三年三月內蒙撫院于
題請欽遵在案矣况道旁下縣不獨臨城已也即如

卑職舊任真定縣真定之南有樂城銀鞘自樂城來必由獲鹿地方十里方接真定縣樂未嘗板及獲鹿以獲鹿無護送之例也真定之北有新樂銀鞘自真定去必由藁城地方五里方接新樂而真定亦未嘗板及藁城以藁城無護送之例也今內丘署官不查舊例不達地勢妄行申擾是一舉而三失之矣卑職若不預為請明恐臨城有事互相推諉均難辭責懇乞憲臺念

朝廷錢糧為重俯查成例仍令經由驛路護送申飭

于未事之先庶責成專而任事切錢糧可保無虞矣等因通詳申報合于上司訖隨于本年十月內蒙巡按御史陳批野狐岡一望荒地不見村落似難責以護鞘果否有成例仰真定府查報蒙此又于本年十一月十九日蒙總督部院馬批仰井陘道查例確議報等因備行到府蒙軍捕廳孔確查去後續准該廳會稱為照銀鞘重務必由驛路而行即護送者亦必驛路州縣也從來定例誰敢違越况近奉部院憲行曾委去任杜同知同內丘栢鄉臨城三縣親詣

野狐舖公議南來銀兩內丘護送直抵栢鄉北來者栢鄉直抵內丘各取印結存照臨城委無護送之例且于三年間蒙撫院于具疏題請欽遵在案矣今內丘不查定例與夫題准之案而妄為申擾欲求委卸其可得乎今准來關確議相應行令內丘遵照前議勿令嘵嘵多事也等情關會到府准此為照銀鞘一事屢奉上臺嚴飭自有成例今既該廳查明妥確前來似應照轉除呈詳本道轉詳外相應呈請本院批示行令本縣遵奉施行等因照蒙巡按御史陳批護

送銀鞘既經公議妥確况奉題請欽依何內丘之多事也仰府嚴飭遵行繳又蒙總督部院馬批護送既有舊例內丘縣何得妄申仰該道嚴飭遵行繳等因俱批到府蒙此擬合就行為此帖仰該縣官吏查照批詳內事理遵奉施行仍具遵行緣由報府轉報查考須至帖者

順治十年正月知縣陳謙典史金弘達立石

太行山說
附喬已百隨筆雜記

太行山說

太行天下之脊也北至于燕然南至于黃河其山隨地異名隨勢異形不可執之曰此為太行此非太行也今一統志真定府志趙州志俱云在臨城臨城邑志直云在縣西九十里是皆見其偏未見其全也按山海經郭註云在河南野王縣西北禹貢註晁氏據地志在河內郡山陽縣西北野王山陽皆古名即今懷慶府是也古書可據果得其實耶譬之天周天三

百六十五度指一度而言之曰此天也譬之地南北三萬六千里指一里而言之曰此地也人有不非之者哉見其偏而不見其全知其所見而不知其所不見太行之爲山亦猶是也夫北至于幽南至于豫縣亘千有餘里乃真太行耳請窮其源本分其正從而歷歷言之朱子曰河北諸山皆自雲中發來則其自北而南無疑矣其大嶺之外自北而來者首曰九珠山勢若長城其色白三峰相湊如蓮瓣清秀可愛自北望之尤顯此山去城百二十里九珠山跌斷復起

而爲三鳳山坐坤向艮左乾右巽三峰拔地而起插天如削曰東鳳中鳳西鳳譌爲三峰者非形勢家呼爲太祖山臨城之根本也三鳳山跌斷復起而爲鐵山山多大石黑質如墨白文類筋木多漆楸此山稍平夷西高東下邇迤十數里至葦塲村撒馬寺而止山半有平地一區一水清冷可茹萬曆初年有南僧宗曉來自京師徧選西山而卓錫于此獨居四十年種松栢檜數千株遂爲一方巨觀初構草亭漸成寺院名之曰鸞喜蓋取鳳鸞相配之意然而實鐵山非

三鳳也崎嶇峻峭翳菁葱先奉常之所甚愛余數遊覽而名其峰巒岩岫十餘處具別楮此山形勢家呼為辭樓下殿降至平原有大水斷之過水突起而為紫金山上有草堂寺下有甘泉院邑人呼為空山寺余親至其寺攷古碑知為紫金山甘泉院山海經云太行多金玉或者此其是耶極巔曰雲天砦可以眺遠形勢家呼為少祖山自此山而下東北行皆微岡曲阜擺折飄蕩狀類波濤形勢家謂之萬馬奔馳約三十里而至天臺山其入首處為嚴光崖純石無

土突兀峻嶒形勢家呼為駐蹕山四圍羅列員者方者平者直者曲者鋒銳者一一呈形獻態而五行皆具矣形勢家以為大瑞其勢東行一山獨峻其巔中斷而多風兩縣之界山也形勢家以為中台左有伏牛山右有一山與伏牛相埒三山並峙而兩山少前形勢家以為小三台三台之外左有旗山右有鼓山旗山屬贊皇鼓山即余邑之白山也山在邑治西北亦名小九尖山山北端去縣三十餘里其南端去縣十里中有龍安等峪十餘名而以石布為中峰即鼓

山也中間一脈洩下數里在喬家莊西南岡頭村東北起一員丘純土無石離城八里東南過峽而為董岡自董岡落脈而為縣治垚峰岡峙其左長生岡繞其右釣盤山揖其前董岡擁其後三土為垚垚高也邑東南隅平地曰楊灣以楊司空之墓地存焉釣盤者縣城之面山不大而得山之名泝水經其陰而東流注于彭水彭泝合流而東過盤石峽紅崖口又東南流出堯與干言兩山之中東流入于黃阿澤止焉若水大則從堯山之內而東北流亦至于大陸澤此

二澤皆非臨城地及之者彭泝之結局也更從其左右言之鐵山之北為驢駒嶺口口之北有一山最大高出于衆山者曰蓮花池蓮花池者山頂有池可三畝土人種藕其中花開茂盛遂以為名鐵山之左臂也鐵山之南有一山尖秀狀類蓮花稍折而東北注內丘之蓬山也一曰鵲山山巔曰太子岩雖不同境實鐵山之右臂也三山相並而為大三台天池山而下羣山不斷有迥然秀幽者數山曰杏山曰青龍山曰西聚米尖東聚米尖皆萬馬奔馳之左護也太子

岩而下而北而東曰永寧山曰螻屈山曰黑山曰灰山皆萬馬奔馳之右護也

杏山今名杏樹砦青龍山今名青龍砦永寧山今名乞了砦

縣

城陽基神龍戲水首穴結衙署次穴為學宮據形勢家言額顱鼻顙皆不宜鑿破而蒞茲土者往往拘通例必欲開泮池不旋踵而得奇禍屢試屢驗矣又按舊志有敦與山云在縣西七十里人無知者余意此山即三鳳山也何以言之山海經云敦與之山有金玉無草木夫金玉不可知而無草木者獨三鳳山蓋純石而無土故也又按舊志有彭山云見金史今不

可攷余按此山即中丘之蓬山也音同而字譌耳分疆畫野古今不同或者古屬臨城未可知也又按山海經郭註泝水出中丘窮泉谷今中丘無窮泉谷余意此即臨城之彭泉村也音近而字譌耳分疆畫野古今不同或者古屬中丘未可知也要之皆一太行耳在幽燕者深遠在上谷者聳拔在恒陽者莊嚴在臨城者蒼古在中州者開暢一山而疆域不同形狀亦異物產遂別不如此不足以見天地之大安可拘也古人云華山如立泰山如坐余嘗續之曰太行如

行蓋其勢如一大龍大行至河而飲水焉處處皆露
枝脚山以西不可知自山之東而言良鄉一也滿城
二也臨城三也皆越孔道而東者其他小者無論也
此皆吾所遊歷目睹而後敢言之且夫天下之山可
名者五千三百有奇而其最長者則太行終南四明
燕狀數山而太行為最如短則不足以負天下之重
矣吾料中國之山高不可及者匡廬峨嵋奇不可及
者武夷雁宕而太行之長皆過之唐人咏終南詩分
野中峰變言其長也夫一變尚言其長而太行之分

野不啻三變矣安得指一州一縣一坡一嶺而遂謂
之全山也安得指一腰一腹一肢一肋而遂謂之全
身也又安得指一鱗一爪一鬣一角而遂謂之全龍
也今夫名省者曰山東曰山西皆指太行而言也若
但臨城一縣河內一縣而遂謂之太行豈足以當齊
魯汾晉之全哉而又安得謂在臨城在臨城西九十
里云云也於戲天下大矣山川亦大矣人勿自小也
邑人喬已百謹識

泝水辨

喬已百

鐵山之下同源而出二水一在南一在北北水經贊皇高邑至栢鄉而止名曰沛南水自余邑經內丘唐山至任縣而止名曰沛沛水屬陰沛水屬陽沛為姊沛為弟何以知之凡陰水不分枝有灣曲而無分合如高邑內丘之水是也陽水則神通變化不可方物吾邑之水是也凡水不同出而同歸者謂之夫婦其同出而不同歸者謂之兄妹如陰水在左而陽水反在右則謂之姊弟沛即姊也沛即弟也古人之命名審矣今以吾邑之水論之自太行而下迴環曲折會

千流萬派之山泉東行五十里至郝莊而始成大壑滔滔東下又三十里至於三歧村東會三大壑而為一始成大川又會南北諸水東行十五里經監石栢暢山南諸村過白山而入於地中當其入處之村曰磴底曰射獸伏五里而出始成大河橫濶三里如從天而降直撞縣城在昔尚小至弘治十四年衝齧縣城西半從此遂為大患隆慶三年又嚙新城西南一角至於南門而水愈濶余幼時猶及見堤外為土土上種田而今直從城下流矣且分雨水泉水為兩矣

先年之小溝尚在其水初出於穴未遠雖隆冬尚煖如蒸過城三里至南山之下而東又會西南二水經釣盤山北至於解村之東盤石之東馮村之西約十里而又伏伏五里許至於尹村是爲臨城內丘交接之處南北往來孔道也又津津而出正東行二十里而又伏其北有大山曰宣嵒南有小山曰干言水在兩山之間由地中行行三里許至唐山縣西而又出出二十里抵任縣界又東行二十里而入於廣阿之澤距沛水之止處相去數十里其流水之狀及水中

小洲如雲如霞如錦紋如樹杪如龜如鱉如魚如蝦如鐘磬如圭璧千態萬狀不可勝窮遠望之秀色參天金光耀日其中所產之石五色俱備大者如拳小者如錢燦然奪目他水所未有也兩山之中有樹兩樹之中有水條南條北或濶或狹迥與衆水不同者非一二而已也登大山而東望者三大灘其白如雪豎石縣城馮村三坦原也其餘或不見或一線空明皆小也大約自大山發源處至於澤二百里而遙而變化無窮此所以爲陽水也其中必有一淵歷年遷

徙無定云是水靈所居其色碧綠如海而蘊藻溝焉
遊魚萬狀人不敢侵如神去而魚存則遊鱗四逸人
競收之矣其味亦美於他處然不常有大水既退而
小魚成陣逆水而升云是蝻蝗之子遇水而化取之
不窮此又水中之餘事也不具論論水名按山海經
敦與之山泝水出焉而東流注於彭水舊誌亦載彭
水之名而不詳其處云見隋書蓋隋書亦據山海經
而言耳作史者未必身至其地也余邑西山衆水下
平原而成大川者七何者爲彭水平余嘗訪之故老

皆云不知而皆知有彭水之名至於西來大水冲城
而注澤者皆云泝水郭璞註山海經謂泝水出中丘
窮泉谷今詢之內丘之人窮泉谷皆不知處而內丘
別自有水亦以泝名唐山即臨城下流亦以泝名臨
城人止以西來大河作泝水而別有一小水自西南
來則曰沙河一水又小亦在西南自正南向正北而
流者則曰小河余會通諸書及山川之形勢考之西
來大河正彭水也何以知之西來之水千流萬派皆
溝壑溪澗云耳至三岐合三大水爲一流故自此以

下方名爲彭水耳然何以知其非泚水而必曰彭水也蓋三水合流之處適有一村名彭泉初入唐山交界之時又有一村名彭村知皆以水名村也曰既以西來之水爲泚水至三岐爲注於彭水似矣則自此以下皆彭水矣而泚水遂泯泯耶曰非也泚水凡有四在常山者二元氏臨城是也而臨城又自有兩泚水發源太行與泚水各自分流者其一也發源水南寺與沙水同入大河者其二也水南寺村名在城西南三里其水自村南山澗而出穿村北下匯聚廻旋

寬者不過丈餘狹者不過數尺土厓沙底緩緩遊翔千古不崩千古不涸亦千古不冰清淺而多魚土人謂之小河者是也何以知其然也此水北行一里有餘與沙水會又東行里許至於釣盤山下循山之背而東約三里許逾津渡至解村東北而入大河故知亦東流注於彭水者也彭水得此而勢乃盛以彭水常竭而此水不竭故也彭水有斷而此水無斷故也然又何以定其非溪水澗水而必曰泚也曰吾邑原名泚水店至天寶元載方爲縣城是臨城縣者新名

也泚水店者古名也而此水不東不西適當其地故知此亦泚水也元氏之泚水在其邑西南與此相去八十里亦小小一溝渠不過五六里而入於槐水其旁一村名泚屯以韓信曾屯兵其上也其小水入大水之狀與此正同故知亦泚水也夫槐水彭水上下皆一二百里此屯此店適與此二小水相當臨城之泚又與元氏之泚名同而形亦似故知此為泚水無疑然則內丘唐山何因而皆稱泚水耶曰內丘之可稱泚水者以此水亦從其地而過也唐山亦可稱泚

者以此水亦在彭水之中也如此則山海經信隋書亦信凡字書所稱在常山者亦俱信郭璞註經未必一一親到尊經為是敦與山即三鳳山鐵山在其懷抱之中同是一派此即姊弟二水同出之處登高而望則知之矣彭者朋也二鳥並飛之名非姊弟非夫妻兩雄水相並而行若朋友然故曰彭也泚字有四音在平聲曰泚在去聲曰帝上聲有兩音曰抵曰雉而吾邑與元氏皆讀為紙紙即雉也以其不遠即有所抵止故曰抵曰止二義皆是而聲音微有差譌若

以水之形勢論之則讀抵爲優以與兄弟之弟同音而義可相兼也吾邑有水三岔者三九曲者三不止泝流之三伏三現也但人知有彭水之名而不知其處所共知者惟一泝水而又不識其義與音與其起止之踪分合之變姑爲一一辯之以俟博雅之君子邑人喬已百謹識

范公三惠

崇禎庚辰辛巳間邑大荒疫人相食於是耆民劉增盛爲叩關之舉夫君門萬里豈易上聞所以得上之

九重者范公之力也真定知府范志完繪流民圖徧餽京紳覽者咨嗟莫爲入告所以使此圖得經睿覽者范公之力也命下矣例由部覆所以命下即覆覆而即行得賜御前銀賑濟而臨城得賑銀八百兩者范公之力也有此三惠臨城人於范公當社而祀之尸而祝之矣可無一言紀之乎范公名士髦字譽華號麓野寧晉人崇禎甲戌進士時爲工科給事中

賑荒紀聞

喬已百

已百生八十三年矣目擊賑荒者凡五次崇禎十三

年大荒有旨發銀賑濟臨城縣分銀八百兩縣令山西人聲言親下各鄉賑濟其日先下南鄉盡南鄉之境而返不放一錢一少婦餓將死攀轅索賑乃當道褪衣責十板其餘各鄉未去竟已回文賑濟訖矣以後三次賑濟俱照數派銀每名若干或視其貌貧者與之而黠者不免重叠冒領或照冊給發而冊籍不無虛開遺漏或臨期擁擠而飢羸者不能前遂至放畢而空手以回則支放之法未善也惟康熙二十三年糧馬廳王公諱懋功與縣侯宋公諱廣業監放商

酌支放之法令飢民候于南門外一莊一牌地保領之衙官于南門外點名放進縣官于甕城中給帖府官坐倉中照帖給米每人二斗領訖從倉後出倉門絕無擁擠散倉穀一千一百三十七石一日而畢無一人不沾實惠者官不煩民不久候吏不能為奸是可為散賑之法也故為紀

重修邑志後序
臨城邑侯宋公謀重修邑志懿源不敏竊與
司訓孫眉並預叅訂之列若考求事蹟搜輯
藝文則邑中喬百一先生所任也先是明萬
曆間喬中丞公所修舊志已燬于火百一家
僅存一本而又失去以故宋公蒞任後逡巡
二三年薈萃雖勤恐不足徵信必俟舊志合
之公不吝重購得之於鎮內莊於是百一復

重修邑志後序
臨城邑侯宋公謀重修邑志懿源不敏竊與
司訓孫眉並預叅訂之列若考求事蹟搜輯
藝文則邑中喬百一先生所任也先是明萬
曆間喬中丞公所修舊志已燬于火百一家
僅存一本而又失去以故宋公蒞任後逡巡
二三年薈萃雖勤恐不足徵信必俟舊志合
之公不吝重購得之於鎮內莊於是百一復

後序
出其先人恭肅公邑志補及其平日所記載者彙訂之公虛懷商訂不耻下問以傳信爲兢兢務使後世有可考焉夫邑志之修非徒昭往事也其天時早晚之序地利瘠沃之分風氣剛柔之辨善可勸不善可懲無不備載人心風俗繫于是矣職郡縣者往往視爲緩圖倘亦未之思乎公之來茲美政蓋不勝舉盜戢於山虎伏於甯賑饑救困蝗不爲災流

亡復歸老幼無失所即以懿源之謫陋猥任司鐸猶得以稱職蒙遷擢者皆公董率之而致然也而公更欲續成邑志使勸戒昭昭以爲奕世人心風俗計不誠識所輕重也哉惜懿源將行不克卒業然竊幸志之成得附名於公後也故爲識之

康熙丙寅仲秋臨城縣儒學教諭陞授浙江浦江縣令武清趙懿源序




夫教士司訓者職也然司訓位卑視乎博士
之端肅縣尹之振興而後文教乃行此非遇
賢者不能睂來臨城所佐者博士趙公趙公
賢人也所事者縣尹宋公宋公又賢人也平
日振興士習以風勵斯民兩公又能同心以
共事是豈惟睂一人之幸實臨邑人士之幸
也宋公有重修邑志之舉以增訂屬之喬百
一先生又不遺一睂令佐趙公並叅訂之睂

雖不才其敢辭乎於是自天文輿地建置賦
役官師選舉人物藝文述考各別爲志總爲
十卷皆宋公所定而宋公虛懷採納每成一
卷必殷殷下問故睂與趙公得殫心以襄事
焉不謂邑志甫成而邑侯太翁之訃至矣其
時士民共感慕太翁之功德而有功德祠之
建宋公哀痛方深何敢以志事紛請然不可
不思以成之故宋公雖去百一先生以志藁

歸之公謂非公之賢不能成亦不能定也夫
臨之士民不忘公之功德尤不忘太翁之功
德睂與百一不忘公之修志以垂不朽是誠
甘棠勿翦勿拜之大端也於公之行識以數
言睂等望公之意深矣 耑

康熙二十六年仲春旣望臨城縣儒學訓導
孫睂序



其間二十六年中春始望湖堤綠柳學信真
 言餘筆聖公之意彩美
 甘棠之蔭必繫之大
 餘與百一不
 甘棠之蔭必繫之大
 餘與百一不



跋

癸巳秋余出守端州奉 家大人於官舍凡
 所措施一以 大人昔日之居官為程式得
 暇邀同志偕 大人遊覽星巖頂湖諸勝其
 山陡立峭拔空洞壘瓏觀者輒歎為奇然茲
 雖奇奇於小耳若綿亘千里蘊隆磅礴如臨
 城之太行山并不得以奇名奇斯大矣其形
 勝畧見于 大人重修邑志中余小子幼侍

大人於臨署六七歲時常往來諸山間歷歷猶在目中且憶雲間葉忠節先生之任三楚便道來臨與大人唱和者累月余小子拜謁庭除執猶子禮忠節公辱贈以詩有從來小宋魁天下記取君家政事堂之句今忽忽三十年矣其詩亦錄於志內顧志未刊就迄今悵快因請之大人曰臨邑大人布政施惠所自始也王父復以功德廟食其

地大人重修之志具在盍加校訂而鏤版歸之大人許焉按臨邑志創自明嘉靖中縣尹王公永興其本已不復存繼之者萬曆間縣尹程公鵬搏請邑中喬大中丞公壁星編次之卷首所爲錄舊序也中丞公子恭肅公嘗作邑志補其文孫百一先生又留心往事紀載靡遺大人藉爲藍本復合學博趙孫兩先生之叅訂而始定山川文物民風土

俗無不具詳而要皆本于太行山蘊隆磅礴
之所致則山水之奇孰有奇于太行者乎余
小子校閱三月隨付剗剗於其成也謹識其
始末于卷尾云 曾
康熙五十五年孟夏中憲大夫廣東肇慶府
知府加五級宋志益敬跋



